


АСАД ДИЛМУРОД

# Эндиш



ҚИССАЛАР

Тошкент  
Ўзбекистон ЛКСМ Марказий Комитети  
«Ёш гвардия» нашриёти  
1989

# ГИРИХ



Уста Абдуғаффорға баҳшида  
*Муаллиф*

I

«Одамзод азал-абад бир мададга муҳтоҗлик сезади, у азал-абад кўнглида ва ҳаётида кемтик кўради, жамики истаган нарсасига етишган тақдирда ҳам барибир нимадир камлигидан нолийверади.

Падари бузрук, шукр, камина одамлик шаънини ерга урадиган бу хил нолишлардан ҳарчанд йироқдаман, камина бу ҳол бехосиятлигини аллақачон эътироф этганиман ва хусусан умрим шомида сиздек савоби азимга умтилиб яшамоққа қасд қилдим.

Максадим ягона: оқу қора шундоққина юзага қалқиган бу кунда ўзи ўзидан йироқлашаётган, вужудини рухига бегона қилиб қўяётган, оқибатда, бу дунё учун бебаҳо мерос қолдирган аждодлари имони ва эътиқодидан мункир келаётган жигарларимга саодат они нималигини англатмоқ холос.

Киши олис сафарга чиқса, чиқса-ю, мозий дардини тингламаса, сойи-сувига кўпприк бўладиган унсурларини бир зарбда зеру забар айлаш билан кифояланмай, жами аччиқ-чучугини бўйнидан соқит қилса, минг аттангки, ҳеч қачон манзилига етолмайди.

Энди буни ақли расо башар беш панжадек билади, вужудни рух билан қовуштируммоқ адолатни жаҳолат чангалидан қутқарив қолмоқ билан баробарлигини, аксинча, тириклик суюнчи ҳисобланган бу икки омилни айри тутиш ақлу идрокни камситишга олиб келажагини ҳам яхши билади.

Янглишмасам, падари бузрук, ҳозирча фақат биз гоғилмиз, биз гоғилликка кўниқдик, буни ҳатто фазилатга йўйишимизга озгина қолди. Натижада ўзимиз яшнатган ўрмонга киролмай гангиг туримиз. Во ажабо, биргина қадам ташлаш учун нима етишмайди: журъатми ёки истак? Бу нарсалар бизда йўқми? Ҳеч-да! Азалдан биз кўп имконга эгамиз. Лекин... кўзимиз очиқлиги, қулоғимиз динглигига қарамай аҳли жаҳонни хайратга solaётган неъматларимизни кўрмаймиз, довругимиз гулдуросини эшитмаймиз.

Сиз жон қадар суйган бу ҳалқ узоқ асрлар давомида бир туйғунликни, бир тантлиликни, бир меҳмоннавоз-

ликни (шу одати айниңса бошига битган бало бўлди-ёв!), бир соддаликни, бир гажирликни... феълига синг-дирган; бу эл боласи она қорнидан ингалаб тушгандай ёруғ оламни тугал қиёфада кўргиси келган, у сал тетапоя бўлиб, қадим очунда ўэлидан кечишга арзийдиган мулки муборак барқарорлигига фаҳми етгандан кейин ўзи ҳам бирор арзигулик нарса яратиш ғамини еган. У наслидан ўтган эзгу меросдан то кўзи юмилгунга қадар ғурурланни эплаган. Энди-чи, падари бузрук?

Эгам қўнглимга тоза ният солди: бир вақтлар чарх зарби орқасида тугатиб улгуролмаган юмушингизни баҳоли қудрат уddyаламоққа аҳдландим. Аждодларимиз нозик дид билан қурган Тиллакори мадрасаси гумбази ичкарисини таъмирлаш ҳоҳиши ором бермай қўйди. Бу вазифаи муддао ибтидоси таваллуд топмоқ, интиҳоси фазли камол эрур!

Жоним омон экан, сиздек пири комил ёди ҳамроҳим экан фазлу камол сари талниноқдан чўчимайман. Ўртада имонимни тиқдим! Фақат, ҳайҳотки, камина тилағини аллакимлар эрмак қилмоқчи бўладилар, аллакимлар иштаҳам тортмайдиган ошни нафасимни қайтаргудек даражада ошатмоқ пайдалар, яъни обида қиёфасига на бир чизиги, на бир мазмуни мос тарҳни пеша айлаб, бошимни ғалвага кўмаётирлар.

Шукр, умид ва далил камина тарафида, булар рагбатимга рағбат қўшади, қачонлардир сиздан ёнитганим бир аъло ҳикматни ёдимга туширади. Ўша ҳикмат будир: «Жоҳил меҳрини тикан қилиб санчгай, оқил қаҳрини гул қилиб тутгай!..»

Ноумид шайтондир. Алҳол қайишиб турган имконни бой бериш густоҳлик: эрта-индин ноил бўладиган савобни, одамзод кечмишидан узилмай яшагандагина ўэлигини таниши мумкинлигини ҳамиша эслатиб турадиган хунар ҳақи, сиздек муҳтарам зот арвоҳига камоли эҳтиром билан бағишлайман. Бир умр ўзини сизга шогирд санагувчи ўғлингизни қўллагайсиз, бузрукворим!..»

Отамерос ҳовли ўртасидаги ёғочлари нақшинкор шинам шийпончада уста Шамсиддин чўк тушган: туриш-турмиши залвар, вазмин, боқиши жиддий, фариштали чехрасида сокин бир хомушлик аксланади. Мияси алланечук нурли, қизишиб боради, кўпдан тайинлитайинсиз ташвишга қўмилгани боис у яқин-орада падари билан бу қадар қуюниб, бу қадар хайрҳоҳ хаёлий

мулоқотга киришмаган эди. Ҳамиша у падарини ёдлаганда вужудини тараңг қарздорлик ҳисси чулғайды. Сабабки, падари арвоҳини шод қилмоқни кўпдан кўнглига туккан, лекин бу эзгу армони ҳадеганда ушалмай. оқибат, ўзича эзилиб, ёр-ошносидан панараб, аламзада бир одам ҳолига тушган эди. Ҳозир шу ниятини тагин дилидан кечиравкан, хомушлиги ортди, беихтиёр шивирлади: «Бир умр ўзини сизга шогирд санагувчи ўғлингизни қўллагайсиз, бузрукворим!..»

Қачонлардир ичиди оғир тош каби ўрнашган ранжга кўпам изн бермаслиқ учун уста Шамсиддин ўзини атай чалгитишга уринди. Бир овунч изларкан, ажабки, ҳалиги сўзлар шуурининг аллақайси сокин бурчидаги тинимсиз жаранглаб акс-садо бераверди. Бу ҳолдан қисинди. лоҳаслангандек бўлди, белос кўёз ўнгидан яна отаси сиймоси ўтиб, енгиллик туйди, иштиёқ билан теварагига аланглади: ҳовлини субҳи-содик файзи, салқин ва ифопри ҳавоси тутган эди.

Ҳовли-жой раҳматли отаси уста йўамииддиндан ҳам арзигулик мерос, ҳам тенги топилмас ажойиб ёдгорлик эди. Сўлим манзара қашф этган бу маскандаги неки бўлса бари — дарвозадан кираверишда тўшалгали пишиқ гиштдан тортиб то иморат буржларида ўрнатилган ёғоч тарновларгача жонини жабборга бериб яшаган, умр бўйи яхшилигу ёмонлик ўртасида адл турган отаси сиймоси ва серҳаракат қўлларини эслатар эди. Иморат беҳад кўркам ва шинам қурилган бўлиб, бирор жойида сакталиқ ва ортиқчалиқ сезилмас, болохонали дарвоза, устунларига кўзаги нақшлар ўйилган айвон, боғоди эшикли меҳмонхона, дахлиз, ичкари хоналарда адо этилган ганчкорлик меҳрибон кишиси диду фаросатда бена-зир бўлганидан далолат берар эди.

Эндиликда иморатларга бетакрор безаклар солиши одати барбод еганини, тирикчилик важи ва енгил-елпи ҳавас туфайли қолипбозлик авж олаётганини ўйларкан уста шийпонча теварагида қийгос очилган оч пушти, оч сарик, қирмизи атиргул ҳамда мунис бир алфозда солланиб турган тўқ нопормон баргли райҳонга паришон-ҳол тикилди.

Хаёт шунаقا экан: бу хандон атиргул, бу масрур район ўша некбин, ўша ғамгин кунларда ҳам ҳозиргидек яйраб-яшнаб ўсар, жимжитлик аримайдиган кенггина ҳовли шукуҳига шукуҳ қўшар эди. Азалдан сабзаю разно, сарву сунбул гуркираган жойда ҳузурдан энтикиб

кетадиган отаси ҳовли бойлигини худди жонидай аспар эди. Ҳатто ишдан олдин — таъмирга киришаёттанды қулогига бир тутам райхон қистириб қўяр, сўнг мароқ билан қуларди: «Ўғлим, эгам райхонни хўп донолик билан яратган, — дерди кейин. — Жаннатдаги етти боғда ўсадиган етти хил гул ранги ва исидан чимдим-чимдим олиб қўшгану уни бино қилган. Райхон ҳиди димоғинга уриб турса ҳаракатингда баракат бўлади!»

Бу гапни отасидан илк бор эшитганда у эндигина тўққизга тўлганди, эҳтимол, шу сабаб райхон нима учун бу қадар сеҳрли эканлиги боисини англамади. Барини кейин билди, мўйлаби сабза уриб, суяги қотиб, таъмир оламига шўнгигб фахмладики, отаси фақат нуктадонлигини ошкоралаш учун эмас, кўпроқ унинг эртасига қайғургани учун шу хил нозик маъноларга ишоралар бераркан...

Ҳа, шунақа, бу сўлим ҳовли-жой, бу хандон атиргул, бу масрур райхон илгари — отаси тириклигига ҳам худди шундай атрофни хуш бўйларга тўлдириб, шийпонча шукуҳи билан ҳамрозу ҳамнафас тарзда очилиб-сочилиб ётар эди.

Нетонг, жаннатдан эгам бандаларига тухфа айлаб юборган бу рангин неъматлар кўхна обидалар қатори ҳаёт ҳам, тириклилик ҳам фано ва бақо қонуниятларига тобелигини мунтазам әслатаверади. Бу ҳол шаксиз табиатан инжиқ инсонни малол гирдобига иргитади; инжиқлик билан баробар ожизликка мойил инсон буни маломат ва тазийқанглаб талвасага тушади. Нима қилсин, у яратмоқчи бўлган нарсасини яратсинми ёки пайдар-пай ёғилган зугумиятдан қочиб, узлатга чекинганча, тўрт кунлик умрини бегамгина кечирсинми!? Жавоб кошки осон бўлса, хайриятки, инсонни аросат ваҳми қарийб енгиб, тавбасига таянтираёзганда савобга и н т и ли ш туйгуси жўшиб кўмакка келади, дилидаги муваққат гумонларни қувлади. Бундан рагбатланган инсон икир-чикирларни янчиб ўтади, шу қадар тошадики, энди уни на фанода насиб этиши мумкин бўлган сохта шуҳрат маломати, на бақо тилсимоти ҳақидаги бир-биридан қўрқинчли тушунчалар чўчита олади.

Раҳматли отаси ҳам, янглишмаса, гойибона қудрат исканжасига кўп бора тушган, ҳар сафар уни чилпарчин қилиб ташлайверган, во даригки, шундай одам, ма-на, энди орада йўқ, абадийлик йўриги ва маслагини қа-

дам-бақадам эслатган, яшаш қадри ва лаззатини фақат зэгу нарсаларда күрган зот қачонлардир ҳаммасини сабил қолдириб кетган...

Тирикликни зап қадрлайдиган отаси тамал тоши ер юзидағи жами шаҳарларниңидан аввалроқ қўйилган Сармарқанд (бу гапни раҳматли мунтазам ёд этарди) турорғидан атиги бирор лаҳза айри тушишни ҳатто тасаввур қиломасди. Қаттол тақдир чаппасига олиб худди шу хислати билан ўчакиши: шўрликни дарбадар қилди. Бари бир у меҳрини замонлар тийғу бўрони билан олиша-олиша толиққан кўпгина обидалар жароҳатига малҳам қилиб босишга улгурди, ҳаанча-мунча улгурди. Кейин эса тўсатдан мангалик маконига жўнади. Уни — ҳали ёруғ дунё билан тўла чиқишолмаган, оқу қорани тузукли танимаган, аччик-чучук нималигини унча билмаган ўғлини доғда қолдириб кетди.

Тўгри, ўшанда у йигирма бешни қораловди, қаддиқоматини роса қўйворган, соқол-мурт афти-ангорини тиканак каби босган, борингки, савлати отни хуркитадиган сириқдек йигит эди. Мияси ақлга, вужуди қучгайратга тўла бўлса-да, фўрлиги бор эди, фўрлиги!

Мана, вақт нақадар учаркан, ўзини ёруғ оламга келтирган оқил қиблагоҳини, идрокини пешлаб, қўлини ўнглаган мурувватли устозини тупроққа қўйгани, жудолик аламини ютиб келаётганига қирқ беш йилдан ошибди. Бу кўргулик туфайли узоқ саросар юрган, қаддини қайта тиклаб олгунга қадар неча бор қоқилган уста Шамсиддиннинг ўзи мана энди етмиш остонасида қўртўкиби.

Тавба, орадан яхшими-ёмонми шунча вақт кечибди, хўш, у қорни тўқлиги, усти бутлигига шукронга айтиб шунчаки тириклик қилдими ёки ота пандига суюнганча тиришиб-тирмашиб яшаш пайида бўлдими?! Уста бўлакча фахр туйди, кейин ўзини койиди. Керилиб қайга борарди. Ҳукм эгамдан, қолаверса, улусдан. Ўртада андиша бор-а! Кейин, билади, устози — падари шуҳрат изидан юрмади, аксинча, шуҳратнинг ўзи уни қувди. Шуқр, у ҳам шуни ният қилган, тоабад пақирлик нашидасини татимоққа қаедланган. Фақат ўғли Гайбиддин ёки шогирди Расул Усмон бу бобдаги маслагини қандоғ ҳазм қиларкин?

Омон бўлгур Гайбиддин гажирроқ чиқди. Таъмир соҳасида ёки бошқа бирор чигилни ечишда айтганини қилдирмагунча тинчимайди. Ҳатто баъзан устага ҳам

ён бермайди. Уйда эса оғзига талқон солиб олади. Ичидан ҳар битта гапни илмоқ билан тортиб чиқаришга түгри келади. Гоҳо хитланиб кетадиган уста буни ўзича тушунади, ҳалигача суюнчиғи оёгини чатиб қўймагани учун ўқинади. Асли ўзи ва кампири айбдор, бу гўр бола лақиллатишига учиниб юрганча, шартта бирорини унаштириб қўйишса олам гулистон эди-ку!

Кампири Муслима хонтахта қуйироғида жимгина ўтириб, хиёл заҳил чехрасида дилкаш аёлларга хос бир беозорлик зоҳир айлаб, чой қайтара бошлагандага уста ҳам гаш, ҳам масрур эди.

Иzzат-икромни жойига қўядиган кампири хушсуханлик билан дастурхонга ундан, пахта гулли бежирим пиёлада дам еган аччиққина кўк чой қуйиб узатаркан устанинг қорамтири магизли чўзинқи юзига табассум югурди, у яккам-дуккам оқ оралаган калта соқолини силади. Шу асно ҳануз сукут сақлаётган кампирига зимдан қаради, ҳали ўзини койиган бўлса-да, бу тикилишида алланечук ҳаволаниш аломати бордек эди; ногоҳ буни туийб ўнгайсизланди.

Эсида, раҳматли отаси қачонлардир, ҳаволаниш — иллат, у ҳушёрликдан маҳрум ҳунарлини хўрлайди, ахийри эл ичидан юрувсиз қиласди, дея башорат айлаган эди.

Уста синиқ қулимсиради, ота ёдидан бағри илиди, зеро тагин шу эсидаки, бузруквори қанча камсуқум бўлса шунча қаттиққўл ҳам эди. Айрим феъли тор, нафси бузуқ усталар избосарларини тузукли нарса ўргатмай бир-икки йил ичидәёқ паноҳидан қувларди. Бу бобда падари бошқача йўл тутарди. Энг истеъододли шогирдини ҳам то ҳунарини илидан-игнасигача эгалламагунча, чангалидан бўшатмасди. Одатига кўра Шамсиддин босига ҳам шундай савдо солди. Илму амал бобида у неча бор синовдан ўтгандан кейингина оқ фотиҳа бергани — мустақилликка узатгани чоғланди.

Масъуд кунларнинг бирида юртни ошга чорлади.

— Жамоа, кўряпсизми, — сиртига майдагул туширилган бежирим тешани юқорига кўтараркан отаси гурнгни қиздираётган усталарга дўриллаб мурожаат қилиди. — Ушбуни падарим еттинчи меросхўр бўлиб олган, мен саккизинчи эдим, — деркан отаси илкис унга ўғирилди. — Энди, сен, ўғлим, тўққизинчисан. Ёшим шу ерга етиб уни камситмадим. Сендан ҳам умидим шу! Тириклигимда-ку уни хўрлагани қўймайман, мабодо

кетимда тоядиган бўлсанг, гўримда тикка тураман!

Ўша тобда падари меҳрибони, кўзлари жиққа ёшга тўлганча, аста келиб лагча чўғдек ёнаётган жуссасини бағрига анча муддат босиб тургани, оллодан узоқ умр, пок имон, сабр-тоқат, хотиржамлик тилагани ҳали-ҳали хотиридан ўчмайди. Жонига ёқиб қолган ҳалиги сўзларри ҳам унуполмайди. Лекин, уста Шамсиддин, хом сут эмган банда, гоҳо бу дуолар қадрига бормайди. Нима бўлганда ҳам ўз билганидан қолгиси келмайди. Феъли тор-да, феъли тор, унга қўпинча шу нарса касри уради, обида деса жонини ҳам аямайди, рўзгор кам-кўстини бут килишга қолганда эса ими-жим! Коса чўмичга урилганда, яъни жонига зўр келганда заҳрини нуқул мана шу мушфиқ ожизага сочади.

Ногаҳон қалашиб келган кесатиқлар тиг бўлиб қўқини тилди, жони оғриб жавдиради, қийноқларини хотини сезиб изза қилишидан чўчигандек, тезгина чехрасига хотиржамлик тусини берди.

— Гайбиддин қани? — деди ниҳоят жимликни бузаб.

— Қаёқдан билай, — деди Муслима совуққина, — ўзингизга ўхшаб дум тутқизмайди.

— Бирор ташвиши бордир-да.

— Бирам талмовсирайсиз-эй, — жўрттага қовогини уйди Муслима. — Болагинани рангини сомон қилдингиз.

— Яшавор, кампиржон, яшавор! — пиқирлаб кулади уста. — Неча кундан бери қулогум тинчиганига ҳайрон эдим.

— Шу болагинага раҳм қилинг.

— Бўпти, — уста дастрўмоли билан ёшланган қўзларини артди. — Эртадан тагига етти қават қўрпача тўшаб бер, роҳатини қилиб ётсин. Қолганига ўзим балогардон.

— Сизни пичингга қўйса.

— Пичинг эмас, тўғриси шу, энди негадир уста кампиридан нигоҳини олиб қочди. — Ана, икки ўғлинг, иссиқ жойини топиб кетди, бир нима дедимми, йўқ, демадим, лекин ўз ўйригимдан ҳам қолмадим. Майли, бунисигаям розиман, фақат ўзи танасига ўйлаб қўрсин.

— Менга мунақа дейсиз, — минғирлади Муслима, — нарёққа ўтиб... болагинани аврайсиз.

— Тилим бесуяқ деб бижиллайверма, — кампирини силтаб ташлади уста. — Авраб эсимни еганим йўқ.

нима қилган бўлса ўзи ўз ақли билан қилиб келди. Ўргилдим сендақа тарафкашдан!

- Бўлди, дадаси, тавба қиппан.
- Тавба қиласан-да.
- Менам аҳмоқ, била туриб сизга ёриламан.
- Менга нима қинти?
- Сизгами? А-ай, қўйинг! — жиндай сукут сақлағандан кейин Муслима бидирлади. — Сизни ундаи ҳам, бундай ҳам дёйлмайман. Ғалатисиз. Гайбиниям жинни қилаёздингиз. Бир ёқда ўқиши чала... Анови найнов Рашул ҳам ўзингизга ўхшаган. Иложини топса кечасиям кошин ўлгурни бошига ёстиқ қилиб ётса!

— Нима, ёмонми? — илжайди уста.

— Нима, яхшими? — чолини узиб олди Муслима. — Э-э, сизми, сиз... ёши бир жойга етсаям қуйинки китоб устида мук тушиб, мотам тутиб ўтирадиган сиздай боламижоз одамдан нима умид?!.

— Ичинг тўла ҳасрат экан-ку!

Чамаси, уста ҳазил отмоқчи эди, мўлжалга тегизолмади. Тошиб кетган кампирни нимага шама қилганини анлагандан кейин хурпайди. Қоврилаётган бўлса ҳам анчагача чурқ этмади, ниҳоят, секин бошини кўтарди, дилида потирлаётган сўзлар нигоҳига кўчди: «Онаси, жон онаси, бундай қаттиқ кетмагин. Мендан эмас, эгамдан умид қилгин, токи сени ўз инояти билан сийласин. Билсанг, онажониси, камина китоб устида мук тушиб мотам тутганим, асли бу — кечмишда ўз юрагимни, соддадил улус юрагини ўпириб кетган кунларга аза очганим! Эҳтимол, бу — ожизлик, лекин майли, шундоқлигимча қоламан, сен хоҳлабсанми, буни бетимга соловер! Иложим қанча, камина ўсмирилигимда бир дард юқтирганман, бу дард кошки бу кунда енгиллашса!»

Арзимаган учиригидан чоли ночор қиёфа олганини кўрган Муслима суратланди, эски ашуласини бошлагани етмай ичкари хонадаги жигарранг жавонлардан бирида терилган, бандасига сариқ чақачалик нафи тегиши гумон йиртиқ-тиртиқ китобларни (чоли шуларга топингани учун хуноб) эслатиб бекор қилганини сезди.

Уста тўнгичи ва ўртанчасига орқаворотдан гоҳо ҳалигидай тош отиб қўяр эди; азбаройи қуйганидан шундай гуноҳга жазм этарди. Инсофни ўртага тикиб айтганда эса Муслима ярамагурларни отага қайиштириш учун пинхона кўп талашди. Натижә аксинча бўлди: Аслидин билан Қиёмиддин игна билан қудуқ қазимоқдан

ҳам оғир юмушдан эслари борида воз кечиши. Дастрлаб уста хотинидан хафаланди, барини билиб турса-да, шўрлик Муслимани айбситди, таънага кўмди.

Раҳматли отаси бу борада ҳам лутф қилганди: бу ҳунар шунақаки, мажбурлаганинг билан бирор сую олмайди, укувли кимса эса хоҳиш ва эҳтиёж тақозоси билан унга қаттиқ меҳр боғлайдиким, ҳеч бир куч шаштини бўғолмайди.

Кейинча мана шу ақида билан овунди.

Омади чопгани шу: кенжаси акаларига тортмади.

— Онаси, Гайбини ўз ҳолига қўйгин, — деди уста хаёлдан бўшаб. — Ўғлинг меров эмас, ўз ишини ўзи билуб қилишини боя айтдим. Бўёгини сўрасанг, у энди очилаяпти, бобоси арвоҳи қўлласа, тузимизни оқлади. Қаттиқ гапирганимга хафа бўлмагин.

— Э, дадаси, — деди Муслима сал тетиклашиб, — сиздан хафа бўлиб нимаям тонардим?

— Ҳа, баракалла, — деркан устанинг йирик-йирик бўртиқ кўзлари ёнди. — Сен ўзи яхвисан-да, кампиржон, хафа бўлишни билмайсан. Аммо, рости, каминага Гайбини туғиб берганинг учун сени кафтимда кўтариб юришим керак. Агар у ёнимда бўлмаса ҳолимга маймунлар йиглаши тайин. Ишонасанми?

— Ишонмай ўлайми.

— Унда ҳалигидай суюлма-да, кампиржон!

— Хўп, ҷолjon, — қулимсиради Муслима. Лекин, дадаси, ўз этинг бўлгандан кейин юриш-туришига қарамасанг бўлмас экан-да.

— Аёл зотининг биттаю битта дарди — бола.

— Шу... анови китобларни нима балоси бор?

— Нимайди? — илкис ўгирилди уста.

— Гайбиддин нуқул ўшаларга ўралашади, — Муслима дастурхон пошугини чимчилогига ўради. — Кечалари хонасида чироқ ўчмайди. Ов, бола, домлаларинг берганини ўқи, эрта бу дардисарларни сўрамас, десам, яна миқ этмай ўшаларга ёпишади.

— Алжирама! — деб уста ўқрайди. — Индама, домлалариники ёнида ўшаларниям ўқисин. Нима, мен унга аҳмоқ бўлиб ҳарф танитибманми? Арабча билан форсчани бекорга ўргатибманми?

— Ҳар нарса эвида бўлгани яхши, — паст тушмади Муслима, — ўзи итдай ҷарчаб қелади, туз тотинмай...

— Бўлди, бас, — кампир иштаганни кесди уста. — Қийналмаган бандада бандами? Элга жони ачиған одам

аввало кечмишини билиши керак. Э-э, қўй, сен бу гапларни қаёқдан ҳам тушунардинг.

Маъюслашган нигоҳи билан Муслима ер чизди, сўнг чолига қарагани ботинмай бўшаган чойнакни олиб қўзгалди, иссиқ чой дамлаб келиш баҳонасида ошхона сари пилдираб юрди.

Ёлгиз қолиши билан уста бошқача бир гашликка ботди, аёл барибир аёллигига боради, ҳар қанақа ўқтами ҳам ўқсик келади, учиригимдан инжилмадимикин, деб мулаҳаза қилди.

Кейин ёнбошлаган ҳолда иморат пешайвонини завқланиб кузатди ва беихтиёр ичкари хонадаги эски риссолалар жойлаштирилган жигарранг жавонни, кун бўйи устахона ва метьморлик институти ташвишига қўмилиб, тун бўйи беадог мутолаага берилиб толиқдан Ғайбиддинни хаёлида гавдалантириди.

Асли кампири жаврамаса ҳам ўғли ҳуши-фикрини ҳалиги жавонга боғлаганидан воқиф эди. Бу қунда хонадонини зийнатлаган бир бойламгина нарса (улкан ҳазина қачонлардир йўқлик комига тушганини Муслимага қандоқ айтади ёки айтгани билан буни Муслима қандоқ тушунади?) эътибор қилгани унча арзимайди. Майли. эҳтимол чиндан ҳам шундайдир, лекин муҳими — шу нарса борлиги, тагин ҳам муҳими — шу нарса маҳзун кунларини эслатиб-эслатиб қўяётгани, қўксисда тош каби қотган армонни қўзғаб-қўзғаб қўяётгани, энди қўзингни каттароқ оч, дея сергаклика чорлаётгани!..

Қаттол экан чарх: огир-енгилни бирдек ўтказаве-раркан! Во ажабо, хоҳ азоб, хоҳ роҳат бўлсин, хоҳ зуғум, хоҳ муруват бўлсин, бир хилда изсиз йўқотаве-раркан! Ана шу йўсинга қараб одамзод ҳам ҳар нарсага чидашга мажбур — ахийри, шу нашъа қиладики, тагин тирикчилик билан овунади. Назарида, ўша кунлар нари-берисида осмон узилиб тушгандек, бутун жонзодни бо-сиб қолгудек, келасига олиб борадиган бутун тешик-тир-киш тамом ёпилгандек бир ҳол юзага қелган эди, ишқи-либ, одамзодни қуюн каби чирпирак қилиб юборадиган бир кулфатни жон ҳовучлаб кутган эди. Лекин ҳеч нарса рўй бермади. Ҳаммаси аввалгидек бир маромда давом этаверди, ҳаммаси ҳаш-паш дегунча унугтилди.

Фақат у ҳеч нарсани унутмади, унугтилди, чорасиз-лик авж нуқтасига қўтарилиган кунлардан борлигини зилзилага соладиган ваҳима билан залвар хотира қолди. Жиндай фахр ҳам қолганини яширмайди: ахир мана шу

бир бойламгинани қутқарыб қолиш учун жонини гаров-га тикмадими? Эзилган тани қултұдага аралашып кетишидан чүчимади, «шляпалилар», деб ном олган ва күпинча зимзиә қоронғыда изғиб юрадиган кишилар гири-бонидан тутиб олиб кетишидан чүчимади. Ҳолбуки, у бир марта ўшалар chanгалига тушган, бел баравар совуқ сув тұлғазилған бетон ертұла нималигини яхши биларди. Бари бир құрқмади, хоҳлаганини қилди. Ох, у култұда! Юраклар қиймаланған ўша лаҳзада замин ўзи култұдадан иборат бўлиб туюлмаганмиди? Кейин билса, қўрни титкилаб топгани — Абу Наср ал-Фаробийнинг «Иҳсо ал-улум» рисоласи, Ҳазрати Алишер Навоий билан Мавлоно Лутфий девонлари, Мирзо Улуғбек замонасида яшаган қайсиидир муннажжим-олимнинг математика ва ҳандасага доир мажмуаси экан; қолган ўн беш-йигирматаси муаллифларини аниқлаш иложи бўлмади.

Чарх бир айланиб олгандан кейингина у отаси уста Жамшиддин билан етаклашиб зўр-базўр кутқарилған митти хазина беркитилған жойга яқинлашишга журъят этди.

Кунлардан бир кун уста жавондан Мир Алишер Навоий девонини олиб, куйган жилдларини силаб, ғазал адоси бўлиб кўз намлаб ўтирганда (Муслима бекор кесатмади) Файбиддин кириб салом берди. Шубҳасиз отаси Ҳазратга бу қадар чуқур меҳр боғлаганини у билмас эди, шу сабаб отаси мумдек эриётганига ажабланди, бўсағада пича маъюс тургач, аста изига бурилди.

Чамаси, ўша фурсатда Файбиддин отаси дарди-кувончи мана шу мўъжаз жавондан, шу жавон қабатларида жамланған ажип дунёдан бошланажагини тўласинча тушуниб етган эди.

Атиги бир лаҳза ичида тамоман ўзгарди, гўё сехрланди, рангин оламнинг ҳали нигоҳи тушмаган нуқтасини илкис кашф этди. Бутун инон-ихтиёрини товланиб кўрина бошлаган шу нуқтага топширганча остонаядан аста узиларкан, отаси босинқи товуш билан чақирди. Тўғриси, у ичкари киргани анча муддат ботинмади, тагин ўқтам чорловни эшитгандан кейин секин жилди.

Во ажабо, нима, шу кун уста ўзини аршу аълога яқин олган кун эдими? Ёки Улуғ сўз пайғамбар янглиғ унинг баъзан гулдек нозик, баъзан тошдек қаттиқ дийдаи ломаконини муруват ва хуштавозелик ҳисси билан тўлдирган эдими? Хулласки, яхши тиляқ, пок муноса-

батни ўзича қадрлай оладиган Ғайбиддин кирганды у, қаршисида мўътабар девон, тамом эриб битаёзган эди. Тағин Ҳазратдан қироат билан ўқиди, сўнг мулоҳазага чўмди, паришон алфозда жавондан баҳмал муқовали бир рисола олиб узатди, сўйланди: мана, ўғлим, қош-қобоғингга сур, «Қирқ ривоят» отлиғ маънилар жамламаси...

Ғайбиддин хайрон: бу қайдан пайдо бўлди?

Тахминан ўн кунча бурун устани ёши ўтиб мункиллаб қолган бир кўса мўйсафид сўроқлаб келди. Рости, уста уни танимади, меҳмон ўзини танитгач, кўзидан ёш тирқиради, анчагача унинг бир ҳовуч бўлиб қолган жусасини бағридан бўшатмади. У қачонлардир отаси сўйган шогирдлардан Қодирбек эди.

Эсида, бир кун отаси ошналари ва шогирдларини ҳовлисига йиғди, уларга дардини айтди, яъни кечагина анҳордан қутқазиб олинган рисолаларни уларга ташитди. Ҳаммадан кейин келган Қодирбек ҳам ўшандада битта халта орқалаб кетган эди, шуни қўшниси кўрган экан, эрталаб бориб чақма-чақарлик қилибди. Уйидан ҳеч вақо топишолмаган, шундай бўлса ҳам... у ёги Сибирь, қаҳратон нафасидан бўлак нарса ўтолмайдиган қалъя! Шўрлик шақирлаган суюк бўлиб қайтган, лекин Самарқанддан юз ўтирган, аниқроги, тагин бирори сотиб қўйишидан чўчиб, Туркистонга қўнган, ўша ерда уйланган...

Кейинча Қодирбек ёр-ошна тарафидан Афросиёб кунчиқарида қазилган горда кўмилган китобларни эслабди, тақдир кўргилигидан эрта-кеч ўртанаверибди. Охири, тўридан гўри яқинлигини сезгач, бола-чақасидан ижозат олиб, сафарга отланибди. Мақсади — кўммани биттама-битта айтиш, ноёб рисолаларни ёруғ дунёга чиқариш, киндик қони томган шаҳарни зиёрат қилиш экан...

Кўумма топилди, лекин, топилмагани авло эди. Қодирбек хабари кўп шов-шувга сабаб бўлди. Чор тарафдан билагонлар йигилди. Сўнг ғор оғзини ҳовлиқиб очишли, не кўз билан кўришсинки, ҳаво етишмагани сабабли не-не бебаҳо қўллэзмалар идраб кетибди. Шундог қўл тегизишилари билан жамиси куқун бўлиб тўкилди. Тошкандан Ҳамид Сулаймон деган олим бор эди, ёши ўтинқираған шу кап-катта одам беному нишон кетган Улуғ сўз тепасида бўзлади: тарихимиз бошига етган касофатларни бугун бўлмаса эртага туз кўр қилгай! Олимлар умид узиб кетишиди, уста ҳам ўртанганча Қодирбек билан

қўлтиқлашиб жўнади. Хайрлашув чоги, Чимкент автобусига минаётиб, Қодирбек қўйнидан баҳмал жилдли нарса чиқарди. Ушбуни олинг, сизга эсдалик қолсин, деди. Сўнгра, падарингиз билан сизни тиқишиган жойда камина ҳам бўлғанман, белгача сув килкиллаб турган симонка ертўлага солғанларида, нарвонсимон темир устига юзтубан ётқизиб дарра билан яланғоч елкамга савалаганларида ушбу рисола чопоним астари ичидаги бўлак-бўлак қилиб беркитилган эди, дегандагуни қайта бағрига босмоқдан уста тийиломмади.

Отаси шуларни сўзлаётгандаги Гайбиддин шуурини нимадир симиллатиб ўтди, туйқус англадики, бу кўксинда анчадан бери туғилиб ётган, ҳар замонда тўфондек кўтарилиб, гирдобдек жунбишга келиб қўядиган, яқин кечмишда кўз билан кўриб, қўл билан тутиб бўлмайдиган ваъда, даъват ва ўтрик туфайли яралган аччиқ хотимага қаратилган беҳудуд нафрат эди. Ажаб, бу нафрат фақат кўксисида эмас, бутун тасаввури, бутун хаёли, ўй-фикри, бутун ташвиши-интилишида, бутун тилагида, борингки, ҳар бир ҳужайрасида яшаётгандек эди.

Бағри тўлиқиб кетган йигит ўша кеча мижжана қоқмади, бениҳоя бёжирим ва майда настълиқ хати билан тўлдирилган саҳифалардан то азонгача нигоҳ узмади, аzonда пича мизғиди, сўнг бехос уйғониб, апил-тапил ювинди-да, отаси ҳузурига саломга чиқди. Бафуржা чой ҳўплаётган уста алиқни қуюқ қилди, индамай ўтириди, унинг уйқусизликдан қўпчиган юзи-қовогига зимдан назар солди. Гайбиддин билдики, отаси маъни кутмоқда, дангалроқ бўлишим керак, деди ичидаги дангалига ўтди: «Дада, тугатдим, ҳар бири нафис дур, фаҳми ожизимча, ҳаммасидан нафисроғи «Икки наққош» экан, каминани ўлашга кўпроқ мажбур қилди!»

Эсида, ўша заҳотиёқ уста ўғли диди, фаросати ва ақлига яна тан берди, у зукколик билан ривоят магзини чақиб берганда ҳазор бора оғарин айтди. Қизиги, «Қирқ ривоят» қўлига тушгандан кейин Гайбиддин зеҳни тағин ҳам тоблангандек бўлди, у бошқа қўллэзмаларга ҳам шу қадар шўнгиб кетдики, бундан бир завқланган, бир ҳайратланган уста унга фақат сабру тоқат тилади.

Нафсиамбри, келиб-кетувчиларни хала-хулада жалб этмайдиган жавонда авайлаб териб қўйилган кўхна рисолалар ичидаги Ҳазрат девони ва «Қирқ ривоят»дан бўлак яна бири бебаҳо ва табаррук саналарди. Бу ал-Фаробийнинг «Иҳсо ал-улум»и бўлиб, зуккотаъб муаллиф

унда меъморлик илму амалини санъат билан баробар-лаштириш йўригидан баҳслашардики, шу асосли маънини ўғли аллақачон ўзлаштириб олган эди.

Даврига хос мураккаблиги бўлган рисоладан панд ёки фикр ўзлаштириш осон эмасди, шу боис бу мушкулотни ота-бала бақамти ечишди ва таъмирда тарху амалини қовуштироқ учун улуғ қоидаларига бот-бот мурожаат қилишди.

Имони комилки, бу кунда Гайбиддин, етук уста бўлмаса-да, юртда таъмир аҳволи қай даражадалигини анча пухта билади, шогирдлар тугул усталар ҳам қўхна ҳунар илму амалидан тўла воқиф эмаслигини армон билан ўқиниб гапиради. Гоҳо бундай ҳол юзага келиши сабаби устида баҳс ҳам қиласди. Аччиқ таъналарини эшитганда уста, шундоқ ҳам хотиралар чангалида эмасми, яраси баттар тирналиб азобланади.

Қўйингки, уста ўғли Файбиддиндан мингдан-минг рози, бошқа шогирдларидан нимаси биландир ажralиб турадиган кенжаси қобилиятига ҳам, событлигига ҳам астойдил ишонади, шундай экан, нечун сўймасин, нечун этагига ёпишмасин!?.

Сал кам қирқ йиллик ҳамроҳи — Муслима нима бўлганда ҳам буни тушунмоги керак. Агар тушунмаса ёки тушунишни истамаса, иложи қанча, пешонасидан кўради. Энди у Файбиддинсиз яримта, Файбиддин шунчаки дастёри ёки кўмакчиси эмас, — жони, хаёти, умиди! Мабодо қазоси етиб қоронғи гўрига думалаб кетса эрта шу ҳақиқий меросхўри бўлади, шу чирогини ўчирмайди. Сўнгра унинг болалари орасидан ҳам бирори тўшини яланг қилиб майдонга тушар-да!..

## II

Уста катта савобдан умидвор...

Лекин, ростини айтганда, бу кун жуда йироқлигини, олдида не-не савдолар турганини сал-пал тасаввур қиларкан, кайфи буткул учади, бир оғриқ билан қоришиқ гашлик борлигини чирмайди.

Афтидан у ҳар қадамда рўпарасидан чиқиб қолиши мумкин бўлган аллақандай таҳдиддан чўчиди. Асли чўчиғанича ҳам бор-да! Чархи буқаламун неча марта жонини қилга илди ва ҳар гал имони бутунлигига ўзи кафил ўтди. Энди шаксиз кўп нарсага хотиралари кафил, яхши-ёмонга бирдек чидаган, катта-кичикка бирдек муомала қилган раҳматли падари ёди кафил! Ноли-

моқчи эмас, бироқ ростини айтмаса ҳам бўлмас: тақдир уни сира аямади, сира! Шунчаси етмагандек, тагин уни бир довдиратмоқчи: қаёқдантир қуриб кетгур анови Маъруф Афзаловични кўндаланг қилди. Қариганида шуна-қа ҳамроҳ топилиб қолди. У валломат ҳам, энди менга мутесан, жиловингни қўйвориб бўпман, деган маънода кўз ўйнатиб турибди. Э, йўқ, кимсан уста Жамшиддиндай мухтарам зот зуриёди — мисқоллаб обрў йиққан уста Шамсиддин келиб-келиб энди, ёши бир жойга етганда, йўриғидан тоядими? Ҳали уста Шамсиддин эсини егани йўқ, ўша Маъруф Афзалович чучварани хом санабди, ана, керак бўлса ишини олсин, кўшкўллаб топширади. Бироқ жиндай ҳам паст кетмайди, отамерос ҳунарини хўрлатмайди. Шу ҳунар деб бутун умр озор чекди, уриниб-суринди, нима қилганда ҳам падари арвоҳини чирқиратмади.

Пушти камаридан бўлган ўғли — Файбиддин ақли идрокини ҳам ўзига азиз нарсалар билан пешлади, ноzik навда эди ўғли, хохлаган тарафига эгди. Энди бу кунда ҳунари тақдирига қанчалар қайғурса, ишонган боги, суюнган тоғи — Файбиддин тақдирига ҳам шунчалар қайғуради.

Ана буниисига нима десин: у кеча-кундуз не андухда, бу ёқда дунё тургунча тургур кампири не кўйда — бир амаллаб Файбиддинни чўнтақка ҳемири туширмаса ҳам даҳмаза-дўмбираси кўкни титратадиган қилвириқ ҳунардан (ўзи тўқиган ибора) четлаштириш пайида. Ҳар қалай ҳалигидай талмовсирашлари тагида бир илинж-иддао ётиби. Асли у шунақа, дарди қўзиғанда кўпам жиги-бийрон бўлмайди, гуриллаб ёнмайди, аксинча, ҳалимдай эшилади, билдирмайгина чимчилаб олади. Зимдан иш пиширса! Хотин ҳалқининг сочи узун, ақли калта-да!

Кичиккина жуссасини тик тутганча Муслима чойнак кўтариб келганда уста Шамсиддин юмшоқ кўрпача ва лўлаболишга бошқатдан хотиржам ёнбошланган эди.

— Дадаси, сиз... тавба қилдим-а, — ҳайратини яширолмади Муслима, — хафа десам хафамассиз, хурсанд десам хурсандмас. Феълингизни биламан, бир гапни ичингизда чиритасиз. Сизам одамга ўхшаб бир марта-гина мундай очилинг. Ўзи нима бўлди?

— Қизиқмисан, нима бўларди? — хитланди уста. — Ҳадеб тергайверма одамни! Ахийри шубҳа бошингни

еиди. Чойдан суз, әрталабдан мунча чанқаяпман, тавба.

- Е Файбингиздан бирор гап олдингизми?
- Гайби менга икки дунёдаям ёрилмайды.
- Ериладику-я, ўзингиз... қовоқ очмайсиз.
- Сен, қовоғингни очаркансан, нима қилолдинг?

Муслима индамади. Устаси тушгурдан тағин қўрслик ўтди, у сир бой бермай бемалол чой ҳўплади. Бекор қилди, ҳаддидан ошди, ётиғи билан уқтирса асакаси кетмасди. Шўрлик камипири, айби шуки, орага яхши ният билан гап қистирди, Файбиддиннинг уйини тушириб бергани шошилмаётганига шама қилди.

Ичи сидирилиб бораётган бўлса ҳам уста Шамсиддин яна ўғли қоматини хаёлида жонлантириди ва ўтирган жойида алланечук безовта қимирлаб қўиди.

Бундан анча муқаддам Маъруф Афзалович тарҳини илк бор қўлига олиб нима қилишини билмай довдираб турганда ҳали бир бандада эътиборига тушмаган шу ўғли қутимаганда суюганини ўйласа ҳали-ҳали орзиқади.

«Отагинам, сиз биласизки, Тиллакори гумбази ичкарисидаги нақшлар Г и р и ҳ, ва И с л и м и турқумларига хосдир, — деган эди у ўшанда истиҳолани йифишириб. — Манови тарҳда эса бу турқумларга тегишли қадимий ифодалар тўласинча тасвир этилмабди. Бундан кўз юмини адолатсизлик!»

Қурмагур ўғли шундай қаттиқ кетди: тарҳни ҳам, тарҳ эгасини ҳам заррача аямади. Шаксиз мўлжал Маъруф Афзалович эди, лекин шапалоқ нақ келиб унинг қулоқ-чаккасига теккандек бўлди. Кўзлари мошдек очилди. Демак, хулоса шуки, Маъруф Афзалович энг муҳим нарсани четлаб ўтган, ёдгорлик қиёфасини белгиловчи кўхна нақшлар қолдиқларини менсимаган!..

Уста Файбиддинсиз узоққа боролмаслигини билди.

Файбиддин бошқача фикрда: агар отасига суюнимаса бир фиштни бир жойдан олиб иккинчи жойга қўйиши мушкул, ҳатто у бу эътирофини катта-кичик орасида гурур билан таъкидлайди; у отаси йўригидан жиндай бўлсин тоймайди, айни пайтда кеча-кундуз эринмай китоб титади.

Орага Маъруф Афзалович тарҳи тушгандан кейин у ҳаловатидан буткул кечди, «Иҳсо ал-улум»га ёпишиб олди. Охири олам яхлитлиги ҳақиқий санъатда ҳам яхлитликни тақозо этишини ўзи учун кашф қилди. Гумбаз ичкарисида танда қўйиб юксакдан юксак шифт-

да бу қоида яққол ифодаланганини кўриб ёқа ушлади, тезда Гириҳ ва Ислими Тиллакорининг асосий либоси эканини устага етказди.

Гайбиддин Гириҳ асири бўлди.

Гириҳ, унингча, изтироблардан яралар эди.

Бу галати таърифдан уста кулади, кулса-да, ичидан ўғли дидига тан беради. Истаса ўзини-ўзи арш тахтига мингазиб қўядиган Маъруф Афзаловичдек одам шу нарсадан маҳрумлигини ўйлаганда негадир галати ҳолга тушади. У қанақа кимсалигини тарҳи айтиб турибди. Тарҳи обида учун бегоналигини идора ёки Регистонда бўлган тортишувларда неча бор савалади, зарурат туғилса тал тортмай тагин савалайди.

Маъюсликка мойил Муслима, қоқсуяк қўли чойнак қопқогида, чоли чехрасидан нигохини узмас, аҳволи-руҳияси бир ҳолатдан иккинчи ҳолатга бетўхтов кўчайтганидан ажабсинар эди.

Хаял ичидан уста ўзи билан ўзи бўлиб қолди, қовоғи солиниб, кампирига ортиқча рўйхушлик бермади. Адиданини роса қизитди, шу ёғи етади. Қуёш ёйилиб кетди, энди тезроқ йўлга тушиши керак. Идорада Маъруф Афзалович жони ҳалқумига тиқилиб кутаётгандир, иописандлиги учун гўрига ғишт ҳам қалаётгандир.

Катта савобга етишмоги асосан ўзига боғлиқлигини дилидан кечирганда таъби сал равshan тортди, Маъруф Афзалович гоҳ уни, гоҳ буни баҳоналаб таънага кўмаётганини, тепадагилар эса янги бошлиққа зимдан ён босаётганини ўйлаганда ўксинди.

Қани, айтинг, Муслима буларни билди нима, билмади нима — икки ҳолда ҳам қилча нарса ўзгармайди. Зинҳор у хотинидан нолимоқчи эмас, хотини фариштали аёл, қолаверса, унинг ҳам ўзига яраша дарди бор, шуни унга тўқмаса кимга тўқади.

Хотини ҳақ, нуқул эс-хуши ҳунарида, ҳатто иримига ўзини бир кун-ярим кун таъмир ташвишилиз тасаввур қилолмайди. Аллақачон бўй етган ўғли кўнглини сўрагани эса вақт тополмайди. Йўғ-э, унчалик эмас, уста уни бир неча маротаба зинграйтириб қўйиб тергади, у эса чайналишдан нари ўтмади. Иззат-нафси оғриган уста, шу бугуноқ ошнам уста Иброҳимнинг қизи Жамилани унаштираман, деб охирги сұхбатга якун ясаганда тушмагур чаппа ўгирилиб илжайди.

Маслаҳат пишди, тўй ташвиши бошланди, совчилар сараланаётгандан бари яна терс кетди. Феъли баҳор

ҳавосидан қолишмайдиган ота қўққисдан айниди. Бир кун кечқурун дастурхон устида уста Иброҳим шаънини ерлади. Аламдан кампири бўғилди, жондай ошнангиз эди, нима бало, ораларингдан пишак ўтдими, э, ўзи сизда бурд йўқ, бунақа гувранаверсангиз у дунё-бу дунё лавант ўғлингиз оёгини чатиёлмайсиз, деб роса бобиллади.

Уста табиатан бир оз паришонхотирлиги ҳамда буткул даҳмазага қўмилгани туфайли, совчилар жўнатилмагандан кейин Файбиддин алланечук маъюслашиб қолганини илғамади.

Үйингга буғдой тўлгур уста нима учун тўнини тескари кийиб олгани боисини соддадил Муслима ҳанузгача билмайди. Узоқ тортишувдан сўнг пишган маслаҳатни чиппакка чиқарган воқеа қўйидагича эди: совчиларни лўкиллатмай, аввал ўзи маслаҳат пишитиш пайида, уста Шамсиддин Улугбек мадрасаси пештоқини таъмирлаётган ошнасини излаб Регистонга борди. Таъмир қарийб тугаёзган эди, шу сабаб уста Иброҳим майда-чуйда якуний юмушларни шогирдларига юклаб қаёққадир кетибди. Ошнасини кутиб у зериқди, буюк аллома ва шоҳ назари теккан иморат ўзак қисмида таъмир қандай бораёттанига қизиқиб, баланд ҳавозалар аро пештоққа тикилди, тикилди-ю, нақ эсдан оғаёзди. Замонида баркамол юлдузлар салтанати саналган оламда... мувозанат чил-парчин қилинган эди.

Қаҳри жўшди, ичи сидирилди, аламини кимга тўкишини билмай орқа-олдига қарамасдан жўнади; қўп яхши тилакни кўксига жойлаб келган одам бу йўсинга йўлиққандан кейин ошнасини қўришни ҳам, баттар қувишни ҳам хоҳламади. Устоз қўрган одам шунчаликка боргани ботинибди, кеча тухум ёрган жўжалардан нима умид, дея жизганак бўлди. Э, аттанг, нечун бу кор-хол юз берди?! Ярамагур ошнасининг қўзи қаёқда эди? Ёки, нима, тарҳга таянмадими, нақшларни кўр-кўрона зарбладими?

Агар у ҳам осонига қараса, роҳати ва тирикчилиги ғанини еса, таваккал қилиб Маъруф Афзалович матоҳини Тиллакорида қўллаворса бундан бешбаттари юз бермайдими, кейин бу қўргиликдан имони куймайдими, жони азобда қоврилмайдими?!

Дастлабки кезлардаёқ ота-бала фикри қатъийлашувди: аллакимлар нархини осмонга кўтарган тарҳи норавони ё бекор қилиш, ёки тамомила қайта тузиш керак

эди. Шундай тузмоқ жоизки, ҳар қатлами, ҳар сарҳади, ҳар рангидә Гириҳ ва Ислими бор күрки билан товланиб күринсин.

Эхтиёткор падари бир вақтлар Гириҳ ва Ислими туркүмлари юзасидан узоқ вақт ҳафсала билан сабоқ ўргатган эди. Гириҳ ҳақидаги мулоҳазалари ҳали-ҳали қулоқлари остида жааранглайди: одамзод ёвузлик билан ҳеч қачон келишолмаслигини ҳис этган онда Гириҳ яралди, аниқроги, у адолат сўзи билан баравар туғилди.

Кошки бу ҳақиқат Маъруф Афзалович дийдасидаги музни эритолса!?

Асли бу одамдан наҳ уриш унча инсофдан эмас, негаки, ақл-ҳуши жойида, кўпни кўрган, эсини таниб бир банда бурнини қонатмаган, иложини топганда катта-кичик атрофида гирди-капалак, қалтис вазият туғилиб қолса яқину узоқ кишилардан бирдек ёрдамини аямайди. Кўпчилик ундан бегараз кўмак кўрганини оғиздан бол томиб сўзлар эди.

Омад Маъруф Афзаловичга жуда эрта кулиб боқкан: студентлик ғалвасидан қутулган заҳоти Тошкентда, таъмир-лойиҳа институтида анчагина юқори лавозимни эгаллаб томир отади. Хевадаги қайсиdir обидани қайта тиклашда қатнашади, бир кўклам Самарқандга тишриф буюради, казо-казолар ҳамроҳлигида Регистонни томошалаётиб, кутилмаганда Тиллакори гумбази ичкариси учун таъмир лойҳасини шахсан ўзи тайёрлаб беражагини лутф этади. Ногаҳоний ваъдани муруват билган, ҳали дараги бору ўзи йўқ лойиҳа учун миннатдорчилик изҳор эта бошлаган казо-казолардан тенги йўқ юмуш ижросига сарфланадиган маблағни тезроқ ажратишни сўрайди, борингки, ишлар жўнашиб (Маъруф Афзалович бир ёш мутахассисни ёнига олиб ваъдасини уч ойда дўндириб ташлаган), шитобига олган лойиҳа барча тегишли тешик-тирқишидан силлиққина кириб-чиққандан сўнг, ахийри, айлана-айлана уста Шамсиддин қўлига келиб тегди, тегди-ю, борлигини дўзах азобига солган можаро шундан бошланди.

Катта-кичик ҳайрон: ҳали шу пайтгача юқори тавсия этган лойиҳани, мукаммалми ёки хом-хаталами, чиппакка чиқаргани ҳар қандай мана-ман деган уста ҳам жазм этмаганди, таомилга кириб қолган бу йўрикни кутилмаганда у бузди.

Лойиҳа-таъмир институтидаги акахонлар тинч ту-

ришармиди: тавсияномадан сўнг дағдага-пўписа эҳтиёткорона қистирилган маслаҳат хатлари пайдар-пай учиб келаверди. Елкасидан сумка тушмайдиган сергап почтачи хотин кўзлар аллақачон ўрганиб қолган қизғимтирик конвертни котиба қиз атр-упаси бўйи тутган хонага киритиб берганда идора ожизона бир силкиниб олар, тўполон қўтарилилар, бош мутасадди Зоҳиржон яхши муомала билан гажир устани аврашга уринар, ялиниб-ёлворгани кор қилмагандан кейин ошкора дагалликка ўтарди.

Оғир-енгилда Файбиддинга суюниб қолган уста кўпинча дардини ичига ютиб шунчасига чидади, насиб қиласа бу ёғига ҳам, ҳар қанақа уқубат бўлса-да, гинг демай дош беради. Фақат ғурурига тегинишмаса, савобдан кечасан, уволга юзланасан, деб хўрлашмаса бас — имонини икир-чикирларга қурбон қилгандан кўра омонатидан қутулгани афзал! Бечора Муслима бошқа дардларини тушунмагани сингари бунисини ҳам фаҳмламайди. У ўғли билан жонини жабборга бериб юрибди, Муслимаси тушмагур эса, сўз худди бир қоп сомон устида бораётгандек, тарҳдан воз кечишу роҳат қилиб яшашни таклиф қилиб ўтирибди. Лекин ундан ҳадеб гиналаши ўринсиз. Ахир у ким? У ўз дардигамига кўмилиб юрган, рўзгору бола-чақа ташвишидан бўлак ташвишни тан олмайдиган муштипар аёл-да!

Ховли анча исиди, уста сабрсизланди.

Нечундир энди Муслима ҳам бетоқат, чамаси, у Файбиддин гийбатини каттароқ қозонда қайнатмоқчи, хусусан агар Файбиддин тезроқ уйланмас экан, пашшадан фил ясайдиган одамлар ёғдираётган маломатдан осонгина ўлиб қўя қолишини сездириб қўймоқчи эди. Яхши ҳамки калласи ишлаб қолди, ҳозир ҳар қандай машмаша чолига ёқмаслигини билди, истамайгина бошқа савол берди.

- Бугун устахонага бормайсиз чоги?
- Ўзлари чақирган, бормасам чатоқ.

Овози алланечук маҳзун эштирилди, бундан гижинди, ўзини тетик тутишга тиришиб қўзғалди, ҳовлидан оғир қадамлар билан чиқди ва димиққан автобусда Афросиёбга жўнади.

### III

Азалу абад бу можаро табиати шунақа: кимнидир баҳтга дохил қиласы, кимнидир дунёдан совутади, кимнидир бир умрга қүйдириб қўяди. Ҳамма тажрибасиз йигитлар қатори ўз баҳти-тахтини ҳали тузукроқ тасаввур қилолмайдиган Файбиддин эса, совчилар юриши бошланмай туриб нохушлик билан тугаганини ҳисобга олмаганды, ҳали бу можаро аччиқ-чучугига деярли йўлиқмаган, айрича туйгудан сархуш юрар, Мажнунни адои-тамом қилган Лайли сингари малоҳатли қиз чеҳраси ва нозу истигносида эртасини қўрар эди. Онаизори уни бўш-баёвликда айбларди, бу шалвирашингда дунёдан тоқ ўтасан, деб узлуксиз минғирларди. Беозор тъянадан сўнг, Жамилани эслаб, бутун туриш-турмуши лангиллаб кетадиган валломат йигит сукутда, юраги гурсиллаб ураётганини онаси эшишиб қоладигандек, ғужанак бўлиб олади. Сўнг ҳатто ўзига ҳам бегона товуш билан бу кунда падари Гириҳ тақдирини ўйлаб овораи сарсонлигини, шу ташвиш бир ёқли бўлиши билан шаксиз ўзига қайишажагини, армони ушалажагини тўхтовсиз уқтиради. Бу борадаги ҳар қанақа муомаладан ийиб-эзилиб кетадиган онаизори киприк намлаб қолиши ёки бошқатдан жовиллаб ёпишишидан чўчиб қолган Файбиддин аста жилади. Кенг ҳовлида кампир ўзи билан ўзи овуниб ўтирганда, саркаш чол Гириҳ билан қайсири мулойимхунук амалдор ҳузурида жингиртоб тортишаётганда Файбиддин, юлдузлар салтанатига учгудек бир тарзда, тасвирий санъат идораси эшигидан эллик қадамча нарида, ҳали кўкка бўй чўзиб ултурмаган ёш чинорлар тагида, асфальт йўлакда нарибери одимлаётган бўлади.

Ҳафсалга билан соқол ўстирган кишилар ин қўйган даргоҳ шундоқ Регистон жанубий биқинида, аниқроги, уч забардаст обида рўпарасида эди. Шу сабабдан Файбиддин бу атрофда чумолидек гивирлаб юрганини отаси ёки уста Иброҳим кўриб қолишидан ҳадиксирайди; агар улардан бирори кўрса-нетса шаксиз бир галва чиқади. Бари бир, шунга қарамай, ҳайиқиши ҳисси, галва таҳликасини бу ерга келиш, Жамила билан дийдорлашиш интиқлиги осонгина енгарди. Чинорлар тагида пайдо бўлиши билан ўзини қандайдир бир ёввойи кучга рўпара қўйгандек, ҳатто уни тап тортмай босиб-янчиб ўтгандек астойдил севинар, ўзида журъат етарли

эканлигини эътироф этарди. Фақат, ҳайҳотки, отаси ҳузурида бу журъатидан ном-нишон ҳам қолмасди, ном-нишон ҳам!

Гайдиддин чинорлар тагига кўпинча кечроқ, қуёш ғарбга ёнбошлигандан, мўминтойгина бўлиб келади. Сўнг, жон ҳовучлаганча, Жамилахон кўк эшиқдан бедана юриш қилиб, фарангий ёки арабий атрлар бўйини анқитиб чиқишини пойлайди. Агар кечикаверса, бўғилади, қони қайнайди, шундоқ ҳам қўкси тубида жунбишга келиб турган соғинч ҳисси бирдан қўзғолон кўтаради.

Тушмагур Жамила ноз-карашмани жа қийворади, ташкарида мажнун йигити анчдан бери интизорлиги-ни сезгач, баттар тантиқлик қилади, пича куттирсам қадримга яхшироқ етади, дегандай, атайлаб кечикади.

Гайдиддин Жамиладек санам учун жонидан кечишга хозиру нозир: Жамиласиз кенг ва ёруғ дунё кўзига тору қоронги, ҳатто сал узокроқ муддат уни кўрмаса, латофатли кулгиси, маънодор сўзларини эшитмаса, ҳеч қурса меҳру мурувватга тўла кўзларига термилиб ёнида бирпас жимгина ўтираса гарангсийди, телбаваш қўйга тушади. Хусусан у дардини волидайнинг<sup>1</sup> қандай сездиришни билмай боши говлаб юрганда гўё омад кулиб боқди. Онаизори, кенжангиз дунёдан тоқ ўтадими, деб зориллайвергандан кейин отаси қисқа муддат Гириҳдан алаҳиси, бирдан қадрдон ошнасини, у меҳрини бериб ўстирган қизни хотирлади, лекин, мирзо йигит, мен аралашгандан кейин қулоқ қоқмайсан, деб огоҳлантириш ҳам қилди. Йигити тушгур падари амрига осонгина бўйсунди, чиндан ҳам қулоқ қоқмади, ҳатто четга бурилганча ҳузур билан илжайди. Кейин Жамилахон ёнига елдек учди, иккиласманмай ундан суюнчи олди, борингки, кутилмаган хабар билан санам дилидаги учқун алангай оташга айланди. Энди Жамила азиз кишиси элчиларини кутиши, уларни таомилга кўра иззат-икром билан сийлашлари борасида куйиниши, қолаверса, иш ҳамирдан қил суғургандек осон кўчиши учун, бетарафликдан кечиб, жиндай ошкора ҳаракатга ўтиши лозим эди.

Аттанг, қўп аттангки, остоңага ўзларидан аввал дараклари зилзила солган совчилар, жиловни бошқа манзил сари бургандек, ҳадеганда қораларини кўрса-

<sup>1</sup> Волидайн — ота-она.

тавермади; улар күчаларини супуриш, эшиклари турумини бузиш тугул, мундай ирими учун деворларига сүйканиб ҳам қўйишмади.

Бардошли қиз умидини синдирамади, баҳти қалитини тугуни қирқ қайта тугилган тугунчаклари қатида яширган элчиларни кутди, кутаверди. Ахийри, йигирма кунлардан кейингина, умид узди, ёруғ дунёга сифмай қолди, кечалари қадрига йиғлади, кундузлари ёлғондакам кулди. Гулдай нарса эди, сўлиди, дилидан иштиёқ билан бирга қатъият ариди. Совчилар дарагини бувиси ҳам, ота-онаси ҳам орқаворотдан эшитишган экан, ўшалар олдида мулзам бўлиб, маломатга кўмилгани қолди, сенга ўзимиз бир сўзини икки қилмайдиган субутлисини топамиз, ғам ема, деган писандалар эшитгани қолди.

Дунёда қиз бола иззат-нафсини ерга уришдан ёмони йўқ-да! Ҳар қанақа чўлта фикрли банда ҳам буни билади. Тағин, сочи шамолига не-не азаматларни йўлатмаган Жамила, гурури тоғдайгина эмасми, бебурд Файбиддинни ғазабида нақ қовуриб ташлаёди. Шунчаки ҳуснга ҳавасманд экансизми, мұхабbat юкини кўтаролмайсиз, деб дангалини айтди. Энди бечора Файбиддин ҳолини кўрсангиз-а! Сувга тушган мушукча нима, у нима! Тумушибгина олган, бўйни қисиқ, кўзлари йилтири-йилтири қиласи, боқишида бир ялинч, ялинччи, турган-битгани узр, тавалло, умиду илинжга мойил, фақат ун чиқармоққа ожиз, беҳол ўйлайди: «Жоним, тушун, мен атайлаб қилмадим. Қўй, жоним, сену менга совчи-повчи керакмас, ўша инжиқ бандаларсиз ҳам топишамиз. Ишон, жоним, ишонгил, фақат бундай қаҳр сочма, ўлиб қоламан-а!» Ёлворувчан нигоҳ Жамилагага бир оз далда бағишилади, ахийри қиз кўнгилчанлигига бориб ийди, кўкси қаърида кўпдан беркинган дард кўпам узоқ ғазаб қилгани имкон бермади ва беозор жавдираётган мушукчага мушукчадек аста сўйканди. Бирам сузилиб тикилди-ей қизи тушгур, ҳатто кўк ҳавасдан энтикиб кетди, шу билан иссиқ танлари, иссиқ нафаслари қовушди, олам аслига қайтди: кенг, ёруғ, осойишта...

Ана шу дақиқада йигит, маст алғозда, қалампир-мунчоқ иси юқсан майин соchlарни силай-силай, ичиди борини тўқди, «хато»сини тузатишга тутинди, яъни камхаржлик оғат экалигини, орқа-олдиларини йиғиштиrmай тўй бошлагани инжиқ ва каттагап онаси розилик

бермаётганини (ёлғонни ўзи кечирсін!) юмалоқ-естиқ қилди. Чайир құллар силашидан әриёттан Жамила инонди. Шубҳага ўрин қолмади; түй боши берк күчага кириб тұхтади. Бари бир Гайдиддин манов даргохға қатнашни, чинорлар тагида ивирсіб, дурқуи танидан бүёк-лой хиди аралаш фарангий ёки арабий атр бўйи анқитиб соллана-соллана келадиган ситамқаш санамни кутиб олишни канда қилмади.

Қүёш қадим маконига яқынлашаётганды вақт тезобига тушгандек туулади. Бошқаларни билмади, унга нуқул шундай туулади, ҳадемай қоронгилик қуюқлашади, у буни баҳоналаб уйига шошилади, деган ўйдан маъюлашади. Тезроқ чиқа қолса бўларди, бу дунё камини ким битирибди, у битиради. Таомили шу, ҳар қандай зарур юмуш ҳам бари бир чала қолади, эртаси куни тўхтаган жойидан давом эттирилади. Агар азалдан шунақа йўриқ бўлмаганда бугун ҳамма пашша қўриб, бир-бирига термилиб, бекор ўтиради. Ҳолбуки, кўзни каттароқ очиб қарасанг қўрасан, чор атрофда чала-чула юмуш, ҳеч қачон қўл урилмаган каби, тиқилиб ётибди. Ана, Гирих, қанча вақтдан бери уларни банд қилган, лекин ҳали тугалига етгани йўқ, ҳали-бери етмаса ҳам керак. Азалий таомилни Жамила инобатга олса-да, диққинафас устахонасини тезроқ тарк этса, ойдай тўлиб, гулдай яшнаб кела қолса! Ахир, у ҳозир паққа ёрилади, бошқа бир қатра ҳам сабр-чидами қолмади. Ёрилади, тамом-вассалом!.. Э, на чора, қиз болага ноз-карашмани буюрган-да, дея ўйларкан, бехос баланд пошнали нозик туфлининг бир маромдаги тўқиллаши эшитилди. Юраккинаси шундоқ ўйноқлаб бердики, нақ оғзидан отилиб тушаёди.

Анчагина бўйчан Жамила, гўё ҳар бир харакатини чор-атрофдан оч нигоҳлар гайронан қузатаётганига аминдек, қимтинибгина одимлар эди. Нозик жуссасида юракни увиштириб юборадиган бир ибо, бир қўрккамлик зухур эди, буни ўзи ҳам биларди, билгани боис мудом беозор ғамза қилас, зебо боқишидан нур, тиниқ қулгисидан дур сочилади, бул ҳусни салтанат ҳузурида Гайдиддиндан фақат ёнишу ўртанишгина қолар эди.

Шоир таърифлагани каби, Жамила ингичка қошлирига то ҳануз қалам тегирмаган, рақами қаттолни бузмаган, ҳеч қачон тегирмакни истамас ҳам эди. Нақш олмадай қизили тарам-тарам юзига упа-элик суриши учун асло хожат йўқ эди, лекин, у негадир сочига

кўп вақт сарфларди. Афтидан у бувисиданми, онаси-данми, соч — қиз мулки ва кўрки, деган гапни қайта-қайта эшитган эди. Мабодо тошойнага йўлайдиган бўлса сочи ғамида йўлар эди, кўпинча сочини турмаклаб ёки икки толим қилиб орқасига ташлаб юради. Бир марта, туғилган кунида, Файбиддин уни қирқокилда кўрди. Саксон бешни пок-покиза уриб жагига суюниб қолган бувиси, ҳозирги сатанг қизлар худойим таоло право кўрган урфдан тойиб, тенгсиз мулку кўркдан ар-зон-гаровга кечиб юборишаётганини писандалаганча, ўз қўли билан то саҳарга қадар майдалаб, нақ қирқта чилвир қилиб ўрибди. Икки четига икки шода қалам-пирмунчоқ осибди. Тўғриси, ўшанда Файбиддин қизни таниёлмай қолган, ё дарё остидан чиқсан парига, ёки осмондан тушган фариштага йўлиқдим, деб ўйлаган, қалампирмунчоқнинг гуниллаётган исидан боши айла-ниб кетган эди. Кейин, сал қоронги тушгач, бошқалар кўзини шамғалат қилиб, том орқасига ўтишди. Ох, малакнинг иссиқ оғуши! Бўйнига чирмашган чилвир ўримлар! Лаблари оташ тусини олган қиз, ҳозир чиқиб қолишади, шарманда қилмоқчимисиз, деб қучоғидан юлқиниб чиқмоқчи бўлганда уни қўйворгиси келмай тихирлик қилганлари, малагим, сен бир умр меникисан, бошқани хаёлингга ҳам йўлатма, мабодо йўлатишга жазм этсанг, аввал мени мана бу чилвиринг билан да-рахтга ослайсан, дея беҳудуд шавққа гарқ бўлганлари...

— Вай, сизни, нима, бошка ишингиз йўқми? — жарангдор овози билан Жамила Файбиддинни хушига келтирди, у Файбиддин қутиб ўтирганидан ичидан се-винса ҳам жўрттага қовоқ солди. — Бунақа ўзбошим-чалик қилманг. Дадангиз ёлғиз, сиздан бошқа қараша-диган одами йўқ!

Файбиддин Жамиланинг ўша кунги сўлим қиёфа-сини, орқа-олдини дувва ёйилиб тўлдирган чилвир соч-ларини тагин бир зум кўз олдига келтиаркан қах-қах отиб кулди. Ҳазилкаш қиз боплабгина пичинг едирган эди. Пичинг таги чуқур, яъники, Гириҳ ўжарлик билан қоғоз бетига тушмаётганидан ҳар бири ранжиб, хит-ланиб, дунёдан безиб юрган кунларнинг бирида, кечга яқин дарвазадан Жамила мўралади, ҳеч ким бўлмаса-да, ичкари кирмай, уни имлаб чақирди. Билдики, Жамила кўмак сўраб келган, бир йўлини қилиб, унинг қиши боши ёки охирларида тарих музейида очиладиган шахсий кўргазмасини тайёрлашга кўмаклашиш учун вақт

ажратиши керак. Аттанг, ана шу сабилдан қисилган эдида! Остонада нажот тилаб турган қыз тушгур буни тушунармикин? Нима бўлганда ҳам ростини айтди, отам ёлғиз, деди, Гириҳ ҳеч биримизни тан олмаётир, деди, вақти камлигидан нолиди, одам етишмаслигидан нолиди, ҳатто қайсиdir ҳужрада Расул Усмон шеърини ёзиб ёлғиз ўтирганда бош-охир тул либосга ўранган бир пари шарнасиз киргани, уни оғушига олмоқчи бўлгани, шўрлик шоир шайтонлаб йиқилгани ва ўшандан бери алжиб, иситмалаб ётганини орага тикиштириди. Кейин майнасини ишлатса, анча нописандлик қилган экан, минг пушаймон еди. Ахир, отаси гўдак эмас-ку, ёлғиз қолганда қўрқса! Бирров бориб маслаҳатини бериб келса нима йўқотарди?

— Расул Усмон қалай? — йигитни ўнгайсизликдан қутқарди Жамила. — Шеър тинглаб ҳузур қилгани келган парини унудими, йўқми? Сиз рашичи бўлсангиз ҳам ростини айтай: шу йигит менга ёқиб қолди.

— Омаднинг ҳаммасини йигиб-териб шунга берган экан, — таассуф билан ганирди Файбиддин. — Шаҳарда нечта қыз бўлса, ҳаммаси оғзидан бол томиб шуни мақтайди. Шунча сулув етмагандай, анови обидада сал кам уч юз эллик йилдан бери бекалик қилиб келаётган пари ҳам севги изҳор қилгани ўшанинг олдига борибди. Тавба, нимасига бунча ҳурмат? Тўртта бетуз шеъригами?

— Ҳасад қиляпсизми, рашқ?

— Шошманг, шошманг, — қыз юзига расо ўтирилиб қаттиқ тикилди Файбиддин, — бўтқаларидан битта-яримтасини ўзларига ҳам бағишилаб юбордими, нима бало?!

— У «Маъшуқа»ни бир зарб билан дабдала қилди, — деди Жамила хиёл жиддийлапиб. — Биласизми, муҳаббат мустақиллиги билан гўзал, сиз яратган маъшуқа кўзларида шу нарса учқунини кўрмаяпман, деса бўзариб қопман.

— Мен унинг бирорта ҳам фикри билан ҳисоблашмасдим.

— Сиз «Маъшуқа»ни ўн марталаб кўргансиз, ҳар гал осмону фалакка кўтаргансиз, — деди ранж оҳангода Жамила. — Демак, ё мени аягансиз, ёки... Расул Усмон пайқаганни пайқамагансиз.

— Ўлай агар у ярамас сизга шеър бағишилаган, — деб бўғилди Файбиддин. — Мен бугун кечқурун ўша

ширинзабон булбулчани излаб топаман-да, суробгинасини түгрилайман. Токи, орага нифоқ солиш нымалигини англасин!

— Шўрлик булбулча, — жилмайди Жамила.

— Устахонангиздан бери келмай қўйганига бир балоси бор девдим-а! — ўзича жиги-бийрон бўлиб илгариларди Файбиддин. — Пайғамбар экан-ку, а, фақат билмабмиз-да!

Одобли йигитлар гули саналган Файбиддин ўзини унутгани, қуюшқондан чиққани, дўстини ҳазил аралаш газабга олаётгани, борингки, жазава билан рашки-ранжини ошкоралаётгани Жамилагага алланечук хуш ёқар, бағрида илиқ-илиқ бир меҳр уйготар, қизлик гурурига малҳам бўлиб юмшоқ-юмшоқ босилар эди.

— Биласизми, Файби ака, қизишибмоқ — ожизлик, деган экан бир донишманд, — унинг ярасига яна туз сепди шаддотликни бўйнига олган қиз. — Сиз бекорга ловуллаяпсиз. Ҳайкалтарошликка тишингиз ўтмас экан, тан олинг-да!

Ҳазил-ҳузилни бирдан йиғиширган қиз аччиқ таънасини чапаничасига, палахмон тоши қилиб, ҳануз довдираётган йигит бетига аёвсиз отди. Намунча у тантиқланаёттир? Нимадандир аламзада чоги? Ишқилиб худойим бу сулув қаҳру газабига дучор қилмасин-да! Илгари совчилар баҳонасида, кейин илтимосини рад қилиб роса таъзирини еди, энди, бас, шу ёғи етиб-ортади, ҳатто бир жонига қўплик қиласди.

Қизиқки, ўшанда, илтимосни зиммасига олишни истамагани билан, анча-мўнча пушаймондан сўнг, кўп ўтмай унга қайишди; уци ранжитиш, ёлғизлатиб қўйиш, арзиган-арзимаган ташвишига якка ўзини рўпара қилиб қўйишга ҳақи йўқлигини англади. Ахийри ҳузурига бош эгиб борди, буюринг, жоним, қайси тогни ўмариб келай, деб шаъни-шашти кўнам настда эмаслигига шама қилди. Шўрлик йигит, киз хурматини қозониш илинжида, ўзини баландга кўтаришга кўтарди, лекин, кейинча ўзини ўзи тузоққа рўпара қилганини англади. Офатижон қиз қулогигача ҳар хил икир-чикирга кўмиб ташладики, шу кетишда миқ этмай бораверса, Гириҳдан-ку ажралгани, ярим йўлда нафас ололмай бир бало бўлиб қолиши ҳеч гал эмасди. Кун ора бўшалиб кетаётганини отаси ҳам зимдан сезди, охири сен болани анови тутга боғлаб қўяман, деб дўқ урди. Ноилож у Расул Усмонга мурожаат қилди. Шоири тушгур бирор маротаба ҳам са-

засини ўлдирмади, илтимоси оғзидан чиқар-чиқмас, индамай Жамила ҳузурига лўқиллайверди. Мана, энди билса, бедаво мажнун кўргазма ғамида елиб-югуриш ўрнига ҳар хил айнума гаплар билан содда қизни чалғитиш, ойни уялтирадиган жамолига достонми, газалми бағишлаб, уни ўзига оғдириб олиш билан машгул экан.

— Сиз аср дахосини кашф этибсиз, — деди ниҳоят Файбиддин аста, ичида кечайдан талвасани яширишга уриниб. — Муборак бўлсин. Эртадан бошлаб соясига салом берамиз, йўғ-а, сигинамиз.

— Сиз ҳам даҳо, — юпқа лабларини қимтиди Жамила. — Фақат мен сизни сал гўрлигингизда кашф этганман. Агар пишиб етилган бўлсангиз, буни исботланг.

— Хўш, маликам, амрингиз камина учун вожиб, — Файбиддин тўхтаб таъзим қилди. — Аммо, айтинг-чи, сизнинг бирор асарингизни бир қарап билан чипакка чиқариб ташласам, етилганимга исботми!?

— Фикрингиз асосли бўлса кифоя.

— Керак экан топамиз асосни! — деди Файбиддин виқор билан. — Аммо, шуни яхши билингки, мен анови бола алжирашига икки дунёдаям қўшилмайман. «Маъшуқа» комил тимсол, севиб қолган қиз изтироблари қиёфасидан сирқиб турибди. Менинча, мустақилликни ҳавоий ҳолатлардан эмас, ўша изтироблардан қидириш кепрак.

— Менинг даҳогинам! — деди кулиб Жамила.

— Йўқ, ундаймас, эплолмадингиз, Расул Усмон буни бошқача ижро этарди, — Файбиддин ўнг қўлини баланд кўтарди ва сўз оҳангига монанд силкиб-силкиб турди. — Тахминан мана бундай: «Оҳ, шўрлик даҳогинам, нечун ҳазин овозинг, қанотинг қирқилганми, бунча ночор парвозинг?» Қалай, ёқдими?

— Бу Расул Усмонники. Ўзингизники ҳам борми?

— Бор. Фақат ҳали уни сизга айтмайман.

— Қачон айтасиз?

— Куни келади, у кун сиз учун ҳам, мен учун ҳам асалдек ширин бўлади, — Файбиддин аста Жамиланинг билагидан ушлади. — Ана шунда камина сиз учун тўқиган шеъримни ер юзига, жами одамларга эшилтириб айтаман.

— Ўша кунни саргайиб кутарканман-да!

— Иложимиз қанча, маликам!

Шу билан анча муддат жим қолишиди, гўё сўzlари тугади, гал хаёлга етди, бир безовта ҳузурдан бадани

жимирлаётган Жамила билагини йигит човутидан тор-тиб олмади, аксинча, йигит пинжига тиқилди. Энди у ўз паноҳига етишган эди, бу паноҳда доим у бир талотүпга тушиб боши айланар, боши билан баравар тепасидаги олам гириллаб айланарди.

Хаёл сурасура, бир-бирлари пинжидан йироқлашмай, шаҳар ўртасини әгаллаган маҳобатли боқقا кириб бориши. Бу бөг анча күхна, инқилобдан бурун бир жуҳуд бойи бино қылган, инқилобдан кейин адо этилган бирдан-бир юмуш шуки, гир-теваракда ҳалқасимон кенг күчә солинган, күчада ҳаракат бир лаҳза тинмайди, машиналар бибиллаши ва гувиллапи дараҳтларни күналга қылган қушлар қағиллаши билан күшилиб кетади.

Бөг түридаги ўзлари ўрганиб қолган суянчиқли ўриндиқ баҳтларига бўш экан, ўшанга бақамти ўтиришиди, шу заҳоти ҳар бири шаксиз шу жойга дахлдор, худди шу жой эслатадиган бир дағал, бир тотли хотираларга берилди. Эсида, бир маротаба Жамила беҳад маҳзун алфозда келди, ўтирап-ўтирмас ўзини тўхтатолмай пиқирлаб йиглади. Бунақасини кутмаган Гайбиддин уни амалтақал билан юпатди. Билса, аҳвол чатоқ экан: бир оёғи гўр лабига бориб қолган қари буви, кенжа набирагинам орзу-ҳавасини кўрмай армон билан кетаманми, бешигини тебратиб азобини тортган эдим, роҳатини ҳам кўрайда, капитардай учиб келаётган совчилардан обрўлирогига розилик бера қолинглар, деб жаврабди. Отаси уста ИброХим, дарди ичидаги юрган эмасми, чойгум қопқоғидай шақиллаётган кампирга дарров ён босибди. Муштипар во-лида аввал миқ этмабди, аҳвол жиддийлигини кўргач, чидолмай, бир бурчакда мунгайиб ўтирган Жамила тарафини олибди. Жаҳли қўзиб кетган отаси уни куракда турмайдиган сўзлар билан кўтара қилиб сўкибди. Бечора нима қилсин, қизингиз розилик бермаса қандай узатасиз ё унга душманмисиз, деб уввос тортибди, унга қўшилиб Жамила ҳам ҳунгиллабди. Ахийри, ховли сув қўйгандек жимжит бўлиб қолгач, онаизор уни тергабди, Жамила бўзарганча дебди: «Йигитим ҳарбийда, уч-тўрт ойда келади. Озгина сабр қилинглар!» Кўкси тез-тез кўтарилиб тушётган Жамила ҳикоясини тугатиб, «Яхши йигит, энди ҳарбийдан тезроқ қайтинг, бўлмаса умрини зору интизорликда ўтказаётган гулингиздан ажрасиз», дея кесатганда Гайбиддиннинг кўксиги тилингандек сирқираб қўйган эди.

— Шундай қилиб, даҳогинам, «Маъшуқа»ни кўр-

газмага йўлатмасликка онт ичдим, — Жамила бегона кишига сўзлаётгандек бепарво, қулгичли лўппи юзи ифодасиз эди. — У чиндан жўнга ўхшайди. Жўн нарса обрў келтиришига ишонасизми?

Ғайбиддин яхшигина эслайди, бир вақтлар Жамила «Маъшуқа»га ўхшаган асар яратишни рассомлик институти остонасига қадам қўйгандаёқ орзу қилганини, ниҳоят, сал кам беш йиллик уқубатдан сўнг шу орзусини ушаттанини тўлиб-тошиб айтган эди. Анча назарга тушган «Маъшуқа»да, эътирофича, интизор қиз кўнглида атиги бир лаҳзада кечган ёки кечадиган изтиробни ифодалаган эди. Мунис ҳайкалчада бўрттириб тасвирланган илоҳий кўзлар, Ғайбиддин фикрича ҳам, бу ниятни бекаму кўст адо этганча дилгириона боқар эди. Энди, не ҳолки, Жамила ўзи етишган нарсадан тониб, ажаб бир илҳом оніда очган кашфиётидан кечиб ўтирибди. Изтироблар ифодаси жўн эмиш! Э, жин чалсин, бу хулосани анови шоир ўйлаб топган-ку! Нима қиласкин тушунмаган нарсасига тумшуғини тиқиб?

— Мен фикримда қоламан: кўргазмани «Маъшуқа» безайди, — деди Ғайбиддин ич-ичида Расул Усмонга нафроти баттар ошиб. — «Маъшуқа»сиз ҳамма уволсавобингиз бир пул! Қолаверса, маликам, унинг ўрнига қўядиган бошқа тайёр нарсангиз йўқ!

— Аввало, даҳогинам, бошқа тайёр нарсам бўлиши шарт эмас, кейин, «Икки наққош»га қўл урганимга анча бўлди, агар улгурсам... ўшани қўяман, — Жамила тин олди, юмшоқ кулди. — Сиз ҳали у нарса хомакисини ҳам кўрмагансиз. Расул Усмонга маъқул!..

Энди қаттол бир гайирлик жонини ёмон оғритди, танг ахволда қолди, ноилож юзини четга бурди. Ҳануз «Икки наққош» хомакиси билан танишмаганини, янгилик бор жойда етти думалаб ҳозиру нозир бўладиган Расул Усмон аллақачон чала нарсани маъқуллаб улгуртанини ҳазм қилиш осон эмасди. Ҳадеб Гириҳ ташвиши, ота зуғумини важ қилиб тайсаллайвериши инсофданми? Йўқ, инсофдан эмас, тан олгани маъқул, кейинги вақтларда шашти бир қадар суст, жони-руҳи бир қийноқдақи, бу ҳол бутун борлигини сездирмай лоқайдликка гирифтор этади. Агар шундай бўлмаганда, «Икки наққош» тимсолини яратишга киришган Жамила мақсадини аллақачон қувватларди, хомаки атрофида гирди-капалак бўлиб, маслаҳати ва қўмагини дариг тутмасди. Ахир бир

вақтлар қиз дилида «Икки наққош» меҳрини уйғоттан ўзи әди-ку!

Тұғри, аввал Жамила оптоқ қоғозга машинкада күчирилған «Қирқ ривоят» құләзмасын беписанд қаради, дунё керак-нокерак нарсага тұла, ҳар бирига берилсам йүлімни қандай тоғаман, деб Гайдиддинни изза қилди. Құләzmани құхна алифбодан ҳозирғи алифбога ўғирған Гайдиддин қарийб бир ой зардоб ютганига эмас, одатда паст-баланд билан иложи борича ҳисоблашадиган қиз негадир бу гал инжилганига ачинди. Этак силкіб кетди. Аммо, бир күн келса, Жамила ихтиёрини құләzmага берган, юзида маъюслик...

— Дағаллигим учун узр, маликам, сиз ўзингизга анча бино қўйибсиз! — деди Гайдиддин дабдурустдан. — Бунча катта кетиш яхшимас. Қани мантиқ: эс билгандан бери диққатингизда турған нарсани бекор қилиб, кечагина бошланған түр нарсани жамоага тақдим этишингиз... кулгили!

— Балки, — деди Жамила хўрсиниб. — Лекин, шуни истаётган бўлсам, нима қиласай?

— Ҳечам шуни истаётганингиз йўқ! — деди узиб Гайдиддин. — Анови найнов иғвосига учяпсиз!

— Идорамдан бамаъни фикр чиқадиган банда тошиш қийин, — ўқсингандай сўзлади Жамила. — Борлари ҳам менга қайишмайди, чунки мен — маҳмадана, димоғдор, нописанд! Борини айтсанг пешонангга шунақа тамга босишаркан! Ахир рангсиз-таъмсиз нарсаларини кўрганда қандай чидай? Шунчалик билан ҳар бири бир пайтамбар! Ана шулар ичида мен ёлғизман! Илгари ёнимда сиз бор эдингиз, энди мен қолиб, Гириҳ томонга оғиб кетдингиз. Айбни Расул Усмонга тақаб нима қиласиз?

Қиз овозидаги титроқ Гайдиддинни адо қилаёзди.

— Жамила, худо ҳақи ишонинг, мен ҳозир ҳам ёнингиздаман, — залвар жимликдан сўнг ниҳоят зўрбазур товуш чиқарди. — Мен ҳамиша сиз билан биргаман, бундан кейин ҳам... сизни ёлғизлатиб қўймайман. Гириҳ ҳам битди, энди чала-чуласини отамнинг ўзи амаллайверади. Ишонинг, жоним!..

— Ишонаман, — деди Жамила аста тин олиб. — Менда ҳозир ўзи фақат шугина нарса қолди, ишониш, умид! Агар булардан ҳам ажралсам тириклигим нимага арзийди?

— Аммо ҳалиги пичингларингиз жонимни ўртаяпти! — алам билан уф тортди Гайдиддин. — Йигитлик

шаънимга оғир ботяпти! Аттангки, узун кечаларда мен чекадиган нолалардан бехабарсиз, ҳар кун минг алам жигаримни хун қилишини билмайсиз.

— Ишондим, — деди қиз яна жавдираб.

— Ҳали биз нима ҳақда баҳслашдик? Мұхаббатнинг мустақиллиги ҳақидами? — деди қисқа сұкутдан кейин Гайбиддин сал дадиллашиб. — Ҳар ҳолда Расул Усмон буни тузук топибди. Лекин, айтинг-чи, мұхаббатнинг мутлоқ мустақиллиги охир-оқибат худбинлик көлтириб чиқармайдими?

— Бу тушунчангиз ўзингизга яраша.

— Эҳтимол, — деди Гайбиддин ютиниб. — Мен ўзи шунақа, баъзан тор ўйлайман. Лекин, бари бир, ён-атрофдаги муносабатлардан ажралған мутлоқ мустақиллик мұхаббатни хор қилиши мүмкінлигини ҳамма жойда бемалол айтаман.

— Хўш, даҳогинам, мұхаббат теварагидаги ҳодисаларга бўйсунса хор бўлмайдими?

— Мұхаббат балки ўз ҳолича ҳеч бир қучга бўйсунмас, аммо теварагидаги ҳодисаларсиз ҳам яшамоги гумон! — Гайбиддин ниманидир ўзига оғир олиб, нимандир ўзини оқламоқчи бўлиб сўзлаётганидан ўнгайсизланди. — Ҳа, майли, бу гапни кўяйлик. Адоғига етиш қийин. Аммо... «Маъшуқа»ни камситманг. Кўргазмада у бўлмаса ютқазасиз.

— «Маъшуқа»да бир балерина дугонам кўзларини нақшлаганман, — Жамила сумкачасини очиб гулдор рўймолча олди, қалампирмунчоқ ҳиди анқиди. — Расул Усмон уни таниркан, манови ҳайкалча кўзлари Нигорахонникига ўхшаркан, деб мени ҳайрон қолдирди. Кейин тасвирда мувозанатни бузганимният яширмади. Дўстингиз ҳақ. Нигор бир қошиқ сув билан ютгудек сулув, мен шунга — ташқи жозибага кўпроқ эътиборни қаратганман, унинг кўзларидан кўпроқ маъюсликни кўчирганман, бироқ шу маъюслик ортидаги ишва — беқарорлик белгиси назаримдан четда қолган. Санъат бундай нотугалликни сира кечирмайди.

— Расулбой тўрт-беш қалин дафтарни тўлдирганидан хабарим бор, анча илгари... — гўлдиради қисиниб Гайбиддин. — Шоир иззатига сазовор бўлган баҳтли балерина ўша эмасмикин?

— Буниси менга қоронғи, — деди Жамила истаристамас. — Жондай дўстингиз қисматидан бехабар бўлсангиз... билмадим, қанақа одамсиз. Сиз ҳамма нарсага

шу бўлишда эришмоқчимисиз? Билганингизни қилинг. Энди турайлик, кеч бўлиб кетди. Сиз Гириҳ ва ривоятларингиз ёнига қайтинг. Эрта, қимматли вақтингиздан жиндай ажратиб, «Икки наққош» хомакисини келиб кўрсангиз, танҳолик билан андармон бошим кўкка етарди.

Хижолатини ютган Гайдиддин минг эшилиб ваъда берди, «Икки наққош»ни албатта бориб кўраман, ўшанда «Маъшуқа» ҳақида бошқатдан тортишамиз, деб сал гувранди. Сўнг жим бўлиб қолган Жамилани бағрига тортди; лекин қиз рўйхушлик бермади, йигит лабларини кафти билан тўсди.

Илгари хайрлашув олдида Жамила биргина бўсага илҳақ турар эди, ҳатто йигит тортинса, жўрттага тай-салласа ёки гап билан овора бўлса, ўзи иссиқ бовурга отилар эди. Бугун эса жонига туташ одами раъйини синдириди, лабларини олиб қочди. Шаксиз, бу ҳолдан у оғринди, қизи тушмагур Расул Усмонни мақташлари бежиз эмас, мендан ростакамига совимоқда, деган аламли хаёлга ҳам борди. Бари бир Жамила билан қўл бериб хушлашаётганда кўкси бир қониқиш, бир орзумандлик, бир согинч ҳисси билан лиммо-лим эди. Жамила қўл силкий-силкий кўчаларидаги дараҳтлар панасида гойиб бўлгач, ёғоч дарвоза чийиллаб очилиб-ёшилгани эшитилгач, у бирдан мунғайди. Ҳалиги ҳислар аёвсизларча дийдасини тарқ этди. Қалтак еган одамдек изига шалвираб қайтаркан, сулувликда тенги йўқ суюмлиси маломат тошларини беҳуда отмаганини, орзу-хавасга иштиёқманд ота-она қошида қари қиз бўлиб ўтириши осон эмаслигини ўйлар, ўзи эса қоп-қоп ваъда-войишларини оёқости қилиб келаётганини, майдакаш ва лоқайд инсонга айланганини, бошига қилич ярақлаганда ҳам бир сўзини икки қилмайдиган падарига дардини ёргани ботинмаётганини эътироф этар, аламда бувранар эди.

Билади, отаси тўнини тамом тескари кийган, уста Иброҳимни кўргани кўзи, отгани ўқи йўқ, шундай экан, у бетига чарм қоплаб олган ошинасига қайтиб ўзини яқин олиши, унинг зил-замбил гуноҳидан кечиши гумон, хуллас, орада кўндаланг чигил қачон ечилиши қоронги эди. Бундан у доғда — ёнгани ёнган. Аҳволини Жамилага очиқ сўзлашдан тортинади, юраги дов бермайди, тўғрироғи, кўргилик қизга оғир зарба бўлиб тушишидан чўчиди. Ҳар ҳолда ҳозирча сир сақлагани маъқул, эр-

танги ғам — йироқроқ, лекин у бир кунмас бир кун өзәдан хабар топса, унда нима бўлади?..

## IV

Ғайбиддин, ҳазилми ёки чин, ҳалиги кесатиқларни ўзига оғир олди, қалтак егандек бир ҳолга тушди, шаддот қиз билан ўла-тирила талашди-ю, лекин бари бир кўп ҳасратлари қўкси тувида қўмилиб қолаверди.

Аввалдан ҳомлик ўзидан ўтган, қиз бундай кескин тисарилиши, уни эса қўкрагидан итариши, бир бегонадек муомала қилишига кўпроқ ўзи сабабчи: бирламчи, Гириҳ деб бор дунёни унугтган, хусусан Жамила дийдоридан бир қадар йироқлашган бўлса, иккиласмчи, келиб-келиб ановидан мадад тилабди-я, от қашқасидек танилаёзган шилқимдан-а! Ана дўсти жонон иши, яъники интиҳони ўйламабди, эртани ўйламабди, қасирлатиб битилган қасидаи бедодлик сеҳру жозибаси билан ул малакни, неча вақтдан бери изида соя каби әргашиб юрган маҳбубаи оромижонини ўзига оғдириб олмоқقا қасдланибди. Шошмасин, ҳозироқ бориб таъзирини бермаса, ёруг дунёда тирик юрган экан!..

Уста Шамсиддинни пири комил, Ғайбиддинни қиёматлик дўст деб билган, эътиқоди-эътирофини далиллаш учун минг қайта қасам ичган Расул Усмон жонини қадрлаш, тирикчилик тариқини созлаш ёки сал бўлсин энлашга парвойи фалак, эрта-индин йигирма бешни уришига қарамай, тўрт миллиард одам бемалол сигишган рўйи заминда то ҳануз ёлғиз боши учун тузуклироқ жой топиб улгурмаган эди. Ҳар ҳолда бундай имконга етишмоқ учун ҳам жиндай ҳафсалай ҳаракат зарур экан. Бу нарса Расул Усмонда йўқми, бор, фақат... казо-казолар олдига бўйинни қисиб боришни истамайди. Эҳтимол, сал ўзини ночорликка уриб арз-ҳол қилса Маъруф Афзалович шартта қайириб ташламас, ҳатто бош мутасадди эшигига юкуниб борганлар пешонасини силашини, ҳар қанақа дардига малҳам тониш учун саъй ҳаракат қўргазишини яхши билади, билади-ю, аммо ўша банда олдида бир умр тили қисиқ бўлиб қолишидан худо асрасин! Ундан кўра дарвешлик афзал, ўзи қатори сўққабошлар билан бетайин тақдир тала-тўпида аралашиб юргани афзал, борингки, у етимхонани тарк этгач, ҳалта-хуржунини орқалаб, шахри азимда ораламаган ма-

халла-күча, бир муддат қўниб ўтмаган ижара-уй қолмади. Ва кутилмаганда шоир инсофга энди, кейинги олти ой давомида Регистон кунчиқарида яшайдиган бир жуҳуд кампирникини муқим бошпана қилиб келади. Бу хонадон Тиллакорига яқин, қатнаши осон, шу сабабга кўра кўнгил бошқа қўноқ тиласас, деб у баъзан гап қистиради; сўнг дув қизариши эса ўтрикка изн берганини ошкор этади.

Саховатли эгам Расул Усмонни, бутун туриш-турмишини, бехудуд шафқат билан йўғирган эди; ҳатто юракка жизиллаб тегадиган шеърлари ҳам, ёш-қари ичидаги ўзаро муомаласи ҳам одам учун тансиқ ҳисобланган, умуман, умр бўйи хатои норавога мойил бандасини таҳлика чангалидан қутқариб қолмоққа қодир шу ҳис билан тўйинган эди. Лекин, бари бир, шунчалиги билан Регистондаги қўноққа қўчини орқалаб келган кундан-ноқ, бирдан-бир эрмаги айвонда ўтировлиб чакак уришдан иборат бўлган кампирга жуда осон қайишгани ажабланарли эди. Қўни-қўшни қўрдики, шоир нақ қанот боғлаган: кун ора бозор-ўчар қилади, ҳовли қақир-қуқири ни тартибга солади, ҳатто кейинча томнинг эскирган тунукасини қўпориб ташлаб, яп-янгисини қоқишириб берди. Бечора кампир хизматини миннат қилмайдиган чаққонгина, бийронгина ижарачи топганига хурсанд, билмайдики, орадаги оқибат ипини ўтган йили ўнинчи ни битирган, ўқишига киролмай уйқизи бўлиб қолган, омади нобарорлигидан эрта-кеч пиқирлаб нолийдиган эркатой невараси — Лизахон боплабгина боғлаган эди. Ҳей, оқибат или нима бўпти, ҳамма бало қизи тушмтурниң чандастлигига: у камонга ўқни қачон жойлаган ва қачон отиб улгурган, айтиш маҳол, шуниси аёнки, қаттол ўқ шувиллаб учиб борган-да, шафқатли юракка чиппа қадалган!..

Бир кун Гайбиддин келса, дўсти оғирдан-оғир касал, яланг тўшини ерга берган, оҳ-воҳига туриб бўлмайди. Туртиб-суртиб, уриб-сўкиб тургазиб олгандан кейин аҳволи қилча ўзгармади, кўз қири билан кампир деразасига қарай-қарай, ҳе йўқ, бе йўқ, пола-фигон билан тўлиб-тошган аломат ашъорларидан қалаштириб ўқиб ташлади:

Жон узмоқ, жоним, нақадар осон,  
Оху нигоҳингга тоб бермоқ маҳол!..



Охири дафтар билан бирга ўзини яна полга отди, худди гирдоб қаърига тушиб кетгандек анчагача жим қолди, ниҳоят, нари-берига қундадай думалаганча, алам-ангиз овоз билан чинқирди:

— У ўксук, кўнгли яримта! Мен уни баҳтли қилишим керак!

Бўғилиб бораётган бўлса ҳам Ғайбиддин сабр қилди, жин тегишибди, ўзига келар, деб ўйлади. Лекин ҳажр ила ҳавас ўрталигида ястанган поёнсизликда саросар шоир ўзига келмади, хусусан кампирнинг парда тортилган деразасига нигоҳи тушганда баттар жўшарди, оғзидан ошиқона сўзлар бодрарди. Охири, Ғайбиддин, бардоши битди, ов, ярамас, оппа-осон бўладиган бўлса жон узиб қўя қолгин-да, деб оч биқинига ўхшатиб тепди. Хўрлиги тутган шоир оғриқ зўридан қўнишди, кўпчида, бужмайиб, ётган ерида тўнгиллади: «Сендақа тўнгиз тепкисидан ўладиган аҳмоқ йўқ, мен ситамкашимнинг мармар қўлларида жон узаман! Қадримни кейин биласан, ҳали менга ҳайкал қўйишга ўзингни ўзинг мажбур қиласан!» Лаби лабига тегмаётган шоирни бира-тўла тинчитмоқни чўтлади, ялпи кўртепки қилмоқчи бўлди. Ўйлаб кўриб айниди, ярамаснинг ўлиги қимматга тушаркан; чиндан нариги дунёга жўнаворса нима қилади. Ҳайкал ўрнатиш учун на вақти бор, на харжи! Кўртепки қилиш қочмас, бошқа тегинмайди, ҳайкалдан кўра шеърини тўқиб юргани авло!

Анча абор бўлган Ғайбиддин ошиасини ширин гаплар билан авради, ўксук Лизани ҳеч қачон баҳтли қиломаслигини ишидан игнасиагача тушунтирди (етимхонада ирим-сиirimдан бехабар ўсан-да!), кўнгил измига юрса икки дунёсиям куйиб кетажагини айтавериб томоги қақради. Ҳайф шунча панди! Тамоми дунё кўзига қилча кўринмай қолган биродари бирор калимасини тан олмади, сен сурбет, баҳт нималигини ўзинг билмайсан-у, менга ақл ўргатасанми, деб бўкирди. Бошқатдан бағрини полга берди. Ана бедодлик! Энди туппа-тузук шоирдан айриларкан-да! Отаси олдида нима деган одам бўлади, дўстингни нима учун гурбат кўчасидан қайирмадинг, деб сўраса, нима деб жавоб қилади.

Ғайбиддин ана шу хил мужмал ўй-хаёл билан ўзича қақшаб юрганда, яхши ҳамки, орада ўксик Лиза пешонасига офтоб тегди: изнини ўзга паҳлавонга топширди. Аламзада Расул Усмон бу айрилиқни кўтаролмади, тамом узлатга чекинди, қайсиdir масжид хужраларидан

бирида уч-тўрт кун дарвешсифат яшади. Воқеадан Гайбиддин орқали хабар топиб қаттиқ жаҳлга мингани бўлса ҳам уста савдойи шогирдини излаб топди, олдига солиб ҳайдаб келди. Бечорани таниш қийин эди: кўзлари киртайган, ранги заъфар, башарасини қоп-қора соқол босган, борингки, саҳродан қайтиш қилган Мажнуннинг ўзгинаси! Тағин шу ҳолига паст тушмади, қовоқ осиб ўтирган Гайбиддинга сўйкалди: «Лиза баҳтини топганига хурсандман! — чуқур сўлиш олиб, анчадан кейин қўшиб қўйди: — Лизасиз қалам керакмас менга, жанозасини ўқидим! Мачитга шу сабаб билан борган эдим!» Бу журъати учун Гайбиддин уни чин дилдан қутлади, ҳаётингдаги энг оғир бурчни вақтида ўтаяпсан, деб лутф қилди. Аттанг, эрта севиниб қўйган экан, бу ёғи унча келишмади, яъники, Жамила Расул Усмон зўр қироат билан шеър ўқиганини айтганда донг котди. Ҳатто янгисини ҳам битибди. Оббо, бетовфиқ, бунда ўзи лафз, субут борми? Агар бирор индамаса бу дунёни оҳанжама мисраларга тўлдириб ташлашдан ҳам тоймайди. Ҳозир нима қилаётган бўлса экан, галварс! Неча ойдан бери юриш-туриши бетайин, бирор нари бор, бери кел, демайди, танбал нарсага бундай йўриқ хуш ёқиб уйқуни уриб ётгандир-да! Ишқилиб, ётгани чин бўлсин, шундоқ жойгинасида гиппа бўғади, Жамилага қилган сурбетликларини бурнидан булоқ қилиб чиқаради. Аммо ётганга ўхшамайди, товуши ичкаридан нақ дўриллаб эшитилмоқда. Мехмон бормикин? Э, йўқ, бу савдойини бемахалда ундан бошқа ким ҳам йўқларди. Ёпирај, нима, яна шеърми? Ростдан тагин худо тос тепасидан урибидиа!

Ўзини босолмай Гайбиддин эшикни гурсиллатиб тепди.

Хона ним ёруғ, одатдагидек ивирисиқ: ўнг томонда сим каравот, қўрпа-тўшак ва чойшаб аралаш-қуралаш, биттаю битта ёстиқ ерда, дераза тагидаги омонат стол устида қурумдан қоп-қорайган кўҳна шамдон, шамонда бир қарич келадиган ингичка шам милдираб ёнади. Тор хужрани кенг дунёга менгзаган шоир эса чап томонда, қадду камолини наэокат билан ростлаган, ёпирај, эгнида бари узун, заррин магизли банорас камзул, бошида ихчам симоби салла, оёғида қайрилма тумшуқли қизил кавш, борингки, улуғвор қиёфага кириб, савлату викор тўккан, оғиздан эса баркамол сўзлар дур янглиг сочилади:

Шоирингман, юз бурма, санам,  
Мен сен сари интилгувчи рух!..

Етти бор қайта ухлаганда ҳам тушига кирмайдиган манзара Гайбиддинни тамом гангитди, адашиб бошқа жойга келиб қолмадимми, дея хиёл ортга ҳам тисарилди. Йүқ, нега адашсин, бу каталакдаги ҳамма нарса яхши таниш — манови игнаси ейилиб кетган патефон-радиоладан тортиб оёқ қўйса зорлангандай гижирлайдиган илма-тешик полгача тамом бадига урган-ку! Аммо, оғарин, дарз еган манови шамдон билан оҳори унча тўкилмаган қадими банорас камзулга қойил қолди. Мақсади нимайкин? Шоири тушгур йўқ ердаги шунақа ғалати қилиқларни топиштириб юради-да!

Гайбиддин бир қулимсираб, бир алами келиб астасста илгари босди, гаройиб салтанат эгасини у ёнидан, бу ёнидан ўтиб синчиклаб кузатди. Шахзодаларникини эслатадиган вазмин қиёфа заррача ўзгармади, табассум аралаш сўз дурлари ёғилаверди. Якун айниқса тантанавор бўлди. Агар қарписида одобсиз меҳмон безрайиб турмаганда ўша жўшқинлиги билан шоир деразадан қанот қоққанча учиб чиқиб кетиши чўт эмасди. Парвоз ўрнига у қичқирди:

— Қелишинингизни билардим, мавлоно! — деди қуличини ёзиб. — Қани, бир бағримга босай, шундай соғиндимки! Ие, ие, нега тортинадилар, қани, қани, қучогимга марҳабо!

Шўрлик Гайбиддин туппа-тузук тили-жагидан айрилган...

— Э, ўл-э, одам қўрмагандай намунча безраясан? — Расул Усмон дафтарни каравот тагига улоқтириди, шохона кийимини алмаштириди. — Ё, нима, таъмир ёқмадими? Унда дидинг дид эмас, туршак экан. Ахир мен бунга етишгунчча тугаёздим-а! Яхшиям театрда бир танишимни учратдим, мановиларни ўша қарашибди. Шамдон она сутимни оғзимдан келтирди. Охири музейникини тинчтдим, янги бинога кўчишаётган экан баҳтимга. Нима қипти, камайиб қўлармиди? Ўзиям нақ Амир Темур Кўксаройини безаганлари хилидан бўлса керак.

— Бирпас чакагингни ўчирасанми, йўқми? — бўғилди Гайбиддин.

— Ӯчирман. Фақат аввал айт: салтанат таъмири ёқдими, йўқми? Ҳеч бўлмаса манови кийим ҳақида гапиргин. Каминага муносибми? Кўпам қаттол бўлма лекин, абллаҳ! Мен ҳаммасини мактаб саҳнасидан бошла-

моқчиман, адабиёт муаллимига ваъда бердим. Таржи-  
маи ҳол учун жуда керак. Хўш, муносибми?

— Муносиб, — деди Гайбиддин бир қадам илгари  
босиб. — Айниқса менга манови салла ёқди. У ишимни  
енгиллаштиради. Сени бўғиб ўлдиromoқчиман!

— Гуноҳим недур? — ёлғондакам жавдиради Расул  
Усмон. — Во дариг, эндиғина муносиб либосга етишга-  
нимда... Шафқат қилгин, эй шеърият жаллоди!

Жамила билан кечган суҳбатни икир-чикиригача  
эслаб жиз-биз бўлган Гайбиддин ўтингни инобатга ол-  
мади, тамом жиддийлашди, салла учини сиртмоқ қилиб  
хиёл эгилган бўйинга солди.

— Қани, ошна, калимаи шаҳодатингни келтир! —  
деди сўнгра қовоқ уйиб. — Қалам жанозасини ўқидим,  
илҳом париси билан аразлашдим, деб ишонтирувдинг.  
Қасамни бузганингга майли чидай, лекин бадкирдор  
қаламингни қўксимга найза қилиб санчаётганингга қандай  
чидайин?

— Жаллод деганиям гапни шунаقا ғужала қила-  
дими?

— Бўпти, ғужала қилмайман, калимангни ўқи!  
Сиртмоқ тортилди, шоир мункиб, хириллади.

— Алвидо, шеърият!

— Э-э, шеъриятинг билан ҳар нарса бўл! — жони-  
дан тўйиб кетган Гайбиддин саллани қайириб ташла-  
ди. — Қўй, бўлмас экан, мен на ўлдиришни биламан,  
сен на ўлишни биласан! Мабодо кунинг битса, ёмони,  
сенга ҳайкал қўйишим керак. Шу азоб менга зарилми?

— Ҳа-ҳа, кўзингга қара, биродар, бир иш қилиб қўй-  
санг бари бир ҳайкал ўрнатасан! — Расул Усмон буки-  
либ, инқилаб-синқилаб, каравот тагидан дафтарини  
олди. — Анойи эмасман бекорга ўлиб кетаверсам. Таво-  
ним шу — ҳайкал! Ким шу ишни эплайдиган бўлса, ана,  
сиртмоқ тайёр!

— Жағингга от тепсин-э! — деди келганига пушай-  
мон қилиб Гайбиддин. — Нима бало, шеър ўқимоқчи-  
мисан, офат? Худо ҳақи, ундан қила кўрма, шафқатинг-  
ни аяма, яхшиси бир бурда нон билан бир қултум сув  
бер, Нил тимсоҳларидан ҳам бешбаттар очман!

— Нил тимсоҳларидан бири қаршингда-ку! — аввал  
кўкрагига, кейин қорнига нуқилади Расул Усмон. —  
Биласанми, эрталабдан бери нимани орзу қилдим: оқи-  
батли Гайбижон ишқилиб анувинаقا қази олиб келма-  
син-да, макруҳ нарса томоқдан ўтмайди, дўкондан гўшт

ҳам харид қилмасин, пишириши бор, раста ёнидан ўтатуриб нони осиёдан бир жуфтгинасини олволса бас, ўзимизда сув жонивор бемаън!..

— Мабодо очдан ўлсанг ҳайкали ким қўяди? — деди Гайбиддин тўнгиллаб. — Ёки, нима, васиятноманг тайёрми?

— Балогардон ўзингсан-да, — деди кулиб Расул Усмон. — Лекин, очиги, очлик мени саранжом қилолмайди. Жоним қаттиқ!

— Ёмонга ўлим йўқ десанг-чи! — чироқни ёқиб, шамни шуфлаб ўчирган Расул Усмонга ола қарашиб қилди Гайбиддин. — Аммо, ҳайронман, ўлигинг тугул тиригинг ҳам уч пулга қиммат-у, қаҳри тош одам ҳам сени кўрса ияди. Отамдай инжиқ одамни қандай эритиб олганингга куяман.

— Уддабуронмиз-да, — мақтовдан талтайди Расул Усмон.

— Тўртта суюқ шеър билан уддабурон бўлиб қолдингми? — деди энсаси қотиб Гайбиддин. — Доғулиман, десанг ишонардим. Лекин, ким бўлсанг ҳам ҳозир орани очиқ қилиб олишим керак. Қани, ўзинг танла, муштми ёки курашиб?

— Мен қалам билан жанг қиласман, — деди Расул Усмон кўкрагини кериб, нари-бери саланглаб юрганча. — Аммо, ов, босқинчи, бундай маънисиз жангдан муддао недур? Бари бир енгиласан, бадарга бўласан, мен-чи, мен енгиб нимага эришаман!?

Иzzат-нафси оғриган Гайбиддин ҳануз қадди-камолини худписандларча намойиш этаётган, ичини эса очлик таталаётган шоир билагидан силтаб тортди-да, сим каравотга юзтубан босди, тасодифан қўлига илинган қайиш тўғаси билан думбасига тасирлатиб ура кетди: «Мана сен эришадиган нарса! Мана, мана!..» Тўға шувиллаб тушгандан шоир сапчилаб-сапчилаб кетар, алланечук бир итоаткорлик билан бўғилиб бўкирар эди, борингки, беибо шеър жафосини бечора думба тортди, расо кўпчиди, тилим-тилим ёрилди.

— Жаллод! — пишқирди у зўравон чанглдан қутулган заҳоти.

- Ҳали сенга бу кам.
- Гуноҳимни айт.
- Кўзларингда хиёнат кўрдим.
- Бўҳтон!
- Қани, ўқи-чи, Жамилагага атаганингни.

— Э, бундай демайсанми, ярамас!

— Бўла қол, ўз қулогим билан эшитай.

— Худо ҳақи у сенга ёқмайди.

— Менга ёқиши шартмас, Жамила хушлабди, етади, — яна ўқрайди Файбиддин. — Қани, бошла. Дурдона яратибсан шекилли. Аммо, ўлдирай десам, эрта ҳайкал ўрнатиш балоси бор. Бошқа йўлини қиласман, тики қайтиб содда қиз бошини айлантирмаслигинг учун тилингни кесиб, кўзингни ўйиб итга ташлайман.

— Ов, бунча ҳовлиқмасанг, нима, ўша ойимчангга севги изҳор қипманми!? — энди шоир ранги бир қадар оқаринқираган эди. — Тавба, яхшилик қиласман десанг ҳам балога қоласан-э!

— Ҳали севги ҳам изҳор қилмоқчимидинг? — Файбиддин Расул Усмон бетига илкис шапалоқ тортди. — Ишонмагин дўстингга, сомон тиқар пўстингга!

— Тоза худонинг газаби экансан-ку, — ниҳоят ўзини тутолмай дўстини итариб юборди Расул Усмон. — Нима, шеър атаган ёки ўқиб берган бўлсам бирор жойи камайиб қоптими? Аввалига, бор, бора қол, ёрдам бер, ёлғиз қийналди, деб қисталанг қилдинг, энди мунақа... чиғириққа соласан. Талмовсираганча пичоқни олиб кўксимга урсанг-чи! Бўлди, бас, ўша устаҳонани қайтиб елкамнинг чуқури кўрсин!

— Мен ёрдам бер деганман, шеър тўқи, қасида бағиша, миясини айнитиб абгор қил, демагандирман-ку! — уни ёқасидан бўғиб, қаттиқ силкилаб қўйворди Файбиддин. — Жа бу, билмаган эканман, Лизахонни олти ойгина севиб, файласуф бўлиб кетган экансан-да, а? Мұҳабbat мустақиллиги Фарҳод ёки Отабекнинг тушига ҳам кирмаган, сен осонгина ўйлаб топибсан.Faқат, ҳайронман, айт-чи, умри олти ойдан ошмайдиган ишқ ўзини қандай тазиикдан ҳимоя қилиши мумкин!? Қани, гапир, нима бало, гунг бўп қолдингми?

— Эҳтимол, ўша муддат... мен учун бир умрга татир! — ниҳоят кўнгли чўкиб ғулдиради Расул Усмон. — Сен умр бўйи сифинадиган севги қисқа умр кўрган ўша севги олдида арзимаслиги мумкин. Эсингдами, бир пайтлар сен, Гириҳ изтироблардан яралади, деганингда, уста мийигида кулган эди. Ҳўш, сабаб? Ҳеч қачон изтиробнинг ўзи Гириҳга айланмайди. Худди шунга ўхшаб, оҳ-воҳнинг ўзи мұҳабbat әмас, афсуски, буни жуда кеч англайпман.

Расул Усмон ҳақ: ҳеч қачон ёлғиз изтироб Гириҳга

шаклу шамойил беролмайди, Гирих қиёфасини ўнглаши учун қалам укув ва дидга суюниб заҳмат тортишига тўғри келади, қалам эзгулик замиридаги некбин маъноларни бўйсундирган тақдирдагина изтироб ҳам Гирих сари юзланади. Буни Расул Усмон ўзича түяди, бундан ўзича хulosалар ясади; шу жиҳатдан бахти чопиб, Тилла-кори паноҳига келишганда, у ўзини кўрсатолган эди. Хомаки чизмаларда уйғун нуқталарни адашмай топишига уста тан берди, Расул Усмон деса ипакдек эшиладиган бўлди.

— Гапни айлантирма, — пича ҳовридан тушди Файбиддин. — Юзимга оёқ қўйганингни тан ол, мардлик қилсанг кечираман. Жамила сени шунақа мақтадики, ҳасаддан бўғилиб ўлаёздим, эртагаёқ мени ташлаб, сен билан бўлиб кетишига ишондим.

— Жамила мени мақтадими? Жамиладай сулув-а!

— Ҳах, рўдапо! — пўнгиллади Файбиддин.

— Сулувинг ўзингга насиб қилсин, — енгил уф тортди Расул Усмон. — Аммо, рости, бунақасини оёкяланг бўлиб қидирганингда ҳам ер юзида бошқа учратмайсан. Ўлдирсанг ўлдир, сенга ҳасад қилишим рост! Нима қилай, Ҳазрат Навоий ғазалларини ўқиганимда... шу санам ёдимга тушаверади.

— Лиза нима бўлди, Лиза?

— Лиза ҳақида бундай безбетлик билан сўрама! — дўстини силтаб ташлади Расул Усмон, айни чоқда чехраси бир эзгинликдан буришди. — Билсанг, бу айрилиқ мен учун келажак, шухрат! Сен учун эса бунақа дард аҳамиятсиз, эрта мабодо Жамила ташлаб кетганда ҳам сенинг ҳаётингда ҳеч нарса ўзгармайди. Нари борса биттасига уйланниб оласан, кейин қарабсанки, бир қажава жўжа!..

— Худди ўзинг уйланмайдигандек ганирасан-а!

— Ҳакорат қилма одамни. Мен қисматимни аллақачон битдим: тоқ ўтаман. Уйланиш фожиа, эрк устидан қора хукм ўқилиши! — Расул Усмон деразадан ташқариға — қоронғиликка ўйчан тикилди, салдан сўнг аста ўгирилди. — Кўпдан бери ўйлайман: одам бир нарсага сигиниб яшагани маъқулми ёки бепарво яшаганими? Бепарволик эркинликка яқиндай, лекин бу ҳолда тандан кўра рух эрта қарииди. Рухинг қариидими, тамом, ҳаётдан безасан.

— Муддаога ўта қол, файласуф!

— Муддао аниқ: эрта қариётганимиз йўқми?

— Эсингни еб қўйибсан.

— Йўқ, сен яхшироқ эшит, ҳадеб сапчилайверма, — Гайдиддин қаршисида тик турганча эзмаланди Расул Усмон. — Мен фақат сенинг эрта-кеч отанг ёнида Гириҳга сифинишингни ёки ўзимниг тунлари шам ёқиб қалам билан қогозга юрагимни тўкишимни айтмоқчи эмасман. Биз бу юмушларни ўз хоҳишимиз билан адо этамиз, демак, бунда — на зерикиш, на қариш! Энди, қара, зарурат туфайли бажо келтирилган юмушни яrim йўлда бир куч ими-жим тўхтатади, сен ҳам ими-жим у билан муроса қилмоқчи бўласан, эплолмайсан, ноилож олиша бошлайсан, йиқиласан, ёлворишга ўтасан, кулгиға қоласан, кейин охирги чорани қўллашга мажбур бўласан — сифинасан. Оқибатда хуш-фиркинг ўшанда! Энди сен шунчаки тирик товонсан. Нима десалар қуллуқ қилиб бажаришдан нари ўтолмайсан. Бу нима — лоқайдлик-да! Руҳингда уйғонган толғинликни аста-секин қарилек аломати боса боради. Қани, айт, бу ҳолда отонанг, дўстинг ёки маъшуқангга қиё боқиб қўйгани ҳафсаланг етадими? Мен ўзимгамас, сенга ачинаман, сен кўп нарсани бой бердинг, энди янайм чатоги — Жамила ишончини йўқотишинг.

— Енгилдим! — деди Гайдиддин шивирлаб.

— Сен доим осон енгиласан, — деб у лабини бурди. — Енгилиш сенга ёқади. Хўш, энди шаҳардан бадарга кетасанми? Кўй, майли, мен рози, Самарқандни ғариб қилма, Жамилани ўйла, мен уни ҳижрон ҷоҳидан қутқариб қололмайман, ўзим ўша ерни ижарага олганман.

— Сафсатавоз! — хезланди Гайдиддин. — Тугатдингми? Ёки яна чаласи борми? Мен енгилдим, шафқатингни дариг тутмаганинг учун қуллуқ, эвазига сени уйимга таклиф қиласман. Нозланмай юравер! Бу ерда ҳаётинг хавф остида, ҳайкалдан эса умид йўқ!

— Айтганча, бугун уч-тўрт мири тегармикин деган умид билан устахонага борувдим, — кулимсиди Расул Усмон. — Анови бақбақаси осилган ҳисобчи аёл чўтини шақиллатиб дагдага қилиб қолса борми! Жўнавормасам пешонамни уриб ёармиди? Илвиллаб қайтаётсам уста кўриндилар, уялганимдан аста ўзимни панага тортдим.

— Саломлашишниям эп билмабсан-да?

— Э, жинни, саломлашиш учун ҳам мундайроқ рафттор керак-да! Мен у кишига кўринадиган ахволда эмасдим, — деди қизишиб Расул Усмон. — Лекин.. анови акахон қовоги ёмон солиқ эди. Устани роса талаган бўл-

са керак. Овози деразадан ташқарига ҳам эшитилиб турди.

— Карвон олдида шу акахон-да, а? — кесатди Гайбиддин. — Лекин, жўра, бу одамга сифиниш эмас, калтак раво! Ўлмасак кўрамиз. Қани, овмин, кетдим! Мен билан борасанми, йўқми?

Расул Усмон дўсти таклифидан кечди. Сен мени якка деб ўйлама, сендан кўра содикроқ ҳамроҳим бор, яъни қалам, у ҳам оч, дардимиз бир, тириклигимиз бир, хуллас, аҳволимиз сен тахмин қилаётганчалик эмас, дея шакаргуфторлик қилди. Ташқарига чиқишигандан сўнг гап яна Жамила атрофида айланди. Юлдузларга термилиб Гайбиддин хўрсинди, ич-ичида бир олам ҳасрат уюлиб ётганлигини шундоққина ифодалаган хўрсиниққа жавобан Расул Усмон чала жойидан олди: «Кўнглингга тегиб кетмасин, уста ақидапараст одам, фақат ўзи билганини бех санайди. Обида мажрух бўлганига куйинади, лекин... бошқа тараф ёнаверса майли экан-да. Ораларингдаги мұомаладан беҳабарми? Яра бутунлай газакламасдан иложини қилгин, номард!» Қуюнчак шоир ҳали-бери тинадиган эмасди, Гайбиддин нафаси қайтиб кеттанига шама қилди, бўлмади, жағинггга от тепсин, деб кўрди, тагин бўлмади, жаврайверди, охири, қўл силтаб, автобус кутмай, пиёда жўнади.

Тахминан соат ўн иккиларда у, Жамила қадди-бастини хаёлида гавдалантиришга уринганча, жимжит кўча бўйлаб оғир-оғир қадам ташлаб борар эди, қалқони тешилиб қайтаётган эди. Ахир, шеъри-қофиясини пеша қилиб ҳаддидан ошган шоир таъзирини бермоқчи эди, ўзи боилабгина адабини еди. Ярамас узундан-узун даромад қила-қила лоқайдлигини бетига солди. Бир винтинг синган, деди-да! Худо ҳақи, ҳар қанча кўпирргани билан бу бобда ўзи қуруқ, лоқайдлик нималигини фаҳми олмайди. Лекин, во ажаб, «Қирқ ривоят»нинг қайсиdir сахифасида одамзодга жуда тез илашадиган шу иллат лўндангина таърифланган, мана бундай: «Кунини фаромушликда имиллаб кечирадургон ва бефарқлиғ илкиға ҳад бергон банда қисқичбақа кабидур, кучи етғон ҳар нени қисқичига қисадур ва хоҳлагон тарафига судрайдур, алҳол, ул нимарсадин ўзгаси қадрини эътиборидин соқит қиладур. Гарчанд йўлда нафси тилагонидин оғирроқ юқта йўлиқғонини сезсанким, ўшал фурсатда они ташлаб қочадур, бул қилиғидин бир озор емас, билъякс ҳузурланадур...» Чечанлик билан қилинган нақл! Наҳотки,

Расул Усмон шунга ишорат берган бўлса? Нима, у гарданига манзилгача эплаши маҳол юк ортганми?

Очликдан силласи қуриёзган Гайбиддин дарчадан кириши билан у ёқ-бу ёққа бурилмай тўппа-тўғри ошхонага шошилди. Димогини пиёздог хиди қитиқлади. Қозон тагидаги шовлани сузишга эриниб, тикка турганча, онаизорини ичиди мақтай-мақтай, ёғоч қошиқ билан апил-тапил туширди. Оҳ, мана буни ҳузур деса арзийди! Энди бу паллада шоиржон нима қилаётган бўлса? Чиноқ қалами билан семиз дафтарини ёстиги тагига қўйволовиб, бир йилда камида ўн даргоҳга саёҳат қилган адёлини тамогигача тортиб, тишгинаси кирини сўриб, губбагужанак бўлиб олгандир-да! Бундан ҳам баттар бўлсин, юр деганда кўнмади, нозланди, келса, мана, марҳамат, манови шохона таомдан тотиниб қавзанарди. Бугун мавш ололмабди. Бечора шунга роса куйган. Асли неча ойдан бери Расул Усмон ҳам, бошқа шогирдлар ҳам чўнтақ гадоси: бир вақтида елкасига шайтон қўнган Маъруф Афзалович щунчаки қилган оғзаки фармойиш билан бригада тарқатилди, тирикчилик важҳидан маҳрум қилинди. Бош мутасадди бутун инон-ихтиёри ўз измида бўлган ғилдиракни бу даража кескин чапнасига айлантириб юборажагини ҳеч ким, ҳатто уста ҳам кутмаган эди. Чорасизликда қолиб у ёққа чопишли, бу ёққа суйканишиди, жавоб битта бўлди: аравасини тортмаётган бригадани тутиб туролмаймиз!

Сал қорни қоззангандан кейин эътибор берсаки, фақат биргина хона чироги ёник, демак, отаси уйгоқ, идорадан таланиб келган бўлса, бу даражада абгор қилишгани боисини қайта бошдан ўз тарозисига босаётгандир-да! Унча-мунчага бўй бермайдиган отасини у гоҳо тушунолмайди. Отаси тирикчилик ғамини аллақаҷон калласидан чиқариб ташлаган, щунчаки ўлмаснинг кунини қилиб юрибди. Бригадасини тум-тарақай қилиб юборишгандан ҳам сал бўлсин жирилламади. Тўғри, бориб Маъруф Афзалович афтига тупурмоқчи эди, фойда бермаслигини билди чоги, бундан ҳам тийилди, ҳали ўзи ялина-ялина одам йигиб беради, дея ёзгириш билан киояланди. Лекин галва фақат шугина эмас-да! Қуюғи тагида, яъни кўпдан кўп савдо бу қунда бекорчиликдан бурчак-бурчакда гийбат уясига ўт қўяётган анови бечоралар қозонга солиб қайнатадиган бирор егулик топиб келишларини не-не қора кўзлар жавдира бутишаётганида! Бу жиҳатини отаси ўйламайди, Гириҳ олдида ти-

рикчиликни сариқ чақага олмайди, унга қолса дунёга ўт тушмайдими, фақат анови обида билан Гирих омон бўлса бас! Нима қилсаки, обида дардига малҳам топса, Гирих дардига малҳам топса! Бу галва, бу чопа-чоп, бу урҳо-ур қачон тугайди — тамом қоронги! Тағин устига отаси ҳар замонда ёқасидан олгани, уйланишни истамай қочиб юрганини пеша қилгани, топмадингми, энди у ёгини ўзимизга қўйиб бер, дея дағдага қилгани ортиқча! Ахир чўнтакда ҳемири бўлмагандан кейин нарху нағони осмону фалакка чиқариб қўйган бу ўйнама замонда никоҳ тўйидек серҳаражат маъракани ўтқазиш осонми? Онаизори бир вақтида сал хүшёрлик қилиб сандигу бўхчага тиқишириб қўйган ялтири-юлтири парча-пурча билан қайгача бориш мумкин? Аввалроқ, ота-онамиз шошғанлари билан ҳомлари бор экан, камхаржлик қурсин, изза еб туришибди, деб Жамилагага важ кўрсатганда қанчалар уялувди, асли уялмаса ҳам бўларкан, ростини сўзлаган экан, камхаржлик хонадонларини тамомила ўраб олган экан...

Топган-тутгани ҳаминқадарлигига қарамай отаси ҳар неча вақтда Расул Усмонни пул-мул, у-бу егулик ёки кийим-кечак билан сийлаб кўнглини кўтариб туришини эслади. Бирдан кулгиси қистади. Бир жиҳати отаси гўдакфеъл, чўнтағига уч танга кирса қандай йўқотиши билмай тиширчилайди, ҳатто тагига сув қўймагунча тинч ухлолмайди. Сеп камини бутлаёлмай хуну бийрон онаизорга тутқазса-ку олам гулистан, лекин у бундай қилмайди, чойхонада шогирдларига ош дамлаб беради, ортганини эркатои Расул Усмонга тутқазади. Шоири тушгурни бу қадар сийлаб нима барака топарди. Кошки, у ҳимматни тушунса, бу нарса қадрига етса, мўмай ақчани бирор кори-ҳолига яратса! Етти чақирим наридан пул ҳидини сезадиган очопат улфатлари дарров атрофида пашибадай айланишади, охирги тийинигача қоқишириб олмагунча тинчишмайди. Мабодо улфатларидан бир амаллаб қутулса, албатта Лизахон карашмасига тутилади. Анча илгари «саҳнани латофатли оққуш каби безайдиган» (канде қилмай ёзиб борадиган кундалигидан) малак суйкалишларидан безор бўлгандан кейин, во даригки, «умид уфқидан ойдек балқиб» (ўша кундалиқдан) Лизахон чиқиб қолди. Тантиқроқ ўсган қиз кўнглини овлаш осон эмасди, кимлигини кўрсатишга ишқибоз шоир эса қизни ҳафтада бир ёки икки марта кино ёки музқаймоқ кафесига таклиф этишни порлоқ

орзуларидан санарди ва уста мурувват күргазгап кезлардагина бунга эришарди.

Күнлардан бир кун, нимадир бўлиб, Расул Усмон кундалиги билан мақтанди, ма, ўқи, фақат сендай жон дўстимга раво, бошқага ҳатто рангиниям кўрсатмайман, деб керилди. Эринмай ўқиди, бир жойида қўнгли юмшади, бир жойида аччиқланди, кулди. Ҳар ҳолда қурғурнинг туйғулари чақиндай эди. Бир ёниш шунча-да! Тўғриси, Жамила билан тотувлашгандан бери, ўзи ҳам кундалик тутади. Бирор кун ёки учрашув тафсилотини туширмасдан майда-чуйдасигача ишо этади, лекин битиклари унидек тиник ва баланд жарангламайди.

Тун кичик саҳар сари оққанда Гайбиддин ухлолмай ташқарига чиқди, ҳалиги хонада чироқ ҳануз ёниқ, демак, отаси ҳам бедор: ўз азоби, ўз илинжи, ўз аҳди-қарорига кўмилиб ўтирибди. Балки, бирор рисола узра мук тушиб, масала-қоида ечиб, қандайдир ноаниқ моҳият заминида захмат чекаётгандир, балки. «Қирқ ривоят» билан машғулдир ёки тальбига яқин шоир қаламига мансуб нозик газал комига чўумиб, завқу сафо сураётгандир. Иложи қанча, отаси қариган, қушуйқу бўлиб қолган, шунга яраша гоҳ серзарда, гоҳ мулойим, гоҳ гажир! Ҳаммасидан чатоги, кун сайин феъли нозиклашади, хурсандчиликка ҳам, хафачиликка ҳам деярли чидамайди, сал қажликни кўрганда жон-пони чиқиб кетади, ўпка-гинани қалаштириб ташлайди, дарров ичидаги кудр тош бойлайди, алҳол, бу тошини жойидан силжитадиган куч қани ҳадеганда топила қолса! Кўпинча Гайбиддиннинг ўзи балогардон! Чоли тушгур ёмон қариди, эҳтиёт бўл, раъйини синдирма, иложини қилиб қўнглига кир, тагин дуойи бад қилиб қўймасин, унда икки дунёдаям коссанг таги оқармайди, бошингача касофатга ботасан, жонинг мондимайди, деб гоҳ хайрҳоҳлик, гоҳ гайирлик билан кимлар панд суқишитирмади. Ҳар бири бир пайғамбар, ҳеч қурса авлиё бўлган бу насиҳатгўйларнинг қайсисини тингласин, қайсисига қуллуқ қилсин. Гайирликда у қарийб отасига тортган, шунга кўра ҳеч қачон билганидан тоймайди, керак бўлса ўша жонкуярларга жавобан маймункулги қилди, лаб-лунжини шишириб ишшайди: «Тошларингни терсаларинг-чи!» Ана шунака қўполлик қилгани билан ичидаги бошқа муддао ётади, яъниким, отам ёлғиз, отамни қўлланим керак, паст кетмасак, дадил турсак, улоқни узиб чиқсак — омадимиз чопгани, Гириҳ йўли очилгани...

Кичик сахар осмонига хос сокинликни туйиб, юлдузлар живир-живирини кузатганча, бир пас ҳовли айланди, отаси эса чироқни ўчиравермади, негадир гашланди, бу палла Расул Усмон қаламга роз айтётгандир, лобаргинам Жамила пар ёстиқقا сўлим соchlарини ўйганча асалдек ширин тушлар кўраётгандир, фақат мен ёқимсиз бекорчиликни маҳримга тушириб олганман, деган хаёлга борди. Билади, Жамилахон туши ҳам ўзиdek беозор, ўзиdek малоҳатли: ана, ақиқ лаблари тамшанади, бўсага интиқ, интизор! Э, художон, санам фақат уни туш шу ҳакда нималарнидир қоралаган: «Ўзи айтди, мен уни тушида муттасил безовта қиласман, нуқул бағримга бо-сармишман, чатнаган дудоқларидан, оққушникидек оппоқ бўйнидан иссиқ-иссиқ бўсалар олармишман. Тушунарли: мен унинг хаёлида, жонида... бир оғриқман. У ҳам мен учун шундайми? Қасам ичаманки, бундан минг чандон зиёда! У, жонимдаги оғриқцина эмас, жоним ичра яна бир ёруғ жаҳондир!» Сокин осмондан нигоҳини узид Гайбиддин оғир энтиқди, беихтиёр изига бурилди, стол устида турган кундалигини очди. Бугунги учрашувни ёзгиси келди, сиёҳ-қаламни қўлга олиши билан ўйлаганлари шуури аро ҳудудсиз бир сарҳадга чекинди. Саҳифа узра Жамила суврати жилмайди, суврат бехос тилга кирди: «Жоним, бурро-бурро қилиб сўйланг-чи, суйиш дегани нима? Бир шоир суйишда минг бир жилва, минг бир ноз, минг бир қийноқ жо эрур, деган экан. Анча жўн таъриф, ҳали бу бобда ҳеч бир мезон топилмаган. Сиз, балки, кўнгил юлдузи кўнгил юлдузи билан қовушганда ҳар қандай жумбоққа ўрин қолмаслигига ишонмассиз! Ўзимни мунглуғ ва бенаво санамасам-да, бунга бир қадар умид боғлайман. Ўша кун ёвуқми, йироқ? Адашмасам, муҳаббат қадри дийдорда, биз эса висол оралиғидаги масофани узайтириш билан оворамиз. Худди шу нарса иккимиз учун ҳам бирдек қадрли алланга нелигини, сизни билмадим-у, менга тобора чуқур англатмоқда. Одамзод ўз бардошининг ҳам қурбони бўлиши мумкиними? Ўйлаб кўринг, жоним? Маза-матрасиз бундай қурбонлик кимга ҳам керак?»

Ҳали суврат кўп дарди-ҳоли қилиши мумкин эди, лекин ҳар луқмаси келиб қўксига санчилаётгани боис Гайбиддин бир хўмрайгандики, у ҳалиги ўйлар қатори чекилди. Сўнг, у чорасиз ўтириди, калласига бирон тайинли фикр кўнмади, Жамила ва кейин Расул Усмон би-

лан ораларыда кечган сұхбат баёнини ҳарчанд уринмасин бир нұқтага йиголмади, ёзолмаслигига күзи етгач, кундаликни варақлади, дуч келган жойидан шошилмай үқиди:

«Бугун отам менга анча титилган, яқин-орада қўк бахмалдан муқова қилинган, муаллифи ҳам, хаттоти ҳам номаълум мажмуа берди. Атамаси «Қирқ ривоят» бўлиб, айтишларича, рисола бошига кўп савдолар тушган, тасодифан Қодирбек исмли бардоши метин ошиаси уни бало-қазо чангалидан омон олиб қолган.

Илгари ёзма ёдгорликларга ишим кўп тушгани, яъни отам даъвати билан кўхна китобатга ишқ қўйганимни айтсам мақтанчоқликка йўйилмас, хуллас, қайда ва кимда арабий ёзувда рисола бўлса олиб ўқимагунимча ором нималигини билмас эдим, интилганимга яраша ҳар доим шундай ҳузурланиб, қониқиши ҳосил қилардимки, бу ҳол мени нашаванддек қилиб қўйган эди. Тошканди азимдаги матълуму машхур хазинага ҳадеганда қўлим етавермагани боис афсусланиб, Самарқанд дорилғунунига қарашли кутубхона жовонларини титпитет қилиб, ютоқиб турганимда «Қирқ ривоят» қўлимга тегди. Тан олай, уни мутолаа қилиш осон кўчмади, у дидли хаттот томонидан майда настаълиқ хатида фоят бежирим қилиб қўчирилган бўлиб, айrim варақлари йўқолгани устига, бутун-бутун жумлалари ва сўзлари ўчиб-чаплашиб кетган эди. Яна тан олсан, мashaққат тортганим бир ҳузур берса, бир аламимни қўзғади. Ахир бу қандай савдо? Мутолаага киришганим ҳамоно юрагим нидо қиласи: «Бегона! Бегона!» Йўқ, дейман мен фифонга тўлиб, у бегонамас, ўзингники, қадимда яшаган бобонг уни сену менга мерос қилиб қолдирган, у ўзингники, фақат уни бегона қилиб қўйишган, чеҳраи малоҳатига ниқоб тортишган. Ана шу ниқобни олиб ташласак бари юришиб кетади. Орадаги тўсиқ қўтарилади. Лекин, ҳозирча мен иккакол, омоч тортаётган ёлғиз ҳўқиздек кучаниб, пайларим таранглашиб, мажруҳ мажмуя узра азобу зардоб ютишга мажбурман. Ва шу юмушга ўзимни бағишлидим. Бирор гаройиб ривоят энг қизиқ жойида тўсатдан узилиб қолганда бирор калтак билан калламга ургандек бўлар, беихтиёр бир кун отам ўқина-ўқина айтган ҳикоя — амаким мулла Ражаб умр бўйи емай-ичмай йиққан китобларини анҳорга оқизгани, китоблар Умар деган шинаванда чол қарайдиган тегирмон нови-паррагига тиқилиб қолгани, дўлу тош тўхтагани,

бу уволга чидолмай биргина қуръонни олиб яширган чолни ҳайдаб кетишганини эслардим. Минг-минг йил аввал бино бўлган сўздан шамшир ясаб бош узганларини ким қандай баҳолайди? Билмадим, билмадим! Ҳар ҳолда мен «Қирқ ривоят»ни саҳифама-саҳифа кўчиришдим. Элга тарқатаман. Кўп ривоят узуқ-юлуқ, фактат «Икки наққош» ва яна тўрт-бештаси тугал экан...»

, Ҳали Гайбиддин тахмин қилган бўлса ҳам худди шу фурсатда отаси айнан «Қирқ ривоят»ни варақлаётгани, нозик маънолар билан безангтан «Икки наққош»ни қайта ўқиб, чархи гардун азал-абад бевафолик билан пойдор экан-да, деган мулоҳаза оғушида эриб-эзилиб бораётганидан бехабар эди.

## V

Бугун чиндан ҳам устахонадан таланиб қайтган уста китоб кўриб ўтирган жойида дарча қийиллаб аста очилгани, Гайбиддин ошхонада тимискиланиб қорнини тўйғазгани, ҳовли кезингани, сўнг ими-жим хонасига қамалгани, кичик саҳарда уйқусираб ташқари чиққани — бари-барини билди. Енимга келар, деб илинди, келса дардлашаман, эрта-индин нима қилиш кераклигини маслаҳат соламан, деган хаёлни қилди. Нияти ниятлигича қолди, йигити тушгур атай қочди, кўриниш беришни истамай, каталагига яширинди.

Хориганига қарамай уста «Қирқ ривоят» билан тамоми мулоқотга киришган эди, нигоҳи заха саҳифалар аро югураётганда тасаввури тубига чўккан хотиралари қалқиб-қалқиб кетаётган эди. Тасаввурида анҳорни тоширган, залвар тегирмонни тўхтатиб қўйган китобат! Зеру забар бўлди! Ким ачинди? Бу ёги яратганга аён, ҳар ҳолда анови Матъруф Афзалович, меҳроб эскирган деб дагдага қилаётган банда, ўшандা оқим ютиб юбориши мумкин бўлган рисолани раҳму шафқат юзасидан қутқарган имондор чолни дагдага билан ҳайдаб кетган, тепиб-тепкилаб қафасга тиққан биродарларга аллақандай яқинов! Агар иложини топса, давру даврон кўтарса, меҳроб бир тушунча баробарида эскиргани ҳолда қиёфасида яшаётган санъат эскирган эмас, деб паст тушмаётган уста тақдирини бир зарб билан бичарди-қўярди. Ана, уста Иброҳимни ўзига қалқон қилиб олибди, ҳарнечук жонини сақлаш, йўригини ўтказиш усулини топибди.

Хўш, бу банда кимлиги маълум, лекин уста Иброҳимни тағин нима жин чалдийкин? Ахир ўзини таъмирчилар сиртлони чоғлаган бу валломат эрта елкасидағи шунча оғир юқ билан пулисирот қўпригидан қандоғ ўтаркин?

Ўйқуси тамом учган, хўроллар бўғиқ қичқираётганига эътибор бермай қўйган уста «Қирқ ривоят»ни вараклашда давом этаркан, беихтиёр Қодирбекни хотирлади. Узоқ Туркистондан сал кам қирқ йил бурунги кўмма жойини айтиш, киндиқ қони томган маконни зиёрат айлаш учун келган банда залвар ўқинчлар билан қайтиб кетгандан кейин ой ўтар-ўтмай қазо қилган эди. Жанозаи савоб хабарномасини олди. Аттангки, икир-чикирларга кўмилгани, Гириҳ талваси ичра ётгани туфайли вақтини қизғанганидан на жанозага, на фотиҳага боролди. Гириҳ деб сону сабоқдан чиқдинг, шўрпешона банда, деди ўзига ўзи қаҳрланиб, эрта қоронги гўрингга думаласанг руху арвоҳингни йўқлаб бир чумчуқ келмайди. Буни ўйлаш аламли, лекин ундан ҳам аламлироғи — манови рисолаи муаззамни келгуси учун асраб қололган банда ҳурматини ўрнига қўёлмагани! Вақтни бой берди, энди бу савоб насиб қиладими ёки йўқми, билмайди, аммо нетонгки, «Қирқ ривоят»да шу хил уволлар ва савоблар илдизига бориб тақаладиган ибратомуз нақллар анчагина, шулардан энг мумтози — «Икки наққош», у устани азалдан ром этган. Аниқроғи, илгари уста бу мажмууани амакиси мулла Ражабникида кўрган, раҳматли отаси уста Жамшиддин билан бақамти ўқиб, қатларидан маъни гуҳарларини терган эди. Ўша кезларда кўп обрў орттирган амри маъруф даврасини буткул мафтун айлаган, буткул сеҳрлаган «Икки наққош»да номаълум муаллиф ушбу воқеотни битган:

«Тангри таолога ҳамду саноларким, аршдин олиймақом даражали ваҳий йўллабдур, аҳли мўминға маъқул кўрилғон ваҳий будур: рўйи заминда раҳмат нури, ҳавзу кавсар суйи ила рўшнои обод қилинғон шахри фирдавсмонанд яратилғай, курраи арзга узук янглиғ яраштурғон бул малоҳат макони устидан тоабад бало-қазо ўтмағай, ҳусни ҳар не қабоҳат ва разолатни маҳв этгай!

Ваҳий ёғилмоғи ила гардун бир беадад ёғдуга беланибдур, кўхна замин тасарруфида вояга етғон беназир фарзандлар — Сайхун ва Жайхун дарёлари оралиғида ястанғон сабзазорлар ўлкасида, саховатпеша Зарафшон яқосинда хосиятли бир субҳи содиқда зўр тадорик кечибдур, кўқдин иноят кўргозилғони боис Самарқанд

аталғон шаҳри саодатманднинг илк ғиши қўйилибдур. Бул муборак вазифаи муддаони Мовароуннаҳр ҳукмдори Ёфас ўғлон рагбатига кўра Арслонбек наққош билан Болимбек наққош адо этибдурлар.

Баҳаво ва осойинта соҳилни қурилиш авжу сурони қамрагон бир айёми муборакда подшоҳ мубоширликни гарданига олғон ошналарни хонаи хосига чорлабдур, аларни хуш қаломлару шоҳона ёриқлар билан обдан сийлаб, мажлис адоғида бунингдек тилак айтибдур:

— Узоқ бир тунда уйқудин фориг ўлиб ўйласам шаҳристон қиёфатида бир сакталик бордек туюлди. Шаҳристонга андоғ бир иморат лозимга ўхшайдурким, ул Саодат уйи эрур. Шул ҳам қад ростласа сакталик чекинадур, зеро, биз эртамизни анда баркамол мажлислар билан хуш кечиргаймиз. Не демакка ҳаддингиз сиғадур, муҳтарам зотлар?

Наққошлар таъзим қилишди.

— Сиздек воҳиди замон тарафидадурмиз.

— Хўб шодмен, — деди ҳукмдор чехраси ёришиб. — Фақат фармони олий булким, иморатни бурун бирон элу элатда кўз кўрмагон нафис безаклар ила безагайсиз, токи ҳали хеч ерда анингдек мақомдағи бўлмагонини эътироф этсунлар.

Амри подшоҳ воҳибдур. Алалхусус, икки пешвои ҳунар хўб камоли эҳтиром ила яна қуллуқ бажо келтириб чиққонларидан сўнг шаҳристон қоқ ўртасида тушадурғон энг маҳобатли иморат шаклу шамойили бобида ўзаро қирқ кеча-кундуз маслаҳат солишибурлар, сўнг бир йиллик заҳмат баробаринда шойи қофозга тарҳи муборакни иншо этибдурлар, ҳаттоким, оғочдин бежирим улги<sup>1</sup> ҳам ясадурлар. Бир жума куни, подшоҳ хушвақтлиғ чогини мўлжаллагон ошналар мармар оstonада ҳозиру нозир бўлибдурлар. Шаҳристон ободонлиғ ва улугворлиғ сори юзланиб гуркираётғонидин мамнун ҳукмдор алар арзу баёнини сертакаллуғ қиёфада тинглабдур.

— Қиблагоҳ, маслаҳатингизни дастур қилдук, — деди Арслонбек комил ишонч ила. — Иншоolloҳ, жаноблари таъбига биноан, иморатни шул дамгача бир меъмор ёки муҳандис ақлу идрокидин кечмагон бир туркум нақши зебо ила зийнатламоққа орзумандлик қилдук. Ул туркум ажаб тугундин пойдор эрурким, таъбир жоиз-

<sup>1</sup> Макет — андоза.

лиги ўлса, они тангри хоҳиши бирла Гирих атамоқ мүмкіндур. Фақат, олампаноҳ, ўласакким, бул тугун жозибаи камолини эл кўзиға бутунича кўргазмак учун газнадин бисёр зару зевар талаб қилинадур.

— Бул талабни қондиришлуг мандин тан, — деб лутф қилди ҳукмдор қатъий оҳангда. — Сиз эса бошқа жиҳатга жавоб ҳозирланг. Эрта иморат камоли аён ўлғондин сўнг бардоши онча бўлгай, қуруқ танаси муаллақ қолиб, зар либослари ечилиб тушмасму?

— Бул тарафидин кўнгилни хотиржам тутингиз, олампаноҳ, — бурро-бурро сўзлади Арслонбек, азалдин хушфеълу алҳол камсухан ошинаи содик Болимбек ўз хайрхоҳлиги ила они суюди.— Қулингиз Болимбек сингори фаросатли банда ила иморатга бир либос кийдирмоққа даъвогарким, ул либос иморат ила даврул қиёматга қадар яшнагай ва мардум кўзини ўйнатгай!..

Наққошлар сарвари эҳтиром ила баён айлагон муддаойи сухан подшоҳ қулогига мой қадарлиғ ёқди. Яна бир бора дилидин тангри-таоло ҳукмига кўра улуғ савобоға ноил ўлаётганини кечирғонча аларни ҳар бандага насиб этмайдурғон қучогига тортди, шоён изҳор этдиким, кўнгилларни сарафroz этадурғон шул обидаи шарифни тутал жозибага эш айлаб, ҳар не нуқсдин холи тарзда оллоға тухғай ганж этсангиз, исмингиз тоабад тирик қолгусидур...

Алалхусус, Арслонбек ила Болимбек ёру биродарлик ришталарини болалик дамларидин қаттиқ боғлагон, но тоза нимарсалардин тану жонларини мосуво тутишгон, неки устивор, неки ғамбода кунлар насиб ўлғонда ҳам тузу намақдин узилишмай, оқибатни бой бермай келишардиким, бунингдек қадри қиём яна бир абадийлик битим тамалиға айланғон эрди. Очуғ баёни арз будирким, муруватли худойим дўсту қадрдон Арслонбек хонадонини алп Камон исмлиғ мўйлаби сабза ургон, илиги зап тўлишғон йигит пой-қадами бирла бадавлат айлабдур. Оқил тангри фарзандмандлиғ шавқу суруридин Болимбек наққошни ҳам бенасиб этмабдур, онинг бақо богини эслатадурғон бўстонини бир гунчай насрин жамоли ила обод этибдурким, бул лобар ҳусни кўк фаришталарини ҳам ҳасадга қўмгай. Ҳунарға муккадин кетғон ото холи бўлғонда кўпинча шаҳристон аро ҳуснда ягона қизи — Биби Нозик маликаликка, Ёфас ўғлон ўғилларидан бирорвига муносиб эрконлигини ўйламакка жазм этадур. Аммо сарой тарафидин имдод йўқлиги, боз устига бир за-

монда жондай ҳабиби Арслонбек қуда-андалиғ хусусида сүз очиб қўйғони боис шашти кўпик янглиғ сўнадур.

Хунар саодати ва мешаққати ила тамом сархушлиғ кўчасида адашғон ошиналар шундог ўнгларида бир қарчигай ила бир гунчай насрин камолот илкини тутиб, барчаға нишон ўлғонидин, дилларида ажаб ҳавас ва ажаб иштиёқ қулф ургонидин гафлатда қолишиди. Подшоҳ эътиборидаги иморат кўп забардаст эрди, алҳол, тилла сеҳри билангина ечилатурғон нақшлар тугуни аёвсиз эрди, бул залвар ва ингичка юмуш интиҳо сори юзланғонда онча шошғонларидин ҳам алар аҳду паймонидин фаромуш бўлишиди.

Кун ўтди, ҳафта-ой ўтди, йил неча бор айланди ва Саодат уйи гардун билан дийдорлашди. Иморат салобати бутун шаҳристонни ҳайратга кўмиб, турфа овозалар тарқалишига сабаб ўлиб турғон бир кунда, хуфтон арафаси Болимбек шодумон алфозда хонадонига аёқ қўйди. Нозиктаъб наққош кўчадин келган заҳоти минг бир тусли гули-сабзаси ва бута-ниҳоли ўзаро роз айтишиб, чор тарафни масти айлагувчи атру бўйларга тўлдирадурғон богини оралаб ором туймоқни одат қилғон эрди. Ушбу айёмда ҳам ўшал одатини ихтиёр айлади, яшил аланга мисол товланадурғон сарви сулув тагига етгон чоғ бир майин кулгидин ҳушёrlаниб аста тўхтади, жавобга йигит қаҳқаҳаси эшитилғонда мулзам бўлди, ҳатто жаҳзлға минди. Шукрким, ақл кучи ила шайтонни жи-ловлади, сўнг вақтни бой бермай, воқеотни биродариға сезидириб қўймоқлигни маъқул топди.

Алалхусус, кўхна аҳдга кўра, ошиналар қирқ қулокли қозонда палов дамлаб, маҳалла-кўй оқсоқоллари гувоҳлигига кенгаш ўткариб, битим тузишиди. Юртоға дуоға қўл очибдур: «Э, яратган эгам, неки мурувватинг бўлса алардин дариг тутмагин, даргоҳингни кенг қилгинки, алар ували-жували бўлиб, қўша қарисунлар, тоабад пок имону ёруғ рафтор ила яшасунлар!..»

Унаштирувдин сўнг, ой ўтиб, иморат тамом битди, подшоҳ чорловидин воқиф ўлғон жамоа шул тараф шошилди, ер ила қўк ўртасида муаллақ қотгон обидаи шарифни ҳамма ҳайрат нигоҳи ила қузатди, илму ҳунарни бу қадарлиғ уйғун айламакқа қодир усталар шаънига таҳсинлар ёғдирди.

Обидаи шариф шоён ҳақиқат заминида пойдор эрур, пойдорлиги булким, ичкори-ташқориси заррин либос ила қўрклидур, хусусан, залвар пештоқға зийнат ўлғон

ингичка тилла чизиқлар ажаб тугун тарзида қиёфат берғон, алҳол бул тугун чувалана-чувалана ғишин деворлар сарҳадини забт этибдур. Хоналар бисёр — ичма-ич, зертанг-забартанг, аларға бош пештоқ тагида воқе ўлғон жуфт табақали мунаққаш эшик орқали йўл белгиланғон...

Бул эшикдин ичкори кирмоқ саодатмандлиг аталди, шул боис подшохи олам изидин аркони давлат шошқин эргашди, улус ёнирилди, алар бурун ҳеч ерда кўрилмагон мўъжиза — Гириҳ ила дийдорлашмок пайида тамом ҳовлиқғон эрди.

Навбат ҳануз ўзларини мезбон чөғлаб, остоңада қўл қовуштириб, ашрофлар билан бирга факирларни хушқаломлик ила ичкори чорлаётғон Арслонбек ила Болимбекка этибдур. Алар ҳам қутлуг бўсаға сори интилибдурлар. Шодумонлигдин чехраси буткул ёришғон Арслонбек олдинда сарафroz борадур, Болимбек сал орқароқда, вазмин илгарилайдур, қароши мислсиз бир севинч ила тўлғинким, ул зот гўё арши аъло тарафга парвоздадур. Ахир, фаҳр қилса арзигай, дўсти қадрдени бирла бул обида қиёфатига фусн ато этмабдурми!? Эмди бул кашфиёт таърифига тил ожиз, қалам ҳам ноҷорона тайсаллайдур. Орага чўқғон сукунат иморат туси-тароватини бисёр ошириб турғонда бир қасирга қулоқларни коматга солдиким, ичкоридагилар ҳам, ташқоридагилар ҳам қаттиқ саросимада қолиб, яқолариға туфладилар. Во дариг, бу не сиру синоатки, баҳайбат эшик табақалари, аллакимлар беҳад куч бирлан сурғон киби, қасирга ила ошналар бетига ёпилғон эрди. Мадад берғил, бул бедодлиғдин ҳалос этгил, муруваттли худойим, ахир то ҳануз шул бўсаға орқали кирибчиқиб юришмагонми?! Ахир Гириҳ ҳузурига шул муборак йўл орқали юриб боришмасми? Эмди бу не жазои заволот эрур? Еким тақдир ҳазилидурми? Еким юмуш баробаринда кўнгли қаборғон шаккок шогирдлардин ул-були улус қўзи олдида аларни иззаи нописанд қилмоқға қаедландими? Алҳол, сир тагига ҳеч бир зукко етмади, эшик ёнилғонича қайтиб очилмади, олдни тўсиб тураберди. Ҳаял ичинда улусни тобаттар ҳайронлиқга солгон янга бошқа воқеа юз берди. Ер ёрилғонда ер тагига тушмокға рози бўлғон ошналар бўсағадин тўрт-беш қадам ортға тисарилғонлари ҳамоно эшик шараклаб очилди. Ранг-рўйларига қон энгон ошналар енгил тортадурлар ва илгари талпинадурлар. Афсус, янга

бурунгы синоат воқе бўлубдур: табақалар қасирға ила бетлариға ёпилибдур.

Хукмдор ҳам, аркони давлат ҳам, халойиқ ҳам бу сирдин кўп таажжубга тушди. Эшик ўжарлигини ҳар ким ўзича таъбирлади. Бири биридин оғир маломатлар қўпди. Ночорлик домига илинғон усталар эрса тўртаворага қўшилмоқ тугул кўчага чиқмоқлиқдин тийилишди. Бу орада хукмдор обидаи шарифда турли мажлису машваратлар, турфа кенгашу маъракалар ўткариш ҳам онингдек иморат ила дўсту душманига мақтаниш ила машғул эрди. Оқибатли подшоҳ нозик маънолар ва туйгуларни тилла тили бирлан сўйлатолгон биродарларни ҳам унутмади, аларни саройға чорлаб, устилариға зарбоф тўнлар ёпди, хазинасидин қимматбаҳо тошлар совға қилди. Не тонг, шоҳона мукофотлар аларга қилча татимади, алар яна хонанишинликка берилишди. Ахийри, маломатлар ҳаддидин ошабергач, бул туфроғда қолмоқ ўзларига нораволиғини англашди, қуда-андалик баҳридин кечмоқлик, кўч-кўронларини оту туяга ортиб, бирлари мағрибга, бирлари машриқға равона бўлмоқлиғ аҳдини қилишди. Ана шунда алп Камон ила Биби Нозик оталари истагидин тондилар ва Самарқанддин жилмай, тоабад шу ерда умр кечиражакларини билдирилар. На чора, фотиҳа аллақачон оллоҳ назаридин ўтғон, шул боис алар қарорини синдирмоқға ботинмадилар, жўнар олдидин аларни никоҳдин ўткариб қўймоқчи бўлдилар.

Алалхусус, киндик қони томғон ердин айри тушаётганига кўнгли бузилғон Арслонбек шом чоги обидаи шарифга охирги дафъа назар ташламоқ, яъниким, ул бирлан видолашмоқ ниятида ҳовлисидин узилди. Йироқдин иморат қуббалари заррин товланиб қўринур эрди, кун аллақачон поёнига етғон, аммо гўё иккинчи қуёш шахристон тепасидин мунаvvар ёғдулар сочар эрди. Тобаттар ўксингон наққош иморат рўпарасида паришонхол туриб қолди. Айрилиқ фурсати яқинлигидин ул иморат деворига сўйкангиси, нақшларини меҳр ила силагиси келар эрди. Афсус, иморат андин бегонасирайдур, андоғки эркан, анга яқинлашмоқ осонми? Ана, эшик ҳам зич берк, йўласа кўқсидин итармоққа шайдур. Не бўлса бўлгай, деб Арслонбек таваккал қилди, эшик сори бирма-бир босиб борди. Ё қудратингдин, орада жиндай масофа қолғонда эшик шарақлаб очилди, аламда қоврилиб юргон устага йўл бериб, они Гириҳ

хүзүрига чорлади. Бир муддат суратланғон Арслонбек иморат ўртасини эгаллагон кенг саңли мұхташам саройға юзланадур. Ажаб, ул сарой бул қадар маҳобатли әрқонлигини бурун онча түймагон әрди, бир ҳадик ила теварагига никох югуртириб билдиким, Гирих қаддикамоли бенихоя улуғвор! Алхол, әмди Арслонбек тамом иштибоқ оғушыда эзилди, әшик нечун илгари йўл бермагони, бул фурсатда мурувват қилғонини ўйлади. Ўртада чўк тушди, бошини қўйи солғон қўйи, сукутга толди. Шоёнким, шул алфозда ўн йил, юз йил эмас, нақ минг йил турди. Бир пайт ўзини заррин бўёқларға чулғонган гаройиб оламда кўрди. Бунда ҳамма нарса заррин әрди, кўз илғамас заррин бўшлиқдин нидо келди:

«Эй, устай бузрук, саодатмандлиғ ато этадурғон мулки муборакға хуш келибурсиз! Чехрангизда ранж аломатини кўрадурмен, нетонг, ранжият чекмоқликға ҳақлидурсиз. Ахир, не бедодликким, ўзингиз ёдгорликга ҳамда менға қўриқбон айлагон әшик сиздек ашрофни маломатға йўлиқтирибдур. Билингким, устай бузрук, бул беодоблик маним тилагим ила тангри тарафидин ижро этилди. Алхол, ошнаи қадрдонингиз Болимбек ёнида ҳақ ҳукмиға тортилдингиз, сиз ул бандадин ўтғон гуноҳи азимға тоабад шериқдурсиз!»

Ҳаргиз ўртада чўккалағон Арслонбек бул нидодин бутқул титилибдур, қўрқувдин дилдираган алфозда ўзича илтижо қилибдур: «Ким ул ҳақ деб жазава қиласурғон? Ҳабиби содиқ Болимбек не гуноҳи азимға ботибдурким, нечук камина анга шерик эркан?»

Нидо:

«Устай оқил, мен — Гирих! Озроқ шикаста сўзлаётиман. Танимдаги бир оғриқ бунга боисдур. Сизға тоабад юкунсам арзигай, алхол, ошнангиз гуноҳини тавсифламак эрса оғирдур. Майли, сўзламай қўя қолай, бағрингизни қайтадин чок айламакни истамасмен!»

Теран сукунат. Энтикиш.

«Йўқ, сўйла, бағримни яна чок этгил майли!»

«Уста, Болимбекка суюндингиз, қадри ила иззатини баланд тутдингиз. Авваллари ул банда ҳам сизга, ҳам ҳунарига бенихоя хурмат кўргазар әрди. Шуҳрат тоғига эришғонидин сўнг қони суюлди. Әмди ул сизда содалиғ аломатларини кўрғонда зимдан кулги ихтиёр айларди. Сиз, юмуш ила машғул, ҳеч нимани сезмасдингиз. Бул орада ул бошингизға маломат тошини ҳам

отибдур, онинг ақли қосир, ҳунари сактадур, деб ўтрик тарқатибдур. Кўрдики, ҳануз ғафлатдадурсиз, сўнг у ўзидан тамом кетди, подшолигдин олингон тиллодин онча қисмини чегириб, ўрнини эритилгон мис ила қоплабдур. Сиз бот ғафлатда қолдингиз. Хўш, муҳтарам зот, андоғки эркан, ошнангиз пиширгон ошга шерик эрмасмусиз?»

«Э аттанг, Болимбек бунингдек густоҳлик илкини тутғондин кўра каминанинг ғафлатдағи бошини сапчадек узиб ташлоғони чандон афзал эрди-ку!»

«Муҳтарам зот, Ёфас ўғлон бил қаро кечмишдин воқифлик топгон қуни сизни ҳам, они ҳам омон қўймас, бошларингизни жаллуду қаттол қундасига топширгай. Эсларсиз, уста, Ёфас ўғлон ҳунарингиздин иштибоҳ қилғонда сиз они қойирғонсиз, дегансизким, иморатга андоғ нақшлар чекурмиз, ул дунё тургунча турғай! Ул ваъдадур, интиҳо ўзга. Асло умид қилмангиз, асло онча яшамасмен, танимға ўрнашғон мис жоним ва сабримни емирадур. Ёвуқ қунларда ҳазон янглиг тўкила бошлайдурмен. Шу билан дуо кетмишдур, уста, ҳунар камоли доим бир кам бўлур!»

«Э дариг, ул банда ила қуда тутингон эрдим!»

«Устан оқил, сиз зукко одамсиз, бил жумбоқ ечи мини олло-таоло ҳукмига ҳавола қилинг. Кейин, ихтиёрни алар ўзига ташланг, алар кўнглига қарамасангиз, гуноҳи азимга икки бор ботадурсиз. Алҳол, инсоғ ила айтгонда, ул ниҳоллар айбдин фориғурлар!»

Гириҳ билан мулоқотни тугатиб Арслонбек бехудул доду фиғон оғушида Саодат уйини тарқ этди. Оламини зимзиё кўриб абгор бўлди, алҳол, ҳунар тоабад онингдек оғир дуо жафосини тортаражагини ўйлаб беҳад қайғурди. Эмди пинҳона ёниш бефойда эрди, шу сабаб Арслонбек обидаи шариф эшиги нечун ўзини ўётға қўйгонини алп Қамонға оқизмай-томизмай сўзлади, камина қудалик бурчидин кечамен, аммо фотиха синмас, ихтиёр ўзингдадур, деб ўғлини огоҳлантириди. Сўнг эрталаб аҳидидин Болимбекни воқиф айламоқ ниятида йўлға тушди; келса дўсти қадрдони ховлиси ҳувиллагон, бир пашша қўзга чалинмас эрди. Бул савдодин ажабланғон қўни-қўшилар ҳам тайинли қалом айтишолмади. Ул кўп ўқинди, қай деворга бош урмогини билмади. Шундай аросатда турғон фурсатда Болимбек аёли-қизи минғон, юки ортилғон қарвонни хилват ҷўли-бедиён бўйлаб қичай-қичай ҳайдаб борар эрди. Ул

кеча хуфтон араfasи Арслонбек изидин Саодат уйи сори яшириңча борғон, эшик бетига ёпилишидин құрқони боис, бұсағадин йироқроқда турғонча, Гирих нидосини эшитғон, Гирих таъналаридин ер билан битта бўлиб сочилғон, оқибат, ярим кечада, ҳамма ухлагонда, шаҳристон билан видолашғон эрди.

Алалхусус, бир ой нари-берисида жандоға ўралғон, қуббали кулохиға попук тақилғон, белиға ис ўтиргон құримсиз кашқул осилғон мункайған бир дарвеш алп Қамонни сүроқлаб келди. Шул фурсатда алп Қамон ото-оносидин тамом кечғон, қоронғу ертұлаға биқиниб, құксини захға бериб ётғон эрди. Ҳар ох чекғонда заминга ўт тушгудек эрди. Дарвешдин хабар етғонда ҳам ул пинақ бузмади. Фигон қилиб ётаберди. Ҳазин овози дарвешга ҳам эшитилди. Алҳол, бирон муҳим мужда борлигини фаҳмлағон Арслонбек ўғлини бир амаллаб ташқорига йўллади. Дарвеш анга бир сўз демабдур, қўйнидин най қилиб ўралғон мактуб олиб узатгач, хассасини дўқирлатғонча гойиб бўлибдур. Мактуб Биби Нозиқдин эркан, санам ушбуни битибдур:

«Марҳаматли бегим!

Худодин тилагим шулким, манзилини Мовароунинаҳр атагон дарвеш чол олис йўлда бирон кори-холга йўлиқ-масун, энг сўнгги тилаги мустажоб ўлса — юрти дийдорига етишса, туфроғини қўзиға сурса, ана шунда ожизангиз хоҳиши ҳам ўрин топур, яъни, битигим қўзингиз нуридин обод ўлғай...

Боги равонимизда аҳдни қаттиқ қўйғон эрдик, сиз узук, камина қўзмен, дея қилғон лутфу қарамингиз ёдимдин ўчмайдур. Тақдир эрса ҳукмни ўзгача бичмиш: узуқдин қўзни айрибдур. Ҳарнечук отои меҳрибонингиз сизни боридин воқиф этғондур. Валинеъматим мени бир қаро қунда шундай қазои дўзахийга гирифтор этди. Хулоса қилдимки, мен — фаришталиғни даъвои достон айлаб юргон ожиза бул гуноҳнинг бир чеккасиға ботибмен. Дугоналарим чит ила бўзни зўрга топиб кийғонда мен, бети қаро маҳбуба, атласу кимхобга, зару жавоҳирга ўралибмен, демабменким, э падари бузрук, бул адоги йўқ мол-дунё қаёқдин?

Бегим, бул ғам катта ғамнинг бир зарраси эрур, яъни агар валинеъматим айби фақат шул жиҳат билан чегараланғонда бибингиз Самарқанд туфроғида абадиян қолғон, сиздек Рустам келбатли, Хотамтой феълли

йигитнинг бир умрлиқ вағодор ёри бўлиб, давру даврон сўргон бўлур эрди. Бибингиз волидаи муҳтарамаси билан нафсга қул тушғони обидаи шариф қиёфатида юзага келғон сакталик олдида хечдур. Бир кеча тушимда кўз қамаштиргудек нур сочадурғон маҳобатли эшик кўрибмен. Ул ҳўб жозиб эрди, андин ичкори кирмоқни баҳт санадим, толпинғонимда ул чекинди, чекинаберди. Ул падаримни Гириҳ ҳузурига киритмағон эшик эрмасму? Бедодлиғ онча бўлмас! Сиз, бегим, онингдек кўргиликни кўтармоқға қодирмусиз? Ожизангизда андоғ чидам йўқдур. Бул зарба тезда одойи-тамом қиласхажини сезганим ҳолда, падарим ҳарчанд никоҳни эслатғониға қарамай, бебаҳт оиласиз карвонига қўшилдим, шахри муаззам ва сиздек оқил зот билан видолашдим. Карвонимиз бу кунда тўхтовсиз йўл босмакда, қаён бораётғанимиз фақат худойимга аён, эҳтимол, манзилимиз йўқлик аталмиш маскантур. Алвидо!»

Алл Қамон ваҳ деб пешонасига чунон урди, мактубни қўксига босганча, Биби Нозик билан кечирғон тотли онларини хотирлади. Алалхусус, анда хотира ва айрилиқ доғидин ўзга ҳеч нарса ҳам қолмағон эрди. Шул сониядии бошлаб ошиқ йигит ертўлага қайтиб йўла-мади. Эмди тангри анга фақат сабру тоқат берсин, балки, яраси тез орада битиб кетгай, вақт не дардларға даво топмағон...»

Саҳифадан нигоҳ узиб уста Шамсиддин пичирлади: «Вақт шунаقا, ҳам қаттол, ҳам меҳрибон: аввал яралайди, кейин даволайди. Ушбу ҳол дастидан дод деган банда гуноҳга ботадими ёки шунчаки таскин топадими?» Ҳарнечук бу мулоҳаза ўзига бир қадар эриш туюлди, беихтиёр хаёли яна ривоятга кўчди, Биби Нозик мактубини қайта ўқиди. Мактуб хулосалари чиндан ўқинч билан лиммо-лим эди, зеро, Болимбек шундоғ бир гуноҳга жазм этганки, бу гуноҳ ҳўлу қурукни баравар ёндиради, баравар! Зийрак қиз буни тушунган, шу боис у шахристонда қолиб, алл Қамон билан давру даврон сурини эмас, йўқлик манзили сари улоқиб кетишни танлаган. Агар у Саодат уйига юзланганда эшик уни Гириҳ ҳузурига киритармиди? Тўгри, бу тарафи кўпроқ худога маълум, лекин, унингча, эшик бари бир қаттоллигини кўрсатар эди. Ахир бу тушида аён бўлибди-ку! Хўш, унда алл Қамон нимага лойиқ? Нечун у мактубни ўқиб тутатган паллада пешонасига урди, нечун узлатдан кечди?

Чуваланган мuloҳазаларга изи берган кўйи уста жиндай ухлаган бўлди. Қайда, ёлчимади, бу уйқумас, бориб турган уқубат эдики, қўзлари худди бир ҳовуч бир ҳовуч қум тиқилган каби ачишарди. Ноилож турди, дераза ёнига борди. Ҳовлида бир шарпа кўринди. Аввал уни Гайдиддинга менгзади. Тикилиб қараса, ие, Гайдиддин эмас, бошқа, ёпирай, Маъруф Афзаловичми, қоқ ярим кечада у бу ерда нимага бунақа тимискиланниб юрибди. Бехос қоронғилик қуюқлашди, гирдибодга ўхшаш нарса гув келиб шарпани ўради, уни юлиб, юлқилаб, қаёқларгадир олиб кетди.

## VI

Уста Шамсиддин Маъруф Афзалович беҳуда чақирмаганини, галвани худди тўхтаган жойидан қайта қўзғашини, борингки, наштарини нозик жойига яна бир бор санчиб олишини биларди. Лекин, худо ҳаки, у жонини қақшатиб, иззат-нафсини симиллатиб юборган таклифни ўртага қўйишини етти ухлаб тушида ҳам кўрмаган эди. Аввал бош мутасадди мулойимлик билан едирмоқчи бўлган луқмани таклиф эмас, шунчаки ҳазил санади, бу ёқда ҳаммаси чаппасига айланаётганда мутойиба ярашмайди, деб жеркинмоқчи ҳам бўлди. Йўқ, қараса, укахон важоҳати чатоқ, қўндингиз, гажирлик қиласберсангиз нақ ўқ томирингиз билан қўшиб қўпориб ташлайман, деб турибди серкиприк қўзлари. Во ажабки, ўша лаҳзада Маъруф Афзоловичнинг серкиприк думалоқ қўзларини кимникигadir ўхшатди, аммо кимникига эканлигини анчагача эслолмади, кейин илкис... ёдига тушди. Анча илгари, Тошкентда, ҳашами қўзни жимиirlатиб юборадиган маҳобатли бир хонада туриш-турмишидан босиқлиги, мулоҳазакорлиги шундоққина сезилиб турадиган бир одам билан гурунглашишга мұяссар бўлгандикি, унинг ҳам қўзлари тутма қадар юмалоқ эди.

Нечундир уста қизил чарм қопланган таниш эшикка тажанглашган қўйи яқинлашди. Эшикни ҳадик билан қиялатиб очди, деразага термилиб ҳомуза тортиб ўтирган котиба қиз Маъруф Афзалович кута-кута роса асабийлашганини, кейин зарур юмуш билан қайсиdir юқори идорага зув бориб келмоқчи бўлиб чиқиб кетганини бидирлаб айтгандан кейин овораи сарсон юрганига минг пушаймон еди.

Хали ҳовлига киргандай, дарди-дунёси қоронгилашган уста бошлиқ рафторини күрмаганига жиндай тасалли төпди, этак тарафда жойлашган копинпазлик еари бораркан, бугунги учрашувга Маъруф Афзолович қандай сийлов ҳозирлаб қўйганини тахминлаб қулимсиради.

Бу жойларда азалий сукунат тарангроқ эди. Хув наридаги бир-бирига мингашган тепаликлар нимадандир зада эканликларини изхор этганча мунгайиб туради. Берироқда ертўлага ўхшаш пастак хумдонлар ёнмаён тушган; қўррайган мўрилардан саргимтири турун ўрлайди. Бир четдаги тупроқ уюми ёнида коржома кийган, қийиқча тангиган, соқол-мўйлови кузалмаган паст-баланд бўйли уч киши қуиди-пишди бўлиб масала талашаётган эди. Шаксиз, уста тортишувдан маъни уқди, бирдан қизишиб, юзида чечак изи қолган соқоли қирвли жиккак кишига ўқрайди. «Уста Фаттоҳ, сизда ўзи инсофдан тариқча йўқ», деган иddaо оғзидан чиқиб кетди.

— Э-э, уста, бу... — чайналди уста Фаттоҳ, овози сал титради. — Хафа бўлманг-у, баъзан сизам шайтони лаъянин васвасасига учинасиз. Майли, сиз айтгандек қилайлик, тупроқни Челакдаги тепалиқдан келтирайлик. Обираҳмат ёки Сиёб сувида ювайлик, бари бир макбул кошин чиқмайди.

— Сабаб?

Ҳамон ҳалиги иddaони ҳазм қилолмаган уста Фаттоҳ чамаси жавоб қилишни хоҳламади, сукутга толган кўйи беихтиёр сухбатдошларидан ўн қадамча йироқлашди, анчадан сўнг қайтиб келиб рўпарада тўхтаркан, уста Шамсиддин сокин қорачиқларини ўқинч қамраганини кўрди.

— Сизам яхши биласиз, — деди у дагаллик билан, — бир пайтлар кўп мўътабар зотлардан ажралган эдик. Фаҳми ожизимча, уста, энди бизни азоблаётган ҳақиқат бутун бўй-бости билан ўшалар юрагида кетган!

Ҳалигина уста Шамсиддин кўксига таъна-дашином, ўлка-гина бир газаб билан қоришиб жунбишга келаётган эди, биродари ҳалигидай тўнгиллагандан кейин туйқус булар бари алам-ангиз ўқинчга айланди.

— Нечун индамайсиз, ошна? — уста Фаттоҳ пешонасига тарам-тарам ажин тортилди. — Қани, бир ўйланг, бу ҳунар куни бугун кимларга қолган!?

Уста Шамсиддин, елкасига тоғ тұнтарылғандек, яна чурқ этмади.

— Менгами? — деди уста Фаттох күкрагига нуқи-лаб. — Шунча дақир-дуқир менинг зиммамдами? Эвоҳ, ахир, мен раҳматли падарим уста Құрбоннинг тирноғига ҳам арзимайман-ку!

Энди буниси ёмон ўртади. Кошинпазлар пири — уста Құрбонни яхши әслайди. Умр бўйи бўёқ ва нақшга сиғиниб яшаган бу дилкаш одам падари билан қиёматли дўст эди. Шаксиз бу яқинлик таъмир ташвишлари баҳонасида тоабад мустаҳкамланган эди. Бир майизни бўлиб ейишарди, кўпинча кечқурунлари улар бошқа дилтортар улфатлари билан шаҳристонга танилган муғаний ва ҷолғусоз мулла Аҳмадникида тўпланишар, тонгга қадар қироатхонлик ва мусиқанавозлик қилишар эди.

Бир кеча, амри маъруф айни қизиган чоқда, бир хил ҷарм қуртка, соявони энли шляпа кийган кишилар мулла Аҳмадникига сўрамай-нетмай бостириб киришди ва бари шу воқеадан кейин алкаш-чалкаш бўлиб кетди.

— Тинмай гивирлаймиз, ҳосиламиз эса гарибона, — секин уф торти уста Фаттох — Нега шундай? Сирни, адашмасам, раҳматли падарим биларди. Мен, гумроҳ, у кишидан бу сабоқни олиб улгурмаганман.

— Мен отангизни танирдим, — деди ниҳоят уста Шамсиддин.

— Э-э, барака топинг, шундайми?! — уста Фаттохнинг ҷеҳраси ёришиди. — Қанақа одам эдилар-а! Тавба, нимага, нима сабабга кўра ёш умрини ҳазон қилишгани ҳалигача жумбоқ!

— У зотнинг кошинга қуфий ёки гулбанди, сулс ёки шикаста усулида ҳарф рақам этишдек фазилатларини айб қаторига қўшганларини кечагидек эслайман.

— Во дариг-э! — бош чайқади уста Фаттох. — Биз шўрликлар падаримга ўхшаганлар билан бирга ҳунари табаррукдан ҳам айрилғанмиз. Энди ёқа чоклаб минг чиранганимиз билан улар йўлига тушмоғимиз маҳол!

Қурғур хаёл уста Шамсиддин танини яна зувва олис ўтмиш қаърига элтиб ташлади, ўзини ҳашами гаройиб чолғулардан иборат ёп-ёруғ хонада кўрди. Ана, тўрда, қалингина баҳмал кўрпачада ҷеҳрасидан нур ёғилаётгани отажони чордана қурган, иккى ёнида бир-бирларига жонларини ҳам тикишга тайёр ҳунарманд ошналари мамнун тизилишган. Пойгакрокда мулла Аҳмад чўк-

кан, суву селоб, тиззасида гирди садаффанд қонун ингренади, қонунга қўшилиб бутун хона, бутун замин оҳиста нола чекади. Сўнг теран жимлик чўкади. Пайтдан фойдаланган ўрта яшар киши — кўкиш симоби салла ўраган уста Қўрбон юмшоқлик билан лутф айлайди: «Нақл қилишларича, қадимда Одам Ато ҳам Момо Ҳаво кўнглини мусиқа билан овлаган экан!»

Нимадир тарақлагандек бўлиб уста Шамсиддин кўз ўнгидан табаррук сиймолар соя янглиғ йўқолди. У хўрсинигини ютиб, паришон турган уста Фаттоҳга ҳамдардона тикилди, бирон ярайдиган тасалли топиб айтольмагани учун ўзидан гижинаётгандан котиба йўқлаб келди, қабулхонада кутиб ўтиргани учун койинди, қулогигача ҳар хил ташвишга кўмилганига қарамай Маъруф Афзолович уни лутфан чорлаётганини билдириди.

Ё фалаксан, лутфан-а!

Чархи буқаламун ўйини: чиндан ҳозир ҳашамдор хонада бошлиқ бетоқат кутаётири, гимирсилаб кириши билан у аллақачон эзив-мижид чайналган ғалвани қайтадан қўзгайди. Аввал ялтоқланади, кейин шалдираб, қирдан ошиб келади. Бу кори-ҳол тоза бадига урди, нима қилса қутулади. Барини ташлаб бирон ёққа жуфтакни ростласинми? Э, йўқ, пешонасига битилган ташвишдан бунақа мункир келиши худога ҳам, бандага ҳам ёқмайди. Бас, шалвирамаслиги керак, нима бўлганда ҳам қаддини ғоз тутади, юмшоқ курсисидан бўлак ҳеч нарсаси бўлмаган шопирилма одамни бир амаллаб эплайди, йўриғига солади. Ҳозир эса, чакаги очилмасдан бурун, кошинпазлик ахволини дангалига шарҳлайди. Жон қулогини бериб тингласа, эрта катта-кичик муаммоларни бир ёқли қилиш учун сал-пал чора қўлласа идоранинг, қолаверса, ўзининг обрўси, агар одатдагидек дўғбўйинлик қилса тагии ўзи билади. Ахир у қачонгача ташқарида гувлаб ётган бесаранжом дунёни манови пашша учмайдиган сокин хона рафторида кўради, қачонгача теварагидагилар қадамини юмшоққина курсида ёйилиб ўтирганча эшигтганлари орқали ўлчаклайди?

Ноёнгай бўлса-да, уста бўсағада тўхтади, нечундир баданига совуқ бир нарса ўрмалади, кечагина устоз қанотига келган шогирд каби қисинаётганини ожизликка йўйди — қаҳрланди, ниҳоят, ҳушини йигаркан, ўриндиқда бемалол чўкиб, яп-янги сарғиши телефон дастасига узалганча кулимсираётган Маъруф Афзало-

вичга ҳали дилидан кечган фикрларни иссиғида супра қилиб ёймоқни чүтлади. Супра қилиб ёйди ҳам! Аммо Маъруф Афзаловичда қулоқ борми, эшитмади, севимли машғулоти — рақам териш билан шуғулланди.

Соддадил уста, ноумид шайтон, деган илинжда очилди, оғзига келганини қайтармади, борингки, бу дунёни ўз тақдирини, ўй-фикри ва босган қадамига алоқадор бўлгани учунгина тан оладиган одамини эритиш учун астойдил эзилди. Ўйлови хом экан: бугун айтганидан эрта увало тонадиган Зоҳиржон сингари бунинг ҳам тамизини қиши қирови ялаб кетган кўринади.

— Уста, гаи бундай, сизни анча қийнаб қўйдик, етар, энди тархни топширинг, уни уста Иброҳим зарблайди,— ниҳоят, телефон дастасини жойига қўйиб ўрнидан турди бошлиқ.— Эрта-индин сизни Даҳбеддаги Махдуми Аъзам<sup>1</sup> мачитига ўтказамиз.

— Иложим қанча,— деди уста кинрикларини оғир кўтариб.— Бу хунарда бир бузилмас таомил мавжуд: ким томонидан таъмирлангани эмас, қандай таъмирлангани муҳим!

— Ҳа, баракалла!— деди Маъруф Афзалович қони-қиши билан.

— Фақат, биродари азиз,— оғриниб давом этди уста,— камина сиз тузган тарҳ Тиллакорига мувофиқ тушмаслигини неча бор тафтиш қилган эдим. Кейинги мунозаралардаям шуни эзғилашувдик. Булардан воқиф уста Иброҳим нечук уволни бўйнига олибди?

— Сизга тан бердим, уста,— деди Маъруф Афзалович юзига табассум балқиб.— Ҳа, тан бердим. Сиз мени аямай дўппосладингиз. Қўзим очилди, тархни қайта туздим. Қўрсангиз, аминманки, қувонасиз.

— Насиб қисса кўрармиз,— деди уста шубҳа арапаш.— Лекин, хабарингиз бор, камина ҳам бу йўрикда ўглим билан кучимни синаб кўрган эдим.

— Тошкентта танда қўйганингизни биламан,— деркан Маъруф Афзалович тезгина ҳўрпайди, гўё чакка томирлари симдек тортилди.— Ҳўш, натижажи-чи?

Тагдор таъна устани мулзам қилди, беўлчак бир малол туюркан, ногоҳ Маъруф Афзалович тархи дабдала қилинган охирги муҳокамани хотирлади. Тарози палласидек ўйнама Зоҳиржон имо-ишораси билан кўпчилик қорнини bemalol силаб ўтирган тошкентлик меҳ-

<sup>1</sup> XVII аср ёдгорлиги.

мон (у Тиллакори таъмирини пайсалга согани касрига тезда ўрнини шу мулойимхунукка бўшатиб беражагини туш кўрибдими дейсиз!) томонга оғгандан кейин куттимаган фикрни Гайбиддин ўртага ташлади, гумбаз ичкариси учун тарҳни ўзимиз чизамиз, деб ҳаммани шамдек қотирди. Тўғриси, ақлга сиғмайдиган бу журъатдан устанинг ҳам капалаги учди, ҳатто ичида заҳархандали кулди, жиддий ўйлаб кўргандан сўнг, ўғли бекорга бундай енг шимармаганини фаҳмлади.

— Тинглангданда натижа ҳам бўларди,— деди гезарид уста.

— Оворагарчиликни қўйсангиз-чи,— деди шафқат ҳисси билан Маъруф Афзалович.— Тарҳ кўчасидан ўтмаган одамсиз, кора меҳнат билан кун кўриб... Ким билади нималарни чаплагансиз!

Ҳалиги таъна устига бу пичинг қўшилиб устани адойи тамом қилаёзди, энди мулзам бўлиш у ёқда турсин, ҳатто орияти ҳам ёмон қўзғалди — бўғзига гўё нақ ўткир тифтишади. Нега бундай қалтираётир? Нахотки Маъруф Афзалович хақ!

Мухокама ўтган хонадан эл кўзи учун қаддиларини тик тутиб, асли ич-ичлари тўкилиб чиқишгандан сўнг, узоқ муддат иш бошлолмай гарангисираб юришганини яхши эслайди. Шўрлик уста эрта-кеч парвардигордан қариганда шармандаи шармисор қилмасликни ўтинди, кару соқов фалак эса чеки-чегараси йўқ илтижоларини ҳадеганда эшитавермади, гапни катта қилган ўғли ва янги тарҳ тузиш заруратини ихлос билан қувватлаган Расул Усмон билан биргаликда ҳарчанд уринишига қарамай, кесатиқларни дўлдек ёғдирган кимсалар гувоҳлигига берилган ваъдани ижобат этиш мушкуллашаверди.

Уззу-кун жимжит ҳовлидан бир қадам жилишмайди. Ҳаш-паш дегунча қоронгилик тушганини сезмай ҳам қолишади. Даҳлизда чироқ ёқишади ва узунданузоқ тунни чироқ ёруғига ўжар уйқу ҳам чигал чизиклар билан олишиб ўтказишади.

Ахийри чамалашди: Гириҳ осонликча тутқич бермайди, негаки, у ердан безган, аршнинг қайсиdir зимзие қабатидан жой олган, бирламчи сарҳади билан иккиласми сарҳади оралиғидаги масофа баҳри маъво қадар худудсиз, ушбу худудсизликда пинҳон нақшлар туркумиини фақат мушоҳада кўмагига иншо айламоқ

улуғ мутаносиблик ҳикматига дарз солажаги тайиндир.

Ана шу хulosадан кейин жами лаш-лушларини орқалаб Тиллакори паноҳига қўчишиди. Маҳмадана Рассул Усмон кутилмаган бу тадорикни, қадимият сари тарихий юриш, деб баҳолади ва дарҳол ширин-шакар шеър билан қувончини нишонлади. Шундай қилиб, не баҳтки, ёритилған шифтни яхлит ҳолда қўриш, идрок этиш имкони туғилди.

— Биродар,— хотиржам мурожаат қилди уста,— раҳматли падарим, оринг бўлса бир ишни чала қолдирма, бирор чала қолдирган иш яқинига йўлама, дегувчи эдилар.

— Э-э, уста, нуқул ақидабозлик қилаберманг-да!

Билди, Маъруф Афзалович гурунгга нуқта қўйди, ақидабозлигини бетига солиш баҳонасида, иззатингиз битди, йўлингиздан қолманг, ана, эшик катта очик, дегандай қилди. Оғир хўрсиниб қўзгалди, топган таклифини қаранг-а, деган фикр миясини зирқиратди. Зардаси қайнади. Кейин ўртада кўндаланг бўлган андишани ўйлаб ғижинди, бекор кетган вақтидан ҳам кўра иложи борича ўзини босиб, уни аяб муомала қилишга ўзини мажбурлагани учун кўпроқ ачинди.

Эсида, охирги мунозара куни Маъруф Афзаловичда ҳар қанақа сарқашни ўзига ром қилиб олиш қобилияти борлигини шунчаки эътироф этувди. Мана, ўша тахмини рост чиқди, қурмагур Маъруф Афзалович истаса бандасини мумдеккина эритиб қўяркан: уста Шамсиддиндек одам унинг ногорасига ўйнашига бир баҳя қолди, натижада нутқида инкордан кўра таъкид оҳанги очиқроқ сезилди. Кошинпазликка тегишли арзи-додини эплолмагани устига тарҳ бобида ҳам дангаллик қиломай чайналиб ўтириди.

Эгам уста Шамсиддинни бийронлиқдан қисган: азалдан мана шунисига кўпроқ ачинади. Ахир, ичиди ҳасрати уюлиб ётса-ю, мундай гап кифтини келиширолмаса, алам қилади-да! Еки алам қилмайдими, устай бенаво? Тавба, нимадан чўчиди, намунча тиззалири қалтиради? Осонгина чув тушаёзди-я! Агар у яна жиндай авраса нақ қуллуқ қиларди-ёв! Аммо, тарҳни қайтадан туздим, дегани қуруқ сафсата, кўнглини овлаш, таъмирни уста Иброҳимга тошираётганини оқлаш учун шунчаки даромад қилди.

Эҳтимол, Маъруф Афзалович қандай курсида ўтири-

гани, қай юмушга боши билан жавоб беришга мажбурлиги, кимлар тақдирини қўлига олганини унча билмас, лекин кимга ва нимага тузоқ қўйиши кераклигини майда-чуйдасигача билади. На чора, қандини урсин, уста бунисига унча кўймайди, бошқа нарсага кўпроқ ловиллади: бу кунда шундайлар тиқилиб кетди. Эҳтиёткорликни ниқоб қилиб тутган Мәъруф Афзолович тоифасидагилар ими-жимгина чўпнинг иккала учини ҳам тутвонишган, чўп ўртасига ҳам умидвор қарашади, нима бўлганда ҳам қургур бу нарса, узун-қисқами ёки ингичка-йўгонми — бари бир, руҳларида мудраб ётган очопат майлга хизмат қилсин. Қолгани бекор! Жаҳоншумул обида тутдек тўкилиши — одатдаги бурдсиз қонуният! Кўчган бўёғу гишти жойига қўндирган билан майл қонмайди, нафс ҳузур қилмайди, қон қизиги босилмайди. Гуур нима? Ўлган пашша ундан чандон афзал! Фақат тап тортмай лақиллатиш, соддаю нотавонларни ариқ ёқасига етаклаб бориб, сувсиз қайтариб келиш ҳузур беради, холос!..

Нақадар ҳавасмандлиғ эди ўша кун...

Бандасини абадул абад тобе қилган аршу аъло бор салобати, бор меҳри-муруввати билан тириклиқ дарвозасига яқинлашди, худди шу табаррук лаҳзада қоғоз узра Гириҳ ҳусну тароватини намойиш қилди, мўлойимгина жилмайди, гўё ҳуши-фикри яратиш-ёниш, хуллас, тек турмаслик бўлган одамга камоли эҳтиром билан қуллуқ қилди. Сўнг у бир шикаста овоз билан нидо берди: ««Дуо кетғон, азизларим, ками бирлан яралибдурмен!» Бехудуд қувончга гарқ Ғайбиддин билан Расул Усмон кечмиш ва келаси аъмоли-бадидан огоҳ этадиган ажаб нидони эшитмади; улар устани ва бир-бирини қутлаб, бақириб-чақириб, обидани ва ҳовлини бошларига кўтаришди. Нечукким, уста без қадар, гўё жони танига сиғмай бораётган ёшлар тўполони ўзига бедахлдек, ғалати тарзда мунгайтан эди. Шуури сирқиарди, йўқ, тобора ғовлаётган шуурида бот-бот ушбу мулоҳаза-за ғимирлади: «Во дариг, дуо кетган, дуо! Қўргилик аввали қанчалар оғир! Болимбек гуноҳини тоабад ҳеч ким юволмас экан-да! Пешонамиз бунчалар шўр бўлмас!» Алҳол, уста бениҳоя алағда бўлди, ҳалиги мулоҳазадан сўнг, нечундир истаса-истамаса қоғоз сарҳадларини эгаллаган оламга диққат билан қулоқ тутди ва, ажабки, яна таниш маҳзун товушни эшитди: «Эй, устай оқил,

нимага бунча интиқсен? Ахир мен қанча вақтдин бүён имон ила виждонинг ёнидамен. Эмди сен не қисматни танлайдурсен, мен то абад ўшанга маҳкумдурмен. Тангри буюргонидин ким қочиб қутулубдур, уста?» Бу не ҳол, не нидо? Поёнызликдан сизиб келади. Жону руҳга зилзила солади. Ҳартугул босриқмаяптими? Йўғ-э, унақамас, бари шундоққина кўзи ўнгида-ку! Қачонлардир раҳматли падари истигфор келтириб айтгандики, ўғлим, астойдил ихлос қилсанг бу гаройиб мулк танингга қувват бўлади, Гириҳ бор сеҳри билан жонингга жойлашади. Рост эканда бу эътироф, э, парвардигор?

Индалло, шу кундан эътиборан устани нимадир афсунлади, энди уни таниш қийин, ранг-рўйида бир ҳовлиқиш, бир саросарлик ҳуқмрон, ҳар қадамда у ўзи билан сўзлашар, сукут сақлаганда ўша таниш нидо шуури-руҳида акс садо берар, шўндай кезларда ҳеч ким ва ҳеч нарсани ёқтирмас, хилватнишинлик ихтиёр айлар, ҳуш-хаёлида нечундир қадимиятда шахри фирмавсмонандни нури зебога кўмган Саодат уйи гавдаланаар эди.

Илгари шаксиз Гайбиддин отасини бунақа безовта, дилгир, бунақа маъюс, тажанг алфозда кўрмаган, балки кўргандир, бироқ сира эсломасди. Отаси юриш-туриши, феъли-ҳуйи, муомала-мушоҳадаси алланечук ўзгариб қолганидан аввал тутақиб юрган онасиға, кейин Расул Усмон билан Жамилага нолиди, ажабки, отаси олдида ўзи ҳам маҳзун қиёфага кирадиган, мум тишлаб ўтирадиган, нари борса эҳтиёткорлик билан сўзлайдиган бўлди. Хайриятки, отаси кейинги вақтларда уни деярли тергашни йигиштириди, ҳатто уни унтиб юборгандек эди. Мана шундан Гайбиддин анча енгил тортди. Энди у вақтини кўпроқ Жамила ёнида ўтказарди; мўътабар Гириҳ ёруг жаҳонга жилмайиб боққан кунни Расул Усмон шеър билан нишонловди, у эса шу куни кечқурун кундалигига мана буларни битди:

«Расул Усмон балки ҳақ: биз ўзимиз билмаган ҳолда зўр кашфиёт яратгандирмиз, таъмири тарихида гуллаб-яшнайдиган давр очгандирмиз. Ҳар ҳолда ҳозирча ҳовлиқмаган маъқул, негаки, ҳали шубҳасиз бизни топилдигимиз билан қўшиб қандайдир чоҳга қулатмоқчи бўлишади, жами увол-савобимиз устидан мағзава тўкишга уринишади. Юзинг-кўзинг демай савалашни одат қилган фидойилар Маъруф Афзалович етовида жавлон уражаги тайин, лекин энди уларга оғиздаги ошини олдириб қўядиган нодон қайда...

Шоири жаҳон қуни тұғди: ҳовлиға чиқиб тут тагидеги чорпояда күкраги билан ётиб, Гирих қиёфасини ойдеккина қилиб күрсатиб берадиган ажойиб шеърни қотириб ташлади, сұнг мени ёнига чақириб, қироат билан ўқий кетди. Күр бўлиб тингладим. Йўғ-а, бу гал маза қилдим. Ярамагур миясини анча тинитибди. Гумбазни юракка ўхшатганига қойил қолдим. Ана топилма: гумбаз — юрак, Гирих унда кечадиган изтироблар алангаси! Асли у ҳам юрак қиёфасида!

Шоир зотини эркалатишдан ёмони йўқ — дарров талтайиб, тепангтга чиқиб олади. Алпанг-талпанг Расулбой атиги икки оғиз мақтовимга нақ арпа бўйи ўси, дарров күкрагини чорпояга қапиштириб, яна бирпасда ажойиб дури бебаҳони таппа-тайёр қилди. Ана энди чинакамига кўр бўлиб тинглашим керак эди, шуни ўйлаб, пешонам терлади. Содда шоир астойдил ҳай-ҳайлаб қолганига қарамай, ўзимни Тиллакори дарвозасига урдим ва тўппа-тўғри Жамиланинг ёнига бордим.

Жамила коржомада: эгнида кўпроқ спортчилар киядиган олди суратли оқ майка, анчагина унниқдан жинси шими тап-таранг, сочи турмакланган, гажаклари осилиб турар эди. Бутун борлиги йўниб ишланган ҳайкалдек нафис ва жозибали эди. Сархуш бўлдим, белидан қучиб олишимга сал қолди. Умуман, Жамила ҳар қанақа кийимда ҳам сулув, мабодо бўзга ўралганда ҳам кўрки олдида сажда қиласдим. Аммо, рости, мана бу ҳолати менга бир қадар эриш туюлади. Йўнилган ҳайкал! Тавба қилдим-а! Қиз бола бадани таранглиги кийим ичидашинхон қолса-да! Таъбим жиндей бузилганини унга сездирмайман, зўр-базўр куламан, лойдан хиёл дағаллашган кафтларидан аста ушларканман, беихтиёр қалин соchlарини толим-толим ёки қирқокил қилиб ўрилган ҳолда кўргим келаверади. Бувижониси ҳафсала қилмабди-да, бувижониси, дейман ичимда ўкиниб, нечун қирқокил билан кўчага чиқармабди, ёким бу бўлиқ соchlарни тарайвериб, ўравериб кексайган қўллари толиқдимикин? Ажаб эмаски, вой ўлай, давлатгинангта қўз тегмасин, бунча мўл-а, беуқувгина қиз, энди бунингни ўзинг уddaла-да, бунинг жонимдан тўйдирди, деб кампири тушгур эрта-кеч ёзғирса, савобга татијдиган хизматини иддао қиласа! Ҳой, Жамилахон, бувижонинг жеркса ҳам, таънага кўмса ҳам, майдалаб ўринг, майдалаб ўра қолинг, опоққинам, деб қайта-қайта ёлвормайсанми?

Жамила «Маъшуқа»ни бурчакка ўрнаштирган: худди ўша тарафдан қўймичидан пасти бир хирмон шагалтош ичига қўмилган маҳзун қиёфали қиз боқиб тургандек эди. Тикилиб қараганда қизнинг тош кўзларида рух қийноғи, кўпинча арзимас қувончлар босиб кетадиган бир норозилик тиниқ акс этган эди. Ҳар гал бу қийноқ, бу норозиликни туйганда нечундир ўзимни гуноҳкор сезаман, дунёning аллақайси бурчида шундай маъсума борлигига тамом ишонаман-да, унга орзу қила-қила етишиб, сўнг илкис йўқотган қувончини ҳеч қачон қайтариб беролмаслигимни ўйлаб ўксинаман. Сўнг дунёning аллақайси бурчидағи маъсумага хаёлим кетиб, ёнгинамдаги маъсумани — иссиқ-иссиқ нафаси билан бутун тани-жонимни иситаётган санамни унугиб қўяёзганим учун ўнғайсизланаман. Балки, дейман ўзимга таскин бериш учун ичимда, ўша йироқдаги сулув ҳузуримдаги мана бу сулув билан битта — бир тану бир жондир. Мен овсар буни сезмаётгандирман. Басирлигим ҳам, тўпорилгим ҳам ростдир. Малагим бунингдек лақмалигим устидан ҳар қанча кулса арзиди. Ахир, ҳар ҳолда, «Маъшуқа» бор қадди-басти билан унинг қалбидан кўчгани аниқ-ку! Эриб кетиб, мақтапни керак, деган хulosага келдим. Лекин илгари «Маъшуқа»ни роса қўкларга кўтарганимни эсладим-да, тил тишладим, иккиласми, Жамиладан суюнчи ундиргани келганимман, шундай экан, ҳозир фақат Гириҳдан сўзлаганим маъқул...

Янгилик Жамилани ҳайратга солиши тайин эди. Шундай бўлди ҳам: у сўзимни охиригача эшифтани сабри чидамай қийқириб юборди, сўнг, кўзлари порлаганча чизмани кўрсатасиз, кўрсатмасангиз бу кеча ухлолмайман, деб қатъий туриб олди. Охирги нусхани отам ўзи билан уйга олиб кетди, хомакилари унча ўхшамаган, десам, хафаланиб, жаҳли чиқиб, баттар тиқилинч қилди. Хомакилар ҳам мазмун ва кўлам ҳақида тузукнина тасаввур берар эмиш! Кўнишдан ўзга иложим қолмади, лекин кейин кўнганимга минг пушаймон едим. Шайтон қиз Регистонда мени кўп абгор қилди, хомакиларни эринмай титкилагани, ҳар босқичда бир тугун ҳосил қиласидиган чизиқлар ва белгиларни ўзича баҳолагани, Тиллакорига зарбланадиган Гириҳ бошқа обидалардаги Гириҳдан қай жихати билан фарқ қилишини эзгилаб сурештиргани, булар бари — майли, ичимни ит тирнаб. баҳоли-қудрат жавоб қилдим. Аммо қайтаётганда бирдан Улугбек мадрасаси қаршисида тўхтаб саволга тут-

ганды тахтадек қотдим. «Файби ақа, сизгаям шундай туюладими, пеңтоқ юлдузлари ўзаро қовушмагандай?» — Жамила шундай дея паришон бир алғозда чимирилди, айни чоқда менга шунақа ширин сузилиб қарадики, шамдек милдираб эридим. Ох, нимасини айтай, ахир азалдан мени адойи-тамом қылган, азалдан танижонимни жунбашга солган, тириклик дүнёсидаги энг улуғ түйғу нелигини англатган мана шу қараши эмасми? Факат эрисам, эрибина тугасам-да, ерга буткул сингиб-сирқиб кетсам майли эди, тилим ҳам кишанланди, бўғзим қуруқшади, бирор калима жавоб тополмай, кўзимни лўқ қилиб туравердим. Қутилмаган оғир ўнгай-сизлиқдан тезроқ қутулиш учун ё бу ердан тезроқ жилиш, ёки иккимизга ҳам баравар таскин берадиган бирон луқма қилишим керак эди. Ниҳоят, каллам ишлаб кетди, «Сизга шундай туюлар, Жамилахон», дедим дабдурустдан; сездим, таъкидим Жамилани қониқтирмади, аста илгарилаб бораракан, деди: «Яқинда театрга борувдим, балерина дугонам тоза бидирлаб берди. Эрчаси каромат қипти. Анови юлдузлар илгари бошқача бўлган эмиш! Аламим келди, эртаси куни эрталаб янка ўзим келиб кўрдим. Ростдан ҳам унча ўхшамагандай. Комиссия қанақа дабдаба билан қабул қылгани эсимда. Нима, комиссия адашганми? Еки одамлар аравани қуруқ олиб қочишиятими? Шубҳа ёмон экан, мени ўлдираёзди. Сиз, рост гапирадиган одам, менга очиқроқ тушунтилинг!» Шаксиз, у отасига ён босиброқ сўзлаётган эди, отаси имони, хунари, уқувига қаттиқ ишонарди, ҳатто отаси ҳар қанақа банда қатори янгилишмоги мумкинлигини, баъзи оддий қоидалар билан аллақачон атай, ўз хоҳиши билан кечганини тасаввурига ҳам сиғдиролмасди. Энди мен нима қиласай, тоза кўнглини, тоза кўнглида эмин-эркин яшайдиган умидларини ерпарчин қилиб ташлайми? Жоним Жамила, падарингизни худо ёнига қўйиб суйинг, аммо у шу қадарлик меҳрингизга арзирмикин, у сизга, менга, умуман жами одамзодга муқаддас мулкни менсимади, бу мулкни тупроқ билан тенглади, буларни қўра-била сиз уни аршу аълога ўтқизиб қўйишингиз тўғри бўлармикин, дейинми? Ёким, авлодимиз шаънига номуносиб бу сиру савдони бино қылган сизнинг падари меҳрибонингиз-у, лекин афсус, унинг жабру жафосини тортаётган, маломатини юрагида юқ қилиб кўтариб юрган каминанинг дагалдан дагал валинеъмати, деб ҳақни бор бўйи ўртада кўндаланг қилайнинми?

Агар, валинеъматим аллақачон бир қарорга келиб қўйганини, бир вақтлар ўзига қадрдон бўлган бўсағага тоабад қадам босмаслик учун қасам ичганини, падарим тўнини бунаقا тескари кийиб турганда ўзимни буткул чор-ночор — ипсиз боғлангандек ҳис этаётганимни, падар хуш-хуввақтлиги, рози-ризолиги билан тузилмаган оила тақдиривойлигини айтсан у не ҳолга тушаркин? Ёруғ дунё қўзига тор кўриниб, ўзини бир бало қилиб қўймасмикин? Э, йўқ, Жамила мулоҳазали, эсли-ҳушли қиз, икки дунёдаям ундан ёмон кўчаларга кирмайди. Кейин, қолаверса, камина учун ҳалигидай валдираш осон эканми? Валдирашни Расул Усмонга чиқарган, автомат бўлиб кетади, жуда иложини тополмаса қофияси билан енгади. Каминани худо бундайин ноёб иқтидордан қисган, ҳалиги ҳар бири тегирмон тошидек дўлвор сўзлар хаёлимдан ўтилти-ю, танимни қайноқ тер дарёйи азим бўлиб ювмоқда.

Аламдан тагин ўйлайман: жоним Жамила, мени тушунганингга шукр, шу боис сенга бир умр сиғинаман. Билсанг, бу дунё мен учун фақат сен билан ёруғ ва роҳатбахшидир. Хаёлинг содик ҳамдамим бўлгани туфайли кўнглимни таний олдим. Ахир бу дунёдан сўқирлигимча ўтиб кетишим ҳам мумкин эди-да! Бу оғир савдо, жоним! Сенга суюнаман, тақдирим сен билан тоабад бир эканлигига ишонаман. Бир кун келиб отам инсофга эншига ҳам, биз бечораларни тушунишига ҳам ишонаман. Хосиятли кунда меҳрибоним оқ фотиҳасига етишамиз. Оқ фотиҳа — умр ва турмуш дастури! Аммо, мен ҳали сени дунёга келтирган одам не ўйлар билан бандлигини билмайман. У зот орамиздаги муносабатдан хабардорми? Албатта бу унча аҳамиятли эмас, аҳамиятлиси — унинг ҳам оқ фотиҳаси! Жуда қўп нарсаларни чалкаштириб юборган, жуда қўп нарсаларни оқилона тарзда ўрни-ўрнига қўйган бу қадим дунё, оталар ўзаро дилдан келишмас экан, ҳеч қачон барака топмайди, оталар холис ният билан қўлламас экан, ҳеч қачон биз ҳам барака топмаймиз!»

Ғайбиддин отасини синчковлик билан, ҳатто бир қадар оғриниб, хайрат ичра кузата бошлаганини яширмайди. Фақат уста ўғли тамоман ўз изига тушиб олганини, ҳар бир ҳатти-ҳаракати ва қаломига ўзича баҳо бериб юрганини сезмасди. Хусусан Ғайбиддинни Гириҳ туғилган кунда отаси аввал боладай қувонгани, Расул Усмон

шөърини мириқиб тинглагани, кейин эса бирдан меровланиб, маъюсланиб қолгани таажжубга солди. Чиндан ўша қуни уста тавсифга сигмайдиган бир ҳолда эди: гоҳ кулди, гоҳ нигоҳида оғир гусса ёлқинланди. Ахволи бу қадар ичорлигини тушунтириб беришга эса оқиз, аслида у тани-жонидаги тўлғоқлар боисини бир қадар билади, баридан воқифлигини ўзича эътироф этади, аммо негадир ич-ичига аллақачон кириб олган, шундоққина юраги ёнига ўрнашган Гириҳ нидоларини ўғли ва Расул Усмонга опкоралашдан чўчириди. Тангри жамолига этишган Гириҳ афғонини эшитишга фақат ўзи қодир эди, бундан у гуурланди, одатан ҳар қанча ўзини баланд тутишига қарамай киприк намлади, истиҳолани йиғиштирганча, белбоғи учини қовоқларига босди. «Сизлар ҳақ,— деди зўр-базўр.— У бир вужуд, эҳтимол юрак. Ўнлаб қоғозда бўлак-бўлак ётган юрак! Шифтга зарб қилинса бас! Энди Маъруф Афзаловични кўндириш қолди. У ҳам одам, тушунар!»

Шундай қилиб уста Маъруф Афзалович тушунишига умид боғлади, Файбиддин билан Расул Усмонни огоҳлантиrmай, бекитиқча асли жини сўймайдиган хонаи хосга қатнади; ҳалиги жиққамушт тортишувлардан сўнг ўзини кўрганда шайтонлаб қоладиган бош мутасаддини тиқилинч қилаберди. Атай паҳта тиқиб қўйилган ўжар қулоққа Гириҳ билан баробар ҳунари табаррук дунёсида кўпдан унтилган бир ҳикмат оқ ёрлиқ олганини такрор қуяберди.

Нозик иддао ва таъна аралаш айтиладиган ҳар қанақа каломга Маъруф Афзалович учина қолмайди: у Гириҳ ҳақида ўз хulosасини пишишиб юргани учун бу борадаги ҳар қандай маънили-маънисиз фикр билан ҳисоблашмайди. Ҳунар йўриқларига мувофиқ тушмоги гумон тушунчаларини тарғиб этиш ёки ўзи ишонган ақидада муқим қолиш учун эса ҳеч нарсадан тап тортмайди. Шунга эришсаки, ҳамма уни тингласа, ҳамма унга қуллуқ қилса! Ахир, у кимсан Маъруф Афзалович, ҳалигача бир банда тушига ҳам кирмаган, ҳеч бир оқилу доно эплолмаган юмушни зўр қобилият билан адо этган — Тиллакоридек азamat иморат гумбази ичкариси учун замонага мос ва мукаммал тарҳ тайёрлаган! Манови ғаламис, тирноқ остидан кир қидирадиган бандан нотавон унинг олдида ким бўпти! Агар қаттиқроқ пуфлаб юборса гарддек йўқ бўлади-кетади! Нега у мана шундай ичорлигини, тақдири қил устида турганлигини

тан олмайди? Нима учун күрпасига қараб оёқ узатмайди? Ахийри гажирлиги бошига етади-ёв! Қатъият билан шулаарни ўйлагандан сүнг у устани итобга олмоқنى, қаҳр билан чирпирак қилиб юбормоқни чүтлади, тезги на сездики, кекирдагига зёр бергани бекор, ҳарчанд чирангани билан тазиик ўтказолмайди, бу ғаддор банды, ўлса ўлиб қўя қоладики, ўйловидан тонмайди. Қўли калта, борар манзили қоронги, имкони беному нишон бир бачканда одам қошида иккиланётгани, нимадандир ҳадиксираётгани учун Маъруф Афзалович ичиди ўзини роса сўқди, бетоқатлик билан ўзини нари-бери ташлай-ташлай, охири бетидаги парданси сидириб ташлаб, мулоим жилмайди: «Уста ака, ўзингизни бунча овораи сарсон қилишдан мурод нима? Оёғингизни тинчгина узатиб ётсангиз бўлмайдими? Галвадан ким наф топибди, сиз топасиз! Нима истасангиз бажо келтирай, аммо, худо ҳақи тарҳимни бошқа тепкиламанг!» Ана шундай, ҳамиша қовоғидан қор ёғиладиган бошлиқ бирдан чиройини очди, тузуккина эриди, ширин қаломини аямайдиган бўлди, борингки, уста неча марта эшик қоқиб келса, шунчак марта ҳалигидай муомала билан елкасини силади, инсоғу диёнат нелигини тавсифлади, шаккоклик ва қўрслик нозиктаъб ҳунар эгасига асло ярашмаслигиги писандалади. Ҳар гал уста умидхонасидан қадди дол, боши эгик ҳолда, зеру забар бўлиб узоқлашди ва, ниҳоят тушундики, Маъруф Афзалович билан талашиб-тортишиб тилагига етишолмайди, бу бандага арзидодини айтгандан кўра деворга танбур чертгани авло!

Маъруф Афзаловичдан қўлинин ювиб қўлтиғига артган уста Шамсиддин кунлардан бир кун, ҳе йўқ, бе йўқ, кундалиги устида мия ачитиб ўтирган Гайбиддинни етаклаб Тошкентга жўнади (асли у Расул Усмонни ҳам ҳамроқ қилмоқчи эди, афсуски, шоир ўша кунлари баҳти сари қанот қоқиб учиб кетган Лизахон ғами-дардида оҳ чекиб, ранги сомондек сарғайиб, хужрасини қоронғилатиб ётарди). Ҳай, ҳай, Тошкент деганлари шаҳар эмас, бир баҳри уммон эканки, бехудуд мавжи-мароми ичра иккалости ҳам қум зарралари янглиғ сингиди-кетди. Буниси майли, чидаса бўлар, шундай катта жойда бир бандани танимаслик айниқса ёмон экан: автобусдан худди этлари суяқдан ажратилгандек бир алфозда шалвираб тушганларидан сўнг, гавжум кўчаларни сарсону саргардон кеза-кеза, ахийри гадойтопмас бир чеккалидаги мусо-фирхонада амаллаб жойлашишди. Тонг-азонда уйғониб.

бу жойни қайтиб елкамизнинг чуқури күрсин, дея, хуноб бўлганча, тасаввурларида жами умидларини рўёбга чиқарадиган идорани излаб кетишиди. Шундай идора бормиди? Бўлса, у қайда? Шукр, бор экан, шаҳри азимнинг қоқ ўртасида савлат тўкиб, эшигини катта очиб, узоқ-яқиндан ҳожат истаб келган одамларни ажаб тавозе билан ичкарига чорлаб турган экан; бу мурувватдан ота-бала анчайин севинди. Иззатни сийлов билиб ичкарига шошилишди. Ичкари беҳад сокин, пашша учмайди, қўшалоқ устунлар, мармар зиналар, баҳмал дарпардали деразалар маҳобатли, лекин жонсиз бир тарзда қотган, ҳар замонда кириш йўлаги, узун каридорларда кўзга ташланиб қоладиган башанг кийимли кишилар нимадандир ҳадиксирагандек омонат қадам босишади. Устани бошқа нарса кўпроқ ҳайратга солди: бу жойда одамлар бир-бирларига деярли эътибор беришмас, сўрашишга келгана оғрингандай гап қўшишар, аксарият ҳолда ер сузганча бир-бирлари ёнидан индамай, қовоқ солиб ўтиб кетишар эди. Шаксиз у идора ташқарисидаги тавозе ичкарида тагин ҳам барқарор, тагин ҳам назокат билан намоён бўлишини дилидан кечирган эди. Остоңда турган қизил шапкали қорақош йигитча нима иш билан келганини узоқ элаб-эзгилаб суриштирганида, ижозатнома бўлмаса киритишга ҳақи йўқлигини виқор билан айтганида тепа сочи тикрайди, агар Гайбиддин, қоида шунақа, деб ҳоврини босмаганда она сути оғзидан кетмаган бу гўдакни гап билан ерга киритиб юборар эди. Бурчини ҳалол ўтаётган йигит билан талашгани ортиқча бўлди, серсавлат бинонинг орқа тарафидаги қўл зўрга сиғадиган туйнукчадан ижозатнома олиб ичкари киритишаркан ва мармар зина билан иккинчи қаватга кўтарилишаркан. индамас одамлар улардан муомалаларини аяшди. Узундан-узун каридорда тентираб қолишиди: на устани, на Гайбиддинни, на Гириҳни бирор таниди. Худди учалови учта шарпа, бири изидан бири судралиб, оҳиста сиргалиб нари-бери бориб-келар, беихтиёр ялтироқ эшикларга сўйканар, сўнг жимгина нари жиларди. Гойибдан келиб қолган сабрли шарпалар бари бир ҳеч кимни қизиқтирумади, шунда ҳануз тавозе-такбирдан умидвор уста, Гириҳ олдида ўзини оқлаш ниятида, ижозатномада рақами кўрсатилган эшикка дадил яқинлашди ва уни шарақлатиб очди. Диван қўйилган кичик хонада бурқситиб чекиб ўтирган бўйинбог тақсан юмалоқ гавдали киши хиёл турганча бақрайиб қаради. Шу ҳо-

латда анча турди: худди хузурига сеҳргар чол ибн Хат-  
тоб кириб келгандек эди. Хизмат, деб чайналди ва аста  
жойига чўқди. Инсофлига ўхшайди, деди ичиди уста  
унинг кўзларига тикилиб ва темирни иссиғида босди:  
шоша-пиша арз-хол қилди. Бўйинбогли киши афсус бил-  
дирди: «Ҳалак бўпсиз. Биз одатда тепангиздаги билан  
масала ечамиз!» Шундай деб у тезгина соатига қаради.  
Шўрлик уста изза еди. Вақт қадрига етадиган манови  
кимса олдида эмас, пешонасига ярақлаб офтоб чиқишига  
умид боғлаб турган Гириҳ олдида! Ҳафа бўлма, танти  
ошнам, ўлмасам энг баланд мартабалиси билан гаплаша-  
ман, деди пичирлаб, ўзича мунғайиб қолган Гириҳга  
далда берди. Кошки бу далда бирор нарсага яраса! Эсга  
тушса юракни ўртайди холос. Чиндан, уйга қайтишгач,  
туриб-туриб уста әзилди, нописандлик билан айтилган  
ҳалиги гап нашъя қилди. Ҳўш, нега фақат тепадаги ма-  
сала ечишга лойиқ? Тепадагининг шохи-бутоги борми?  
Нима, у одам эмасми? Баланд курсини эгаллаб ол-  
ган Маъруф Афзалович қариchlайдиган нарсани, гар-  
чанд жуда пастида — оёқ остида ўралашиб юрса-да, у  
ҳам сал-пал танийди-ку! Агар танимаса Самарқанд-  
дай мўътабар шаҳар ноини еб, сувини ичиб бекор-  
га юрган экан-да! Йўқ, шукрки, у бекорга юрган  
эмас, белида белбоғи, бошида салласи бор, худо ажал-  
га омон қўйса заминни ҳайратга соглан мулки му-  
борак нималигини, бу мулк аро яшаган ва яшаётган  
санъят нималигини, кўп мاشаққатлар эвазига бошқат-  
дан бино бўлган Гириҳ нималигини Маъруф Афзалович-  
га ҳам, уста Иброҳимга ҳам, бўйинбоғ таққан анови ким-  
сага ҳам исботлаб беради. Исботламаса қўймайди. Сў-  
қир ва иотавон эканликларини ҳам бетларига солади.  
Ахир нечун улар Гириҳни танишмаяпти? Нега уни бе-  
гана деб камситишади. Нафсиlamбри, бу худодан тониш,  
кечмишни топташ, эртани оёқ ости қилиш эмасми?  
Даврлар ўтаверади, лекин инсонга холис хизмат қилган  
кашфиётлар тоабад яшаб қолади. Қачонлардир Гириҳни  
ҳам кашф этишди: уни адолат билан ёвузлик ўртаси-  
да чегара қўя олишга қодир мўъжиза сифатида тавсиф-  
лашди. Энди бу тавсиф қадри тушганига уста ишонмайди,  
аксинча, бу қадрни тоабад оширмоқ зарурлигига  
имон ўгиради. Ҳатто у Гириҳ умри жуда қадимдан, кўк-  
дан келган ваҳийга биноан Самарқанд тамал тоши қў-  
йилган, буюк Ҷафар ўғлон мангу Саодат уйини барпо қи-  
лишга амр этган замондан бошланганига кафил ўтади.

Одам умри чакки — бебақо, юлдуздең бир йилт этиб ўчади. Битта-яримта қылған савоб юмушигина номини абадият сари әлтади. Агар Гирихни кашф этишмаганда әхтимол Арслонбекни ҳам, Болимбекни ҳам бу кунда хеч ким эсламасди. Ҳеч бир нақош ёки меъморга насиб этмаган бекіёт савобни улар аді этишди, бу билан бутун оламта татигулик баҳтга етишишди ва ўzlари ҳам, кашфиётлари ҳам ривоятга айланди. Энди эса ривоят шундоққина уста құз ўнгида ҳаётга күчди. Аслида у ҳаётнинг ўзи эди, бу кунда гаройиб жило берди. Ривоят худи Гирих янглиг әзгулик билан жаҳолат ўртасида туриб олди. Уста ановиларга шулар ҳақида сүзлайди, оқу қора юзага қалқыган шундай кунда ўзи ўзидан ийроқлашетган жигарларим, деб ҳайқиради, бу дунё учун бебаҳо мерос қолдирған ажоддарингиз имони ва эттиқодидан мункир келманғиз, ахир сиз олис сафарга чиқсаныз, мозий дардини тингламасанғиз, сойи-сувига күприк бўладиган унсурларини зеру забар айлаш билан киғояланмай, бор аччиқ-чучугини бўйиндан соқит қилсанғиз, минг аттангки, ҳеч қачон манзилга етолмайсиз.

Қачонлардир уста олисдаги, ҳа, жуда олисдаги манзил ташвишида эди, эрта-кеч ҳаёлан гойибдаги ўша жойга интилар эди, Гирих тирилған кун беадад интизорлик ниҳояланғандек туюлди, ҳаммаси осонгина жойжойини тонадигандай бўлаверди, қачонки, Гирих билан Маъруф Афзаловичга рўпара бўлгач, бирдан бари ўзгача изга тушди. Шўрлик уста шунда чархи гардун Маъруф Афзалович қовоқ-тумшуғида жо бўлганини кўрди, кўрди-да, ҳиққа тинди. Таасавуридан олисдаги мўътабар манзил бутунилай йўқолди. Айни дамда бошқа кўпгина нарсалардан ҳам айрилди. Ҳалиги истагида эса муқим қолди: анов кимсаларга са одатони нелигини, яъни мулки муборак ила Гирих жамолига этишмоқ фурсати нақадар мўътабарлигини англатмоқ аҳдидан қайтмади. Энг дасти узун одам ҳам ботинмайроқ яқинлашадиган баланддан баланд эшикларга суйканаверди ва, ахийри бир кун, маҳбатли хонада кўзлари худди Маъруф Афзаловични сингари юмалоқ кишига, жумлай мўмин тилаги-истагини бир имо ёки бир имзо билан ижобат этишга қодир, кўринишдан Хизр табиатли кабиру кенг-феъл оқсоқолга йўлиқди.

Зада Гирих билан етовлашиб кўп кўчаларни қатогон қылған, кўп эшикларни дағдаға-даъво билан очиб-ептган, ахийри латталари сувга тушиб оҳори нозик эшик

тагида саргайиб турган ота-бала айни фурсатда Маъруф Афзалович муросаи мадорасига жон-жон деб қуллук қилган уста Иброҳим Тиллакори деворига сўйканганча, таъмирни қайси нуқтадан бошласам экан, дея хушнуд хаёл суроётганидан бехабар эди.

Хосиятли кунда — муқаддас қоғоз юзасидан жилмайиб қарагандай ёки Гириҳ ўзига чексиз умид боғлаганини уста теран туйган эди. Авваламбор Гириҳ шу куни ўзини англади, ривоят қобигини ёриб чиққанини билди, худди минг йиллар аввалгидек нимасидир кам яралганини устага уқтириди, фақат уста тўла англомадики, ўша не камлик!? Сўнг, Гириҳ уста қатъиятини ўзига қалқон қилди: ҳар не тўполонли кунда Гириҳга паноҳ зарур эди. Индалло, у минг-минг йиллар қаъридан эсономон келган ривоятни бир дастур билган банда билан тошиди, шу боис баҳри уммонни эслатадиган шахристон кўчаларида сарсону саргардон кезишларни писанд қилмади, салобатда бир-бирларидан қолишмайдиган эшиклар тагида мунгайиб, беун-бехол ўтиришларга тез кўниди. Шукр, энди у кутиш азобидан чўчимайди, фақат дабдабаю асъасадан бино бўлган, одамзодга сарик чақачалик нафи тегмайдиган ҳашам аро тентираб умрини бекор ўтказиб юборишдан, нуқул шу ҳашамгагина бўйсунадиган қабулхоналарда умрбод ўксик, забун, эътиборсиз қолиб кетишдан хавотирланади.

Бу қабулхона ҳам бошқаларига ўхшайди: турфа ранглар бир майин қовушган, паркет пол шишадек ялтироқ, бурчакда, бениҳоя улкан сопол тувакда дараҳтсимон гул пушти очилган; нинажидек нозик котиба эринчиқлик билан эснайди, тагин ҳам баттар эринчиқлак билан бир сидирға оқса бўялган деворга, бир қизғимтири стол қиррасига, бир ёнидаги сайроқи телефонларга термилади, енгил имо-ишора ва ярашиқли ҳаракатлар ила келди-кетдини бошқаради. Зеро, бундан одам оёғи бир лаҳза узилмайди, келди-кетди бамисоли занжир — тинимсиз айланади, фақат, афсуски, на кирган, на чиққан Гириҳни кўради. Ҳатто ширинзабон хушфеъл котиба ҳам уни зимдан бегонасираб кузатади, уни ва шерикларни ичкарига чорлагани шошилмайди. Бу хил муоммадан Гириҳ ҳар ҳолда қисинади, чукур-чуқур энтикади, уста пинжига тиқилганча аста шивирлайди: «Фақат мен бир ками билан туғилғондурмен десам, асли дунёнинг ўзи ҳам бир камига яралғон эркан-да!»

Гусса билан қоришиқ бу шивир устани әзади, уста

сархуш тортади, шуурида ададсиз бир ўт чақнайди, не-дандир ғуурланган алфозда Гириҳ шивирини ҳамма — бутун эл, жамоа, замин эшитишими, магзини чақишини истайди, орзу қиласы. Аттанг, тилақ бошқа, ижобат бошқа-да! Нече гал ҳайқириқца солиб айтилган не-не залвар гүссани англамаган улус беун шивир тимсолидаги гүссани қаёқдан ҳам англаради. Ҳар ҳолда шитоби тез Самарқанду Тошкандга ўшаган шаҳарлар, нигоҳлари эртанги кунга қадалгани билан, иккала оёғи ҳам кечмишда бўлган, келгусига етиш-етмаслиги даргумон Гириҳ ҳасратини тинглашни арзимас икир-чикир санашини уста тан олмас, ўлиб-тирилиб инкор этарди. Ҳозир Гириҳ билан қўлтиқлашиб бекатдан бекатга юргурганларини, бир ёпилса қайтиб очилиши маҳол эшикларни, рўпарада синамоқчидай истаганча қилт этмай туроладиган қиёфаларни эсларкан Файбиддинга сездирмай хўрсинди.

— Сен ҳеч Болимбек ҳақида ўйлаб кўрганмисан? — кутилмаганда савол берди уста. — Ўша банда қисмати бошимизга тушмаётганига ким кафил? Лекин, ҳайронман, гуноҳимиз нимайкан?

— Бирники мингга, мингники туманга, деган гап бор, дада, — Файбиддин негадир ижирғангандек бир тарзда сўзлади. — Шу... ҳар ҳолда, биз ҳам оппоқ эмасдирмиз.

— Оҳ-ҳо, йигит, кесатиқ менгами? — деди уста ранжиганнамо. — Ҳақсан, сени олдингда тилим қисик, лекин сенам инсоф қил-да! Кўнглингдагини айт тезроқ! Биласан, анови нокас билан қуда бўлмоқчи эдим. Ярамади. Ўшандан бери задаман, бир бандага дардимни ёрлмайман.

Атиги бир зум ичида Файбиддин каловланган қўйи қайноқ терга ботди, алланечук кенгайиб кетган қорачиклари мунгли бир маъно ифодалаб йилтиради, ҳатто бўғиздан англамоқ маҳол жонсиз хўрсиниқ отилиб чиқдики, келин тушириш савдосидан оғир савдо йўқлигига қайта имон ўгираётган уста ажабсинди.

Тушмагур Файбиддин, тезроқ баҳти очилсин, хўреинигини ютолмай қолганича бор: кечадан бери тани буровда, жони қийноқда, ўзини зимзиё ертўлага қамалган капалакдек у ён-бу ён уради, лекин тешик-туйнук топиб қутулиб кетишга ожиз, ё фалаксан, бу бетизгин кўргилик қаёқда пойлаб турган экан-а!

Бир гал Тошкентдан келиб, ўйлаб кўрса, Жамила

билан қарийб икки ҳафтача дийдорлашмабди. Шаксиз, орага тушган ҳажрни бепарволиқдан топди; шу муддатда дилида йигилиб қолган соғинч ҳиссі бирдан жунбишга келди-да, уни бир зарб билан күзига ҳамиша ис-сиқ күринадиган идора остонасига элтиб ташлади. Құз адоги ёки қиши бошида очиладиган күргазмасига ҳаловат билмай тайёрланыёттан Жәмила ҳам мени астойдил соғинган, устахонасига киришим билан құчогимга оти-лади, үпичларга күмиб ташлайди, узоқ бедарәк кетиб қолганим учун шунчаки үпка-гина қиласы, деган хаёлдан Файбиддин сархүш эди; мабодо саркаш қызы димог-фирогни ҳаддидан ошираса оғига йиқилиб кечирим сү-рашга, Гирих можароси ҳамон тугамаётганини айтиб, айбига иқрор бўлиш ёки ҳар ким ҳам тушумайдиган бу айбнинг бир бўллагини отасига тўнкашга ҳозир эди. Одатдагидек, у муомаласини ўрганиб қолган сўзидан бошлиди: «Жоним!..» Бутун умиди шу сўзда жам эди, лаб ёр-май турган қизга интиқлик билан тикилди, ноз қиляпти, нозни келишитиради, деб тагин ўзини овутди. Ҳай хот, одатдагидек илиқ эркалашлар, тантиқона навозишлар, назокатли лутфу карамларга эмас, совуқ ўт сочаётган қаттол нигоҳга дуч келди. О, мана унинг қаҳри — жами тирикликни галаёнга солувчи қаҳр! Азалдан шу лаҳзага дучор бўлишдан чўчимасмиди? Асли ҳозир қызы ҳолатида у ўйлаганчалик зилзила аломати сезилмасди, қызы «Маъшуқа»га яқин ерда маъюс турап, ва ажабки, шу туришида у нимаси биландир ҳайкалча эгизагидек эди. Бу ўйдан қалқиб кетган Файбиддин дунёning қайси дир бурчидан мана шу ҳайкалчага ўхшаш қызы яшашига ишониб юрганини, ўша қизга хоҳлаганича қувонч ва баҳт ато қилиш ҳеч қачон қўлидан келмаслигини билгани учун азобларга ботганини эслади, эсларкан, бир тахмин ичра ҳушидан айрилаёди: «Наҳотки, «Маъшуқа» ўзи бўлса? Балки у «Икки наққош»даги Биби Но-зикдир? Қачонлардир уни Расул Усмон суйган балери-нага ўхшатмоқчи бўлганини айтган эди. Лекин у бале-рина эмас, Биби Нозик! Ахир, ўртада Гирих, тургандек-ку! Гирих баридан огоҳ: у бошлиган, у якун қиласы! Бу яхшими, ёмонми?» Жимлик чўзилганидан у хитланди, ўзини энди маъюслик изнига берган қизга зимдан разм соларкан, беихтиёр яна ривоятга кўнгли суст кетди, фирдавсмонанд шаҳристонда қадим-қадимда қад ростлаган Саодат уйи, Гириҳни қашф этган наққошлар, тилла ўрнини тўлдирган мис, йўлтўсар эшиқ, аросатда қол-

ган алп Қамон билан Биби Нозик... хаёлини алғов-далғов қилиб юборди. Бир оҳ тортиб ўзига келганды хонада қиз күринмади, бурчакдан, шағал тошлар ичидан «Машуқа» мұлтираб, жами умиди, қайғусини нигохига жамлаб сокин боқар эди...

— Ҳа, ўғлим, нимага индамайсан? — деди уста сабрсизланиб.

— Нима дейман? — минғирлади Гайбиддин, овозида бир аламзадалик бор эди. — Қани, аввал манови иш битсин, кейин...

— Э-э, битса битар, битмаса... на илож?! — деди уста авзойи тамом ўзгариб. — Фақат шу... нашъя қилади: эски обидалар доди манавинақа эшиклар, ортида ўтирганларга икки дунёдаям етиб бормаслиги рост эканда!

Уста сўзлаётганда Гириҳ бир ингранди.

Рост, уста эътирофи оғир эди, бу мислсиз аламни, замин учун кўпдан залвар юқ саналган, одамзод шуурини хираваштириб юборишга қодир аламни келиб-келиб энди ногоҳ илғашгани (умидвор юришган экан-а!) ўзларининг ҳам ғофил бандалар қаторида юришганига ишора эди. Ана шуниси айниқса чиппа ботди: уста қоврилди, Гайбиддин ер билан битта бўлиб титилаёзи, улар бу қадар ночор аҳволга тушганини кўрган Гириҳ эса илкис минг йиллар нарига чекинди. Анчагача уста Гириҳ нафасини туймади, кўқси бўшаб қолди — қўрқиб кетди, қачонки, йўқ, мен ғофил эмасман, аксинча, ғофилларни уйготиш чекимга тушган, дея пицирларкан, бадани илиди. Аллақайда тўниб ётган ва қ т и ортда қолдириб Гириҳ келган эди. Анча таскин топган уста, ғофилликдан ўзинг асра, парвардигор, дея хитоб қиласкан, Гириҳ бир хўрсиниш билан норозилик изҳор этди. Уста Гириҳ муддаосини англади ва то тириклик бор экан, одамзод бу нарсадан халос бўлиши мушкуллигини эътироф этди. Тириклилик азалдан шундай қурилганда: кимдир яхши-ёмонни бирдек ямламай ютадиган ўпқонни ер юзидан бутунлай йўқотиш учун жон олиб жон беради, кимдир заминни зир қақшатадиган бу савдо бошида томошибинлик қилади. Ўтар дунё ўйини шунақа, бунга қайғурмоқдан тийилгани афзал, рост, тийилади, ҳадеб жон чеккани беҳуда, манови диққинафас гўшадан ҳам тезроқ жуфтагини ростлайди. Керак бўлса ўзлари изидан дод солиб боришин-да!

Тушликка атиги ўн дақиқа қолганда, бу фалаки буқаламун муруввату оқибат деган нарсалардан тамомила

маҳрумлигига имон ўгириб, бугун ҳам Гириҳ билан қўлтиқлашганча, лабга кесак суртиб қайтишни чўтлашаётганда, кўҳлик котиба илиқ табассум билан ичкарига чорлади.

Хона дид билан безатилган: тўрда улугларимиздан бирининг сурати, дераза токчаларидағи нафис гултувакларда турфа гуллар — очилган-очилмаган, пушти деворга уйғун дарпардалар, бурчакда зилдек темир сандик, устида рангли «Фотон» телевизори, гир айлантириб қўйилган суюнчиқли юмшоқ курсилар оқ гилофда эди.

Чиндан хона, соҳибига буюрсин, тавсифга лойик, лекин ҳозир ота-бола шинамликдан ҳам кўра маҳобатга мойил хонага ҳавас қиласидиган ахволда эмасди, улар лаҳза ичидаги минг бир гумон кўчасида хаёлан кезганча бутун диққатларини тўрда, суюнчиғи елкадан баланд юмшоқ ўриндиқда кино ёки мода журналини варақлаб ўтирган олтмиш ўшлардаги юзи ажинсиз, пешонаси тик, қийғир бурунли тугмакўз кишига беришиди.

Орадан зил-замбил дақиқалар кечди, ноёнгай жимлик ҳукм сурди, узундан-узун ялтироқ стол қўйисида таёқдек қотган ота-бола пақقا ёриладиган, ота-бола пинжида бир шарпа янглиғ кўз илгамас бўлиб турган Гириҳ гувва ёнадиган даражага етди ҳамки, асаби қанақалигини кўрсатиб қўйишга қасдланган каби хона соҳиби индамай журнал варақлайверди.

Қургур журнал қалингина, вараги ҳар очилганда жонсиз эпкини аста келиб уста Шамсиддин юзини силаб-сийпалаб ўтгандек бўлар, чукур ўриндиқда буткул чўкиб олганидан қадди кўзга зўрга чалинаётган киши журнални эмас, ўзининг ҳасрат-надоматга тўла кўнгли қатини эҳтиёткорона очиб кўраётгандек эди.

— Сизлар ота-болами? — деди туйқус хона соҳиби. — Нимани талашиб юрибсизлар?

Чўзилган жимлик устани нақ қовураёзган эди, журналсевар хона соҳиби кутилмаган саволларини ботиний бир таҳдиду иддао билан бергандек, айни пайтда ҳеч қандай жавобу изоҳга ўрин ҳам, ҳожат ҳам қолдирмандек туюларкан, бирдан музлаёзди. Сўнг, билдики, сўровлар Гириҳга оғир зарба бўлиб тегди, Гириҳ бужмайиб олди, тагин... чекиниш учун ҳозирланди.

— Нимага индамайсизлар? — қировли қошини чимирди хона соҳиби. — Қанчадан-қанча идора тинчини бузибсизлар. Манови хатга хаёлларингга келган нарсани тиқиширгансизлар.

— Кечирасиз, — уста ўзини ўнглади, — биз зарил кеб...

— Зарурат дeng? — яна чимирилди хона соҳиби. — Яхши, унда қулогум сизда. Асли ўзи менга Маъруф Афзалович даҳмазаси етарди, у Тиллакори деявериб гаранг қилган эди. Уни Самарқандга жўнатиб тинчийман деб турганимда, қайта ёмон бўлди, бир жангари ёнига сиз қўшилдингиз.

— Маъруф Афзалович бир нарсани тушунмаяпти.

— Хўш, нимани?

— Ҳар иморат, кўҳнами, янгими, ўз заминига эга бўлишини.

— Қизиқ, — хаёлга толди хона соҳиби. — Буни сиз тузук тушунасиз. Шундайми? Унда айтинг-чи, ўзи... ўша Тиллакори қанақа иморат?

Гурунг мароми бир синоатни — мана шу шинам хона доирасидаги беҳад оғир тош босадиган имкон Маъруф Афзалович томонида эканлигини аллақаҷон очган эди; мана шу хусусда ғайирлик билан мұҳокама юрита бошлиған ота-бола эрта-индин Гириҳ абжағи чиққан ҳолда орадан йўқлик комига кетиши мумкинлигига ишонаёзди. Шундай саросар туришган пайтда жаранглаган кейинги сўров худди елкаларига залвар гурзи бўлиб урилди. Анграйиб қолган Файбиддин аста отасини туртди, нигоҳи ёлқинланди: «Энди чидайсиз. Жавобингиз тайинми?»

— Кечирасиз, — деди уста мингирилаб, — Тиллакори қанақа иморатлигини гапириб беришим қийин.

— Ҳа-а, тушунарли! Аммо роса эринмай қуриб кетишган эканда! — журнални кўксига босди хона соҳиби. — Харажат қиласверасан, қиласверасан, лекин натижя йўқ — бирортаси савлат тўкиб туришдан бошқасига ярамайди.

— Унчалик эмас, — чидолмади уста.

— Қанчалигини билолмадим, — ниҳоят хона соҳиби журнални стол четига иргитиб ўрнидан турди. — Бунакада... эскисини ямайвериб эсдан ҳам, чўнтакдан ҳам айриламиз. Ундан кўра янгисини қурсак маъқул эмасми?

— Эс бўлса айрилмаймиз, — деди уста инжилганинамо. — Чўнтак, менимча, у нарса олдида... нима бўпти!

— Оҳ-ҳо, бойвачча одамнинг гапи-ку, — товушсиз куларкан унинг чехраси сал ёришди. — Барибир чўнтақсиз... бекор, мушук офтобга чиқмайди. Мана, сиз, ёд-

горликка қайишадиган одам, чақасиз нима қила оласиз? Аммо Маъруф Афзаловичга тан берганман. У ёдгорликиям, бизниям тушунади. Сиз эса унинг устидан шикоят қиляпсиз.

— Ие, — таажжубланди уста, — ҳали мен шикоятчига чиқдимми?

— Шунчаки айтдим-да, — бепарво жавоб қилди хона соҳиби. — Хў-ӯш, — деди кейин чўзиб, жиндай сукутга толди, — менга тушунтиришларича, Маъруф Афзалович тарҳига кўра таъмирда тилла ишлатилмас экан. Сиз тиқишириётган тарҳга кўра эса акси. Давлатни чўнтағи шилинаверсин-да, а? Тагин ҳалигидака пичинглар!

Уста ғашланди: «Нега тиқишириар эканман?»

— Кечирасиз, — у сал қисиниброқ ғудранди, — ҳали камина ҳар бир иморат ўз заминига эга бўлишини эслатдим. Тиллакорини тилласиз... кулгили, ҳатто шармандали! Агар Маъруф Афзалович йўриғи билан иш тутилса, бу — кийикка жайра либосини кийдириш билан тенг! .

— Вазият кўтармагандан кейин замин — пуч, — ўзи муҳим санаган гапга атай урғу берди хона соҳиби. — Сиз тузган лойиха у одамнидан беш баравар қиммат, беш баравар! Сизнингча, бу чиқимни кўтариш осонми?

Миясини симиллатган бу сўровга жавоби, ҳа, жавоби тап-тайёр эди, унга дарди-дунёсини зимзиё қилган ҳасратларини ҳам қўшиб-чатиб сўзлашни ўйлади. Лекин ўзини тутди. Етти ўлчаб бир кесиш керак. Агар ҳозир ақча-чақа равиши билан бор бисоти оддийлик ва қаноатдан иборат бўлган санъат тушунчасини тарозининг икки палласига қўйса шаксиз ахвол тагин ҳам нозиклашади, ҳали сўниб битмаган умидларини сухбатни ўз ройишига монанд қураётган бу одам бутқул босиб-яничиб ўтади. Тавба, Маъруф Афзалович йўриғини қўллаб-куватларкан, таъмирни аввалги тарҳга биноан олиб бориш керак негаки у — арzon, деган фикрда экан, нечун уларни газагига дори қилиб, мұнақа эзғиланиб ўтирибди?

Сим-сим оғриққа чулганаётган уста ўриндиқ ортидаги очиқ жойда нари-бери оғир-оғир одимлаётган хона соҳибини паришон кузатаркан, нечундир, хаёлида эртакеч ажиб сурур ичра сокин ётадиган Регистон майдони, бу майдонда неча асрлардан бери қўр тўккан обидалар-

ни бир бора, атиги бир бора күргани уммонлар ортидан ошиқиб келадиган мардум гавдаланди.

— Хўш, — деди хона соҳиби кутилмаганда, — лойи-ха учун ҳали маблағ ҳам талаб қиласиз?

— Йўқ, — деди уста узиб.

— Ҳҳ-ҳҳ!

— Бўларини айтдим, — дадиллашди уста. — Ёдгорлик заминидан узилиш — фалокат!

— Сиз тузган тарҳ ёдгорлик заминига мосми?

— Шубҳаланишга ҳақлисиз.

— Ҳамма бало шунида-ку.

— Унда кўпчилик овоз ҳал қилсин.

— Фалванинг уяси экансиз, — мийигида кулди у. — Тинч қўймайсиз шекилли? Бўити, сиз айтганча бўлсин, иккала хужжатниям тегишли одамлар билан чоғиштирамиз. Шарт шу: натижаси қанақа бўлишидан қатъи назар, қайтиб тинчимизни бузмайсиз, идорама-идора изғимайсиз. Розимисиз?

— Розимиз! — деди Гайдардин отасидан аввал; лекин у бу хулоса Гирихга унча ўтиришмаганини, ҳануз бужмайганча отаси пинжига тиқилиб олган Гирих шубҳа комида қолганини сезмади.

Хона соҳиби бўйчан, елкалари қўйма, оқ мағизли юзи бичими келишган тийрак йигитни гўё энди кўрди. Ўйчан нигоҳида нимадир, хайроҳликка ўхшаш нарса учқунлади. Сўнг негадир дарҳол қовогини уйди, индамади, аста ўриндиққа чўкиб, бояги журналга узалди. Суҳбат яқунлангани англашилди. Хайр-хўш айтишини унутган ота-бала, бир гумонни икки қилиб, ташқарига йўналди.

## VII

Хона соҳиби уста Шамсиддинда тузуккина таассурот қолдириди, ҳатто унинг бир қадар сиполиги, сезилар-сезилмас инжиқлиги, оддий нарса ҳақида ҳам мулоҳаза-корлик билан фикр билдиришини фазилатга йўйди, ўзларига сал бўлсин қайишадиган нуфузли одамни учратгани учун Гирихни қутлади, ха, қутлади, кейин эса кутилмаганда, ҳай билмадим-да, бунинг ҳам танаси бўлак, дардимизни қанчалик тушундийкин, эрта айтганидан тонассайди, дея нолиш қила кетди.

Уста нолишини бошлаганда Гайдардин атай ўзини чалғитди, шу билан у Маъруф Афзоловични ҳам, хотир-

жамликини қийиб қүядиган хүшмуюмала бандани ҳам, унсиз иидо бериб келаётган Гирихни ҳам ёидан чиқарди. Ҳуш-фикри Жамилага күчди: энди тезроқ Самарқандга етса, сүнг Жамила ёнига чопса, оёғига тиз чўқса-да, ҳалиги куни қовоғини очмай хун қилгани, индамай устахонада ёлгиз қолдириб кетгани боисини аниқласа, дардини ҳам бошқатдан тўқса, бу дунёда фақат уни деганини айтса, ҳайқириб айтса — ана шунда сал таскин топармиди, борлигини ёқаётган ўт сал босилармиди!..

Йўл бўйи Гайбиддин илинжу армон ўртасида тўлғанди, шу ҳолда агар манзилга етиши билан бориб Жамилани кўрмаса, унинг гули насрин япргидек тоза чехрасига тўйиб-тўйиб тикилмаса, илиқ-илиқ нафасини туйганча орани очиқ қилмаса пакқа ёрилажагини билди. Ўз дарди-дунёсига гарқ отасига бугун институтга бориши зарурлигини баҳоналади. Ғовлаган калласига шу важ айланиша қолди. «Офарин-э, ўғлим, ўқиш жонворниям эслар экансан, мунақа сийпаланаверсанг думингни тугворишади-ёв», деб уста кесатди. Тушмагур Гайбиддин индамади, қиёфасига шундай тус бердики, бундан кўпам латтамаслиги, институтдаги бутун бордикелдиси жой-жойида эканлиги англашилар эди.

Асли, отаси кесатиги бежизмас, у охирги курсга миаси қатигини ачитиб, зўр-базўр етволди, энди буёғи бир гап бўлар, деб овундими ёки Гириҳ ташвишига шўнғиганиданми, мана, қаришиб тўрт ойдан бери институт осто-насига қадами тегмади, қандайдир чақирув қофозларини эътиборидан соқит қилиб, чамадонига тиқиб қўяверди, шундайки экан, думини аллақачон тушишган бўлса ту-гишгандир-да!

Йўқ, ҳозир институт бир чақа, ҳайдаспа нима бўпти, тагин ўзлари иззат-икром билан (ёлворишса ҳам ажабмас!) қайтариб олишади. Еш ниҳолни қийратмаслик керак-да! Хўш, Жамила... меҳри гул, қаҳри тикан Жамила ҳайдаса чатоқ: бу малаксиймонинг биргина ҳукми билан ҳаммасини, нимагаки интилган бўлса барисини, оппа-осон бой бериши мумкин — ҳаётда ўрни ва қадрини белгилайдиган илинжу қувончини ҳам, қобилиятини ҳам, эртасини ҳам, ҳатто, қолаверса, Гирихни ҳам!..

Нетонг, у қобилиятига ишонарди, одамзод қобилият билангина баланд иззатга лойиқ, деган фикрни дилида мунтазам такрорларди, муҳими, отаси эъзозлайдиган ҳунарнигина эмас, шу ҳунарга яқин, у билан жон ва қон қадар сингишадиган мусиқа, тасвирий санъатни бутун

кенглиги, бутун муракаблиги билан сүярди. Қайси дир күрикда у Жамила билан осонгина танишгани, унинг ҳусни ва чуқур фикрлашига маҳлиё бўлган ҳолда, ўзи ҳам келишган қадди-басти, санъат унсурларига ҳалол муносабати билан маъсума қизни сехрлаб қўйгани бе-жиз эмасди. Ўшанда у кўпчилик шаклини ҳам, ранги-равишини ҳам, моҳиятини ҳам муқаммаллик намунаси деб баҳолаётган асарни тан олгиси келмаган, ҳеч ким кутмаган бир дағаллик билан муносабат билдирган эди, адашимаса мана бундай: «Биродарлар, сал пастроқ ту-шинглар, ахир бу нарса ҳавойи-ку!» Шаксиз, бу фикри кўпчиликка, ҳусусан, мақтодан шишиб кетган муаллифга оғир ботди. Мақтov бошида турганлар уни букиб қўйиншига уринишиди, улар эҳтимол муддаоларига етишлари ҳам мумкин эди; сал-пал довдираబ қолган гўр йигитга, ҳал қилувчи паллада, чинни жарангини эслатувчи тиниқ ва дадил овоз кўмакка келди. Бундай қара-са, ё фалаксан-э, қаршисида бир малак, малакки, чехраи малоҳати билан замину замонни тамомила забт этмоққа қодир, хумор кўзларидан ўт сачратганча, беаёв мулоҳазалари билан унга ён босаётган эди. Омади чопдида! Шу билан кўрикда жуда катта мавқе қозонган мақтov гердайишдан тийилди, ёнгинасидан иккинчи ўжар тушунчага жой берди. Нотекислик тугилишига сабаб бўлган йигит ўша лаҳзада, шубҳасиз, Жамилага авлиё бўлиб кўринди. Беихтиёр, ҳаё пардасини бузмаган ҳолда, йигит сари суринди. Четроқда яна ўзларича тортишишди. Танишувдан кейин кўп ўтмай уни устахонасига етаклаб келди, пишиб етилган асарларини ҳам, хомаки-ларини ҳам унга биттама-битта кўрсатди. Қизиққи, Гай-биддин ўзи мақтога қолганда учига чиққан хасис экан, Жамила ардоқлаб юрган кўп нарсаларни кўзини чирт юмганча бекор қилди, «Маъшуқа»га рўпара келганда эса ўйга толди, ҳатто бир қадар маъюсланди, кейин кў-пирди, уни дурдонага менгзашига жиндай қолди. Кейинча бу ёгини Расул Усмон бузди, Гайбиддин фикри бир ёқлама деган даъвони қилди ва «Маъшуқа» таржи-маи ҳолидаги энг гўзал саҳифаларни ҳар хил доғлар билан чаплади. Хаҳ, шоири тушгур-а, унга ўчакишиб шу-нақа қуюшқондан чиққанми нима бало?! Аммо, унақада, ўчакишган деса, Жамилагага элакишгани чинга ўхшаб қолади-ку! Йўғ-э, ундай мас, у кўнгли бекир бола, гайир-ликка ҳам бегона, у ҳеч қандай қитмириликни ўйламай, азбаройи жўшганидан, ёлғонлагиси келмай, ростини

айтган: «Маъшуқа» узоқ умр қўролмайди! Ажаб, у бу фикрни айтишда қандай асосга суюнган? Ёки моҳияти ва эътибори ҳозирча унча сезилмаётган бу инкор щунчаки тўпорилик ёки бошқалар мақтаган нарсани атай ерга уришга интилиш натижасими? Агар бир вақтлар Файбиддиннинг ўзи вазиятга қараган, қиз кўнгли учун «Маъшуқа» жозибасини кўкка кўтарган, энди ўша айтганидан қайтолмай, ичидা изза еб юрган бўлса-чи?!

Санъат боқийликка даъвогар! Хўш, нечун? Бу даъвогарлик заминида нималар ётгани ёки ётажагини аниқлаш учун Файбиддин Жамила билан эртадан кечгача тортишар, лекин зерикмас, аксинча, завқи-илҳоми келар, шуурида мудраб ётган тумтароқ фикрлар аста-аста уйғониб маълум бир ипга тизила бошлаганини англар, гоҳо ҳузурбахши енгиш ҳиссига кўмилиб, маъсума қиз раъьи-равишини чил-парчин қиласи эди. Йигит катта кетганини, қўрсликни ҳаддидан оширганини Жамила унчалар оғир олмасди, негаки, ўжар йигит ҳужумга ўтганда барча ишончли далилларни ўзи томонга оғдириб олган бўларди. Аттангки, бора-бора тортишувлари сийраклашаверди, энди куюнишлари боқийликка даъвогар санъат доирасидан чиқиб кетган, кўпроқ рух ва юракка ҳокимлик қиласидиган туйғу атрофига кечарди. Сўнг олдиларида ғалати бир муаммо кўндаланг бўлди: муҳаббат санъат билан тирикми ёки аксинчами? Жавоб тайёрдек эди. Рост-да, илгари бу борада кимлар ёқа чоклаб жанг қилмаган, хулоса шуки, улар бир-биридан айри яшомлади, бир-бирини тўлдирган, улғайтирган ҳолда боқийлик билан юзлашади. Лекин булар қолипдаги гаплар-да! Ана шу жиҳати Файбиддинга ёқмади, Жамилани огоҳлантириди: «Тайёр ошга баковул бўлмайлик, жоним, шошилиш керак!» Бу даъват билан у кўп нарсани назарда тутди, яъни ўзи Гириҳ ёнида — уни тирилтириш учун отаси ва Расул Усмон билан Тиллакори паноҳида кўр тўккан, Жамила эса ҳаётидаги биринчи кўргазмага ҳозирланмоқда. Ҳартугул, Гириҳ тирилиши билан ўзлари шуҳратга кўмилишига қанчалар ишонса, замини кун-бакун мустаҳкамланаётган кўргазма ҳам Жамилагага довруғ келтиришига шунчалар ишонади. Асли эл оғзига тушиш учун «Маъшуқа»дек биргина асар кифоя, Жамила эса «Маъшуқа»га ўхшаганлардан бир нечтасини сафлаб қўйибди, шунга ҳам қаноат қилмай, неча ойдан бери «Икки наққош»ни оҳорламоқда.

Кўксисда зил-замбил дард билан келаётган Файбид-

дин ним қоронги тор йүлакдан ўтиб устахона эшиги қабзасига қўл узатган пайтда нечундир «Икки наққош»ни эслади. Йўқ, ривоятга эмас, ўша ривоят заминида Жамила яратишга киришган, Расул Усмон фикрича, кўргазма обрўйини кўтаришга қодир ғаройиб асарга хаёли оғди.

Эътироф этиши керак, Жамила моҳиятни рух билан қориштириб юборишга бениҳоя нозик ёндошади, унингча ҳаёт мағзи, одамни эрку иқболга ундан турадиган шахту шиддат, қолаверса, событлик или маҳзунилик ҳам моҳиятни таранг ушлайдиган руҳда мужассам эди. Хусусан, у «Икки наққош»да ҳам шу йўналишда изланди, минг ийлларни ортда қолдириб келган ривоятни мураккаб қиёфатга жо қилди: гумбази жуфт баланд иморат, ҳавода муаллақ қотгандек, қаъри-қиёфаси сирли, шаксиз, бу синоат нигоҳларида ҳайрат, қўрқув ва ўксиниш акслангандан икки наққош бетига ёпилаётган қўштабақали эшикка бориб тақалади. Во ажабо, Жамила қабариқ усулда шундай бир ҳолат яратганки, наққошлар қарашидаги ўзаро уйғун маънолар алланечук гуноҳи азимга, айни пайтда ўжар табақалар ўзларига қасдмакасд йўл бойлаганига сезилар-сезилмас ишора берар эди. Ана шундай дидли қизга бир умр сифиниб яшаса арзимайдими? Арзийди, лекин... сифинишини ҳам эплаш керак чоғи, қолаверса, сифиниш — мужмалликка яқин, дангалликка нима етсин! Ҳозир дангал бўлади, гуноҳларини тан олади, отаси оёқ тираб турганини ҳам, совчилар қайтгани боисини ҳам... яширмайди. Тамом, сабр косаси тўлди, ахир бундай тушунуксиз, ҳеч бир мезонга сифмайдиган савдога қачонгача чидаши мумкин? Айтади, барини айтади, ҳар нарсага фаҳми етадиган Жамила тушунар, шафқат қилас! Ахир ер юзида ундан шафқатлироқ, ундан оқилароқ малак йўқлигига аллақачон амин-ку!

Устахона манзараси ўзгармаган: тўрда «Маъшуқа», бурчак-бурчакда ҳали сону сабоқда йўқ ҳайкалчалар, қоқ ўртани «Икки наққош» эгаллаган, у ҳануз хомакилигича — Файбиддин атай дикқат қилди, бирор ўзгариш сезмади. Сал илгарироқ Жамила, биринчи навбатда эшик ўзи-ўзидан, қасдма-қасд ёпилаётганига ишора берувчи маънони чуқурлаштиришим керак, дегандай бўлувди; бу ҳолатга ҳам тегинмабди. Нима, рағбат қилмадими? Еки бошқа юмушлар вақтини ўғирладими? Хўш, шу лаҳзада, «Икки наққош» дан сал нарироқда,

паришон туришида рағбат борми? Қўзларидаги нима — мунгми, таъна? Ҳар ҳолда у ҳеч нарсага хоҳиши йўқдек бир алфозда эди. Маъюсгина кулимсирашида жонсиз бир киноя йилт этаркан, у ўзини кутмаганини Гайбиддин сезди, шу заҳоти ичиди пишишиб келган ҳасрату хоҳишини унудти, оббо, аввал юмшоқроқ эди қаҳри, энди нақ қилич-ку, деган ўй билан остоңада жимгина қотди. «Жоним, намунча зугум?» — демоқ ниятида лаб жуфтлади. Лекин «жоним» ифодаси учун қани журъат? Ҳей, намунча саркаш-а, бу қиз? Сал қовоғини очса-чи, икки оғизгина ширин-шакар сўз айтса-чи! Йўқ, у сукут сақлади, қўл қовуштирганча, «Маъшуқа» ёнига ўтди, ўтаркан, юз бичими «Маъшуқа»никига ўхшаб кетишини Гайбиддин яна эътироф қилди.

— Барини билдим, — деди ниҳоят Жамила унга қарамай.

Нечундир бу лаҳзада таъби-дили муздай совуган Гайбиддин ўзидан ҳам, Жамиладан ҳам тониши чўтлаётган эди; ҳайҳотки, ҳозир у ўзида эмасди, гўё руҳи-шуури танини тарк этган, қадри тушгани боис беимкон қолган имкон қаршисида дали-девона янглиғ турар эди. Хона жимлигини бузган маҳзун товуш эса бирдан уни ҳушига қайтарди, алланечук қаҳрга тўлганча, бу қанақа бекарорлик, мен ҳеч қачон ўзлигимдан тонмайман, демак, Жамила ҳам тоабад ёнимда, дея мулоҳаза қилди. Сўнг Жамила не маънога ишора берганини ўйлади, лекин, нимани билдингиз, деб сўрашга улгурмади. Энди Жамила таъна оҳангидаги гапирди.

— Сизни шунақа деб ўйламовдим.

— Намунча гужала қиласиз? — «Икки наққош» атрофида гир айланди Гайбиддин. — Мунақада жинни бўп қолади-ку одам!

— Мен сизчалик гужала қилмаётгандирман, — давом этди Жамила ўксиниш билан. — Дудмал ўзингиз, кейин... ғофилсиз. Яхши ҳам Расул Усмон бор экан, ўша айтмаса юраверардим.

— У девона яна бошингизни қотирдими?

— Йўқ, Гайби ака, у девона эмас, ақли қўп балога етади, — Жамила унга тик қаради. — Сиздан ўпкалайман-у, асли ўзим ҳам ғофилман. Шу маҳалгача сизни тушунмабман. Панадан панага қочишингизга эътибор қилмабман. Қиздамас, йигитда ҳам ноз бор, деган бемаъни хаёлни қилибман. Энди билсан... даҳшат!

— Сизни шоир тилсимга сопти.

— Эҳтимол. Лекин, гап шундаки, менга ва сизга ўхшаганлар туғилганидан то ўлганига қадар тилемимлашган эди. — Ахир, наҳотки билмасангиз, кўпдан бери ўзингиз тили-жағидан айрилган, инон-ихтиёрини бошқага берган одамовисиз-ку! Агар шундай бўлмагандা отангиз нима учун совчиларни қайтарганини ўшандәёқ айтардингиз.

— Узр, Жамила! — илгари босди Файдиддин, рангкүти оқарганча, аста Жамиланинг билагидан тутди. — Худо ҳақи кечиринг. Ростдан мен фафлатдаман, бу гаплар тагига етмадим, етолмадим. Тан олай, мен отамга қарамман, гўдаклигимдан! Аммо, билмабманки, кўнглим ихтиёрини ҳам...

— Сиз шу пайтгача мени овутиб ўелгансиз! — Жамила билакларини унинг чанталидан силтабгина чиқарип олди. — Бу билан яхшилик қилмоқчи бўлгансиз. Аммо овутиш бора-бора таҳқирга айланишини билмасмидингиз?

— Қўйинг! — Файдиддин шундай хитоб қилдики, залвар оҳангода, Жамила, жоним, билардим, туппа-тузук билардим, лекин иложим қанчайди, деган маъно ниҳон эди; юракни тиғдек тилимлайдиган бу маъно, афтидан, Жамилагага осонгина англашилди, ингичка қошларини чимирганча, анча муддат лол қолди.

— Чора кўрмаяпман, — деди анчадан сўнг.

— Чора битта — кутиш!

— Илгари кутиш мен учун баҳт эди, энди... билмадим, — Жамила «Маъшуқа» юзини силаб қўйди. — Аммо сиз бунақа баҳтга туғилмагансиз, кутишазоби билан эмас, шунчаки эрмакка вақт ўткарасиз, сизнингча шу вақт муродга еткаради. Қани, айтинг-чи, бунақа юриш-туришингиз ҳалиги ривоятдаги алп Қамон қисматига ўхшамайдими? Эрта бирор гап бўлса, узлатни рад этишингизга ким кафил?

Анчагина қизишган Жамила, ўпка-гина қолиб, ошкора ранж оҳангода сўзлашга ўтди, димоғ-фироғ билан яна Расул Усмонни эслади, яна у «Икки наққош»ни яхлитлигича тушунишда қўллагани ва пештоқ бошига тушган кўргилик туфайли кўп нарса алғов-далғов бўлиб кетганини яширмай айтганини миннатдорчилик ҳисси билан изоҳлади. Буниси етмагандек, тағин устига, Файдиддинни бир лоқайдликда, бир писмиқликда, бир нописандликда айблади. Қизи тушмагур шоири жаҳон

исмини оғзидан бол томиб тилга олганда Гайбиддин бир күтарилди, икки қураги ўртасида жойлашган шайтон, сулувлити ўзига, намунча тантыланади бегона йигитни мақтаб, боплабгина жавобини бер, деб рисоладагидек маслаҳат солди. Йигит жонидай азиз малак юзини қилди, ўз айби ҳам бўйнидалигини ўйлади, ярамас шайтон сазасини ўлдирди, нафас ютди, жавдирай бошлаган кўзларида эса ўтич ёлқинланди, ўтиччи, Жамила таънатахқирларига бамисоли раддия: барига чидаш мумкин — қаҳру ғазабга ҳам, аччиқ зуғумга ҳам, зил-замбил кесагиққа ҳам! Фақат қувғин балосига эмас! Савдои Расул Усмонга намунча ихлос? Зада дили бунингдек зарбаи қаттоллиқдан оғримасинми? Орада ҳали бошқа бир хатар бор, сулувгина шоири жаҳон лутфу лисонини берилиб тинглаган эрса-да, ул хатар дарагини сезмаган кўринади. Ҳарнечук, аччиқ ҳақиқат ҳозирча ўша ўринига тушмаган кошиплар тагида ботин ётгани маъқул эди, Расул Усмон буни ўйламай-нетмай очибди, аттангки, нени вайсаган бўлса — бари беаёв калтак! Бу калтак кимнинг бошида синади? Шоир буни эътибордан соқит қилган, хусусан, орага, вақти келганда, у алп Қамондек узлатга чекинишини қистирган, яъни нотавонлик касалидан фориғ эмаслигига ишора қилган, ҳатто яна ҳам мақтангиси келиб, Саодат уйини мўъжизага менгзаган, ўзлари ясаган эшиқдан жабр кўрган наққошларни афсус билан эслатган. Ваҳоланки, адашмаса, у Саодат уйи нималигини ҳам, одамдан одамни ажрата оладиган эшик тақдир ҳукми билан тутган йўлни ҳам тузукроқ тасаввур қиломайди. Дунёда эшиклар кўп, лекин одамзодни Гириҳ ҳузурига йўллайдиган эшик ягона! Кошки, у буни тушунса! Ким билади, балки тушунар, унда худо хайрини берсин!..

Оғир-енгилни кўп кўрган уста бекор нолимади: чиндан маҳобатли хонада кечган сұхбат шунчаки овунч, лекин у бир тўхтамга келгани, йўл-йўриқ белгилагани, хотиржамликка берилгани ҳеч бир асос бўлолмайди. Ахир, ҳали нимага эришилдики, ўзларини овутишади ёки олдга кўндаланг қайси тўсиқни олиб ташлашдики, ҳовурларини босишади? Ҳозирча илгарига бир қарич ҳам силжишгани йўқ, шундай экан, улай-булай ҳовли-қишиш — тўйдан олдин ногора қоқиш билан баробар, қисқаси, ҳали жами ғалва илгарида, таҳлика-талашув илгарида, неча йилдан бери пойтахтдаги казо-казолар билан

ош-қатиқ бўлиб келган Маъруф Афзаловичдек чангали қаттиқ одам осонгина жон узарканми? Ичидан пишганку тоза! Соддаликини эса эгам йигиб-териб уста Шамсиддинга берган, одам одамга суюнмоғи, бир-бири қадрини баланд тутмоғи азал ва абад, деган ақидага у елимдай ёпишиб олган, ҳатто, ўламан саттор билганимдан қолмайман, деб катта-кичикка эрта-кеч пишсанг бераётган густоҳ ҳам шу — устаси горатгар! Унингча, ёпирај, киши қони ўзгалар қонига қўшилмаслигидан, тирикчилик юки зил-замбилигидан нолиб ўтишдан ёмони йўқ эмиш! Олдинда бораётган банда, пайгамбарми ёки авлиё, дономи ёки жоҳил, мардми ёки номард — бари бир, мабодо бирор билан бел олишмоқни ният қилса, бирон арзирли асоси бўлсин эмиш, беасос бирор юзига чанг солса гуноҳи азимга кўмилармиш! Эҳтимол, бу жиҳатдан устаси тушгур ҳақдир, яъни тўғриликни қадрлай билиш — савоб, лекин, умуман ёши бир жойга етганда фақат ўйла-хаёл билан овуниш ҳам унча ярашмас — хусусан, таҳлиядан, ёрти-юрим фикрлардан дадил кечиб, теварагига тикика боққани тузук, агар шалвирайверса Маъруф Афзалович хамирдан қил суғургандай қилиб осонгина суробини тўғрилайди, мабодо у улфатбоши сифатида ўзини чет-чақага тортиб турганда ҳам бирни ўн қилиб кўрсатадиган шотирлари адабини бериб қўйгани ҳар доим имкон топишади. Кейин аниқ билмайдики, ўғли ва шогирди билан кеча-кундуз қўзи нурини тўкиб, мияси қатигини ачитиб тузган тархи маза-матраси қай даражада? Ростдан ҳам у нарса ранг-рўйини ҳали унча билмайди, эҳтимол, шу сабабли юрак ҳовучлаётгандир, шу сабабли маҳобатли хона соҳиби таклифидан ботиний оғринаётгандир. Фақат шу ҳол унга жиндай таскин берадики, у нени англаган ёки англамаган бўлса, бари Гириҳда мужассам, астагина имони ёнига ўрнашган Гириҳ бу ҳақда неча бор мулойимлик билан шама қилди, бир оёғи неча минг йил нарида бўлса ҳам унга ҳамдард эканлигини билдириди. Шу боис, жони қилга илинишидан таан тортмай, ҳамдарди билан Самарқанду Тошканд қўчаларини чангитди, не-не залвар эшиклардан мардона мўралади, не-не баланд мартабали зотлар ҳузурида гоҳо тариқдек титилса ҳам унча-мунчага бўш келмади. Энди ишқилиб охири баҳайр бўлсин-да!

Уста муҳташам хона соҳиби ўртага қўйган шарт магзини аввал унча чақмаган эди. Тошкентдан қайтишгандан сўнг ёлғиз кезлари кўпинча шу хусусда ўйлади, ўй-

ларкан, шарт замирида тушунуксиз бир озордан ташқари бағрини қақшатадиган қочирим ётганини түйди. Э, дариг, бу одам Гирих олами ва бу оламни нозик қатламларигача гавдалантирган тарҳ ҳеч балога ярамаслиги, чогиштирув чоги қайсарликни құдрат өзглайдиган кимсалар томонидан тит-піт қилиб ташланажагига билиб-білмай ишора бериби-да! Бошқа нимаям бұларди. Үшанды ҳалимдай юмшаганига ажабланған эди. Қуйқаси бу ёқда экан, борингки, бир қитмирикни чамалаган. Хүш, чамаласа нима бўпти, ихтиёри ўзида, хоҳлаган но маъқулчилигини қиласерсин, у бундан чўчимаслиги керак. Үртада ҳақ бор, ҳақ! Еки, нима, ўзига тамом ишонмайдими? Ҳоми бўлса... уни яшириш учун ўзини панага тортадими? Эх-хе, йўқ ердаги юкни гарданига ортаётганда дами чўққи учини чилниб юборгудек ўткир эди-ку!

Тўғри, худди шунақа эди, хусусан Гирих тирилишига ишончи ортгандан кейин тошни кемиришү сувни симириш зарил келганды ҳам чўчимади, олди-қочдига илҳақ эл орасида боши-кети йўқ миш-мишларни тарқатган уста Иброҳимни дўй-пўписа эмас, қофозу қаламни ва гумбаз шифтидаги беҳисоб белгиларни собитона тарзда бўйсундира олгани билан додга қолдирди. Лекин, аттанг, бу ёғи сал келишмаётир, бу ёғида фақат сабрга суюниб қолганидан доғда, хилват хонада энди нима бўлишини ўйлаб (тағин бот-бот Муслима ўғлининг бахти очилмаётганидан нолийди), ичи тирналиб ётганда тинмасак Файбиддиндан уста Иброҳим шогирдлари билан ҳайдар-ҳайдар қилиб Тиллакори таъмирини бошлаб юборганини эшилди. Иш-ку туж гўшти еди, шу бекорчилиқда кенжамга бировини унаштирсам савоб тагида қолардим, аммо мени ҳафсаладан қисган экан, Муслима жавраганича бор-да, деган боши-кети йўқ ўйловда роса тажанг эмасмиди, бу хабардан ток ургандек бўлди. «Йўғ-э!» — деб бўзарди, овози алланечук тушкун жаранглади ва шу лаҳза гўё иккى игна икки чаккасига зарб билан санчилди.

Биргина йўл қолди: ҳозироқ уста Иброҳим ҳузурига бориши, ҳа, на чора, кечиктирмай югургилаб бориши, ё яхши, ё ёмон муомала билан уни аҳдидан қайтариши, бу шошма-шошарлиги ҳаммани уволга ботириши, уятга қўйиши мумкинлигини майдалаб тушунтирмоғи керак. Қўймаса-чи? Бор, йўлингдан қолма, халта-хуржунимни сендақа ҳакамсиз ҳам эплайман, деб изза қилса-чи? Ни-

ма, унда ёлворадими, оёғига бош урадими? Э, йўқ, буниси шаънига ярашмайди, умуман, унинг олдига гердайибми, ялтоқланибми бориши — ўзига ўзи маломат ортиргани! Бирор дардини сезиз турса ҳам ўзини овсарликка соладиган ошинасини кўрса бари бир жини қўзийди, истаса-истамаса жазаваси тутиб, Улуғбек мадрасаси пештоқини расвои жаҳон қилганини бетига солади. Ярамагур уста Иброҳим ҳам ўрни келса жангари — у ҳам ҳақини едирмайди, ичингда аламинг бор-да, ҳисса чиқариш учун ҳар муқомда чакак урасан, лекин хомтама бўлма, бирингга ўнни кўндаланг қилмасам шаҳрингда юрган эканман тош тергилаб, дея гувранишдан ҳам тоймайди. Ана буниси ғалати, ичидা нима алами бор, э, айтгандек, устай нотавон, ўзингни гўлликка солма, наҳотки бу шама тамалидан бехабарсан!? Ахир гап унинг қизи Жамила билан кўзинг қароги Гайбиддин орасида, ҳе йўқ, бе йўқ,чуваланиб қолган олди-қочди ҳақида-ку! Э, фалак, бу не кун!? Игнадан тую ясад жимгина юришганига қуяди, эмишки, Муслима оёғи олти, қўли етти бўлиб уста Иброҳим эшиги турумини бузгани чоғланибди, сатанг ўелингни қизимнинг тирноғига ҳам тенгситмайман, деб ошинаси Муслимани қалтаклагудай қилиб қувлабди, буни обрўси тўқилганликка йўйиб қаҳрга минган уста Шамсиддин арзиган-арзимаган важ-карсонларни рўйач қилганча унга захрини сочаётганмиш. Тепада худо бор, кампира ўша эзма даргоҳига қадам босгани ёлғон, фақат ўзи ҳалигидай оғизланиб қўйгандан кейин у Жамилани келин қилишга ҳаваси кетиб бир-икки отланди; лекин анов кўргиликни унуммаган уста (токи жони бор экан унупотмайди ҳам!) ҳар гал даҳмаза-дўмбира билан ниятини синдириди. Жон онагинаси, ундей қилма, қиз зоти қуриб кетмагандир, мундай бошқа тешик-тирқишидан ҳам мўралагин (гоҳо шу хил ёлворишларини Гайбиддин гилтиллаб эшитган, ранги бўздек оқарган, жавдираб тураверган), дея астойдил ўтинди. Аллақачон бир сулуви ёки хунуги топилиши ҳам, орада тўй-ҳашам созгина ўтиб, Гайбиддин бўйнига алмисоқдан қолган ола хуржун осилиши ҳам мумкин эди. Қачондир Гайбиддин ҳам ялинч, ҳам дағал оҳангда: «Сал ўз ҳолимга қўйинглар, мавриди келар!» — дегани ҳали-ҳануз ҳар нарсага ишонаверадиган чол-кампир орзу-ҳавасига битмас-йитмас тўғаноқ эди. Кейин... иштиёқ билан танланган совчилар йўлга тушмасдан бурун ўз ваколатларидан жудо қилиниши ҳам гажир ўғилга алдам-қалдам таъсир қилди.

Рости, билибми-билмай, уста буидан ҳам күз юмди. Иккى ўртада ҳеч қандай сүйканиш-сурелиш бўлмаган, та- мом-вассалом! Энди кампири ёки ўзи эшилиб-эврилиб ниятларини ушатиш пайида юришганини сал сездиришса у шу заҳоти ими-жим туриб қочади. Соддадил чол- кампир сувга тушган латтадек бўшашиб қолаверади. Шунда Муслима, жаги жагига тегмай, ана кўрасиз, бу тинмагурнинг кўнгли Жамилада, деб эҳтимол қиласи. Ориятига ҳатто ел тегишига тоқат қилолмайдиган уста тутайди, тутантириқли калима тополмай ўкраяди. Ҳақ эканлигидан кечишни истамай Муслима ёниб-ўчаётган ўчоққа ермойи сепади: илгарироқ, уста Иброҳимникига совчилик ихтиёр этганда, том бўйи санчилаб ётган ўғли онасини тўйиб эмган бузоқчадек юввош тортганини орага қистиради. Қайда, уста баттар тутақиб, ўртаниб, бу тахминни бекор қиласи, мана-ман деб турган мантиқни нописандлик билан лойга қоради. Ёлворишдан тийилмайди: «Жон онаси, ундай қилма, қиз зоти қуриб кетмагандир, бошқа тешик-тирқишидан ҳам мўралагин!» На илож, бу йўриқ кампирига ёқмайди, у ялинчиқлик қилгани сари кампир тушмагур тўрсаяди. Даҳлиз эшигини иддао билан очиб, иддао билан ёпади, хонтахта ёнида терс ўтирганча, миянгиз ачиб қопти, ҳеч нарсага фахмингиз етмайди, деб зугум ҳам қиласи.

Ҳар кун аҳвол шу: қарийб жагига суюниб қолаёзган чол-кампир тоҳ Файбиддинга сездирмай, тоҳ ошкора бир-бирини чўқийди, бир-бири гўрига ғишт қалайди. Асли гиди-гидига уста Шамсиддин сабрсизроқ, шу боис кўпинча кампирига ён беради ва даҳлизига қамалиб уйқуни уради ёки тарҳ устига чўк тушади. Индалло, ўзича истиффор келтиради, бу дунёдан қайси муслим ёки муслима тоқ ўтибди, дарвешликда Расул Үсмондан қолишмайдиган ўғли тоқ ўтсин! Асло ундоғ бедодлик юз бермас, шундай экан, шошмаган маъқул, келинни минг бир чиририқдан ўтказиб танлашса ўзларига ҳам, Файбиддинга ҳам яхши-да! Алҳол, бир кун кампирি можарони нақ тўхтаган жойидан олди, гийбатни қиздириди, ахийри кўзёши ҳам тўқди, ноласи бутун ҳовлини зириллатди. Юраги зада уста ноилож уни юпатди, ширин гаплар айтди, қараса, бўлмайдиган, кампир ишёшидан бино бўлган дарёйи азимга тамом чўкаёзган, ҳатто уни ҳам ғарқ қилмоқ тадорикида эди. Шўрлик уста охири ими-жим панага қочди, эски оби-дийдага ортиқ дош беролмади, алланечук гашлик ичра «Қирқ ривоят» -

ни варақларкан, худодан инжиқ кампирига ҳам гажир ўғлига ҳам инсофу диёнат тилади. Сүнг беихтиёр рисолаи муazzамни бағрига босди, бағри илиди, шуури ёришиди, тамом баданини бир завқ, бир умид қамради. Кейин бир залвар сукунат чўқдики, уста бунақасини илгари ҳеч қачон туймаган эди, Сехрланган кўйи, деразадан мўралаётган осмон бўлагига тикилганча, пи chirлади: «Яратган эгам, хабар бер, у Жамила билан... наҳотки то тув? Мабодо тотув бўлса, бу ҳол хонадонимиз азалдан суюниб келган расми-русум тамалига дарз соглай! Шундай экан, э, парвардигор, худбин отаси қўлидан ҳар тоифа луқмани билиб-бilmай еган ойимчани останамга қандай йўлатаман? Ғайби беэсми, буни тушунмайдими? Ҳаром аралашган жойда тириклик барбод-ку!» Бир ҳукм билан омухта фикрлар кўнглида ўн қайта айланди. Ҳар ҳолда у Гайбиддинни айблашдан жуда ҳам йирокда эди, шунга қарамай, билганини ичига солиб юргани учун ундан ранжиди, ўзини чалғитиш учун яна «Қирқ ривоят»ни варақлади, лекин мутолаага ҳафсаласи чопмади. Чарчаган эди, аста киприклари юмилди, ажаб бир лаззат тия бошлаганда олисдан, заррин ранглар гужкон ўйнаётган беҳудуд бўшлиқдан бир товуш келди:

«Устаи бузрук, сиз оқил одамсиз, жумбоқ ечимини аввало эгам ҳукмига ҳавола этингиз, иккиламчи, алар ўзига ташлангиз, акс ҳолда гуноҳи азимга ботурсиз! Алҳол, билингки, оралиғда қолғон бул ниҳоллар айбдин форигурлар!»

Уста бир сесканиб кўз очди. Ҳузурдан жудо бўлди. Хонани ҳалиги сас қамраб олгандек эди, залвар сас: «...оқил одамсиз... гуноҳи азимга ботурсиз... бул ниҳоллар айбдин форигурлар!» Салдан сўнг пайдар-пай ёғила бошлаган овоз фақат хонани эмас, гўё бутун ер-зaminни ҳам чулғади, кейин у оғриққа айланиб, танига ёйилди, тобора хуруж қилаётган оғриқни унтиш учун чироқни ёқиб, мутолаага берилди. Кейин тўлғана-тўлгана ухлади, эрталаб уйғонса, ёнида «Қирқ ривоят», урниққан варақлари очиқ-сочиқ...

Уста энг аввал Гайбиддиннинг кечаги нохуш хабарини ва кейин ўз аҳдини хотирлади. Чиндан йўл битта: тушмагур уста Иброҳимни тобга олиш керак. Аммо қандай қилиб? Чиндан у ярамас бошқани тинглашни хушламайди, бирорвга ён беришга қолганда том бўйи санчилайди. Ҳусусан бу кунда у осмонга устунилик даъво қилиб турган Маъруф Афзаловичдан ўзгани оёгининг

учи билан күрсатади. Индалло, калласи ғовлаган уста, кампири буровга олиб турган бўлса-да, ўғил можаросини бугунча ҳам ортга суріб қўйишга ўзини мажбурлади, маза-матрасиз урҳо-ур эрта шубҳасиз бирор фалокатга йўлиқтиришини уста Иброҳимга тушунтириб қўйгани шошилди. Ярим йўлда фикридан айниди, таваккал қилиб йўлни устахона сари солди. Аллақачон бадига урган без билан пачакилашиб ўтириши фойдасиз, кесакдан маъни чиқар, ундан чиқмас, яххиси — фалокатдан Маъруф Афзаловични яна бир карра огоҳ этади, ҳозир уста Иброҳим хўжаси ўша, уни ўша тийсин!

Ажаб бир бўрон кўтарилишини сезган каби алағда эди, қимтинганча ичкари кирапкан, аксига, бир беҳузурлик исканжага олди, ҳамишагидек Маъруф Афзаловичнинг чаққон қўли бир телефон дастасидан иккинчисига узалганини қузатиб оғринди. Саломи аликсиз қолди, шартта бурилиб жўнавормоқни чўтлади, ичида муттасил чарх ураётган дард бундай қилгани қўймади. Ослилиб тушган қош-қовоқ зарда-захрига чидаб, даромадини чўзмай, муддаосини лўндагина ифодалади.

Бир дақиқа беҳаракат қолган бошлиқ дастани шарақлатиб жойига босди, аста туриб, кафтларини стол қирғогига тиради. Жўмгина устага тикилди: «Бу иркит чол жонимдан тўйдирди! Уйида невара боқиб ётса бўлмайдими? Ў, ярамас, худди дунё камини битказадигандек елиб-югуради-я!» Агар сабри битган уста яна лукмана ташламаганда Маъруф Афзалович шу тарзда яна қанча туришини айтиш қийин эди. Оғир ботадиган лукманни эшишиб у беихтиёр нигоҳини олиб қочди.

— Оббо, сиз-эй! — у безори йигитча билан тортишашётгандек бир оҳангда ғулдиради. — Ёшингиз бир жойда, лекин мунақа... уста Иброҳим билан орангиз қанақалигини сўровдим-а!

— Гап бу ҳақда эмас.

— Гўл дейсиз-да, одамни! жойига аста чўқди Маъруф Афзалович. — Қўйинг, уста, чарчадим. Бу бемаъни идорага келгандан бери ғалва тугамайди.

— Тиллакорини шу чарчоқ билан ямамоқчимисиз?

— Тиллакорини анови одам эплайди, — деди у уста кесатигини тушунмаганга олиб. — Сизга Махдуми Аъзамни толширдик, боринг, сиз ўшани сонга солинг. Кейин, уста, танангизга ўйлаб кўринг мунақа юришни. Одамларни биласиз, ҳасадчи экан, деб тўқиб-бичишимасин тағин!

Маъруф Афзалович гоҳ ундоғ, гоҳ бундоғ турланаёт-ганидан энсаси қотган уста нимадир олов янглиғ баданига ўрмалаётганини яққол ҳис этди. Ҳали уста Иброҳим дийдорини кўрмасликка аҳдланиб тӯғри қилган эди. Беҳуда ғалвани истамовди. Лекин умид билан бу остоңага бош уриб келиб нима топди. Уйгинасида чогиштирув кунини кутиб, ёки дилкаш кампирি билан қайсиdir баҳтли хонадондаги бўй етган қизни илинтириш режасини тузиб, ёки яратганин ёдлаб тинчгина ётгани авло эмасмиди?! Агар ҳозир муҳташам хонада кечган сұхбатни сўзласа бу одам сочини битталаб юлар-ов!

Хона димиқдӣ, жигарни хун қилворадиган ноҳуш бир жимлик кечди, норозилиги ортган уста эс борида этакни ёпиб жўнаворишини кўзлаётгандага эшик ланг очилиб бош муҳандис Солижон, уста Фаттоҳ ва уста Иброҳим бир дунё вагир-вугир билан ёпирилиб киришди. Жимжит хонани бир пасда гулдурак босгандай бўлди, қулоғи қоматга келган уста Шамсиддин энди бу ерга ўзини бегонадек сезди, қорасини ўчиришини ҳам, баҳсни чала жойидан давом эттириш учун кутишини ҳам билмай гарангсиди.

Ошиб-тошайтган биродарлар эса шу дамгача хонада қандай вазият ҳукм сурганилиги, если-хушли икки бирдай одам нима сабабга кўра бир-бирлари билан муроса қилолмай мunaқа xўрпайиб ўтиришгани боиси билан заррача қизиқишмади, ранг-қути учган бош мутасадди рўпарасида тип-тикка турганча, бири қўйиб, бири олиб, арз-додларини саржиндек қалаштириб ташлашли.

Шаксиз ҳозир уста Шамсиддиннинг ўз ғамидан бўйлак ҳар қандай андуҳ ёки қувончга тобу тоқати йўқ эди. Тикан устида ўтиргандек бир алфозда ановилар иддаосини узуқ-юлуқ эшилди, эшитаркан, ўзини аллакимлар пиширган макруҳ ошга шерикдай санади. Э одамзод, ҳар нарса бўлганинг яхши! У, уста Шамсиддин, не кўйда, соқолгинанг қирқилгур уста Иброҳим нени чамаламоқда!? Осмондаги ойни узид олмоқчи шекилли!

Қисқаси бу: машаққат билан ҳақ кўчасига кирган уста Иброҳим таҳлика-тараддудни ҳам шунга яраша қиласиди. Ойига мўлжалдаги бир манзил қолиб, роппа-роса учовидан ҳакалайди. Бу ниятини ушатиши учун кўпроқ кошин керак. Қутилмаган талабни эшигандеёқ эсидан оғаёзган уста Фаттоҳ дарҳол бош муҳандисга шикоят қилибди, у барини жимгина эшитибди, тугунни ечишда эса чайналишдан нари ўтолмабди, борингки, можаро

адолат юзасидан ҳал этилишига ишонганча учовлон укахон хузурига қанот қоқишибди.

Ахийри бидирлайвериб чарчаган икки уста сал ҳо-вурларини босгандан кейин ҳали бир четга сурилиб қолган Солижон навбатни олди, агар Тиллакорига уста Иброҳим даъво қиласан миқдорда кошин ажратилса бошка жойларда иш тақа-тақ тўхтапини эслатди. Ноўрин луқмани кўтаролмаган уста Иброҳим яна илгарига отилин-қираб чиқди, ов, инигинам, шу савилни қайси участкада қуриб қўйган данғиллама иморатимизга сўрапниз, бо-риб турган қурумсоқ экансиз-ку, ҳар ҳолда отангиз қуриб кетган хумдан ҳисобидан бермассиз, деб эзмаланган-ча Солижонни тузлади.

Одатда ғалвадан иложи борича тўрт тош нарига қо-чадиган Маъруф Афзалович беҳуда қизишаётган уста Иброҳимни босиқликка ундини, ўзи мулоҳазага чўмди, анчадан кейин Тиллакори тепадагилар назарида турган-лигидан эҳтиёткорона гап очди, шу вақтгача таъмир бе-корга ташлаб қўйилгани, шу ҳол қасрига аввалги бошлиқ думи тугилгани, агар тайсаллайверишса ўзлари ҳам тузуккина қалтак ейишлари мумкинлигини таъқидлашни ҳам унутмади. Қалтис вазият билан ҳисоблашган ҳолда Тиллакорига жиндай зиёдроқ кошин ажратилса зарар қиласайди. Кемтикни тўлгазишнинг ягона тўғри йўли шу! Буни бошқа усталар қозонга солиб қайнат-масликлари керак. Иложи борича улар ҳам бекор саланглатиб қўйилмайди. Аравани илгари силжитиш қўпроқ уста Фаттоҳга боғлиқ, у ҳали ҳеч ким юзини ерга қаратганича йўқ, уч кун бурун кошин тубини қўпайти-ришга ваъда берган...

Бу нима: жўмардликми ёки жазава!?

Хонани аввал жимлиқ, сўнг шивир-шивир босди, агар кошин пазлик буюртмалар ижросини тезобига солиб юборса ошиқлари нақадар олчи туражагини қуя-пиша муҳокама қилишга тушиб кетишиди. Шўрлик уста бир босинки, бир шалдирاما, бир ялинчай овозларни эши-тиб ўтиришга маҳкумдек пича бардош қилди, орадан кўп ўтмай сабри битди, бирдан жўшиди, йўқ, пистондек портлади.

— Инсоф қилинг-э, биродар!

Маъруф Афзалович учун айниқса ким ёмон? Сўзини бўлган одам! Агар иложини топса бунаقا шаккок бандани бир силтov билан йўқотарди ёки сездирмай шохини қайириб қўярди. Кимики гапимни кесса, эрта йўлимни

хам түсади, деган ўй уни ҳамиша ҳушёрликка чақиради. Ҳозир у шу ҳушёрликни бир қадар бой бергани учун гангиди, нафаси ичига тушди, оббо, сиз ҳали шу ердами-дингиз, деган маънода хўмраяркан, важоҳатида бир қаҳр ҳоким эди.

— Сиз аралашманг-да, — тўнғиллади у ниҳоят.

— Аралашмоқчи эмасман, лекин...

— Лекин тинч ҳам қўймайсиз.

— Мен сизни тинч қўйдим ёки қўймадим нима? — деди уста осуда бир алфозда. — Тинчингизни эгам бузмасин. Мабодо хотиржамлик берсаям ўзи берсин.

— Ичингиздаги бошқа, уста, — кесатди Маъруф Афзалович. — Келинг, майли, бир ораочди қиласлилар. Ана, ошнангиз ҳам шу ерда. Мунақа зимдан бир-бiri-мизга тиш қайрайверсак асабларни еб битирамиз.

— Ошнамга арзим йўқ, — деди уста узуб.

Булар қўпам гаранг ёки одамови эмас-да, ўзларига балодай ишонишади, зеро ҳар бири уста Шамсиддиндан ўтган чарслик замирида алам, таъна, кин билан қоришиқ гайирона иддао ётганини дархол сезди, айни чоқда ҳар бири куюнчак уста овозида адоватдан бутқул холи самимий бир хайрхоҳлик борлигини атай рад этди. Эҳтимол шу боис нигоҳлари бежо гилтиллади: «Вой, эсини еган ярамас чол-эй! Охири сен ҳасаддан бўғилиб ўласан-ов!»

Бу кез орада нимадир тап-таранг тортилган эди, ким билади, балки бу ягона чизиққа қаратилган, лекин турлича йўналишда бўлган тушунчаларнинг ҳеч илғаш насиб этмайдиган ашаддий занжиридир. Ҳартугул у, нима бўлса-да, ўртага қутқу солди. Фақат бунга уста Иброҳим бефарқ эди. Худди у хонада танҳо, бу ерга ташвиш билан эмас, шунчаки қўнгилхушиликка келган, муҳими — ҳеч ким нафсониятига тегаётгани йўқ, аксинча, димогини чот қиласиган гурунг қизиётгандек эди; у сергалва дунёдан йироқлигидан мамнун ҳолда бафуржа, ҳа, бафуржа ўй сурап эди.

— Арзингиз йўқ экан, нега бунча мижинглайсиз? — деди Маъруф Афзалович койиниб.

— Ақлга ишора...

— Сафсата қилманг.

— Оғайнижон, — истар-истамас сухбатга қўшилди уста Иброҳим, салла ўринидаги қийиқчасини тўғрилаган бўлди, — агар ростдан ҳам менга даъвоингиз бўлса... ичингизда чиритманг.

— Иброҳимбой, сиз ражжани ўз хоҳишингизча ўйнатяпсиз, — унга тик боқди уста Шамсиддин. — Шундай бўлгандан кейин камина даъвои-достонини назарга илармидингиз?

— Бунча ҳаддингиздан ошманг-да.

— Мени безовта қилган нарса бошқа: эрта сизни бўғзингизгача кўмадиган қарғиш.

— И-и, уста, бу...

— Мен ҳазил қилаётганим йўқ, — уста Шамсиддин маъюсланди, пича сукут сақлагач, деди: — Нафсила-брини айтсан, сиз аллақачон қарғишга учрагансиз, бадном бўлгансиз, кошки кори-бадингиз фақат ўзингизга урса!

— Эшитдингизми, одамлар, — уста Шамсиддиндан бошқа ҳаммага бир-бир қараб олди уста Иброҳим, — бу бандай нокас нималарни валдирамоқда?

— Шунча тил тишлаганим етар, ҳозир башарангизни буларга танитаман, — босиқлик билан давом этди уста Шамсиддин. — Сиз Улугбек мадрасаси пештоқига хиёнат қилдингиз. Энди тузатилиши амримаҳол хатои бедодликни Тиллакорида такрорламоқчисиз. Сизга балли, уста Иброҳим, падарим тузини оқлаётисиз.

Дераза ёнида қирчиллама йигитдек тип-тикка турган уста Иброҳим мош-гуруч соқолини тутамлаганча пихилаб кулди, нафаси тиқилиб қолганча кулди, кўзларидан жовиллаб келган ёшни арта-арта бирдан жимиди, бўзарган кўйи уста Шамсиддин устига битта-битта юриб борди, лекин ҳеч нарса демади, қўл силтаб бурилиб кетди. Шунда уста Шамсиддин билдики, умуман бу бандага маъни уқтириш деворга танбур чертиш билан тенг, айниқса ҳозир, Маъруф Афзаловичдек одам аччиини ширин, ширинини аччиқ деб турганини ҳис этаёганда на тавалло, на хитобни эшитиши гумон эди.

Эсида, бир якшанба куни у Регистон шимолида янги тушган чойхонада маҳалладошлари билан чақчақлашиб ўтирган уста Иброҳимни, ҳе йўқ, бе йўқ, ёқасидан олиб, Улугбек мадрасаси тагигача судраклаб борди, инсофдан нўхатча қолган бўлса ҳақни айтинг, пештоқнинг чап қанотидаги юлдузлар шакли-шамойили ўнгдагилари аҳволига мувофиқ тушадими, деб сўроқ солди. Ошнаси ўлгани қунидан пештоққа нигоҳ қадади, ранги узилди, тириклай ерга кираёзди, лекин баланддан келди, хотиржамгина айтдики, уста Шамсиддин, алломай шаҳаншоҳ назари теккан пештоқни ҳар қанақа шоҳдор ҳам бундан

үтказиб ямолмасди, мабодо сизга беришганда қаро тупроққа қоришиардингиз, во дариг, билмаётирман, ичингизда болалаб ётган нарса нима!?

— Аммо камина ҳам сизнинг башарангизни буларга танитаман, — деди уста Иброҳим кутиб юрган зарбасини беришга қулай фурсат туғилган каби очилиб. — Бирордарлар, камина бехабар, бир вақтлар бу одам Улуғбек мадрасаси пештоқини таъмирлаб от чиқармоқчи экан. Аввалги раҳбаримиз эса бунга қўнмади ва бу юмушни менга юклади. Бор-йўқ айбим шу, бу киши эса... ҳалиям қилни қийтимлайди.

Уста Шамсиддин ерга қапишиб қолгандек эди.

— Ҳақ номидан сўзлаётирсизми? — деди у ниҳоят аста.

— Шубҳасиз.

— Менда ундей ният у дунё-бу дунё бўлмаган.

— Сиздан бошқа ҳамма аҳмоқ-да, а?

— Мендан бошқа ҳамма доно, — деди уста Шамсиддин ўқинганинамо. — Ҳар қанча нодон бўлсанм ҳам жабр кўрган пештоқ ямоғини кўчирадим, тарҳни бошқатдан тузардим ва бошқатдан...

Жўрттага суқутга чўмиб ўтирган Маъруф Афзалович мунозара шу жойига етиб таранглашган соқ столни гурсиллатиб урди ва тоқати тоқ бўлган одам қиёфасини олиб сапчиб турди.

— Сиз, уста, ўзингиздан кетмаяпсизми?

— Асло! — деди уста Шамсиддин кескин. — Бир вақтлар падарим... шунга журъат қилган эди. Бу ҳатто мана шу одам гувоҳлигига юз берган эди.

Энди сал тумушиб олган уста Иброҳим елка қисди.

— Падарингиз одамови бўлган экан-да, — илжайди Маъруф Афзолович. — Йўқса... аввал қудуқ қазиб сўнгра қўмармиди?

— Падаримни камситманг.

— Ўша одам фарзанди бўлсангиз сиадан нима умид!?

— Камина ўша одам фарзанди бўлганим билан фахрланаман, — қаддини ростлади уста Шамсиддин. — Афсус, у зотдан даврон ўтган, агар ҳозир у зот тирик бўлганда ҳаммамизни гаврон билан ўлгудек саваларди. Уста Иброҳимни-ку тоза!..

— Яна манга ёпишасиз-а! — деди уста Иброҳим ўйланиб. — Нима, мен устозим арвоҳини шод қилмоқни хоҳламайманми?

- Хоҳласангиз...
- Қамина сиз ўйлаганчалик әсимни еганим йўқ, яқинда лойиҳа билан бирга гумбаз ичкарисини ўрганиб чиқдим.
- Чарчатибсиз-да ўзингизни.
- Ўлмасам ҳали сизга салом бераман.
- Қўйинг, уста, ундан кўра бориб мардикорчилик қилинг.

Шунча таъна-дашноми бир бўлди, бу кесатиги бир бўлди, ошнаси қоқ балиқдек буришиб қолди, қайтиб ун чиқармади, уни зидан кузатётган бош муҳандис босинки уф тортди, уста Фаттоҳ гезарганча гарданини қашиди, фақат Маъруф Афзалович пинак бузмади, ҳатто киприк ҳам қоқмади, нишонни аниқ олган уста Шамсиддин эса бош мутасаддининг кўйдан газаклаб келаётган аламзадалиги ҳам, довдираган кимсани баттар гангитиб қўйиб ҳузурланиши ҳам, ўзи хушламаган ҳар қандай нарсани босиб-янчиб ўтишга иштиёқмандлиги ҳам — жамиси шу хотиржамлигига ниҳонлигини англади.

Шундан кейин уста Шамсиддин танасида сира тоқат қилиб бўлмайдиган оғриқ ва ҷарчоқ туйди, гойибдан бостириб келган пала-партиш мулоҳазаларни бир нуқтага жамлаб, чиқиб кетиш олдида айтдики, уста Иброҳим, ражжангизга эҳтиёт бўлинг, муборак кунда уни сизга не-не умидлар билан тутқазган бандай мўмин бугун ёргу жаҳонда йўқ — зимзиё маконидан қўмакка келолмайди.

Қизиқ, у бир ўқинч, бир таъна билан бу сўзларни ипга тизгандек қилиб қўяркан, хаёлида нуқул ҳам падарлик, ҳам устозлик меҳри билан пешонасини силаган зот қадди-басти гавдаланар эди.

Эсиз, отасидан даврон ўтган, агар отаси ҳаёт бўлганда чиндан ҳам уста Иброҳимни боплабгина ийларди, дуойи бад қиласарди, ўткир нафаси билан афсунлаб ташлардики, бир умр ўнгарилемасди.

Тўғри, у ҳам анча-мунча боiplади, эгам қўнглига солганини қайтармади, хафа бўлса томдан нари, отагинам шогирди ҳам қиёматлигим, маслаҳат солсам инсофга энар, деб шунча силаб-сийпалагани етар, энди бас — аямайди. Ҳа, пичоқ суюгига етди, энди тайсаллаб, думни бурса уволи ўзига! Ҳах, уста Иброҳим-а, қандай иблис бунчалар йўлдан оздирди! У шундан доғда, шундан!

Агар одамзод олло раъийга тик борса озгина чидаш мумкиндир, аммо бандаси ўзини аршдан баландга қўйса, умтила-умтила топгани — номаълум осмонда бил-

ган-бilmagan номаъқулчилигини авжга миндирса бунга тоқат қилгани сабру қаноат етармикин!?

Уста Шамсиддин фаҳми оқизича, ошнаси ражжа си-  
ру синоатидан туппа-тузук воқиф, фақат у шунақа гуш-  
наки, агар жиндей ҳожатига ярагулиги бўлмаса оғиб  
кетаётган ражжани икки дунёдаям тўғрилаб қўйиши  
истамайди. Ҳар нарсани ўз қаричи билан ўлчаклайди,  
худди шу одати билан ўзини теварагидаги жами мўмин-  
мусулмонлардан тамомила илгарилаб кетган одам са-  
найди, лекин билмайдики, эрта-индин шаксиз довруқ  
ва эътибор топур, деб орага тиқишириётгани бу кунда  
буткул чўллаган, хориган, бир мададга интиқ турган  
юракларга далда бўлолмайди. Наҳотки, у халқ дахоси  
ҳадсизлигига ишонгувчи бандаларга таъна-таҳқир на-  
зари билан қарашни зўрма-эўрақи олдинлаш тақозо эт-  
ганидан бехабар? Наҳотки, муҳтарам укахони тарҳига  
кўра улуғ гумбаз ичкарисига тузатишлар киритгани —  
шикаста-куфий ёзувларини ўчириб ташлашга, заррин  
Гириҳ ва Ислими парчаларини тиклаш ўрнига горат  
қилишга, бир чеккасида қуръони шарифни авайлаб ас-  
раб келган меҳробни бузиб, суваб юборишга ҳадди сиғса!

Майли, эҳтимол, бу ақлга сиғмас юмушни у некбин-  
лик билан адо этар, афтодаҳол безаклар устига ўз безак-  
ларини чапдастлик билан зарблар, сўнг қойиллатиб  
ўталган бурч эвазига ўзича азиз ва нуғузли ҳисоблаган  
мукофотга — Маъруф Афзалович меҳрига сазовор бў-  
лар, алҳол, бу интиҳони арш инояти деб билса ҳам ажаб-  
мас. Лекин, кошки, шу жойда бари ниҳоя топса, йўқ,  
ундай эмас, уни муқаррар бошқа — иккинчи ҳақиқий  
интиҳо қутади. Пайти етиб руҳини беадад қуюн чулғай-  
ди, умид ва имон эса руҳини абадий тарқ этади, қўйинг-  
ки, ростликдан кечиб, ёлгонга суюниб қолади, жон чиқар  
пайти тогдек зил армону ўқинч тагида азоб-уқубат чека-  
ди. Бандаси учун бундан ортиқ завол йўқдир.

## VIII

Тасодиф барини бузди: Маъруф Афзаловични қўра-  
сола, ҳалиги дардини бир фойда бўлса-бўлмаса айти-  
сола изига бурилмоқчи эди, ўйлагани тескари айланди,  
бошлиқ ҳузурида мўлжалидан кўпроқ тутилди, шунинг  
касрига ановилар билан бирга жин чалтур уста Иброҳим  
кўзиқориндек оёғи тагидан чиқиб қолди.

Рост, уста Иброҳимга айтадиганини дилидан атайин

ўчириб ташлаганди, унинг афт-ангорини кўргани зарра-ча ҳам тобу тоқати йўқ эди. Ажабки, ярамас тасодиф бу хоҳиши билан сира ҳисоблашмади, аразинг ўзингга буюрсин, тирик пайтинг тугул эрта ўлганингда ҳам бу гўрсўхтадан қутулолмайсан, дегандек қилиб, уни рўпа-расида ходадек тикрайтирди. Бутун ақли-ҳушини тақ-дири қил устида турган Тиллакори, эрта-индин чиғи-риқقا солинадиган икки тарҳ (Маъруф Афзалович на-ҳотки бундан бехабар?), бир ўқ билан икки кийикни қу-латмоққа уринаётган эҳтиёткор бошлиқ банд қилгани учун ошнасига унча эътибор бермади. Қараса, баҳс ўзи-нинг ҳам оғриқ жойи — кошин атрофида! Шундан сўнг сергакланди, ошнаси қўйди-пишдисини тингларкан, зап адашибманми, бу банда тираги аршдамас, худди ерда-ёв, дея ичидаги кулди.

Асли уста Иброҳим Улугбек мадрасаси пештоқида юмуш адо этганидан беҳад ғурурланар эди, бу кунга келиб шу ғурурини унуган кўринади, энди у Тиллако-рига ёндошгани ва гаройиб оламдан келиб қолган тантин одам корига яраётганидан кўпроқ тасалли топгандек эди. Ҳатто у бирордан юз ўғирган омад ўзига қайишга-ни, не-не ниятларини ушатишга ваъдалар бераётгани-дан астойдил хузур қила бошлаган эди.

Уста, буни дилидан ўтказаркан, ошнаси каттами-кичик бир хил худписандлик содир қилганига афсус билан имон ўғирди. Ҳунар аҳлининг кўпчилиги шуна-қа: шуҳратга ўлгудек ўч, лекин шуҳратга қон-зардоб ютиш эвазига эмас, осонгина эришиш режасини тузиша-ди. Ҳатто айримлари бу ният ўйлида фақат ўзларига зарари тегмайдиган, асли ё тарих, ёки бирор кўҳна оби-да қиёфасига доғ бўлиб тушадиган ҳар қандай қурбон-ликни беришга таппа-тайёр туришади. Қани энди улар-ни гирибонидан шартта олсангу, охиратингни ўйламай, бўғиб ташласанг!

Уста оғир хўрсинди, бирор ўзининг гирибонидан ту-таётган каби жавдиради, сўнг шубҳа гирдобида сузди. Араваларини амал-тақал билан судраб юрган бандаларни маломатга кўмаётир, хўш, ўзининг аҳволи нечук!? Ахир ўзи ҳам пайғамбар эмас, хом сут эмган бир банда! Демак, шундай бўлгач, ўзи ҳам баъзан номаъқул кўча-га киргандир, ўзи ҳам гоҳо улус кўзига чўп сукқандир. На чора, тан олади, қайсиdir йили бир хомлик қилгани эсида, хомлиги шуки, Собирхўжа деган шогирди азза-баззасига учди, ялтоқланишини ўзига кўргазилган

хурмат санади ва уни мўлжалидан бурун мустақилликка узатди. Хоҳишидан ташқари қилган бебурдлиги кўп қимматга тушди. Устоzinи эритиб олгунча ўзини авлиё-сифат қилиб кўрсатган ва беҳад катта кетган Собирхўжа Ҳазрати Хизр масжидини таъмирлаётib... ҳандасавий гулларни бузди. Буни у сезди, жигибийрон бўлди, лекин обрўси тўкилишидан қўрқиб, нодон шогирди айбии ўлиб-тирилиб яширди. Мана, энди Улугбек мадрасаси пештоқини хорлагани учун ошинаси гўрига ғишт қаламоқда. Ўзинг нафси кетидан қувган Собирхўжа гуноҳига теппа-тенг шерик әдинг дейдиган мард қаёқда! Э, одамзод, орқа-олдингни аввал ўзинг йиғиширгин!

Хўш, буниси майли, буниси томдан нари, Расул Усмон бошига нима савдо солувди!? Биларди, у етим бола, азбаройи ҳунарга муккасидан кетгани туфайли дорил-фунундаги ўқишини сиртқига ўтказиб пинжига тиқилди, бундан хурсанд бўлиш ўрнига негадир хитланди, ҳафта-ён кун орасида тинмасак йигитни ёқтирмай қўйди (эҳтимол, келгусида ўғли нонига шериклик қилишини ўйлагандир), очиқроғи, бийронлиги — гоҳ ганч қориш, гоҳ қошинбуруш теришда меъёр бузилаётганини ҳадеб писанда қилавериши ҳамиятига ёмон текканидан тўнини шунаقا тескари кийди.

Дали-гули Расул Усмон Гириҳни қанча сўйса шеърни ҳам шунча суярди, у шеърни Гириҳ ёнига қўярди, бу иккалови бирлашгандагина дунёга тирак бўлади, дерди; амаллаб кун ўтказишини хаёлига ҳам келтирмасди, истаги йўлида эса ҳеч нарсадан қайтмас эди. Бир гал шўрлик куз изғиринида ҳавозага чиқиб қўйлакчан ишлади, бу тиришқоқлиги бир балога йўлиқтиришини билса ҳам уста индамади, коржома беришни ўйламади. Кўнглидан кечгани бўлди, шоир шамоллади, йўталиб юрди, касалхонага оғриниб жўнатди. Бир ой даволаниб келгандан сўнг... қовоғини очмади, таъмирга ҳар ким, айниқса дардчил бандалар чидамайди, деб гудранди. Йигит ўксинди, лекин кетмади, ичида кудр шоҳлаган уста вазифа бермаса ҳам, бир оғиз ширин сўзини қизғанса ҳам, исми-шарифини маош олувчилик рўйхатига тиркамаса ҳам у мўлтираб келаверди, келиб, обидага суйканиб тураверди.

Умри бино бўлиб уста бунаقا шилқим шогирдни учратмовди, бунаقا темиртироқни учратмовди, сал ийди, лаби чети билан қулимсиради. Кейин унга нима дегани ҳозир эсидамикин? Ҳах, уйгинаси бўғдойга тўлсин, сал

очилиб ғудранувдики, сени шунчаки синамоқчийдим, инжиқлигимга дош бердинг, қандингни ур, азamat! Асли бундай муддао ҳеч қачон калласидан кечмаган эди.

Қани, айтсин, энди ўзини қандай оқлади?

Одамзод ўзини оқлаши осон, у ҳам йўлини топади, яъни кейинча бола пақир пешонасини силаганини, кўчага ташлаб қўймаганини рўкач қиласди. Буниси рост, сал ўтмай тойганини тан олди, бир беозор йигит дилини қовартирганини ўйлайвериб ўзини ўзи еб қўяёзди. Шушу шогирд зотига ҳатто олароқ қарамайдиган бўлди. Шогирд деганда раҳматли падари тамом ўзидан кечишини ҳам эслади-да!

Бандаси борки, хато ўтади, хато қилиш хавфли әмас, ҳатони қайтармасликка уринмаслик — даҳшатли! Мадомики, у ожизликка мойил бўлган дақиқаларини тан олиб турган экан, бу әгам ато қилган феъли-хуй туфайли юз берганидан қандай тонади. Асло тонмайди. Ақлини тугал таниганидан кейин эса эҳтиёткор одамга айлангани, ҳатто қатиқни ҳам пуфлаб ичишни (масалан, ҳунарини менсимаган банда қизи — Жамила эрта уринмай-суринмай рўзгор тебратишига ким кафил!), ҳар қанақа нарсага гумонсираб қарашни одат қилганини айтиб ўтирумаса ҳам бўлади.

Яна бир нарсани таъкидлаш жоиз: ошинаси уста Иброҳим нима сабабдандир ўзга банда тўқиниб-суриншини ўзига таскин санабди, лекин минг шукрким, унга бунақаси бегона, у ҳеч маҳал жони ҳузурини қўзлагман, уқубатга ботса ҳам имонини бутун сақлаш бобида қайғурган, бошқа одамни додга қолдирган омаддан севиниш тугул, ҳатто юпанч излашни ор билган...

Қизиқ, юпанч ўзи нима? Бир умр шу нарсани қўмасаб, шу нарсага умтилиб яшаш бориб турган нотавонлик-ку! Умтила-умтила етишсанг — яхши, бордию етишолмасанг-чи, унда ҳолинг не кечади?

Тагин бир илинжи: ҳунарга гард юқтирумаса!

Бу тилак, шаксиз, падаридан қон билан ўтган, шунинг учун ҳам унга азиз ва дахлсиз туюлади. Эрта-кеч бу бобда қуймаланиб, талашиб-тортишиб юриши тумшуғи тагидан нарини қўролмайдиганларга наштардек ботади. Бошқаларни, масалан, ичидагини ҳала-ҳулада сездирмайдиган Маъруф Афзаловични қўйинг, ҳатто у ёдгорлик билан бу ёдгорлик орасида ўзи билан сарсон-саргардан чопқиллаб улгайган уста Иброҳимдай зукко

банда ҳам мақсадини тушунмайди ёки тушунгандан ҳам үзини анқовликка уради.

Құхна гардун шу экан: ўрнида тоғни кесакча билмайдиган уста Иброҳим билан Маъруф Ағзаловича үхшаганлар ўз қисмати, ўз йўриғи, ўз фикр-ўйи билан қураш отлиғ тўдага келиб қўшилган экан, у — бандай ожиз уста Шамсиддин нима ҳам қила олади. Ҳозирча фақат сукут сақлайди, ҳозирча уларни изидан эргаштиришга қурби етмабдими, ўзи ҳам улар ортидан лўқилламасликка тиришади. Фаросати шунга етгани учун ҳам шукр!

Лаҳза сайин нимадир эзгин-эзгин нашъя қиласи; бетайин аросат адоги бор-йўқлиги ҳақидаги залвар ўй бетўхтов дилини кемиради. Бир пайти келиб шундай бедаво дардга чалиниши етти ухлаб тушига кирганими? Асло! Доим ошиги олчи туриши, падари арвоҳи ҳамиша қўллашидан умидвор эди. Бугун мақсад-муддаосидан бир қадар путур қочди, аксига олиб пойтахтдан ҳам бирор мужда келавермади, гёё бу дунёда Афросиёб қаърига чўккудек бўлиб ётган мўъжаз устахона, бирбири билан тоабад сингишмайдиган икки тарҳ мавжудлигини унтишган эди.

Мужда кутавериб уста зерикди, яхши ният билан кампирига эргашиб таниш-билишникига қатнади, иш қўр ола қолмади, тўртинчи куни хотин киши билан судраклашиб юриши эриш туюлди. Совчиликка ярамаслигини тан олди. Тўғри, масала ўғли тақдирига дахлдор, лекин ҳозирги қўшгина ўзбилармон ёшларга ўхшаб Гайбиддин ҳам елиб-юрганини сариқ чакага олмайди-да!

Бу кунда у тамом худнисандликни ихтиёр қилди, у тасаввурга сиғмайдиган бир қобиққа ўралиб олгандики, ҳатто бундан баъзан ўзи ҳам қўрқиб кетарди. Мана шу лаҳзада, отаси ҳалигидай қутблари мутлақо келишмайдиган хаёллар билан қоврилаётгандай, Жамилахон дийдорига зор-интизор, навқирон чинорлар тагида кезинаётган эди.

Кейинги вақтларда Гайбиддин деярли ҳар куни юрагига чуқур ўриашган бу даргоҳга жунунуваш ҳолда инграницаб, оху фифон чекиб, бенажот бош уриб келди. Қаттол тақдир қарғади чоғи, ниятига етолмади, ҳар гал латтаси сувга тушиб, ҳар гал бир алами минг бўлиб қайтди. Шаддот қиз, унга аччиқ қилиб, атай ишхонасидан қадамини тийгандек эди.

Энди Гайбиддинни тусмолу гумон эзганини кўринг: мабодо у бурга қасрига кўрнасини қўйдирмаяптими? Ахир, олма пиш, оғзимга туш, қабилида бунақа тантиқланиб юраверса, эрта кўргазмаси тақдири не кечади? Ҳали «Икки наққош» чала эди, ҳануз ўша ҳолича ётиби. Эшик қасдма-қасд ёпилишига ишора берувчи маънони бўрттиришга аҳд қилган қиз бу қадар тез ҳафсаласи совугани, бениҳоя муҳим нарсадан тониб, ўзини панага торtgани ғалати таассурот уйготар эди.

Очиғи, Гайбиддин ниманидир фаҳмлади, лекин нимани!? Жимжит ва ивирсик устахонада «Икки наққош» қаровсиз қолгани, пардек юмшоқ ва меҳрибон қўлларни интиқ кутаётгани минг йиллик ривоят комига ихтиёrsиз тарзда шўнгиган қиз иштиёқи тўsatдан сўнганига бир ишора эди. Шаксиз, у «Икки наққош» ёнига қайтиши керак, аввалги шахти-шаҳодати билан қайтмоғи жоиз, йўқса... бари тугайди.

На чора, Жамиладан бугун ҳам дарак бўлмади, ҳалигидай хаёлларга боргани учунми ёки бошқа сабабданми тамом борлигини бир зулмат қоплади. Истиҳолани йиғишириди, суриштириб билдики, қиз касал, тумовлаган, ҳали-бери бу ёқларга йўламайди. Эҳтимол аралаш бу таъкиддан қаноатланмади, чунки, бу дунёга алоқадор жами равиш билан бирдек апоқ-чапоқ шоири жаҳон икки кун бурун уни лутфан кўчада учратган, у билан салом-аликни қуюқ қилган, қаёққадир шошаётганига қарамай, қисқагина гурунг қуриб, баъзи саволларига жавоб олишга ургурган. Фақат ундан эшигтанларини бир тирик жонга айтмасликка ваъда бериб, хатто калимаи шаҳодатни ўртага тикиб, қасам ичганмиш! Оббо, шоир-а, бунга қўпиртириш бўлса!..

Индалло, Расул Усмон қўнглига зигир ёғдек теккан, уни қўрганда бир чеҳраси ёришса, бир зардаси қайнайди. Ҳалиги куни, Жамила ичимдан топлигини бетига солиб роса гиналагач, аҳвол шу даражага етиши учун зимдан замин ҳозирлаган шоир пўстагини қоқиб қўймоқни ният қилди. Е, фалаксан-э, бутун заҳри-зардасини ичига йиғиб борса, шоир узлатда — шер боласиникидек беозор қўзлари жиқقا ёш, қовоқлари гупдек, тишлайверганидан бўлса керак, лаблари қонталаш, борингки, шифтга бакрайганча бўзлаб ётиби: «Лизахон!.. Лизахон!..» Эски дарди қўзғалибди-да! Рости, аччиқ бир кулгими, заҳарли бир таъноми шундоқ томогига тиқи-либ, паққа ёрилаёзи, тамом бўпсан-ку тоза, худонинг

ёрлақаган бандаси, деб боплабгина чўқиди-да, бошқа гапни ортиқча ҳисоблаб, жуфтакни ростлади. Ўшанда у бетавфиқ билан буткул ораочди қилиш, бузгунчилиги учун қайтиб юзкўришмас бўлиб кетиш (нечанчи аҳди бу, билмайди), ҳатто отаси қулогига ҳам ўлай-булай шивирлаб қўйишга қасдланган эди. Энди ўйлаб қараса, шоирсиз қийин, у билган нарсаларни икки дунёдаям билолмайди, хусусан ҳозир уни кўрмаса, алдаб-сулдаб эритмаса, Жамила не боисдан бу қадар панага уриб кетгани, ҳатто ўзи суйган ва қадрлаган ташвишлардан кечишгача бориб етганини сўраб-суринширишмаса, хуллас, сир тагига етмаса ҳоли забун! Ишқилиб, худо унга инсоф берсин; агар у ҳалиям мотам туваётган бўлса ёнига йўлатмайди, итмисан ёки битмисан ҳам демайди. Жини елкасига қўнгандан шунаقا ёмон-да қурғур! Хайрият, учалик эмас экан, ўша қуни ростакам газабга олган бўрон тиниби, тирикликни нолишдан иборат деб, газовот эълон қилган шоир аслига қайтибди. Ҳар замонда остонаси билан кўнглини обод этадиган қадрденини кўрган заҳоти қувонганидан том баравар иргишилди. Орада ўша қунги аҳволидан сўзлади: «Асли сен сариқоёқсан, кўпинча бемаврид келасан, ҳали-замон шундай бўлди, мактуб олувдим ҳабиба маҳбубимдан, мактуб ярамни янгилаган эди. Кечиргайсан!» Ҳушификри Жамилада, Жамила тутумида бўлган Гайбиддин шаксиз таманносифат оби-дийдани хушламади, ичи тоза тўлиб кетган-э, қандоғ буни инсофга эндирысам, деган ўй билан буришиб ўтирди. Ана шунда Расул Усмон кутилмаганда ечилди: «Мени овсар дема, қай ниятда бунаقا шалпайиб келганинг кўзингдан маълум. Лекин, хомтама бўлма, мендан ҳеч нарсани билолмайсан. Оғайни, Жамила шунаقا ўйлов билан машғулки, нималигини айтсам, одамни бўғиб қўясан!» Қуп-қуруқ ваҳимачи бу, гапдан тойча ясайверади. Сал инсоф қилсанчи! Тавба, худди Жамила осмон устунларидан бировини шартта қўпориб ташлаб, чархи гардунни таҳликага солган-у, у бундан тамом гафлатда қолган! Хўш, индамайгина тинглайверсин-чи, шоир тағин қай тарафларга ўтлаб бориб келади. Жилови қўлида бўлгандан кейин хоҳлаганини қилиб, билганини сўзлайди-да! Аммо Расул Усмон қуюшқондан чиқиб кетганини сезди шекилли, бирдан нафас ютди, у ҳам Гайбиддинга тақлидан буришиб олди; гўё биров ҳеч қачон билиши мумкин бўлмаган сирни очиб қўйишдан

зўрга ўзини тийиб, событлигини кўргазган одам алфозида эди. Энди у роса таранг қиласиаги англашилди. Бу қитмириги учун яхшилабгина туйиши керак эди, лекин Гайбиддин шайтонга ҳай берди, умид билан деди: «Жўражон, борини айтақол, чартсам агар худо урсин!» Қани энди ундан сазо чиқса! Шундай чакакли нарса соқовдан ҳам ўтказди. Бўлди, биродар, кўп нозланаверма, бунақаси сендей шоири қалонга раво эмас, деб Гайбиддин темирни қизигида босди. Қайсиdir қаломи Расул Усмон қитиқ патига бир майин, бир ҳузурли тегди. Шу билан у шам янглиғ әриди ва қаттол пардани кўтарди, индалло буки, Жамила бедодлик қошида ожиз, лекин, ҳозир у бу нарсага ҳокималик қилиш қасдига тушган, ўзи ўзига сигмай юрган бўлса-да, бу дунё устидан қатъий ҳукмини айта олди, ҳукмки, санъатдаги гўрликни, муҳаббатдаги беқарорликни чил-парчин айлайди; қачонлардир у иқтидорига ишонарди, иқтидори беҳудуд оламдаги паст-баландни тоза бир ниятга бўйсундира жагига ишонарди, рости, то «Икки наққош» хаёлига кириб келгунга қадар шундай тилак билан яшади, «Икки наққош»да ниҳон маҳзану муддаони тасаввуридаги қиёфага кўчирмоқ ташвишини чека бошлигандан сўнг, ногоҳ илгадики, руҳи ва тани басирлик чангалида экан! Ё, фалак, бу не издиҳом, не қабоҳат, не жаҳди жадал интихоси — фақат эгамга аён! Яна буки, «Икки наққош» хомакисини яратгунча омади юришди, илҳом қаърига ҳеч қачон бунингдек жазава билан, бунингдек ҳуморваш кўйда чўкмаганди, ҳеч шубҳасиз, у хомакидаёқ қадимиятни кўп алгов-далгов қилган, бир учи ажаб сиру савдо билан бу қунни ҳам чирмаган тугунни кўрган эди; ана шу лаҳза уни ғалати тўлғоқ тутди, хаёлидан Фирдавсмонанд шахри азим бағрида қад ростлаган гумбазли залвар бино жилмай қолди, ниҳоят, бир қун у «Икки наққош» қошида тиз чўкди, кўзларидан шашқатор ёш оқизиб, энди ҳеч қачон тугалликка етолмайдиган, ривоятдан ажралиб чиқиб, ёруг олам қошида чорасиз қотган хаёлот билан видолашди. Ҳайхот, бу видо фақат «Икки наққош»га эмас, қайғу ва қувончга бирдек чидайдиган шахри азимга ҳам, санъат дунёсига шунчаки мўралаб қўйиш билангина чанқоги босилганларни очилмасидан бурун чирқиратган кўргазмага ҳам, ўз тушунчалари илиа йўғини йўндириб, борини йўқотадиган бандаларга ҳам... тегишли эди; энди у «Икки наққош» ҳузурига қайтмоғи гумон эди, шу боис бекитиқча Тошканд-

га борди, бир вақтида устозлари тарафидан бўлган бир таклифни қабул қилмовди, яъни, Масков ёки Киевда, тагин ҳам обрўлироқ даргоҳларда таҳсил кўришдек эзгу қувончдан қандайдир сабабга кўра воз кечувди, Тошкандга ими-жим сафаридан мурод ўша таклифга бажонидил рози эканлитини билдиromoқ бўлди, қарангки, оқил устозларим маслаҳатини инобатта олмай гўрлик қилган эканман, гўр ақлу идроқ билан санъят аччиқ-чучугига аралашиб юриш охир-оқибатда рух инқирозига замин ҳозирлайди, ана шундан ўзимни асрармоқчиман, асролсам, балки келгусида худди ўзимдек аросат домига илинганд, тирикликни фақат гойибдаги мўъжизаларга менгзайдиган, жар лабига бориб қолганда ҳам ҳушёр тортишига шошилмайдиган бандаларга нафим тегар, деган эътирофлар бор эмиш аризасида...

Ҳангу манг бўлган Ғайбиддин бутун журъатини йигиб Расул Усмон кўзига тик қаради, бу ярамас тагин ҳовлиқди, нияти бад, бир амаллаб мени жинни қилмоқчи шекилли, деган ўй ичини кемирди, йўқ, бу гал қадрдени жиддий, нигоҳи ўтрик ва ҳазилдан йироқлигини қатъият билан эслатаётган эди. Бу сиру синоатдан у анча-мунча гангиди, талмовсираб қолди, ҳатто изза еди. Ахир, изза емасинми? Орада шунча кудурат, даҳмаза кечибди, яъни суюмлиси ниманидир англабди, нимадандир тонибди, у эса бехабар, гафлатда — қўксига ўз дарди-даъвосини жойлаб, бир ҳаволаниб, бир тойғониб юрибди. Ҳар ҳолда ҳаволаниб тамом кўкка кўтарилиб кетган эмас, тойғонгандан етти қат ер тагига тушиб кетган эмас, неки заҳри-заволга рўпара келганда ҳам, неки эҳсону қарам ҳузуридан боши айланганда ҳам Жамилани ёд олган, ўзини Жамила ёнида деб билган. Хусусан, у падари бузруквори ва Гириҳга қарам эрсада, бу қарамлик бутун ҳаёт-мамоти билан боғли эрса-да, барি бир, Жамилага меҳри ҳаммаси устидан ҳоким эди. Айни чоқда у ўзини Жамила изида хору хас санаиди, «Қирқ ривоят»ни бағрига босганча тунларни бедор ўтказаркан, ораларида бўй чўзган девор тамом йитишига ишонар эди. Ҳайҳотки, у фақат умиди-илинжига суюниб яшаётган бир пайтда Жамила ҳалигидек ҳою ҳавас илкини тутгани аламли эмасми? Қайсар қиз руҳидаги тўлғоқ билан ўз ҳоҳиш-истагини занжирбанд айлаб, тушунуксиз видо билан бу дунёни иддаога қўмиб ташлаганини ундан яширгани, Расул Усмонга эса оқизмай-томизмай сўйлагани тагин ҳам

баттарроқ алам қилмайдими? Ҳой, сулув қиз, күк фаришталарини доғда қолдирған оқила санам, узун кечаларда қирқ кокилингни тушида күрадиган, сарвдек нозик қадду камолинг ҳажри-фироқида адойи тамом йигит умиди сендан шумиди!?

Мунгли лаҳзалар кечди. Аста әнтикаркан, умрида илк бор Расул Үсмонга ҳавасланди, дали-девона шоирни аста ачомлади: «Мен кутибман, уни ўзимга бегона қилиб қўйиш учун кутибман. Сен эса Лизага бегона эмассан, гарчанд у... Лательни гоффиллик!» Бунақа сўзлар оғзидан камдан-кам чиқарди, шу боис Расул Үсмон ҳайратланди, қизиқ-ку, сен менга — шоирга ўҳшаб кетдинг, деди, сўнг уни шеъргамас, шоирона бўсаларга кўмди. Шўрлик дўсти лирикадан йироқлигини афсус билан билдириди, рости шуки, агар унингдек ғидойи бўлганда кўргиликдан сўнг ёнида ҳеч қурса қалам қоларди. Асли у тўнорироқ эди, ёнида қоладиган қаламни тасаввур қилолмади, ичиди бир қулиб, бир ҳасрат қилиб, қачонлардир Лизахон нафаси илтган хонани тарқ этди. Айни чоқда ўз хонадонида ҳам аҳвол бинойидек таранг эди, Жамиладан ўзича гиналаб, тушмагур қиз қалтис қадам ташлаганини муҳокама қилиб дарчадан кирганда, тутай-тутай гуриллаб кетган ўт сингари, ярим соатча илгари чол-кампир ўртасида илкис бошланган можаро эндингина авжига минган эди. Билди, тиф нақ нозик пайга қадалган, тифки, кескир, пайки, узилаёзган. Ўртада қурилган дош қозонда бир дард қайнаётганини ҳис этди, қуриб кеттур шу дард ўзига тегишли эканлигини айтадиган лаҳза шу лаҳзадир-да! Аммо, ишқални қаранг, у ёқда Жамила араз-ўразга зўр бериб ётибди-ку! Индалло. чор тарафида хусумат, у нима қилишни билмайди, нима бўлганда ҳам умиди отасидан, ажабмаски, ота шаввозд булар барига чек қўйса! Асли у зотга осон тутмок гуноҳ, ана, қадди-басти анча чўйкан, қўзлари киртайган, ранги заҳиллашган — ахир унинг бир жони-бир танига Гириҳнинг минг дарду даъвоси етиб ортмайдими!?

Уста Шамсиддин ҳозирча Гириҳ юқидан ўзгасини ортиқча санаарди, ортиқча санагани учун ҳам кампири минғир-минғирини, ўзича қовоқ-тумшук қилиб олган Гайбиддин иддаосини ёқтирамасди. Сабр таги олтин, чиданглар, дея у хаёлан кампири ёки ўғлига мурожаат қиласарди. Одатicha, гоҳо хилватни ва ёлғизликни ихтиёр айлаб, қайтадан «Қирқ ривоят» мутолаасини бошларди.

Ғайбиддин юз-күзи бўғриқиб, кўпчиб, овдир-шовдир кириб келган куни кампири билан қарийб бўғишгудек ҳолга етган уста бирдан мулойимлаши, ҳалигина баланддан келаётган одам ўғлини кўрган заҳоти дамини қўйворган пуфакдек илвиради; негадир аланг-жаланг бўлди, аста ичкарига кириб кетишни мўлжаллади. Жимжит хонада эрта-кеч мутолаага берилиш, кулала бўлиб ётавериш бадига урган эмасми, қачонлардир бузилган қози Раҳмон мусофирихона-қироатхонаси ўрнида кўримсизги на қилиб қурилган чойхонага чиқди. Аммо чиққанига пушаймон еди, ўтган-кетгандан хуш-хандон ҳангомалашиб ўтирган ёш-қари чойхўрлар орасида ҳам қўним топмади. Чуст дўппи кийган, соқоли сидирға қурилган, ияги калта бир чол қўзойнаги устидан сузилганча унга ниш санчди, уста Шамси, омонатини тоширисангиз мақонни Регистондан ясатишармиш, шу ростми, деб тиржайди. Шундан сўнг томоғидан бир қултум ҳам чой ўтмади, аста думини қисиб жўнади, уйга келиб кампирининг осилган қовоғига йўлиқди.

- Оёғимда оёқ қолмади, — тўнғиллади Муслима.
- Келин келса қусурини чиқарасан, — аўраки кулади уста.
- Намунча беларвосиз? — энди кампирни ошкора зарда қилди. — Ўртанчангиз бир гап топиб келди. Гайбини Жамила билан бирга кўрибди.
- Жаврама-е! — ола-була қаради уста.
- Гумоним тўғри экан.
- Ўргилдим гумонингдан! — деди уста овози қалдираб. — Сен менга Қиём гуппининг ваҳимасини айтаяпсанми? Ярамас, ўзи ойда-йилда бир қорасини кўрсатади, ўчоққа мунақа ўт қалаб кетгани ортиқча!
- Шамол бўлмаса дараҳтнинг учи қимирламайди.
- Ҳозирги дараҳтлар шамол турмасаям қимирлайверади.
- Мен нима аҳволдаю, сиз... ҳазил билан енгасиз.
- Нима қил дейсан, кампир?
- Розилик беринг, ошнангизникига бориб келай.
- Ошнамникини қўя тур, — деди уста елкаси тиришиб. — Биласанми, яххиси эрта гапга етармон қариндош-уруғни йиғамиз, маслаҳат беришсин, қани борми бу атрофда ўглинг тенги...
- Вой, анови кишини, ўргилдим сиздақа каттазандан! — деди Муслима овози бир хил товланиб. — Ўғлингиз ўзи ким бўпти? Шохи-бутоги борми?

— Келин муносиб бўлса нимаси ёмон?  
— Э, сиз миянгизни еб қўйибсиз, — ўкинди Муслима. — Балки ўша Жамила унга муносибдир? Ҳеч нарсадан хабарингиз йўгу мунаقا қилиб... икки оёғингизни бир этикка тиқиб олганингизга куяман.

— Ҳа, шунаقا, мен нодонман, сўқирман! — ҳалиги на бир ором истаб турган уста дикқат бўлиб жағига зўр берди. — Аммо сен ўзинг-чи? Сен ўзинг кимсан? Аввал бир ишни озгина дўндири, кейин лақилла-да!

— Сиз, ота бўлиб, ўғлингиз ярим кечаларда итдек санқиб юришига пича қизиқинг.

— Ярашган гапни қил.

— Сизга ҳар нарса ярашади, менга қолса...

— Э, қўй энди,— сал паст келди уста,— ундан кўра эртанинг ғамини егин. Ҳадеб бўғишганимиз билан... худонинг айтгани бўлади.

Шўрлик Муслима сал овунди, эрта кимларни чақириш кераклигини ўзи бийронлик билан санаб берди, ҳатто оби-ёвғон учун нималар харид қилинишини ҳам ўзи чамалади, у нима деса уста индамай кўнди, борингки, икки ёрти бир бутун бўлганча, маслаҳатни боплабгина пишитди.

Одатда уй гапи кўчада тош босмайди, аксига олиб бу гал ҳам шунақаси юз берди, кеча маслаҳат қиёмига етганига қарамай, эрталаб уста кампири билан, паловга жувоз ёғи тузукми ёки думбами, дея, гап талашиб турганда дарчадан устахона югурдакларидан бири мўралади. Югурдақдан ҳозироқ етиб бормаса бўлмаслигини билиб уста бўшашди. Шўрлик Муслима мўлтиради, юзидан қони қочди, лекин бир нима деёлмай жимгина тураверди.

Кампирини бошқатдан ғамга ботирган уста, ўзича аллақандай тасаллилар айтиб, кўчага шошилди, шитоб билан келиб идорада можаро устидан чиқди. Қалин қошлари ўртасига тугун туширган Маъруф Афзалович рўпарасида таёқдек қотган бош муҳандисни тўпоричасига тузлаётган эди.

— Мен сиздан сўрайман, сиздан! — Маъруф Афзолович мушти билан столни эзгилаган бўлди, тўшини очиб кирган уста Шамсиддинни кўрган заҳоти баттар кўпчиди. — Биродар, сиз нега бунча парвойи фалаксиз! Ахир сиз аллақачон Махдуми Аъзамда иш бошлашингиз керак эди-ку!

Ёши бир жойга етган одамга бунаقا дағдағани кўта-

риш осон бўпти-да! Нима, у кечагина илиги тўлишган йигитчамидики, ҳар қанақа зуғумга чидаб, хушомад юзасидан узр айтиб, бурилиб кетаверади?! Бу одамни нима жин урди, унинг олдида нуқул шунақа томоқ йиртадиган бўлиб қолди. Агар пўписага зўр берсам, юраги олинади, гаҳ десам қўлимга қўнаверади, деб хаёл қилган бўлса адашибди. Андишанинг оти қўрқоқ экан-да! Э, йўқ, ўзини босиб, иззатини сақлаб юргани билан ўрнида жазава ҳам қиласди. Жиловини бирорвага тутқазиб қўймайди.

Таваккал, қўрсликка — қўрслик! Қани, у ҳам бир бақириб берсин-чи, томоқ фақат менда бор, деб ўйладиган бошлиқ чидармикин?! Чидайди, нақ без-а бу одам, ҳали-ку кекирдагини чўзгани, агар бир зарб билан тоғни тўнтариб ташласа ҳам жаҳлга мингган бош мутасаддига бир дона барг бандидан узилганчалик кор қиласди. Қани, жиндан кутсан-чи, бу ёғи қандоғ кечади.

У ҳануз муштларини столга тираганча бақрайиб турган бошлиққа разм солиб дағдага шунчаки даромадлигини, асосий гишова бошқа нарса тагида эканлигини тусмоллади. Энди жиддий алағда бўлди. Бошлиқ намунча тувақсан? Хаёл қисаки, ҳозироқ уни олиб бориб Махдуми Аъзамга рўпара айласа, деворига пешонасини уриб ёришга мажбуrlаса! Агар фақат таъмири чўзилаётган Махдуми Аъзам учун шунчалар тўнини тескари кийган бўлса, бу бандада ҳам виждан азоби бор экан, дея ўйларкан, ногоҳ узун стол четига бир конверт пириллаб келиб тушди.

Хатда муҳокама куни аниқ белгиланган эди.

## IX

Кўнгли ғулуллангани шунча, шундоқ тумшуғида турган мактубга узалгани анчагача журъят этмади, ҳайрат тўла нигоҳини унга қадаганча шамдек қотди. Ниҳоят, у курси чеккасига омонатгина ўтириди, хиёл титраган кўйи мактубни олди, очиб ўқиди, Гириҳ тақдиди ҳал бўладиган кунни билди.

Бирпасда хона тор қафасга айланди, ҳаммасидан ҳам Маъруф Афзаловичнинг тикандек қаттол нигоҳидан тезроқ қутулмоқ учун типирчилади, кабинетни тарқ этса бу нияти ушалишига амин эди, аттанг, янглишибди, э, устай нокас, бузоқнинг юргани сомонхонагача, деган маъно зуҳурланган нигоҳдан шалвираб

ҳовлига келганды ҳам, кампирі қошида ожизона чайналганды ҳам, әртаси куни тонг-азонда Гайбиддин билан автобусда пойтахтта жүнаганда ҳам қутулолмади. Бу лаҳза кимгадир интиқ әди, интиқлик баҳонасида кимгадир юрагини бўшатгиси келарди. Бир ҳамдара топса-да, барини — Тиллакори Гириҳ билан топишолмаётгани боисини, Маъруф Ағзалович билан уста Ибрөҳим азал ва абад воқе русумдан тонаётганини, ўғли Гайбиддин эса тайинсизроқ кўчага кириб бораётганини эринмай сўйласа!..

«Падари бузрук, малол олмасангиз, арзи-холимни ўзингизга баён айлайин. Сиз — ёлғизлиқдаги энг мардона ҳамдамим! Бутун умрингиз ва кучингизни нимага баҳшида этганингизни билганим учун ҳам ҳануз сиздек зот мулозаматидан умидворман. Сиз менга ҳамиша рағбат берурсиз ва шу рағбат орқасида бир муродни дилга жойлаганимдан — оқу қора андоғ юзага қалқиган бу кунда ўзи ўзидан йироқлашаётган, вужудини руҳига бегона қилиб қўяётган, охир-оқибат, кўхна дунё учун бебаҳо мерос қолдирган ажоддлари имони ва эътиқодидан мункир келаётган жигарларимга саодат они нелигини англатмоқ хоҳишини қилганимдан воқифсиз. Ажабланмак ўринсизки, мурод ўзга, уни ижобат айламак ўзга экан. Айри-айри йўл бошида ҳамон баргдек титрайман, алҳол, буткул чарчадим, шунга яраша, кошки, Гириҳни бандаларга танитишга улгуролган бўлсам!

Гофиллигимиз, падари бузрук, барҳам емоғи ўрнига, бир талотўп суръат билан ғалаёнга кираётганидан афеусдаман. Кўп уриндим, кўп вайсадим, аммо на гофилнинг гофиллигини исботладим, на ўзимнинг нодонлигим ойдинлашди. Камина бу лаҳза азиз набирангиз тақдирини қаттол чангалига тушиб, баҳти боғланиб қолганидан нолимоқликни нодонлиқдан ҳам қўра майдакашлик санайман, хусусан, жонни жаҳонга татигулик масала — Гириҳни йўлга киргазиш, яъни жамоа ва аҳли идрокка танитишдек чигал масала қийнаётгандан, ундан чекиниш, орзу-ҳавастга шўнғиган ҳолда, бир йигитни уйли-жойли қилиш билан машғул бўла кетиш асло қолипга сигмайди. Алҳол, набирангиз дунёдан тоқ ўтмаслигига имоним комил, иншооллоҳ, унга эрта-индин муносиб бир ожиза топилур! Лекин, куёвлик даъво қилаётган шу набирангиз мен билан бирга то қайта тирилгунига қадар жонини аямагани — Гириҳ тақдирини

на бўлгай? Мана шу тарафи қоронғи, қоронғики, кечагина одамзод шаънини баланд қўтариб, дилини нурлантириб турган нарса бугун унүтилган, камситилган! Энди, отагинам, мен-ку тоабад паноҳингиздаман, Гириҳни қўлланг, Гириҳ қаторида набираи аржумандигизни қўллагайсиз!..»

Хов ўша субҳи-садикда, ҳовлини райҳону атиргуллар ҳиди тўлдирган паллада падари билан нақадар қизғин мусоҳабага киришган эди, ўшандай бўлмаса ҳам сал мундайроғи ниҳоят орадан анча вақт ўтиб бугун насиб этди, чамаси, ўзини тамом ёлгиз сезгани учун ҳам падарини ёдлади, ичиди йигилган ҳасратини тўкиб, анча енгил тортди. Сўнг уста ўйл бўйи, қурғур Маъруф Афзалович ошнамга зуғум ўтказдими, бирон қуюқсуюқ луқма ваъда бердими ёки қариганида ошнамнинг ўзи йўргалик қилгиси келиб қолдими, нима бўлганда ҳам булар ҳеч бири тамизулағизни бузишга арзимайди, деган қабилда мулоҳаза юргизиб борди.

Мулоҳазаси тумтароқ, лекин умиди катта, шашти ҳам анча баланд, ҳатто шишиниб ҳам қўяди, шундай ҳаволаниши заминида бир маъюслик ҳам бор, яъни ҳали осон бўлмаслигини бир нозик сезим билан ўйлайди. Ҳарнечук паст тушмайди, насиб қиласа ўзини бир кўрсатади. Ҳудди бало-қазо ҳозироқ ёқасига ёпишадигандек, юзи қилт этмай сукут сақлаб бораётган Файбиддинни қизишиб тергади, тўғрироғи, уни якуни қоронғи йигинда нотаниш кишилар билан басма-бас солишиш учун шайланишга чорлади. Биз юрак қонимизни бериб тирилтирган Гириҳ Маъруф Афзалович теварагида ўралашаётган бандаларни инсофга эндиришга қодирмикин, дея хўрсинаркан, нақ қоврилгандек бўлди. Лекин, кошки, Файбиддин қулоғига гап кирса! Ҳозир унга Гириҳ дардидан ҳам кўра ўз дарди муҳимроқдек эди. Йўқ, асли бу ҳаётда нима муҳим, нима арзимас, ажрим қилгани ҳозир чоги келмайди, негаки, назариди, ҳалиги учрашувдан буён бари тугаган, бари аралаш-қуралаш бўлиб кетган; Жамила қувлади, пича баландпарвоз сўзлаган бўлса ҳам Расул Усмон қўзини очди, муҳаббат биргина қонун билан собитлигини осонгина англатди, бу қонун номи — фидойилик! Сал чалгидингми, бас, у сени аямайди, жами увол-савобинг бир пул! У Гириҳ изидан чопқиллади, ҳадеганда отаси қанотидан жилавермади, ҳунар расм-русумини дахлсиз билди, муҳаббатнинг бир эмас, юз қонунини ўзи ўйлаб

топган доира ичида тасаввур қилди, оқибат, ошиқ зотига қирон келтирадиган қаҳрга йүлиқди. Энди Жамила-дан гиналагани бефойда: асли Жамила ҳар доим у билан бирга эди, унинг дардини худди ўзиникидек кўрар эди, ҳайҳотки, бу кунда... ўз йўриги билан!

Гайбиддин бўшашиб келаётгани, ич-ичида эса бир хил армону алам сурон солаётганини сезиб уста ғашланди; ҳатто бир қадар умидсизланди. Ахир, энг қийин дамда, икки оёти бир этикка тиқилганда, доим у бир чора топарди. Сал гайирлик ёки нуқс кўрганда тинмагур гуриллаб кетарди; сиркаси сув кўтармас эди. Ажабки, ҳозир у бошқа Гайбиддин: гўё лаб-даҳанидан путур қочган, инон-ихтиёрини номаълум бир куч ҳукмига берган, қуп-қуруқ силласи қолган. Оббо, бу не ҳол, агар Гайбиддин ҳалиги жойда ҳам шунаقا шалвираб ўтиrsa, омад буткул юз ўғиради-ку! Бутун умиди шундан-а! Эҳ-хе, тўдадан улоқни узиб чиқиш осон бўпти-да! Эсида, аввалги муҳокамаларда Маъруф Афзалович биродарлари сувни жон-жаҳдлари билан лойқалатишган эди, тагдор учиринклар билан устани сира қўз очирмай қўйишишган эди. Наҳотки, яна ўшалар қулоқ тепасида, наҳотки, яна ўшалар ҳукми баланд келади? Ҳар ҳолда сал-пал бўлса ҳам бўш келмаслик учун айтиши зарур фикрларини уста калласида зўр бериб пишиитди, қачонки, совутгичлари бир маромда салқин ҳаво пуркаётган хонага кириб, йигилганларни бирдек оғзига қаратиб ўтирган Маъруф Афзаловичга нигоҳи тушгач, ўзларига яратгандан бўлак суюнчиқ ҳам, падари арвоҳидан бўлак тарафдор ҳам йўқлигини фаҳмлади. Ўнгайсиз бир ҳолда оstonада тайсалларкан, хонада залвар жимлик чўқди, шу асно қўз ўнгини ҳудудсизлик ва тип-тиник заррин ранглар жимирилатиб юборди.

«Устай оқил, ҳайрондурмен, нечун бу қадар титроқладурсиз? Алхол, ақл нури муборагини сочгон ўринда жаҳолати шабкўр ожизлигидин воқифсиз-ку! Аршу аъло соҳиби барҳақ эркан, падари бузрукингиз ёди барқарор эркан, иншооллоҳ, хорликдан қутулғайдурмиз.

Бир сирни ошкор этайким, сиз тириклиги ёки бежонлигига бирдек юқунган зоти шарифни кўп яқиндан танирдим, яъни ўзимға ҳамдарду ҳамдам санардим. Негаки, ул зот зукколик бобида беназир, илло тошда гул ундириарга қобил сеҳргар эрдиким, буни ҳар фурсатда ўз гувоҳлигим ила синағонман. Зоти шариф пе-

шонамни күп силағон, етмиш икки томиримға жон ато қилғон, умримга қасд айланғонлар ила айнисиз солишғон. Онингдек тантиликни унутайинми? Ҳаргиз, англанг, унутмогим — таназзул! Алалхусус, сиз зоти шариф ёди-ла мулоқот ихтиёр этган маҳал баданимда бир ҳарорат сезилдики, бул ҳарорат ўша киши қўлидин қолғон. Бардам бўлинг, уста!..»

Ҳали ўнғайсиз аҳволда турган уста ғойибдан келган нидо соҳибини илкис билолмади, билгандан сўнг сал дадиллашди, ваҳимага тушиб учун ҳеч бир асос йўқлигини ҳам тушунди. «...бул ҳарорат ўша киши қўлидин қолғон! Сўнмабдими, умид бор экан-да!» Кўксига илиқ бир нарса қуйилди, беихтиёр тўрга нигоҳ ташлади. Батартиб хона соҳиби жойида муқим эди. Кечикишгани учун изза еган ота-болага асосан у эътибор берди: табассум билан бош ирғаб саломлашди, ҳатто қисқагина ҳол сўради, ўтиришга таклиф этди, шунча одамни куттириб қўйишганини эса бетларига солмади. Жиндай сукут сақлагандан кейин ўтирган жойида бемаврид, умуман, навбатдан ташқари чақирилган йигини мақсад-муддаосини эснаб-эснаб изоҳлади.

Ирими учун шунчаки давра қуриб ўтирганлар ма-на шу изоҳга илҳақ турган каби бирдан кўширишди: чиндан ҳам бу йигин беҳуда, у вақт ўғирлашдан бўла-гига ярамайди, умуман, бор бўй-бастилари билан эл ташвишига кўмилган одамларни бунақа уч пулга қиммат манимашага жалб этиш — уят!

Шўрлик ота-бола, бир сўз қотолмай, полу гирён эди.

Хона соҳиби, нихоят, норози оҳангда тўнгиллади. вағир-вугир бир қадар босилди, пайтдан фойдаланган кўзойнакли, ола дўппи кийган чувак киши отилинкираб турди. Ичи тирналаётган уста овози шанги бу одамини дарров таниди. Самарқандда — таъмир устахонасида Маъруф Афзалович тарҳи юзасидан бўлган охириги баҳсда у кўп баланддан келган, гапини қайириб ташлаган Файбиддин билан Расул Усмонга ёпишган, ҳозир сен ярамасларни битта-битта деразадан улоқтираман, деб қолипга сигмайдиган пўписа қилган, кулгига қолган эди. Уста қараса, чорток абжирни тағин кўзойнакли: у аввал ҳовлиқди, салдан сўнг ўзини тутиб олди, Маъруф Афзалович қандай қилиб ўзлигидан кечолганини шошмай шарҳлади, охири ваъзини чувалата-чуvalата келтириб Гирихга қадади, алмисоқдан қолган манови одино қилган нарса олдимизни хитойdevor бў-

либ түёди, дея чимирилганда Маъруф Афзалович калтагина томоқ қирди, ота-бала асаби тараангашди, ота-бала пинжида жон сақлаётган Гириҳ ими-жим тўлганди.

— Менимча, Гириҳ аллақачон хизматини ўтаган. Маъруф Афзалович билан кўз уриштириди кўзойнакли. — Энди бизга унақаси керакмас, янгиламас эканмиз, у бугун учун нолойиқлигича қолади.

Бир шивирлаш: «Ох!..»

Шўрлик уста гарангсиради, жавдиради, лекин алами сиртмоқ бўлиб бўғаётганини сездирмади, ҳаял ўтиб ҳушини йигаркан, баданига ажаб бир ҳарорат сим-сим таракалаётганини ҳис қилди. Бу ёруғ дунё юзини кўргандан буён таъқибга учраб келаётган, ўз жойини топажагига бир ишониб, бир ишонмаётган, айни чоқда устидан ўқилган яна бир ҳукмни эшишиб унсиз фарёд чекаётган Гириҳнинг ўтли нафаси эди.

— Шунақами? — ғудранди уста ниҳоят. — Бунинг лекини бор-да!

— Кўхнани пеш қилиш ҳозирги безакларни топташ!..

— Ҳозирги? — қўлларини ёзди уста. — Ахир, биродар, улар кўхна заминда тирик-ку!

Шаксиз, бу хулоса илмоқли эди, шу боис баъзилар беихтиёр бош иргаб устани қувватлади, уста анча қаддини ростлади, катта йўлга тушиб олганига тамом ишонган кўзойнакли эса қоқилди, анчагача дам урмади.

Қалингина сочини ён томонга парқ очиб силлиқ тараган барваста киши кутилмаганда кўзойнакли жонига ора қирди, у қизиққонроқ эканми, тоҳ туриб, тоҳ ўтириб узоқ ўсмоқчилади, қадим дунёда санъат мўъжизаси саналган Гириҳ моҳияти зобитлар даври руҳи — мўминликка ундовчи ғамбода оҳанглар ва маҳдудона ниятлар билан қоришиқлигини оппа-осон таърифлади, шу сабабли Гириҳ хуш-хандон умр кечираётган. Қайғу-хасрат нималигини билмайдиган ҳозирги баҳтли авлод шаъни-таъбига сингишмайди, демак, аввало бу туркумнинг ўзи таъмирга муҳтоҷ, уни тубдан ўзгартириш, кун талабига биноан охорлаш фақат яхшилик аломатидир.

Орага қисқагина жимлик чўйкан пайт ҳалиги шивирлаш тағин эшитилди, сўнг шивирлаш нидога айланди: «Бўхтон бандаларига лаззат берадур чоғи, уста!..»

Қатиъятли ҳамфирк топилганидан рагбатланган кўзойнакли ер билан битта бўлиб сочилаёзган ота-болани

бошқатдан саваламоқни мүлжаллаётганда хона соҳиби учи очилган қизил қалам билан столни дўқиллатди.

— Шошиманглар, Гирихи нима ўзи? — деди кейин юмшоққина қилиб. — Лекин, нима бўлганда ҳам, мавҳум ва мужмал нарсага ўхшайди. Тушунмай қолдим, биз нимага тўплангандиз?

Хона ўксиниш аралаш нидодан зириллаб кетгандек туюлди: «Бул инсон не каромат қиласидур, устай оқил?»

Шаксиз, ҳалиги сўров ва баҳо кўзойнакли ҳоврини анча босди, хусусан, мунозара маромидан сира қоникмаётган Маътуф Афзалович ҳузур жойига илиққина тегди, фақат уста Шамсиддин билан Файбиддин, Гирихнинг тобора зўрайиб бораётган ўтли нафасини туйганча, ич-ичларидан зил ейиши.

Сал дадил турмаса бари барҳам топажагига ақли етган уста раҳматли падарини ёдлади, падари Гирихни ҳамиша тавоғ қиласиди, ўғлим, бу нарса одамзод шариат, тарикат босқичларидан ўтиб, маърифатга етишгандан сўнг яратилганки, асосида тугал илм ётади, деб таърифини уйқаштираси эди. Зеро, отаси ҳақ-да! Ахир, «Икки наққош»даги Арслонбек билан Болимбек уни — Гирихни илк бор дунё юзасига олиб чиққанда ҳам фақат илм, зукколик ва заҳмат орқасида намоён бўладиган маъруфу урфон сарф этган эмасми?!

Дабдурустдан ҳалигидай луқма ташлаган хона соҳибига майда-чуйдасигача айтишни, умуман, Гирих унақа эмаслигини тушунтириб қўйишни чамалади, энди турман деганда энг адоқдаги стулда ўтирган калта соқолли қария (у ота-боладан ҳам кечикиб келган чоғи) қимтинибгина сўз сўради.

Хонада ажаб жонланиш рўй берди, кейин оғир жимлик чўқди ва барча нигоҳлар, бири хавотир, бири нописандлик, бири хурмат ифодаланганча, қарияга михланди. Шаштидан қайтган уста Шамсиддин ҳам унга қизиқсиниб қаради. Кўринишдан у етмиш бешларни қоралаган, ёшига нисбатан бақувват ва тетик, қадди деярли расо, энлигина пешонасида икки қатор ингичка ажин, бўртиқ кўзлари тийрак, беғубор чехрасида, умуман, бутун туриш-турмишида заковат соҳибларидагина бўладиган қатъият зохир эди.

— Пўлат Раҳимович, — хайроҳлик билан мурожаат қилди хона соҳиби, — илтимос, юқорироққа ўтсангиз.

Энди уста Шамсиддин ўзидан бир-икки қўйлакни

ортиқ йиртган бу одам номи ўзига танишлігіни билиб бир қадар шошди. Қутылмаган мұғжизага йүллиққандек бир ҳолга тушди. Қаранг-а, таъмир муаммолари соҳасыда жамоатчиликни ўйлашға мажбур этадиган тадқиқоттар үтказған бу олим билан учрашувни тақдир шу қунға қўйған экан-да! Эх-хе, нимасини айтасиз, устахонанинг узоқ йиллар бир меъёрда сокин кечган ҳаёти, ҳалиги тарҳ баҳона, таги-туғи билан қаттиқ силкиниб, бино бўлган ўпқон ўзини ҳам комига торта бошлагач, у мерос ҳақида пайдар-пай мақолалар бостираётган Пўлат Раҳимни неча бор излаб институтга келди, лекин ҳар гал омади чопмади, «Москвада ёки Ленинградда», деган бир хил жавоб билан кифояланиб қайтаверди. Бугун, не баҳтки, дийдор насиб қилди. Лекин нимага бунча севиняпти? Нега бу қадар ҳовлиқиб қолди? Ахир ҳали бу одам ичидә нима борлигини билмайди-ку! Фақат бир нарса аён: Пўлат Раҳим мақолаларида фақат ростни ёзган, ёлғон билан бирга меросга сохта муносабатни савалаган, ҳозир ҳам адашмаса ҳақ ёнини босади. Лекин, қизиқки, бу нарса ўзи томондами ёки Маъруф Афзалович тарафдами?! Буниси коронғи-да!

— Ҳечқиси йўқ, шу ер маъқул, — таклифга кўнмади Пўлат Раҳим. — Мен гапиришга тайёр эмасдим, лекин...

— Сизни фикрингиз зарур, — деди хона соҳиби дудмалроқ.

— Эҳтимол, — у кулимсиради. — Фақат чўчияпман. Мениям алмисоқдан қолган деб афтимга уришса нима деган одам бўламан.

Нечундир бир қадар енгил тортган уста илғади: хона соҳиби чимирилиб қўйди, ҳозиргина чўнтакларига кирган ҳамённи эҳтиётизлик орқасыда йўқотган каби Маъруф Афзалович билан кўзойнакли тундлашди, ўзларини ҳар қанча хотиржамликка уришганига қарамай бошқалар рафторига ҳам турфа хил кўланкалар қўнди.

— Бу йигин бемаврид эмас, мавриди, — тутилин-қираб сўз бошлади Пўлат Раҳим. — Агар у бир натижга бермаса ўзимиз сабабчи!!

— Шусиз ҳам бошоғриқ етарли әди-да! — деди кимдир.

— Бу бўлишда бошоғриқлар тугамайди, — луқма ташлаганин аланглаб қидирди Пўлат Раҳим. — Ғалва

кўп деймиз, лекин ғалвани тугатишга келганда, пинақ бузмаймиз.

— Пинақ эмас, асаб ҳам бузилади, фойдаси йўқ!

— Фойдаси бор, фақат шу фойда сизга тегмаслиги мумкин! — Пўлат Раҳим овозида бир ғашлик сезилди. — Мана шу нарса сизни совутади, шу нарса сизни четлаб юришга мажбур қиласди. Фойдаси тегмагандан кейин жонни қийнаш нима керак?! Унданай эмас-да! Бу йигинда ҳам шундай йўл тутилмаяптими? Муҳокамага қўйилган икки тарҳ эрта икки томонга айрилиб кетади. Обидага қай бири зарб этилиши сизга бефарқ!

— Нега бефарқ бўларкан? — қичқирди қўзойнакли.

— Яна айтаман, бефарқсиз! — қўзойнаклига қарата узиб хитоб қилди асабийлаша бошлаган олим. — Тарихдан кўра сизга бугун нафи тегадиган икир-чикирлар афзал, қадимда кўзга суртилган Гириҳ-Ислими туркумлари, тасвирий безаклар энди сиз учун чўпчак!

— Ҳа, чўпчак!

— Лекин қачонгача?

— Асрлар елиб ўтган, — таъна оҳангода сўзлади қўзойнакли, — лекин сиз бўяб-бежаётган санъат бир жойда депсиниб тураверган!

— Йўқ, ундеймас, сизга ўхшаганлар бир жойда депсинган, — қўзойнаклини қайирди Пўлат Раҳим. — Менга унақа ола қараманг, исботим шуки, кўпчилик ичидаги босинқирайпиз, Гириҳни хомталаш қилмоқчисиз.

— Тушунмадим.

— Унда тошингизни теринг, — кесатди Пўлат Раҳим, салдан сўнг хомушланиб деди: — Сиз ўзингизга муносиб эрмак топинг, оёғимизга мундай билиб-бilmай болта урманг. Шундоқ ҳам таъзиrimизни еганимиз.

— Оббо, биродар, — яна қаламини ишга солди хона соҳиби, — сиз ҳам четлашдингиз-ку!

— Ёки, таъзиrimизни еганимиз ёлгоими? — Пўлат Раҳим қочириққа эътибор бермади, секин уста Шамсиддинга кўз қирини юборди. — Йўқ, рост, бўларимиз бўлган. Фақат сиз гафлатдасиз, аниқроғи, ҳаммамиз гафлатдамиз. Яқинда газетада ким ўқиди, Сурхондарё воҳасида қадимдан қолган ёдгорликлар<sup>1</sup> бузилиб, ўрни

<sup>1</sup> Бронза даврига тегишли Бўйрачи тепалиги, қадимий Чагиниён вилоятининг пойтахти — Будрач шаҳри, X—XV асрда оид Қизилтепа ёдгорлиги, ўрта асрларнинг ноёб гавҳарларидан Ҳонибии обидаси назарда тутилмоқда.

текисланиб, пахта ва тарвуз экишипти. Мана күргулик! Шу қунда-я! Эллик йил бурун тиззадан ва билакдан бутаб әмаклатиб қўйишгани етмас экан-да! Агар ғафлатда бўлмасак ўша пахтасевар, тарвузхўр кимсалар йўлига гов ташлардик, ов, биродар, сен тупроққа қориштириб юборган гиштларга ота-бобонг қўли теккан, инсоф қил, дердик. Йўқ, ҳозирча бу гап камдан-кам одамдан чиқади. Тарих деса жонимиз халқумимизга тиқилади, хәёлимизда нуқул қўлида қилич тутган қонхўр шохлар гавдаланади. Ахир халқ-чи, халқ!? Сиз хўмрайиб, бегонасираб қарайдиган обидаларни жаллодлар ва ҳукмдорлар эмас, кўкси яра, кафти қадоқ халқ яратган-ку! Сиз эскирди деган Гириҳ тириклигини бир амаллаб ўтказган усталар кашфиёти!..

Анча-мунча қизишиб томоги куруқшаган Пўлат Раҳим чамаси нафас ростламоқ ниятида жимиidi, у кўпчилик ҳуши-хаёлида бўлмаган пардани туйқус очиб юборганидан руҳланган уста ҳақдан қочиб қутулмоқчи бўлган банда олло газабига йўлиқишини ўзича муҳокама қиласётганда, Гириҳ бир эмранди, дедики, бул зот холис экан, Арслонбек ила Болимбекни эсламоқ кифоя! «Эй суянган тогим, — пичирлади унга жавобан уста, — камина Арслонбек номига тоабад юкунаман, аммо, ўз йўриғига терс борган Болимбек ёдини қилишдан оғринаман. Айт-чи, жоним қуввати, кўзга тушган чўпни ардоқламоқ жоизми?»

— Сафсата, — деди кўзойнакли жимликни бузиб.

— Эҳтимол, — деди Пўлат Раҳим сал бўшашиб. — Хўш, бу сафсата экан, унда айтинг-чи, Маъруф Афзоловичникида тарҳлар бодраб кўпаяётгани боиси нимада?

— Савол ўринли эмас.

— Жавобни ўринли қилинг, — деди у кўзойнакли бу қадар сурбетлигидан таажжубланиб. — Мен сизга айтсан... тиззамидан, билагимиздан кесилган бўлса, бунинг устига кўзимизга нил тортилган бўлса, натижаси — шунаقا тарҳ-да!

Уста Шамсиддин тавба айтди; сирқираётган шуурида чилпарчин қилинган чолгулар, юлдузлар нури заминга етиб келмаган кеча, майдончани ёритган гулхан, қултўда ичидаган болакай, шахристон билан видолашган муганий, пири комил даражасига кўтарилилган падари ва падари билан масъуд онларни

кечирган дилкаш усталарнинг сиймолари чарх урап эди.

— Чалғидингиз, — гудранди кўзойнакли.

— Мени чалғиганликда айبلاغандан кўра баъзилар ҳамиятига тегинаётганимни эътироф этсангиз тузукроқ бўларди, — деди олим оғриниб. — Ёшим бир жойга етиб қолгани учунми бир жумбоқ мени кўп қийнайди. Биз ўзи ясаган ханжар билан ўз кўксини қиймалаган темирчига ҳам ўхшаймиз. Энди бас-да, ахир!

— Сиз ростдан чалғидингиз, — қовогини ўйди хона соҳиби.

— Ҳозир тугатаман, — деди Пўлат Раҳим ўнгай-сизланиб. — Бугун гап бир иморат тақдиди устида, шундай экан, иккала тарҳ әгалари афти-ангорига қараб эмас, иморат талабидан келиб чиқилгани ҳолда баҳоланиши керак. Маъруф Афзаловични хафа қилишга тўғри келади.

— Бошқа илож йўқ-да, — деди кимдир паст товушда.

— Ўҳ-ҳў, Мирза Обидович, сизмисиз? — киноя аралаш сўради Пўлат Раҳим. — Мени ёқламоқчимисиз? Жуда соз! Ахир лойиха-таъмир институтида казо-казо олимлардансиз.

— Йўғ-э, унчамас.

— Адашмасам сиз анови лойиҳани Маъруф Афзолович институтда от суриб юрган пайтда қўллаворгансиз, — ачиниш билан сўзлади Пўлат Раҳим. — Эсингиздами, мен бир ойдан зиёдроқ касалхонада ётдим, келсам шу гап...

— Бир мен эмас, ҳамма шундай қилган.

— Кечирасиз, Мирза Обидович, агар сиз ва мановилар сур-сур пайтида яшаганларингда салла деганда каллани олиб келган биродарлар тарафида бўлардинглар.

— Унчалик камситманг одамни, — гўлдиради Мирза Обидович.

— Иzzат-нафсингиз баланд жуда, агар шу иззат-нафсни топталаётган нарсаларни қутқаришга жиндай хизмат қилдирганингизда эл сиздан рози эди.

— Анови қолиб менга ёпишаяпсизми энди, а?

— Ҳали айтдим, ҳозир ҳам бузишяпти, сўқирлар ҳам, қўзи очиқлар ҳам басма-басига бузишяпти, сиз шу нокаслар суробини тўғрилаб қўйиш ўрнига, осонига қараб, ўзингиз ўшаларга қўшилиб олгансиз.

— Мен ўзим билан ўзим, унақа...

— Ха, яшанды, сиз ўзингиз билан ўзингиз, — ох уртадек бир алфозда күнди олым. — Эллик йил бурун каллакланган дарахтга бугун құз ёшими, демоқчисиздә, а? Худо ҳақи, сизге ва манови укамга ўшаганларни күрганда ҳүнграб ийғлагим келади, каллак урганлар муродига етган, улар құлларидан болта тутган пайтда келгусида дүнё сиздек мутығларға қолишини бемалол тасаввур қылғанлар.

— Жуда ошириб юбормадингизми?

— Йүқ, Мирза Обидович, борини айтапман.

Йиғин йиғинга ўшамай қолғані учун хона соҳиби юзида муттасил норозилик аксланды, түнгиллашлари фойда бермагандан кейин у даврани ўз ҳолига ташлаб қўйди.

Баҳс нишаби гоҳ чапга, гоҳ ўнгга бурилаётганидан уста Шамсиддин безовта — тархи оёқ ости бўлиб кетишидан, бағрида најот истаб қоврилаётган Гириҳ оғзи-бурни қонга бўялишидан чўчирди; кўпчиликка аён, лекин кўпчиликнинг ўзи жон ҳовучлаб яшириб келаётган яра кўзи очилгани, ситилиб кетганидан бошқалар қатори Маъруф Афзалович билан кўзойнакли тажант — энди бу ёғи қандоқ бўларкин, деган ўйда жимгина жавдирашади.

Жимлик чўзилди. Ранги ўчган Маъруф Афзалович сапчиб турди.

— Сиз одамни қийратдингиз.

— Сиз... қалта ўйламанг, — ношуд шогирдига рўпара бўлган каби Пўлат Раҳим чайналди. — Ота-боланинг яққалангани... хеч нарсамас. Улар бардам, сояларидан қўрқишимайди, сиз эса ўлгудек қўрқасиз, бир вақтлар ер юзини титратган бўрон эрта яна увлаб қолиши мумкин. Жонни асрар керак. Ёдгорлик томдан нари!

— Сиздек кекса одамга хаяжон яратмайди.

— Эҳтимол, — деди Пўлат Раҳим сал инжилиб, — лекин баъзиларга ўхшаб тўнкадек бир жойда ётгандан кўра хаяжон билан ўлган афзал!

Тариқдек титилаёзган Маъруф Афзалович садо бермади.

— Думни буришганини! — тўнгиллади Пўлат Раҳим; сўнг у, тагин анча эзмаланиб, таъмирда илму амал қовушмоги жоизлигини, буни Маъруф Афзалович наза-

ридан соқит қилганини, аксинча, уста Шамсиддин шу қоидага суюнганини тавсиғлади.

— Мен эътиroz билдираман, — деди Маъруф Афзолович.

— Хўш, — деди хона соҳиби, — сиз нима даъвода-сиз?

— Мен даъвоимни неча марталаб айтганман, — тишлари орасидан сўзлади Маъруф Афзолович, — Мақсадимиз ўзи нима? Судралишми? Давлатни чўнтагини қоқлашми?

— Сал ўзингизни босволинг, — кулимсиради хона соҳиби.

— Сиз нимага бунча шама қилдингиз? — Пўлат Раҳимга гинали қаради у. — Агар сиз ҳалол одамларни гангитиб ташлашни зиммангизга олган бўлсангиз, биродар, буни очиқроқ айтинг.

— Мен... унақамас. Аммо бурчимдан тонмайман.

— Фаҳмимча, сиз аллақачон қўмилган кулни тит-килаш билан қўзимизни мошдай очмоқчисиз, — равон сўзлай кетди Маъруф Афзолович. — Хато қиласиз. Ўтганига саловат. Энди маъқули тилни тийиш! Ким сизни унақа бутабди? Хай, бутаса бутагандир, ҳаётда нималар бўлмайди! Энди бу ёғига зийрак бўлайлик, қўли-мизни қўксимииздан узмайлик. Дунёга баумид келганимиз.

— Дарвоқе, — деди Пўлат Раҳим энсаси қотиб.

— Сиз қозонга нима солдингиз, мен бехабарман.

— Тавба қилайми?

— Ихтиёрингиз. — илжайди Маъруф Афзолович. — Васвасани қўйинг-да, менга бир нарсани айтинг, кечаги галванинг бугун тузилган тарҳга нима алоқаси бор!?

— Майли, алоқаси бўлмай қўя қолсин, — қўл силтади Пўлат Раҳим. — Бу билан ҳеч нарса ўзгармайди.

— Йўқ, ўзгаради, буни фақат сиз тушунмайсиз.

— Хўш, қани?..

— Ахир уста Шамсиддин тархи... бизни роса уч аср ортга чекинтиради.

— Уялинг-э, — деди дағаллик билан Пўлат Раҳим, — ахир бу чекиниш эмас, уч аср нарида қолиб йўқолаёзган гўзалликни бугунги кунга қўчириш-ку!

Одатича Маъруф Афзолович калта йўталди.

— Шу жуда керакми? — деди кейин ичини нимадир юлаётганини сездирмай. — Менимча, хозирги кун одами бориб меҳробга сигинмайди, аллақандай бемаъни ёзув-

ларни ўқийман деб (хозирги алифбони зарбласак бошика) бош қотириб ўтирамайди.

— Гап меҳробда ёки ёзувдамас. Гап булар баҳонасида ифода қилинган нозик санъатда.

— Мен ҳақиқий санъатни бошқача ифодалаш тарафдориман.

— Бунинг йўли кўп, лекин ҳозир гап... Шопманг, биродар, сиз тузган тарҳ нимага кафолат беради!?

— Ҳукуматга оғирлик туширмайди.

— Ҳа, шу жойи маъқул, — деб қўйди хона соҳиби.

— Ана, эшигдингизми?

— Эшигдим. Уста Шамсиддин қандай фикрдайкин?

Гириҳ ёниб битаёзган эди, Гириҳга қўшилиб уста Шамсиддин ҳам лагча чўғга айланган, нақ ловуллаб кетишига нимадир етишмай тургандек эди. Номини эшитиб енгил сесканди, сўзлаш имкони туғилганидан севинди, қисқа мулоҳазадан сўнг деди:

— Бизни ишимиз ақчага чақилмайди.

— Ана бу ёгиям бор-да, биродар!

Ҳукм қатъий эди, хеч ким эътиroz билдиrolмади. ҳатто қўзойнакли ҳам столга қапишиб олди. Вазият мунақа жиддийлашгани Маъруф Афзалович учун кутилмаган ҳол эди, шу сабабли у ҳам бўйнига сиртмоқ тушган каби типирчилади, рангида қатра қони қолмади, нихоят, серкиприк кўзларини чақнатганча айтдики, моҳият қиймати янгиликда, неки бор ўзгартириш керак — фикрлаш тарзини ҳам, моддийлик асосини ҳам, шунда руҳимизни чирмаган қоронгилик ўз-ўзидан йўқолади; қўҳна усулдаги таъмир қонимизни совутади холос, ҳатто доно алломамиз айтмоқчи, кўнглимизни шикастлайди, ғамбода оҳангларга гирифтор этади; Тиллакори қиёфасидаги таназзул безаклар кўчиши эмас, ялпи эскириш билан белгиланади, масалан, обида улугворлигига бир эзгинлик сезилади, шу эзгинликни меҳроб билан куфий-шикаста ёзувлар бўртиргандек; келгу-сида обида маърифат уйи бўлиб қолади, ниятни бундай катта қиласак-да, диндорлар саждагохи — меҳробни, қуръони шарифдан олиниб деворларга зарблланган ояту сураларни тиқласак, одамлар башарамизга қараб кулмайдими!?

Сабри битган хона соҳиби столни асабий чертди.

— Мушқул экан, — деди кейин.

Уста сезади: Гириҳ ожизона тўлғанмоқда...

— Энди мен эътиroz билдираман, — деди Пўлат

Раҳим қақшаб. — Маъруф Афзалович, ўзингиз ҳам фаҳмладингизми, сиз кечаги кунни пичоқ қилиб бугун ва эртанинг бўғзига тирадингиз.

— Сизники нуқул шунаقا сафсата.

— Кошки сизники ҳам шунчаки сафсата бўлса!

— Кечаги кун арзимас ахир бугун билан эртанинг олдида.

— Алжинг-а, алжинг! — деди Нўлат Раҳим ўкиниб. — Сизнингча, мозийисиз эрта дориломон! Шундайми? Бунга кафил борми?

— Нима, ҳаётнинг кафиллиги ўрин ўтмайдими?

— Ҳом ўйлабсиз.

— Ҳоҳласак... кафил-да.

— Сиздақаларга худонинг ўзи инсоф берсин.

— Сиз худодан қолманг.

Ахийри яна залвар жимлик чўқди.

Томошабиндан фарқи қолмаган уста Шамсиддин ичида ўзини бўралаб сўка бошлади. Э, ҳар нарса бўлгани яхши-е! Ахир нима жин урдики, мунақа без бўлиб ўтирибди!? Худди, гарангдек гоҳ унга, гоҳ бунга қулоқ тутади, лекин ўзи нафас чиқармайди. Бу ёққа келаётганда не-не мулоҳазаларни ўртага ташламоқни мўлжаллаб қўйган эди-я!

— Хў-ўш, — деди ниҳоят хона соҳиби чўзиб, — бунақада эрталабгача ҳам тугатмаймиз. Қани, лўндасини айтинглар, тарҳнинг қайси бири маъқул?!

— Албатта Маъруф Афзаловичники-да! — қичқирди ҳаммадан аввал қўзойнакли.

— Э-э, ҳовлиқманг-да биродар, — деб тўнгиллади Мирза Обидович.

— Нега ҳовлиқарканман? Арzon, бугунга мос...

— Уста Шамсиддин ҳам гапирсинг, — деди аллаким.

Шундай қилиб, кутилмаганда яна уни эслашди, у сўзлашга, аниқроғи, ўзи ва Гириҳ дардини мановилар олдига худди ойнада акс этгандек қўндаланг қилиб қўйишга мажбурият туйди. Афтода Гириҳ ҳануз пинжиди ожизона тўлганаётган эди, агар унинг мана шу тўлғаниши боисини тавсифлаб берганда ҳам муддаосига бир қадар етишар эди. Йўқ, у бундай қилмади, узоқдан келди, айтдики, одамда имон деган нарса бор, одам одам бўлгандан бери шу нарса ўзи билан, хуллас, жуда эски, лекин эски деб ундан кечмайди, Гириҳ ҳам шунаقا... У шу жойда таққа тўхтади, томогини нимадир

гиппа бўғиб, бошқа гапиришга қўймади. Ҳолдан тойган каби илвиллаб ўтириди.

— Бўлди қиласайлик, — деди хона соҳиби бош чайқаб нари-бери юрганча. — Бир йигинда чигал ечили мас экан, энди бир таклиф, иккала тарҳиям олимлар ихтиёрига топширамиз, бошқатдан ўрганишенин.

— Тўғри таклиф,— деди Мирза Обидович.

— Яна бир истак, — бафуржा давом этди хона соҳиби, — мутасадди Пўлат Раҳимович бўлса, қайси тарҳ танлансанса, ўшани такомилга етказиш чорасини кўрса. Маъқулми?

— Маъқул,— деди Мирза Обидович.

«Бемаврид» йигин шу билан якунланди.

У алағда эди.

Остонада қимтиниб тураркан бирдан Пўлат Раҳимни эслади, алланечук енгил тортиб, у билан икки оғиз бўлса ҳам бақамти сухбатлашгиси келиб орзиқди. Илоҗини топса ичиди уйилиб қолганини унга ипидан-игна-сигача айтади, баҳонада яқиндан танишади, ёрдам сўрайди, Самарқандга таклиф этади.

Аттанг, уста кечикибди, котиба ганича, зарур иши бўлса керак, у ошигич қаёққадир жўнабди. Котиба-олдидан ҳардамхёллик билан узоқлашаркан ҳозирги-на маҳобатли эшикдан судралиб чиқиб ўртада қаққай-ган Маъруф Афзоловичга урилиб кетаёзди. Ранги унгиган бош мутасадди лабига қистириғли сигаретни тутатолмай гарансираф турар, дуч келган одамдан гугурт сўрар, гудранар эди. Тиришиқ пешонасини аста-аста ишқалаётган устага назари тушгач, жимгина ўғирилди, барваста гавдасини стулга ташлаб уфлаб юборди...

## X

Энди гёё бари бир нуқтага жамланди: зардоб ютгани, елиб-юргани, умидлар қилгани... бир илоҳа сеҳри билан шундоққина ловиллаб намоён бўлди. Ажабки, баҳайбат бир нуқта худди ўзини ҳам чирмаганди, у залвар вужудини чирпирак қилиб айлантирас, шиддатли бир тўфон ҳосил қилганча, арш сари юксалиб борарди.

Ногаҳоний бу ҳолат Маъруф Афзоловични қўрганда атиги бир лаҳза ҳукм сурди, чиндан борлиғи, ҳуш-хаёли тушунуксиз бир куч ихтиёрига ўтиб қолди. Қаддини гоз тутмоқчи бўлар, лекин эплолмас — ҳалиги нуқта ичиди нуқтага айланниб борар эди. Ахийри у ҳам қайси-

дир стулга чўкди, безовта нигохини титроқ панжалари билан ёндирилмаган сигарет учини бетўхтов эзгилаётган Матъруф Афзаловичга қадади.

Уста «бемаврид» йигинда анча-мунча таъзирини еса ҳам паст тушмаган бош мутасаддига алланечук раҳми келган каби шунчаки тикилиб турарди, хаёли эса ичидағини тап тортмай тўқкан Пўлат Раҳимга огиб-огиб кетаётган эди. Яратганга шуқр, бу одамни ўзи етказди, ўзи!..

Е фалаксан, кунимиз мутигларга қолган, дедими!?

Бу оламда Гириҳ дардини тушунадиган, ўзи, ўғли ва Расул Үсмондан бўлак, бандай мўмин ҳам бор эканда! Қани, Гириҳни қадим дунёда мавжуд бўлган мўъжизалар қаторига қўшганда уни қаттиқ қучгани, этагини кўзига суртгани имкон бўлсайди! Ажабо, ўша лаҳза Гириҳ ҳам бир хил қувватга энди, яратганга шукrona ўқиди; қадим замонда ўзини кашф этган, ўзини абадийлик йўлига солиб юборган наққошларни эслатди. Бонгийликка ҳижрат қилган Арслонбекка ҳамду санолар бўлсин, лекин Болимбекни бу қадар иззат-икром билан ёдламоққа на ҳожат!? Мана шунга уста пича гашланди, Гириҳга оғирроқ пишанг берди. Қадим шаҳарни безаган Саодат уйи довругини, шу довругнинг аллақайси бир жойида ҳар ким ҳам сезавермайдиган бир кемтик бўлганини, худди шу хусусда ваҳиди замон Арслонбекка ўзи ёна-ёна, ўқина-ўқина сўзлаб берганини ногоҳ эслаган Гириҳ жим қолди. Сукутга кетди, минг йиллик сукутга!

Яшириши ножоиз: бунақа бўлишини уста ўйламаганди, муҳташам ҳонага юрак ҳовучлаб кирганди; умиди липиллаб қолганди, йигинда ола-тасир ёғилиб кетадиган муштлардан лаб-лунжи гупдек шишиб қайтиши шубҳасизлигига эса қатъий имон ўгириб қўйган оди.

Уста дард-армонидан доим боҳабар яшаган, мабодо гап юрақда кетмас-йитмас дод қолдириган кунларга тақалса у сергакланар, жони қалқиб кетар, руҳи тиниқар, ҳар мақомда — хушфөъллик ёки дағаллик билан тортишаверарди. Сал побои ёки нотаниш даврада парда очилса бир йўриқдан чўчирди: ўша кунларда ҳам, ҳозир ҳам жони-жаҳонидан баланд бўлган, лекин ҳар ким ҳам қадрига, маъни-мазасига етавермайдиган нарсаларни худа-бехуда хўрлаб қўйишмасмикин!? Мабодо шунга ҳаддилари сиғса у ўзини қандай тутмоғи, оқу қорага нописандлик қилган кимсаларга не омилни кўндаланг

қилмоги маъқул? Бу саволга жавоб кўкси тубида етти қатланиб ётарди, бир енгил туртки билан у уммон бўлиб отилиб чиқиши тайин эди; йиғинда турфа юмалатма гаплар қалашганда устанинг кўхна яраси неча бор сидирилди, сидирилиб, борлигини нақ дўзах азобига солди, оқибат, неча маротаба ўридан бўғилиб-бувраниб қўзгалди. Йиғин маромини кўтаролмаган Маъруф Афзолович ҳаммани ўтқазиб қўйиб бемалол тут қоқа бошланганда қўлидаги калтагини тортиб олиб ярамагурнинг ўзини бопламоқ ниятида мундай қараса, Пўлат Раҳим нақ гурзи билан унга рўпара турибди.

Билди, Пўлат Раҳим аямайди, гурзисини ўхшатиб ишга солади, токи Гириҳ гамбода оҳанглар билан йўғрилган, дея жағ ураётган, таъмир оламига бегона матакиний маъқуллатиш илинжида ўлиб-тирилиб савдолашаётган банда тариқдайин титилсин! Шу ўй билан у бир овунч туди, ҳа, Пўлат Раҳим бетига зимдан қараб олдида, шашти пасайди, орага тушиб бекорга шаллинг бўлишни эп қўрмади. Мавридини топиб сабр қилиш ҳам оқилликдир, деди ўзича. Лекин, нима, бу билан одам одамни зўрга таниган ур-йиқитда тили яхлаб ўтирганини оқламоқчими!? Тавба, ўзи уни нима жин урди, анов одам ҳалигидай ҳарбу зарб берганда — калтакка гурзини пеш қилганда у ҳам ҳеч қурса бир ол-ҳа деб қўйса бўларди-ку! Бирор жойи мертилмасди, тили узилиб тушмасди. Аксинча иззат-нафси қониқарди, кейин мунақа ич-этини ҳам емасди. Ори бўлса энди Файбиддиннинг юзига ҳам тик қаролмайди. Тили қисик-да! Лекин, қизиқ, у-ку ҳалигидай истихола қилибди, икковлон довлашганда эҳтиётни шарт санаб (ҳай-ҳай, уста-я, шу ҳолга тушибсан-да!) мурдасини панага тортибди, хўш, ерга урса кўкка сапчидиган Файбиддин-чи!? Одатда бунақа тало-тўпни бемалол пулга сотиб оладиган, ҳар қанақа авлиёси-алпи билан бемалол ётиб ёқалашаверадиган ўғли нима учун унақа суринди. Ёки у ҳам... уни-қидақа ўйловни қилдими? Ҳарнечук, шуниси ҳам борки, чорток улоқ ҳавосини олган зол отлар туёғи тагида зир титраётган, чанг-тўзон булут бўлиб самога ўрлаётган маҳалда ўргамчик тойлар сағрисини керолмайди-да!

Кўнглининг бир чеккасида пайдо бўлган қемтикни ҳарчанд тиришмасин, ҳеч бир таскин, ҳеч бир илинж билан тўлғазолмади. Ахир, бағрида, ҳа, бағрида Гириҳ чарх ураётганда... шу аламнок рух хурмати учун ўзидан

тамомила кечса, төг күчгандек күчса — түдани тит-пит қилиб ташласа арзирди. Афсус, у бундай қилолмади, чортокқа ярамади, бошқаларни томошалаш билан кифояланди.

Лекин, инсоғ билан айтса, нүқул бундай қоврилиб ўзини қийнаши ҳам унчалар жоиз әмас, негаки, йигин унинг ранг-рўйига қараб гоҳ ундоқ, гоҳ бундоқ ўзгариб турди; шаксиз, кўп нарсани Гириҳнинг унсиз ниодси ҳал қилди, бу нидо муҳташам хонани қоқ иккига айириб юбораёзди. Шунда у муҳимини айтишга улгурди: Гириҳ имон қадар эскирмаслигини кўрга ҳассадек қилиб қўйди. Шунисига ҳам минг қатла шукр!..

Ана шуларни ғашланиб ўйларкан, қаршисида хушламайгина қулимсираётган Файбиддинга чиндан ҳам тик қараёлмади, ҳорғин нигоҳини секин олиб қочди.

— Бир солишув ўрнийди-да, — ғулдиради Файбиддин қабулхонадан жилишгач.

— Нимага солишмадинг? — ўғлини бир силтаб қўйди уста. — Хўш, мен мияси суюлган чолман, унақага ярамай қопман, сен нимага бундай мўлайдинг?

— Қизиқсиз-а, дада!? — астойдил хафаланди Файбиддин. — Икки-уч ўрнимдан турдим, гапирмоқчи бўлдим, сиз ҳар гал билагимдан ушлаб босиб қўявердингиз. Бир сир борми деб ўйлапман.

Илкис эслади ўғли шаштини синдирганларини...

Асли Файбиддин ўзи билан ўзи эди, Жамила билан орасига тушган совуқчиликни, қизгина саркашлик билан зимзиё кўчага қадам қўймоқни мўлжаллаётганини ўйлаб андухга ботган эди, лиққатини бир жойга тўплагандагина гоҳ қўзойнакли ғулдираши, гоҳ отаси шивирлаши, гоҳ ҳаммадан кейин ташриф буюрган чол жавраши қулоғига чалинар эди. Бир пайт Маъруф Афзолович одатдагидек лойдан маъбуда ясай бошлаганда сергакланди, Жамилани ҳам унутди, қаҳр билан кўп умтилди чортокқа, буни уста саркашликка йўйди, йўлйўлакай миясига гап қуийиб келганига қарамай, ўзи-ку босим ўтиргани, уни ҳам мум тишлашга мажбурлади. Нега ундей қилди, нега? Жавобга ожиз, фақат элас-элас ёдидаки, йигин Пўлат Раҳим шахти билан бўлакча оқимга тушгандан кейин у бутқул ўзгарди, жуда-жуда узоқдан бир амаллаб кўтариб келган зил-замбил юкини кутилмаганда ўша қария ўз гарданига олгандек туюлаверди. Адашмаса шу боис у бор-йўқ равиши-ройишини йўқотди-қўйди.

- Сир? Нима сир? — пүнғиллади уста.
- Чарчабсиз-ку тоза, дада, — деди Гайбиддин юмшаб.
- Илож қанча, — ўгринча қарашиб қилди уста. — Анови одам кетиб қопти-да, бир отамлашмоқчи эдим. Институтга борсак-чи!
- Фақат бугуимас, оёқда зўрга турибсиз.
- Истараси иссиқ одам экан.
- Ҳа, нима, ҳамма Маъруф Афзаловичга ўхшайверадими, — деди Гайбиддин тилини бураб. — Қабулхонада, бари бир мен ҳақман, дегандай қилиб ўтирганини кўргандирсиз.
- Кўрдим. Лекин... шунгаям осонмас.
- Аза очяпсизми?
- Э-э, нимага? Қўйсанг-чи!
- Сиз ҳали уста Иброҳимгаям куясиз.
- Жаврама бола. Сен дунёни кўпам тушунмайсан.
- Айтмадимми? — деди Гайбиддин ҳафсаласи пир бўлиб.
- Раҳматли бобонг шу бандани жонидай суюрди.
- Охири... Истихола экан-да!?
- Кечир, ўғлим, — деб уста бошини эгди.

Орадан нимадир гёё соядек лип этиб ўтди, ўтди-ю, шу билан гурунглари қайтиб унча қовушмади. Ҳориб-чарчаб вокзалга келишди, бош зўрга сиғадиган туйнукчалар олдида аргамчи бўйи чўзилган навбатлардан бирида сабру тоқат билан кута-кута тунги оташаравага чипта олишди. Сал нафас ростлаш, пиёз пўсти бўлиб кетганидан нолиётган қоринларини алдаб қўйиш учун яқинроқдаги ошхонага довдираб-совдираб киришди. Одам гужлигидан бу ерда ҳам анча-мунча кутишга тўгри келди. Бири биридан галати, тўғрироғи, атамаси ўзидан ҳам тансик турфа таомлар уста иштаҳасини қитиқлаш ўрнига, гиппа бўғди. Сал таъбга яқинроқ экан, деб, уста ахийри чучварани танлади, сўнг ийланганда қандоғ бўлса шундайлигича хом қолган хамирни (ичида нима борлиги фақат худога аён) чор-ночор чойнаганча индамай ўғли қочиримини ўйлаб ўтирди.

Э, тавба, йиғиндан орттиргани — иши тағин юришмай гужала бўлгани, тарҳи тақдирини бир ёқли қилиш масаласини тағин ортга суришгани учун куяётгани кам эканми, устига Гайби bemaza ҳалигидай нимғўрда кесатик билан савалади. Жиззакилигини қаранг, салаяса-чи: ов, дадагинам, тутуруғингиз борми, нима са-

бабдан гоҳо шунақа тоб ташлаб турасиз-а, демоқчи бўлди-да! Майли, бунисига қуллуқ, аммо ўша тутуруқдан бу болагинанинг ўзида қанча борийкин!?

Нигоҳи бир нуқтада қотди, кейин кинояли илжайди.

Барака топгур уста, ишқилиб гаранг-паранг эмасми, нимагадир ҳала-хулада бир маъни тагига ета қолмайди. Ёки Файбиддини тушгур ҳаддан зиёда мугам-бирлик қилиб, ақлу ҳушини бойлаб ташлаганми?! Дўп-писини ерга олиб қўйиб мундай мулоҳаза қилиб кўрсии: нима учун бу шерамат олдида гервайиб, минг хил муқом қилиб, уста Иброҳимни ерга уради, агар ҳай-ҳай-ламаса, қаро гўрини ҳам ташпа-тайёр қилиб қўяди. Орқасида эса ўзини тутиши бутқул бошқача: уста Иброҳимга мойил, ҳатто қизи Жамила билан.. апоқ-чапоқ эмиш! Ахир анов қуни кампири қулоғи тагида хира пашшадай шунақа деб гўнгилламадими? Анов қуни эмиш, ахир Муслима анчадан бери Файбиддин қилмини қурақда турмай қолганини, ўша ойимча билан кўча-кўйда етаклашиб, бояғи сабзазорда ҳиринглашиб юрганини жаврайбериб эсдан оғаёзди. Ажабки, у — кар, кампири жон койитиб бижирлашларини атиги бир қур тузукли эшитмайди. Охирги маротаба сайрагандан ҳам қулоғи том битди. Нафас ютиб ўтирди. Кейин зўравонликка ўтди, алжира ма, деб ошкора дўқлади.

Кампири феъли жizzга-биззасигача ўзига аён, бир қилири — ҳамиша подадан олдин чант чиқариб юради. Тағин ўшанақа ҳовлиқмаётирми? Агар бир суйканиш қилган бўлса Файбиддин бунақа тиргилмасди, уятини йиғишириб қўйиб, оламни бузарди. Шундай чарсарса-я! Ҳозир, ўзи нима гап, деб ётиғи билан сўраса-чи! Балки дардини ёриб қолар? Аммо, у чиндан меров, гоҳо мияси айниб, ҳар нарсанинг ўз мавриди борлигини унутади. Аввал, уста, эсон-омон ҳовлига етиб ол, юмшоққина кўрпачага оёқни узатиб ҳордиқни ёз, аччиққина кўк чойдан ичиб каллани пешлагин-да, ана ундан сўнг бемалол ҳол сўр, ичига расо келишириб илмоқ сол, ҳаддинг сифса думни унақа ҳар томонга қилпиллашиб нималигини боплаб қўрсатиб қўй! Инсофи бўлса эрир, уялар, оқибат тузоққа илинар-да!

Уста яна иззат-нафсини оғритган қочиirimни ўйлади: гўё икки оғиз сўз икки дона ўтқир тикан бўлиб нақ бўғзига санчилиб турарди. Чиндан у истихола қилаёт-тирми? Йўғ-а! Агар бунақа тоб ташласа неча йил мис-қоллаб йиққан обрўси елга кетади-я! Омон бўлгур Фай-

би буни зимдан илғаган, илғаган-у, жони ачиб, ҳалиги пичингни юмалоқлаб отган. Зийраклиги тузук, буни-сига шукrona айтади, фақат чарслиги күйдирган. Го-ҳида нўхатча луқмага төғдек қайтимни кўндаланг қи-лиши чатоқ-да!

Шунақа, уста ўғли қони қизиқлигини кўтаролмай овора (у Расул Усмон билан ҳам жиққа-мушт бўлаве-ради), шу одати орқасидан бир-икки ёмон изза еди. жонидан ўтиб кетгандан кейин уни роса ўғирчага сол-ди, бу одатингни ташла, одамни учаворадан чиқарасан. деб ўтинди. Қайда, у ҳеч ён бермади, билганидан той-мади: жойини топса, ёшми-қарими, бари бир, юзинг-кўзинг демай дўўпослайверди. Ярамас кўпдан уста Иброҳимнинг кўзини ўйиш учун пайт пойлади. Бир хуморимни ёзмагунимча тинчимайман, деб неча мар-тараб гингшилади. Агар қизида сал қўнгли бўлса икки дунёдаям у билан бунақа ғашиқмас эди.

Э, айтгандек, Файбининг ҳалиги пичинги... бу бола бир ўқ билан икки кийинни овлабди. Кўпдан иккиси бир мужмал масала теварагида гоҳ ошкор, гоҳ ботин ўра-лашади. Гажир ўғли ўзини доим ҳақ санайди, бир энли паст тушмайди, қисқаси, бир юмуш фақат бир устага ёрлиги, бошқа устага бегоналиги ҳақидаги азалий удум-ни тан олгиси келмайди. Жигибийрон уста тегинилган иморатдан ҳар қандай уста ҳазар қилишини айтса у бепарволик билан пиқирлаб кулади. Энди замона унақа ирим-сиримни кўтармас эмиш!

Ҳали анча-мунча ёўрлигига қарамай ўғли кўп ба-лони билади, кўп чигалларни бемалол чиғириқдан ўтка-за олади, зеро ақлу идрокни жиловлаб қўядиган ҳар қанақа ирим-сиримдан ўзингизни четга тортинг, деб жаврагани бежиз эмас: агар ўша тутумга суюнса, тум-шуғи тагидан нарини кўрмаса шаксиз Тиллакорига бир умр номаҳрам бўлиб қолади, унинг яқинига борол-май армон билан ўтади.

Йўқ, устай басир тагин довдираётир, тагин ўз жони-ни ўзи қилга илаётир, шу боис рўпарасида бўй ростлаб турган ҳақни кўрмайди. Басир-да! Эсини тезроқ йигсин: ахир Тиллакорига раҳматли падаридан кейин дастлаб ўзи оғиз солмовдими!? Ахир ошнаи қадрдони қачон-лардан бери бу обида пойида тупроқ ялаётганини, қо-лаверса, Маъруф Афзаловичга аччиқма-аччик, тавакка-лига, Файбиддин ва Расул Усмон билан бўлак тартибда тарҳ тузишга киришганини биларди-ку!

Узундан-узун оташарава гавжум қўналғасидан хоҳламайгина узилиб чиққанда ҳам, мудраётган ҳорғин шаҳарни ортда қолдирғанча дала зулумотини қоқ ёриб гулдираб бораётганда ҳам қуриб кетгур истиҳола деганини қачон ва қаерда илаштирганини бетиним ўйлар, ўйлови темир излар сингари беадад эди.

— Дада, — эрталаб Самарқанд вокзалида оташаравдан туша-сола автобусга чиқишгандан сўнг Файбиддин хотиржам мурожаат қилди, — сиз уйга бориб дами олинг, мен Регистонда қоламан.

— Ҳозир сенга Регистонда нима бор? Кўпам безбет бўлма! — ўғлини жеркиди уста, автобус жилгандан кейин сал юмшади: — Ҳозир тўппа-тўғри уйга! Чала гапларни бир гаплашиб олайлик.

— Ҳечам безбетлик қилаётганим йўқ, — қовоқ солди Файбиддин. — Кўп қўрқманг, уста Иброҳимга ёмон гапирмайман. Ётиғи билан яна бир огоҳлантираман. Ажрим бўлгунча чидасин.

— Бефойда. Гажирликни қўй, юравер.

Қўнгли алағда уста тавалло қилса ҳам у қўнмади (бу бола ростакамига таёқсираган-ов!), қанча чала гап бўлса ораочди қилгани кечқурун вақт этиб-ортажагини писандалади ва Регистон бекатида лип этиб автобусдан тушди. Тутакиб кетган уста ортидан ҳай-ҳайлаб қолаверди. Ҳовлига етгунча жумла мўмин қатори шу тинмагурига ҳам худодан хотиржамлик ва давлат тилади. Эшикка термилиб ўтирган кампирига эндиғина қўриниш бериб, энка-тинкаси қуриб қайтаётганидан одатдагидек нолиш қилаётганда дарча секин гийқиллаб очилди ва лаблари гезарган Файбиддин кирди.

— Калтақ олиб қувлабди-ёв! — қулимсиради уста.— Агар шундай қилган бўлса қўнглимдаги бўпти!

- Бекор борипман, — хомушланди Файбиддин.
- Нима бўлди, қатти қулоқ?
- Борсам, ошнангиз якка...
- Бу нима деганинг?
- Моховдай сўнпайиб қопти.
- Ие, нега?
- У ёгини шогирдларидан сўрайсиз-да.

Тушмагур Файбиддин хомуш, хит, ҳатто қовоқ-тумшуғи осилган эди, уста Иброҳим ёлғизлиқда қўли ишга бормай у ён-бу ённи айланиб юрганини, мунғайган обидани, худди тилла қўғирчоқ сингари бирор ўғирлаб қочадигандек, тиш-тирноғи билан қўриётганини

сўзларкан нигоҳидан бир дард ёгар эди. У бу қадар хафалигига уста ажабланди, қачонки, синчков эътибор бераркан, овози ҳазинлигига ҳам, башарасида кўпчиған хитлиқда ҳам бир сохталик борлигини илғади: ҳатто бутун туриш-турмишида ўзи тезда етишадиган ҳузурга ишонч, нақд омаддан қувониш, ҳаволаниш аломати ботин эди.

Кечаки ивирсиқ ошхонада ораочди қилмоққа чоғланган, ҳали автобусда ҳам гапни шунга бурган, шийпончада нафас ростлагандан кейин тугал қарорга келган уста ўзини бунақа шайтонликка ураётган ўғли билан сирлашиш осонмаслигини яна бир марта тан олди.

Шийпончада гоҳ ўзидан, гоҳ кампиридан, гоҳ ўғлидан норозиланиб ўтирганда, қаёқдандир Расул Усмон пайдо бўлди, сал чеҳраси ёришган уста уни ёнига ўтқизди, аллакимлар касрига худо қарғаган устахона бу кунда не аҳволдалигини сурштириди. Одатда хушсухан устоз билан эртадан қаро кечгача гурунглашса ҳам чарчамайдиган ёки оғринмайдиган шогирд негадир бу гал сукут сақлади. Ер сузганча хўрсинди, чайналди: «У ёққа бориш осон экан-да! Бормасам қайдан биламан аҳволни?» Алланечук иддао билан қилинган жавобдан нечундир уста мулзам бўлди, айрим шогирдлари четчақага қочиб, ичларида бир дунё ҳасрат билан юришганини ўйлаб ўқинди. Сўнг ёлғон пинак қилди. Худди шу дамда Расул Усмон қовоқ-тумшуғи осилган Файбиддинни чеккага тортди, гоҳ паст, гоҳ баланд товушда унга алланарсаларни узоқ куйманиб тушунтириди. «Масковга учармиш! Нима қиласан энди, алвидо муҳаббатми?» — деган сўзларни элас-элас эшитди уста; галваре Расул Усмон нимага шама қилганини, умуман, орада ўйласа ўйлагудек бир дарди-ҳасрат ётганини у англағандай бўлди. Шунда ҳам у сезгиси ва эътирофини ич-ичида ўзи ўлиб-тирилиб инкор этди. Ажабки, айнан шу нарсани рад этиш унга ҳузур, чексиз бир ҳузур бағишлар, бу ҳол юраги туб-тубида қачонлардир пайдо бўлган ташналикни босаётгандек эди. «Мени қону жонимга ташналикни қилган анови банда — уста Иброҳим, тоабад ундан кечганимни, аъмоли-бадини тангри ҳукмига ҳавола қилганимни билса бўлди, бошқаси керакмас», деган фикрни дилидан кечираркан энди чинаки пинакка кетди. Ҳовлида икки жўра узоқ айланишгани, ботбот тортишиб қолишгани, ниҳоят, дарчадан ғудрана-ғудрана чиқиб кетишганини сезмади.

Бир вақт қараса шийпончада ёлғиз: бу яхши баҳона бўлди.

У кун бўйи бир ёққа қўзғалмади, гоҳ ошхонада, гоҳ даҳлизда, гоҳ айвонда майдада-чуйда юмуш билан кўйманиб тинимсиз жавраган кампирига ҳатто қиё боқмади.

Негадир қоронги тушгани сайин уни аллақандай бир нохушлик чулғайверди, назарида кўпдан бери эътибордан четда қолган бир синоат шу кеч ниҳоят очиладигандек, очилиб, бутун борлигини алгов-далгов қилиб юборадигандек эди.

Мана, кеч ҳам тушди, Гайбиддиндан эса дарак бўлмади, у ўзини кампирига хитлангандек қилиб қўрсатди, асли ичидагинаётган эди. Балки, бу ёлғондир, ўз ёғига ўзи қоврилаётган одамда севинч нима қиласди. Ҳартугул унда шунга яқин бир ҳис хукмрон эди.

Бекўним ўй-фикрлар гирдобига ботган уста деярли туз тотинмади, қоронги гўрингга тезроқ думалагур кампири жонини бетўхтов буровга олавергандан кейин чарчаганини важ қилиб қўзғалди. Жигарранг жавонлар турадиган хонада қамалди. Кейинги вақтларда ўзи ҳам, Гайбиддин ҳам юракка ғулу соладиган бу оламдан узоқлашганига ўқинди. Тавба, нималар юз бераёттири? Мабодо икир-чикирларга ўралашиб қолишмаяптими? Йўқ, унчалик эмасдир, ҳарнечук у орқа-олдига қараб юрибди. Майдалашиб кетишдан худонинг ўзи асрасин. Ҳоли етса-етмаса ўзини ўтга-чўққа ураверади. Тинмасаклиги аллакимларга ёқмайди. Раҳмат-ку насия, ҳеч қурса ўз ҳолига тинч қўйишмайди, нуқул чалишгани чалишган — бир амаллаб йиқитишса-да! Биз бачкана, овдир-шовдир эканмизми, сен биздан баттар ғаламис, яхшиликни юзага чиққани қўймайдиган қитми, дунёни сув босса тўпигига келмайдиган бегам бўлишинг керак, қабилида ногора қоқишади. Агар иззат-нафсинг оғримаса, номусинг ва имконингдан қолган жиндак қўр-қут ҳам тамом битган бўлса, осони шу дегин-да, ўшалар ногорасига жўрлашавер!..

Уста «Иҳсо ал-улум»ни ҳоргин варақлади. Кўпдан у гумбаз ичкарисида мутаносиб ва номутаносиб ўлчамларни қадимги усталар қандай аниқлаганини ўзича чамалар эди, ҳозир бу жумбоқни улуг мутафақкир билан хаёлан кенгашган ҳолда ечаркан мамнун жилмайди. Кейин, хотиралари қаърига чўкканча, «Қирқ ривоят» билан мулоқотга киришди. Не-не бало-қазолар чангалидан эсон-омон ўтиб келган мажмуа! Шўрлик

Қодирбек, мислесиз ситамлар тушган бошига, лекин әзопони астари ичига мана шу гавқарни яшириб қўйганини айтмаган. Агар айтса, ё қийноқни тўхтатишар, ёки баттар таҳқирлашар эди. Қанчалар бедодликни ўткарган-а бу бебақо дунё! Шу хил тумтароқ ўйлар билан уста рисолани шошилмай варақлади, ажаб илҳақлик билан «Икки наққош»га нигоҳ югуртиаркан, улуг мутолаа саодатига етишганидан севинди, узоқ ўқиди, ахийри чарчаб, киприкларига тош бойланди...

Оlam заррин, ажаб бир заррин рангда эди.

Қизиқ, у еру қўқ бунчалар тиниқлигини, бунчалар устивор товланишини, бунчалар осойишталигини илгари билмаган экан. Бундан ҳозир хабар топди, ҳаёт чиндан лазизлигини ўйлай бошлигандага яхлит тилла манзара қаърида, бир олис маконда гумбазли юксак иморат жилоланиб кўринди, у бўшлиқда муаллақ турар, жамийки мавжудотни ўзи сари чорлар, чехраи малоҳати қўхна очунда азал ва абад мавжуд рангларни бир маромда таратар эди. Тамом таажжубда қотган уста тангри назари тушган бу иморат деворига сўйканиш — бир савобдор бўлиш, ланг очиқ нақшинкор эшигидан ичкари кириш — икки савобдор бўлиш нияти билан сафарга отланди. Ранглар ҳар бири бетакрор қиёфага киришини остоңада туриб кузатиш беҳад маҳоқли эди, алҳол, ранглар ўзини ўзи танигани сари бортиқни қамраган жимлик теранлашаётган эди. Уста жон-жаҳди билан илгарига умтиларкан, ногоҳ ҳамма нарса — қуёш, ой, юлдузлар, тунроқ, сув, даражалар жаннатий гўшада қад ростлаган иморат измига тушди. Бу қарамлик юз йил, минг йил чўзилди, ниҳоят, мувозанат бузилди, бир овоз келди, йўқ, у қалдироқ эмасди, шикастагина сас эди, атрофни жимлик қамрагани учун у жаранглаб, ҳа, жаранглаб эшитилди.

«Фарзанд қўнглини билмак — қарзу фарз!»

Рисолаи муаззам — «Қирқ ривоят»ни шундоққина ёнига эҳтиётлаб қўйганини гира-шира эслайди, йўқ, унақамас, фақат руҳи-жони эмас, бутун борлиғини азалга, Саодат уйи жамол очган, Гириҳ қўриқбони — эшик ўз қудратини намойиш этолган фурсатга рўпара айлаган рисолани бағрига босиб олган экан. Худди шу алфозда у қўхна очунда азал ва абад мавжуд жами рангларни ўзига тобе қилган иморат билан дийдорлашиди ва яна қулогига ҳалиги хитоб чалинди.

«Фарзанд қўнглини билмак — қарзу фарз!»

Бу не сиру синоат, бу нидо қаёндан?

Уста, бағрида рисола, теваракка аланглади.

Энди ҳамма нарса шу нидога айланган эди.

Нидо юз йил, минг йил янгради, янграйверди, хаёт надоматларини тинглаб қўникиб қолган, ҳатто ҳар қандай таҳдид, кесатиқ, қаҳру ғазаб замираид ҳам илинж бўлажагига имон ўғирган уста эса миқ этмай тинглади, тинглайверди ва, ахийри билдики, нидо қилаётган — Гириҳ!..

Мувозанат қачон бузилганини эслолмасди, ёдида фақат зар ёғдулар сақланибди, залвар жимлик эса ҳамон юрагини тош каби эзаётгандек эди. Агар бу ҳодисот тўғрисида сўзлашга тўғри келиб қолса, шаксиз, у дафъатан бирор нарса дейиши маҳол эди. Тўғри, ҳаммаси шундоққина кўз ўнгида юз берди, у гўзаллик ғалаёнга келганда олам кичрайиб қолиши, таҳликага тушиши, эшилиб-буралишини шундоққина кўриб турди. Лекин фақат бесаранжомликдан иборат бу узуқ-юлуқ манзара жонига ваҳима солишдан бошқа нимага ҳам арзирди? Ҳалиги нидо, шикаста нидо-чи?

Уста нимагадир (хўш нимага?) астойдил ишонгиси келди, гумон эса хохишига қўймади, ноилож жаланглаб мундай қараса — рисолаи муazzам бағридамас, ёнида, ўртасидан очилганча, яхшиликка қолганда бефарқ, ёмонликка қолганда жидду жаҳд кўргузадиган гардундан гиналаганча, мунгайиб турибди.

Барақа топсин, кимдир бошига ёстиқ қўйибди, чироқни ўчирибди, эшикни зичлаб ёпибди. Хона дим, жимжит, ваҳмга тўла; баланд шифт шундоққина елкасидан босаётгандек, чор тарафдан девор қисиб келаётгандек эди. Фақат пардаси бир чеккага сурилган, жимити юлдузлари пирираётган осмоннинг гиламдайгина жойини акс эттираётган деразагина најжот йўлига ўхшаб чараклаб кетди.

Ақлу ҳушини йиголмай қийналган уста совуқсиради, аста туриб, қўнишиб ўтирди. Беихтиёр рисолаи муazzамни олди, енгил хўрсинганча унга термилди, хаёлига ҳув гавжум майдончани саросимага соглан гулхан бир лаҳза чирмашди. Энди исиб кетди; гўё тутун бўлиб кўкка ўрлаётган эди. Кейин жимлик, кейин зар ёғду ва турфа ранглар қоришуви, кейин... шикаста нидо!

Кеча имиллаб ўтди, назарида кеча ҳаддан ортиқ чўзилиб кетгандек эди. Ахийри кўкда юлдузлар пир-

пираб бир-бир сўнди, эринчоқ тонг ўру қир ошиб келиб најоткор деразадан мўралади. Хона ёришса ҳам у ўзини ўнглолмади: қўз ўнгида гоҳ у, гоҳ бу ранг жимирлар, ёнида мунгайиб ётган рисолаи муazzзам унсиз сўйланар эди.

Эрталаб ранг-рўйини кўрган Муслима оҳ-воҳ қилди.

— Тобингиз қочибди шекилли, дадаси, — деди овози алланечук товланиб; у ела-югурга бирпасда аччиқ-қина угра ошини тайёрлади, иштаҳаси ғиппа бўйилган уста ўзини у ён-бу ёнга ташлаб ундан ярим косагина ичди, сахармардандан қорасини ўчирган ўғлини койиганча, кўрпа-тўшак қилиб ётди.

Ана энди савил кўнглига вахима оралаганини қаранг: ҳали қариликни бўйин олмади, ёруғ дунёда кўрадиганини ҳали кўриб улгурмади, борингки, ҳаётда ҳали қарзи тиқилиб ётибди; қачондан бери раҳматли падарининг ўзи билан кетган армонини ушатиш пайида ғам чекади, қачондан бери тушмагур Ғайби оёғини чатиб қўйишни ният қиласди, лекин ҳозирча на униси, на буниси амалга ошиди. Ана шуларни кўра-била қаҳри қаттол азроил тепасида айланишаётирми? Э-э, парвардигор, наҳотки шу адолатдан? Гулми ёки тиқан — фарқига бормай бирдек қийратадиган фариштангга бир бор тушунтириб айт, жиндай сабр қилсин, ташвишларини битириб олгандан кейин битта жон бўлса тайсалламай осонгина топширади. Ҳозир эса шафқат қилсин, чирқиратиб қўймасин, ҳали бемалол оёқ узатадиган чоғи йўқ, агар шоширадиган бўлса... падарига ўхшаб иккала қўли тепада кетади.

Кеч тушаверди, устани қайгу босаверди.

Туз totмади, рисолаи муazzзамни қўлидан қўймади, толиққан пайтида Ғайдиддини сўради, у ҳали қайтмаганини билиб оғринди, маъюс нигоҳи номаълум нуқтада қотди.

Тақдирига қарийб тан бероётган кампири ҳар гал ўғлини санқилиқда айблаганда ноиложликдан уста куйиб-пишиб унинг тарафини оларди, бирор зарил иш кетидан чопиб юрганини рўкач қиласди. Энди ўзи уни орқаворотдан койиди, кейинги вақтларда у чиндан ҳам кечалари саёқ юришни одат қилганини ичидаги айблади.

Илгари уста ўғлини бошқача тасаввур қиласди, худо ҳақи илгари Ғайдиддин бошқача эди: ўжарлиги ҳатто ўзига ярашарди, худа-бехуда ҳар ёққа чопавер-масди, ётволиб нуқул китоб ўқирди, ниҳоят, факат

таъмир дардида яшамоққа қасдланганини исботлаган қобил ва зукко шогирд эди. Энди, ажабки, бу одатлари тушуниш маҳол бир инжиқлик, айтсанг бирор ишонмайдиган бир лоқайдлик соясида қолиб бораётгандай туюлади.

Кўкси оғирдан оғир бир қалқиди, ёшлиқда одам ҳар хил кўчага бир-бир кириб чиқишини, тез-тез турланиб туришини ўйлади, бу бола ҳам кўп даҳмазалар иззатнафсига ўтиришмаслигини сезди, энди акалари изидан кетиб қолса холим не кечади, деган фикрни миясидан ўтказаркан хонага сиғмай бўғилди.

Шом қоронгуси ёпирилди, хона торайиб қолди, худди кечагига ўхшаб шифт босиб тушадигандек, девор чор тарафдан қисинқирақ келаётгандек туюлди. Факат најжот йўли пардаси суриб қўйилган, юлдузлари пириллай бошлаган осмон бўлакчасини акс эттираётган дераза тарафда эди. Ихтиёrsиз тарзда у ўша ёққа умтилди, лекин қўзлаган мазгилига етолмади: олдини сариқ туманга ўхшаб тилла ёғду тўёди. Ноилоj тўлқин уриб ётган ёғду ичига оралади, оралади, ҳарчанд илгарила масин адогини кўрмади. Юз йил, минг йил юрди, барри бир кўролмади. Тоқати тугаган маҳалда олисдан элас-элас нидо келди.

«Ўғил қўнглини билмак – қарзу фарз!»

Заррин ёғду жунижиккан баданига илиқ-илиқ тегаётганини уста бемалол ҳис этар эди. Ажаб, бир кучга тўлса, бир бемажол эди, шу хил аросат оғушида аста кўзини очди: зимзиё хонада яна якка ўзи, жойда ғужанак бўлиб олган, қайноқ терга ботган, ёстиқда шундай нешонасига тегай-тегай деб турган рисолай муazzзам -- очиқ варақлари худди ўт пуркаётгандек эди.

Ҳар тонг аҳвол шу: дилдираб уйғонади, ёнида рисола...

Иложи қанча, уста сабр қилди, имонига суюнди, бу арш раъийи эканлигидан қатра шубҳаланмай ҳар кеча якка ўзи бу оламдан тамомила ташқарида бўлган, ўз баланд тоғлари ва тубсиз дарёлари билан гувлаб ётадиган оламга гоҳ эмаклаб, гоҳ ўпкасини қўлтиқлаб бориб келаверди. Ҳар гал зар ёғду қоплаган жарликлар ва тўқайларни кезганда ўзидан ўтганини ўзи билди галати оламини залвар жимлик қоплайдиган маҳалдагина янграйдиган ҳалиги нидони эшитавериб тугаёди, нарвардигордан шарманда қилмасликни ўтинди.

Ахийри бир кун кечқурун қавакма-қавак кўршапа-

лакдек биқиниб юрган Ғайбиддинни түмшүгидан илинтириди, дастурхон бошида ўтиргизиб қўйиб, саводга кўмди.

— Очиқроқ сўзланг, дада, — гудранди Ғайбиддин.

— Одам иккюзламачи бўлмаслиги керак, — деди уста совуқ бир оҳангда. — Мени унақасига аврайсан, онангни бунақасига, кўчага чиқиб билганингни қиласан.

— Ҳасратингиздан чанг чиқди-ку тоза.

— Бунақада... бошингни қўшалоқлаш...

— Одамга бошнинг биттасиям оғир.

— Майнавозчилик! Биттасиям оғир эмиш! — пичоқ суюгига етганини ошкоралаб сўзланди уста. — Ов, бола, менга қара, оғирлик қилса нима учун анови билан... Бўларини айт! — уста бирдан жимиди, салдан сўнг маҳзун қиёфада давом этди: — Майли, мен розиман, фақат сен... ҳадеб чайналаверма! Бўлди-да энди, онанг бошқа эшик тагида қачонгача сарғаяди!?

Мана, жангари, гажир, худнисанд йигит аҳволи — у пешонасида тер йилтираб, текис ёноқлари оловланиб, миқ этолмай, ер сузиб ўтириди, «Ўғлим, дардинг шунақа экан, отаси гўрига ҳадеб ғишт қалайверма-да!» — деб уста тўнғилларкан, у ортиқ чидолмай, аста жуфтагини ростлади. Ичи қоврилиб кетаёзди-я! Ахир, неча кундан бери итдек ҳаллослаб нари-бери югуради Жамилани атиги бир мартагина кўриш илинжида, лекин у њеч қаерди йўқ — ё фариштага айланиб осмону фалакка учган, ёки пари бўлиб сув тагига тушган. Ҳали кўнглини отасига очгиси келди (айни мавриди эди-да!), жудаям очгиси келди. Жонида бир бедаво оғриқ бор эди, эҳтимол, ёрилса, шу оғриқдан қутулар эди, ниҳоят, инсофга энгани, қалавани ҳадеб чувалантиравериш охир-оқибат ёруғ дунёдан атай кечиш билан баробарлигини англаған отаси оқ фотиҳага қўл очган, омадини, ўсиб-унишини, ували-жували бўлишини тилаган бўлар эди. Аттанг, у журъат қилолмади, йўғ-а, журъат қилар эди, ҳал қилувчи лаҳзада иккиланишига шу нарса сабаб бўлдики, у ёнда Жамила... ўз тарадди-ташвиши билан машғул эди.

Чол-кампир ғамга ботиб ўтирганда у деразадан мўралади.

— Бугун Пўлат ака келган экан, — деди бўзарганча, хуши товламай. — Сизни сўрабди, бир учрашаркансиз.

— Ким у одам? — ўғли ўзини орқага тортиши билан Муслима чеҳраси ёришган, бир нуқтага тикилиб қол-

ган чолидан қизиқсинаиб сүради, чоли индамаганини ўзича тушуниб, гапни Файбиддинга бурди. — Бу болагина жуда сурбет бўпти, сизниам писанд қилмайди. Илгари мунақа эмасди чоғи?

— Писанд қилмай қаёққа ҳам борарди, — мингирилади уста, хаёли Пўлат Раҳимга оғган эди.— Аммо сенинг гумонингда жон борга ўхшайди. Индамай қолганини сездингми?

— Сездим, кўпдан бери бир нарсани сезаман, — деди ҳовлиқканча Муслима.— Аммо ўғлингиз ҳам ўзингизга тортиб... гажир бўлгани билан икки дунёдаем раъйингизга тик боролмайди. Сиз мақтаган нарса униям қувонтиради, сиз нимани дард билсангиз у ҳам...

— Шопима, кампиршо, сен балосан-ку.

Шундай деркан уста шуурини шикаста нола титратиб ўтди.

— Майли, сиз мени, сочи узун, ақли калта, деб ерланг, — тутилинқиради Муслима, уста бир хил бўлиб кетди. — Лекин қейинги кунларда дилимдан кечган бир хавотирни сездирмасам... тинчимайман. Сиз ўғлим ундей, ўғлим бундай, дейсиз-да, аммо ўзингиз унга фақатгина ташидан қараётгандайсиз. Ичиди бори нима бўлса бўлаверсин.

— Оворагарчилик ёмон-да, — қизаринди уста.

— Баҳонангиз тайёр, — кесатди Муслима, юзида малол жилваланди. — Гайбини кўп ардоқладингиз, бундан тонмайман, фақат... Бўйини бўйингизга шунчаки мослаб қўйгандайсиз-да!

— Ҳеч бўлмаса бўйи отасига тортсин.

— Э, йўқ, мен... айттолмадим истаганимдай.

— Айт истаганингдай...

— Гажирлиги шунчаликки... раъйингизни қули!

— Топган гапингни.

— Агар шундай бўлмаса яширмасди дардини.

— Тушунмадим, — тумтайди уста.

Чиндан Муслима шамасини тушунмадими ёки ўзини шунчаки овсарликка урдими — ўзи ҳам билолмади; жизиллаб турунг бераётган кампиридан безиб; қони қайнаб, бир дамгина роҳат қилгиси келди. Лекин кошки бу истагига етишолса! Аввали кампир жаввашлари бир зум ором бермайди, мабодо жағига суюниб қолган кампиридан қочиб жавонлар турган хонага кирса яна чатоқ — жилди-варағи қуйинки рисолаларга нигоҳи тушиши билан ўзини йўқотади, қачонлардир тун пардаси ўраган

майдончада Улуг сўзни ямлаган ялмоғиз ўзини, ўғлини, бу кунда кўп нарсадан гоғил биродарларини не-не ажойиб мажмуалар дийдоридан абадиян бенасиб айлаганини ўйлаб ўқинади, кейин борлигини насиб этмаган, бир умр насиб этмайдиган мутолаа азоби қамрайди, кейин бу азоб эзилган-титилган танини беҳудуд бўшшиқ ва баланд давонлардан олиб ўтади, охири, зар ёғду қопланган оламга келтириб ташлайди. Кейин шикаста нидо! Э, дариг, бу не кўргилик!?

Ҳали эрта, устига — уйқу қаёқда, Гайбиддинни чақириб Пўлат Раҳим ҳақида у-бу гап сўрамоқчи бўлди. Ҳозир ўғли ғамга ботиб, икки ўт ўртасида бўғилиб ўтирганини ўйлаб айниди. Қолаверса, нимани ҳам сўрарди, бор-йўғи ойнадек равшан: ўша куни «бемаврид» йифинда Пўлат Раҳим чекига оғир юқ тушди. Энди у аччиқ ичакдек чўзилиб кетган даҳмазани бир ёқли қилиши керак. Адашмаса, у Самарқандга шу муддао билан ташриф буюрган, яъни Тиллакорини яна бир бор назардан кечириш, Гириҳ ҳақида тугалроқ тасаввур ҳосил қилиш, қолаверса, шаҳристондаги таниқли уста ва устазодалардан фикр олишни ният қилган. Агар Маъруф Ағзалович кутиб олган бўлса атрофида ўлиб-тирилиб ётгандир. Худо бу бандани уятдан қисган: у меҳмон қўлтиғига сув пуркашдан ҳам тоймайди. Ҳартугул Пўлат Раҳим анойилардан эмас, унинг ялтоқланишига учина қолмас, қайта қуюшқондан чиқадиган бўлса таъзирини едиравар...

Айтгандек, олди-қочди ва хуфия ҳаракатлардан кутилмаган маъно-маза топадиган Расул Үсмон хабарига кўра, Тошкентдан бели майишиб қайтган Маъруф Ағзалович шошилинч равишда юқорига қандайдир хат тайёрлабди, хатда уста Шамсиддиннинг ҳар бир босган қадами, хусусан, бу кун андозасига сигмайдиган тарҳи авра-астар қилинган эмиш...

Мабодо Пўлат Раҳим шу баҳонада келмадимикин?

## XI

Устахонада бир қуйни хиргойи қила-қила берилиб жун пайпоқ тўқиётган котиба қиздан бўлак бир зоғ йўқ эди; у одатича устани бу даргоҳдаги яккаю ягона эпли-уқувли, батартиб, бутунича ташвишга кўмилган ходимадек жиддий қаршилади, кулимсираб қарашида бир иддао сезилди, ҳатто рўпарасида қисиниб-қимтиниб тур-

ган банда етмишни қоралаган чоллигини унугиб ўзича ажабтовур қарашма ҳам қилди.

Котиба ойдайгина, шунга яраша ҳавоси ҳам анчамунча баланд, гоҳо ўзи сезмаган ҳолда тилига эрк бериб қўяр, ёш-ялангга жиззакилик қилишдан ҳам тоймасди. Бу ерга мунтазам қатнагани боис уста унинг азза-базза қочиримлари, тушунуксиз идаоларига бир қадар кўниккан эди, лекин шунга қарамай ҳар гал қўзлари чақнаб турадиган бу қизни кўрганда, э, парвардигор, бу ўзи бор-йўғи бир ожиза бўлса, бу қадар ҳаволаниш учун кучни қаёқдан оларкин, деган ўйловни қилар, сўнг шу дарражада майда гапга борганидан ўзича ижирганар, уялинқирап, тишини-тишига босиб аста жиларди.

Хозир айниқа уста котибанинг минг муқомдаги чапламалар орасидан таниш осон бўлмаган рафторига тоқат қилолмай ёмон оғринди, нима учун келганини қарийб унугиб тезгина изига буриларкан, ингичка таниш овоз жойида тўхтатди.

— Ака меҳмон билан Регистонда.

Анча эпга келиб қолган пайпоқни қўлидан қўймай келиштириб сузилаётган котиба «ака»ни ёқимли ургу билан нақ шамшир дамига айлантирди, аниқроги — у бу сўзни шундай бир энтикиш билан талаффуз қилдики, агар хозир уста ўрнида илиги суюгини туртиб турган қиррикроқ одам бўлганда ҳавас ёки ҳасаддан паққа ёрилиши тайин эди. Гўл устамиз (бу ёшда ановинақалар олдида шундан айирмасин) ипакдек эшилган овозга чап берди, меҳмондан хабар топганига севинар-севин-маслигини билолмай, унга муздек совуқ нигоҳ юборди.

«Хей, устахонадай жойда... лаббуёғ-а!»

Илгари бу даргоҳда эмин-эркин эди, уқувли-уқувсиз усталар қадами аримайдиган оstonага жон-жаҳди билан умтиларди, эрталаб келса гоҳида кечгача қуймаланиб қоларди. Бирор зарур юмуши бўлса-бўлмаса шу ерда ўралашиб юраверарди. Энди... устахонани эсласа бирдан тепа сочи тикка бўлади, ҳаммадан аввал хаёлида юмшоқ ўриндиққа чўккан, телефонда уззу-кун ҳасратлашишдан бўшамайдиган басавлат кимса гавдаланади. Асли устахона илгари ҳам гўр эмасди, Зоҳир маҳмадона ўз хузури эвазига уни деярли майиб қилган эди. Шундай бўлса ҳам у эрталаб албатта хозир бўларди, иш кўзини билмаса ҳам анча дали-гули бўлган Зоҳир билан бемалол масала талашар, унга бор дардини тўкиб соларди. Жигилдонини мойлаб туришдан бўшамаса ҳам ҳар-

тугул у ҳасратини тингларди, сал мундай савоб ишлар қилиш учун ақли ёки кучи етса-етмаса бақириб-чақириб, түполон билан урнаб ётарди. Бунисини эса худо ҳар тарафдан қисган: бекулоқ, бесабр, таянчи — ҳашамдор хона, ўриндик, телефон...

Дунё паст-баландига хотиржам хукм ўқиётган Регистон ҳамишагидек адл: боши узра поёнсиз осмон, ёнверида ҳансираб — минг бир бўлакка бўлинниб, шовқин солиб чопаётган безовтаҳол Ҳаёт, кағтида юлдузлар билан сўйлашган уч обида...

Аршу аъло сийлаган мана шу гўша ёруғ оламга шамолдек келган ва ҷархӣ қажни шамолдек тарқ айлаган падари билан кечирган бир некбин, бир қайгули дамларига абадул-абад гувоҳ эмасми!?

Эсида, у ўн бешда эди, бир кун Шердор пештоқи тагида ҳангомалашиб туришганда муғаний мулла Аҳмад савдоий сифат ҳаллослаб келган, пештоққа қўпол чок солинганини, ёмони — у эрта-индин сўқилиб кетишини бекорчи эл майдалаб чайнаётганини айтиб қўп қайғурган эди. Таъмир ҳоритган падари эзилиб жаврамади, бекорчи элники — бекор, демак билан кифояланди. Мана, ўшандан бери қанча ой, қанча йил тизилишиб ўтди. Пештоқ эса бутун: ўша кезлар зарбланган кошинлар, кеча сайқал берилган каби, қилт этмайди.

Падари панижалари изи Тиллакорида ҳам қолган...

Дунёдаги энг қадрдон кишиси армон, етишмоқ маҳол армон билган иморат қошида қарадорлик ҳисси танини ловуллатди, қўпдан бу ерга келмагани, аниқроғи, келмай қўйгани учун ўзига-ўзи таъна ёғдирди. Нима, бургага аччиқ қилиб кўрпани куйдирмоқчими? Ёки, тарҳни боплабгина тахлаб қўйдим, энди бу ёғи осон қўчаверади, деган хомхаёл билан овунаётгандир-да! Агар мунақа кавагида биқиниб ётаверса... нари ёгини ўйлаш ҳам даҳшат! Ҳеч курса ошинаи қадрдонини, инсофни ўртага кўндаланг қўйиб, тўғри йўлга солмоғи жоиз эди. Афсус, бунга ярамади, аниқроғи, ўзи тобга келишига умид боғлади. Ҳаҳ, нокас, умид боғлади-я! Ахир бу но-тавонлик билан тенглигини биларди-ку!

Уста адашмабди: ўймакорий дарвозадан кирганда ҳовли ўртасида, танаси ғудраша қари тут тагида Маъруф Афзалович билан уста Иброҳим тип-тикка, бири гапини бири маъқуллаб обида авра-астарини ағдарар, во дарифки, обидани бундай камситиш билан не муродлари ҳосил бўлишини англаш маҳол эди.

Пўлат Раҳимни меҳмон демайсиз: суюнчиқлари суғуриб ташланган чорпоя четида омонат қўнган, енги калта кўйлаги, шими, сандали одмигина, чехраси сал хоргин, қарашида бир норозилик қотган; енгил қадам товушини эшитиб у ўгирилди, уста Шамсиддинни кўрғач, сухбатни чала ташлаб, пешвоз юрди.

— Сизни кўргани келсагу, сиз... қора бермасангиз, — ўз ҳазилига яйраб қулди Пўлат Раҳим. — Бу қанақаси? Қариликни баҳоналаб устахонага доримай қўйибсиз?

Азиз меҳмон ҳурматига ёлғондакам илжайди; меҳмон кесатиги аччиқлигидан ташқари ҳақиқатга яқинлигини бир бўшашиб, бир ғашланиб тан олди. Оббо, бу Маъруф Афзалович дегани тог қулаб-нетиб қолса тагида қолишдан чўчиб этак сари йўламайдиган одам, лекин гап етказишга келганда ҳеч ҳақини едирмайди. Дарров араз-ўраз қилиб юрганини чақиб улгурибди. Ў, омон бўлгур-а, каттароқ суюнчига зор экансан-да!

— Камина бурга тепиб... — ғудранди уста Шамсиддин.

- Э-э, узр... Энди тузукмисиз?
- Шукур, суягим енгил.
- Унақа бўшашманг-да, биродар.

Шу маҳалгача қовоғидан қор ёғиб ўтирган меҳмон қулфи-дили очилгани ва устага хайрҳоҳ муомала қилгани ановиларга палахмондан отилган тошдек тегди. Ноўнгай жимлик чўқди, ҳар бири сўз қотишга шошилмас, худди тасодифан учрашиб қолган кишилардек бир-бирларини синовчан қузатишарди.

Уста ўйиндан ноўрин чиқарилган болалардек тумтайган бош мутасадди билан уста Иброҳим калласида нималар ғивирлаётганини ўзича чамалади: шаксиз ҳозир улар гап белига ўхшатиб тепгани учун уни етти пуштигача қолдирмай ёглашаётган эди.

— Уста Шамсиддин, — деди меҳмон жойига бафуржা қўниб, — гап нимадалигини биласиз.

— Ҳа, энди... манов иморат-да.

— Яшанг, — деди меҳмон қониқиши билан. — Эсингиждами, Тошкентдаги йигинда Маъруф Афзалович бир луқма қилувди. Иморат таназзули — ялпи эскиришда, деганди... Кечадан бери яна... Сиз нима дейсиз?

Уста Шамсиддин индамади. Падари таърифини ёдлади: «Ўғлим, булар баҳарнав қурилмаган, арш иродаси билан тикланган. Дунё тургунча туради!» Қулоги остида таниш ва суюмли овоз янграгандек бўлиб у сер-

такланди. Кейин жимгина бошини лиқиллатди. Қизиқ, сохту сүмбати бир умрга чидаса, бу — тан олинса, сал заха еган безаклари бир бақона билан чиқитга чиқарыла, бу — адолатданми!? Ахир тўкилиш — умуман ярамай қолиш дегани эмас-да!

— Мен фикримдан қайтмайман, — деди Маъруф Афзалович.

— Иҳтиёргиз, — ранжигандай бўлди меҳмон.

— Кечадан бери ҷарчагандирсиз, ошна? — илмоқлироқ гап қилди уста Шамсиддин. — Э, қуриб кетсин, худди бошқа ташвиш йўқдек... ёпишиб олганимизни қаранг!

— Биз учун бошқа ташвиш йўқ, — қулди Пўлат Раҳим.

— Тўғри, лекин... сиз шаҳримизда қўноқсиз.

— Э-э, бунақа демайсизми, уста!?! — беихтиёр ўрнидан тўриб кетди у. — Йўқ, қўноқ бўлиб қайга ҳам келибман, ўз шаҳримга-да. Лекин ўзимни қўноқ чоғлаб маза қилиб ётсан ҳам бўларди. Бултурдан қолган иш борми?

— Ҳа, баракалла, бултурдан қолган иш йўқ-да, — деди уста Шамсиддин мужмалроқ қилиб. — Бунақа... арзимайди. Аммо, биродар, сиз камина муддаосини тушунмадингиз.

— Хўш, хўш?

— Раҳматли падарим бир қулол билан қиёматли ошна тутинган эди, — уста Шамсиддин юзи қилт этмай узоқдан гап бошлиди. — Ер юзида у қизиқмаган нарса йўқ эди. Лекин нимага қизиқса, адогига етказмай, ора йўлда қолдириб кетаверарди. Отам қироатхонлигини билганидан сўнг у китобатга ишқ қўйди. Уч ой Шайх Саъдийнинг «Гулистон»ини эрмак қилишиди. Охири бир кун отам ундан қулогига не маъно ёққани, не маъно ёқмаганини сўради. Қулол эснагани, тақсир, биз ўзи қандоғ китоб билан машғулмиз, деб жавоб қилгани ҳамон ёдимда. Сизлар ҳам шу хил жонкуярликдан қилмаётимисиз, деган хавотирдаман.

— Тушунарли, — қаҳ-қаҳ отиб қулди меҳмон, сўнг у ирими учунгина лаблари чети билан илжайиб қўйган Маъруф Афзалович ва уста Иброҳимга қаратадеди: — Боплади-я, оғайнимиз? Тагдан олди, тагдан! Хўш, кейин нима қилди ўша қулолни отангиз?

— Нима қиласарди, — деди пинак бузмай уста Шамсиддин, — сиз бориб қийшиқ қўзаю офтобангизни ясай-

беринг, деб жўнатиб юборди. Шу-шу кулолни амри маъруф кечаларида қайтиб кўрмадим.

— Ҳа, тузук, — деб қўйди меҳмон.

— Чайналган нарсага... мунақа қуйди-пишди ортиқча, — деди сал қизишиброқ уста Шамсиддин. — Бошқа кўп чигал ечилимай тургандан... Кучни нимага сарфлашни билмаймиз-да!

— Сиз ҳақсиз, — ўнгайсизланди меҳмон. — Лекин мен майдада-чуйдагача аниқлашим керак. Чайналган бўлса ҳам...

— Аниқлайсиз. Фақат... сал ўзингизни аянг.

Меҳмон ўзини нима учун ашии кераклигини уста Шамсиддин аниқроқ айтмади, овозида яна бир хил кесатик оҳангি бордек эди, у қўл силтаганча гумбаз эшиги сари йўналаркан, тажанглашгани аниқ сезилди; у хиёл лапанглаб одимлар, ҳаракатида жонсараклик аралаш бир шижиоат мужассам эди. Гурунг эндигина қўр олганига севинаётган меҳмон унинг орқасидан инжилганнамо бирпас қараб турди, делвагайлик ҳар қандай уста зотига хослигини кўнглидан кечирганча, у ҳам секин қўзғалди.

— Узр, меҳмон, хафа бўлмадингизми? — гумбаз саҳнида ўй сураётган уста Шамсиддин изидан шошилмай келган Пўлат Раҳимга қарамай сўзланди. — Камина, гап эгасини топар, қабилида ҳикоя қилдим.

— Аммо бопладингиз.

— Аҳволимиз шунақа, — ёзувлари кўчган меҳробга яқинлашди уста. — Ясаганимиз қийшиқ кўзаю офтоба, лекин нималарга ишқ қўймаймиз.

— Отангизга ўхшаб йўл тутиш керак шекилли.

— Кошки эди. Унда... Кечираисиз, меҳмон, мен шу эскириш деганини хеч тушунмадим, — надомат билан давом этди уста. — Сиз «Шашмақом» чиқит бўлишини ақлингизга сиғдироласизми? Бир ёпишиб ҳам кўришган эди, «Шашмақом» ҳали бор, ёпишганлар... Э-э, билмадим!

— Маъруф Афзалович «Шашмақом»ни эшитади деб ўйлайсизми?

— У бошқасини ҳам эшитмайди.

— Жа нари борса ҳалиги кулол қулоги билан...

— Ҳа, яшанг, — деди уста очилиб. — Ўзи бўлганича бўлган, таъбига ўтирганини қиласди, шу... бошқаниям йўлдан ургани чатоқ-да!

— Тоифаси шунақа чоги.

— Уста Иброҳимни десангиз... бориниям...

- Даражтнинг бўшини қурт ейди.
- Энди Гириҳга осилиб олган.
- Аммо сиз қайшишибсиз.

Уста қизаринди: меҳмон юз-хотир қилаётгандек эди.

— Биродари азиз, — деди у анчадан кейин салмоқлаб, — мен бўларини қўрдим, на ўзимни, на хукумат чўнтагини ўйладим, қайрганим фақат шу — иморат ва Гириҳ!

- Сиз Тиллакорини ҳар гиштигача биларкансиз.
- Бунга одам умри етмас-ов.
- Эринмай ўрганибсиз.
- Эринсак... яхшимас. Бардош ҳам ордай гап.
- Бу мусулмончиликка яқин нарса. Шундайми?
- Мусулмончилик ўз ўйлига. Одам бир-бираига суянаст...

- Маслаҳатли тўн тор келмайди, демоқчисиз-да?
- Баракалло сизга.

Гурунг ниҳоясиздек эди. Ҳали анча руҳи чўқкан меҳмон энди чиндан яйради, устанинг завқдан кўпчиган юзидан нигоҳ узолмай қолди, қачонки баҳс Гириҳга кўчгандан кейин у қизиши, жиддийроқ тортиша бошлиди, шифтнинг юқори нуқтасида бирлашадиган чизиqlар ва безаклар уйғунлигини топиш таъмирдаги бирламчи шарт эканлигини узундан узун баён қилди.

Гумбаз ичкарисида ярим соатдан зиёдроқ бўлишди, лекин на Маъруф Афзолович, на уста Иброҳим яқинларига йўлагани, тарҳни амал билан қовуштирмоқ савоб эканлиги, Гириҳ шаҳодат берувчи тушунчалар инсон шуурини тоабад ёритажаги борасида қизғин кечган сұхбатларига аралашгани журъат этди; улар чорпояннинг икки томонида бир-бирларига тескари қараб жимгина ўтиришар эди.

— Меҳмон, яхшики сиз чўнтақка ёпишмайсиз, — деб қулимсиради уста Шамсиддин; бу вақтда улар Тиллакори дарвозасидан чиқиб, пештоқ тагидаги зинадан битта-битта тушиб, майдон ўртаси томон илгарилашаётган эди. — Агар сиз ҳам шунақа қилсангиз... тамом эди.

— У нарса бозорда керак-да.

— Агар ақча кучда тенгсиз бўлса... — тутилди уста. — Ташибшишимиз фақат шу савил билан битадиган бўлсади Улугбек мадрасаси пештоқи, ана, унақа кўйга тушмасди.

— Ҳа-я, шуни айтинг.

— Уста Ибродим бирорвга гапини бермайди,— ҳар

нечук тийбат қилмаяпманми, деган ўйдан уста ўзича ижирганди; ҳали ўзларини валломат чөглаган икки бирдек одам гумбаз қанотларидаги ҳужраларда таъмир олатасир бошланганини, шогирдлар ва ёрдамчилар биринсирин ҳар ёқда жұнаб қолғач, ноилож ими-жим ташлаб қўйилганини меҳмондан яширишганини сезган эди, ҳозир шуларни оқизмай-томизмай сўзламоқчи бўлди, тагин қайларни ўйлаб тийилди. — Ўзини жамики обидага устун санайди. Елкасини тортса шўрликлар гупиллаб йиқиладигандек!..

— Ўҳ-хў!

— Лекин бу ёқда...

— Мен ҳам сизга бир нақл айтами, уста? — қовоги осилиб тушган уста Шамсиддин бош иргаб розилик бергандан кейин у давом этди: — Бир кекса бօғбон бор экан, отангиз кулол билан ошна тутинганидек, у чўлда мол боқадиган бир подачи билан дўстлашибди. Авжи баҳорда подачи меҳмон бўлиб келибди. Бօғбон чуқур қазиб, эндинга кўчат ўтқазмоқчи бўлиб турган экан, ишини қўйиб меҳмонга қарабди, ёлғиз бўлгани учун бозорлик қилиб келгани жўнабди. Келиб қараса, ниҳоллар ўтқазилган эмиш, фақат не кўз билан кўрсингни, ниҳоллар томири бир чеккада хирмон бўлиб уйилиб турганмиш. «Меҳмон, нима иш қилдингиз?» — деб сўрабди мезбон зўрга ўзини босиб. «Сиз бօғбонликни ҳар ким ҳам эпламайди, дердингиз. Ана, қаранг, туппа-тузук эпладим, — деб жавоб қилибди меҳмон хотиржам. — Чўпларнинг ортиқча жойини болта билан чопиб олдим. Қумон қайнатасиз». Ана бунақаси ҳам бўлади. Қалай, маъқулми?

Энди уста мириқиб қулди.

— Сизам тагдан олдингиз-ов.

— Бир мавриди келди-да.

— Дунёда нақл кўп, лекин одамни нақл билан одам қилиш қийин экан, — деди қисқа жимлиқдан кейин уста. — Ўспиринлигига уста Иброҳим раҳматли падарим уста Жамшиддинга шогирд эди. Э, унинг қулоғига нималарни қўймаган!

— Уста Жамшиддин дейсизми? — бехос меҳмон чехраси нурланди. — Сиз ўша одам фарзандими? Раҳматли кўп оқибатли эди-да?

— Сиз отамни танирмидингиз?

— Таниганда-чи! Мен у кезларда бўйдоқ йигитча

эдим, гурунг олгани Тошкентдай жойдан оташаравага осилиб келардим.

- Илгари сиз билан учрашган эканмиз-да!
- Балки, — эслашга тириши мөхмон.
- Лекин келди-кетди күп эди.
- Тирик қомус эди отангиз.
- Рост, — деб қўйди уста ҳорғин.
- Бир куни мени амакингиз мулла Ражаб билан танишитирди. Кутубхонасига бошлаб кирганда, ишонасизми, оғзим ланг очилиб қолган.

Кечаги куни билан учрашгандек уста безовталанди.

— Унда отам сизни қози Раҳмон қироатхонасига ҳам олиб борган, — деди уста ичи ғулуланиб. — Амри маъруф кечалари аксар шу икки даргоҳда бўлар эди.

— Шубҳасиз, — гоҳ у, гоҳ бу иморатга нигоҳ отиб илгарилаётган Пўлат Раҳим тагин ҳам очилди. — Ҳар иккала кутубхона дунёдаги жами илму фунунга тегишли рисолалар билан лиқ тўла эди.

- Тўғри, — пичирлади уста.
- Эслаганда... уйқунгиз қочар.
- Телбасифат кўйга тушаман.
- Ғўр эканмиз-да, ғўр!
- Секин айтасизми?

— Шундай қилинглар дейишса... Тавба! Даҳшатку, қайсиdir аждодимиз битган асар ер юзидан йўқолиб кетса, биз ўша асар бўлган-бўлмаганини ҳатто билмасак!

Майдонни иккинчи бор айланишаётган эди; мөхмон шу гапни айтгач, уста бир қоқингандай бўлди, тасаввуррида эса гўё чақмоқ чақди: гавжум майдонча, ўртада — ялмоғиз, у — оч, сарғимтири соchlари ҳавога чирмашади, ганжина табаррукдан бино қилинган уюмни бир бошидан ямламай ютади, ютаберади, ниҳоят, «Иҳсо ал-улум»га, «Чор дарвеш»га, «Зарбулмасал»га, «Ҳикмат»га, «Қирқ ривоят»га... гал етади. Э, дариг, бу не кўргилик? Жаҳолатнинг-ку кўзи йўқ экан, маърифатнинг кўзи қаёқда қолди!

Бари ўша майдончада юз берган, барини ўша майдончада юқтирган: худди ситамгар дардни дунё бино бўлгандан бери инқиллаб-синқиллаб кўтариб юрибди, шуниси тайинки, то дунё бор экан, ундан бир лаҳза айрилмайди, айрила олмайди.

- Қанчадан қанчаси асқотарди, — деди ниҳоят уста.
- Ҳа-да, — деди узиб мөхмон. — Ҳунарингиз қа-

дим, лекин тугал шархи қани!? Кошинпазлиқдаги но-  
чорлик нимадан? Бу йўриқдаги битиклар бугун қўли-  
мизда йўқлигидан! Ҳар жойда чанг босиб ётганларига  
эса тишимиз ўтмайди!..

«Ночорлик!..»

Жонга қадар ўтириб кетган кечаги доғлар нималиги-  
ни бир қадар ойдинлаштирадиган бу сўзни эшитиш уста  
учун беҳудуд малол эди; алланечук таҳқиромуз оҳанги  
бўлган бу сўз устани неча йилдан бери мулзам қиласи,  
қонини қайнатади, ўз ёғига қоврилиб ётаверишидан бў-  
лак илож-имкони йўқлигини бот-бот эслатади, эслатаве-  
ради. Бу қадар мўминлиги, бу қадар нотавонлиги, бу қа-  
дар бўйни қисиқлиги... боиси нимага ва қайга бориб та-  
қалишини ўйлаганда юраги орқасига тортиб-тортиб ке-  
тади.

— Сиз билан яқиндан танишганимдан хурсандман,-  
жимликни бузди меҳмон. — Хоҳлаган пайтда тортинмай  
боринг. Институт эшиги сизга доим очиқ.

— Қуллук.

— Тарҳга келсак... сизникини танлармиз, — деди у  
чайналиб, гумон аралаш. — Ирими учун у ер-бу ерига  
тегинамиз. Ундан тузукроғини икки дунёдаям қилиб  
беролмаймиз.

— Нима учун?

— Сабабини ҳозиргина чайнашдик.

Уста ичида ўнғайсизланди: «Ҳа-я, ночорлик, ялпи-  
сига!...»

— Келбатингиз отага тортганини қаранг, — у синч-  
ков тикилди устага. — Ўйлаб кўрсам, у киши вафот  
қилганда мен чет элда эканман.

— Падарим анов ёқдан қайтгач ўнгарилмади.

— Нозик одам... осонми!?

— Кипригига ноҳақ гард қўнса уч кунгача ўзини  
ўнгаролмасди.

— Териб-териб қийратишган-а, нокаслар!

— Улар етти нафар эди, — овози бир хил товланга-  
нидан уста сира ўзи истамайдиган, зарурат туғилганда-  
гина зўраки эсга оладиган мавзу билан тўқингани анг-  
лашилди. — «Етти пайғамбар» деб эл иззатларди, шу  
иззат... ўзларига бало бўлди. Иримига бировини қолди-  
ришса-чи!..

— Энди бугун қўли амалга, ақли илмга келишади-  
ган уста йўқ деб нолиймиз.

Меҳмон ўғил бола тап қилди.

Қаранг-а, ахир бундан бир неча кун мұқаддам ўзи уста Фаттоқ билан шу бобда бўғилиб талашмовдими, уста Фаттоқ хунар куни ақли қосир, диди чўлта бандаларга қолганини айтиб ўксинмаганиди!?

— Падарингиз қорнигамас, қадрига йигларди.

— Балли сизга! — деди уста ғилтиллаб.

— Бир кун келсам, Регистон жимжит, пашша учмайди. У ёқ-бу ёқа тумшук тиқдим. Қайсиdir ҳужрадан бир дўппили йигит пилдираб чиқди, саволимга жавоб беролмай, нуқул ҳиқиллайди, кўзларида жовиллаган ёш!..

Энди уста буткул амин: бу одам ёшига ярашасини кўрган, кенгга кенгу, торга тор дунёни қай жиҳатдан қадрлашни билади, агар шундай бўлмаганда замон аллақачон унутган, тирикчилик билан овора одамлар эса атайлаб эсламайдиган кунларга бундайин куюнмас эди.

— Ҳовлингиздан ҳеч кимни тополмадим, — аста чаккасини ушлади Пўлат Раҳим. — Мулла Ражабникига борсам, йиғи-сиғи, кутубхона ағдар-тўнтар! Охири Ҳикматуллани сўроқладим. Мусоғирхонага етган жойимда... тахта бўпман!

Кўксини симиллатган оғриқ киприклариға қалқимаслиги учун ўзини қаттиқликка урган уста хаёлида олис кун — Регистон бесаранжомлиги, минораларнинг чўзила-чўзила қулранг бўшлиққа қўшилиб кетган кўланкалари, безаклардан кўчган товланишлар, ниҳоят, гирдатрофдан кундуз шуъласини қувлаган коронфиликка кириб йўқолган падари ва... соявони энли бир хил қора шляпа, бир хил қора чарм куртка кийган кишилар элас-элас гавдаланди.

— Ўша кунларни эсласам ўзимни ёлғиз ва нотавон сезаман, — деди меҳмон аста.

— Мен-чи!? Азоб-а! — тишлари орасидан пицирлади уста. — Лекин, кошки, бир нарса ўзгарса!

Шаксиз, иккалови ҳам кўринмас бир гирдобга ғарқ, бу гирдоб гўё вужудларини у қиргоқдан бу қиргоққа пў-как каби келтириб ураётган эди; зеро кечмишнинг ҳар ким ҳам туймайдиган замзамали кулфати сароб янглиғ намоён бўлганда туриб бериш, бирор лаҳза ортиқча чидаш маҳол эди. Шу боис сухбат беихтиёр Регистон аҳволотига кўчганда баравар енгил тортишди.

Нетонг, Регистон бу кунда анчайин гарибона қиёфа олгани борасида ҳам фикрлари деярли бир жойдан чиқди; анча-мунча қизишган меҳмон бу атрофда қурилган

күпгина иморатлар (серсавлат ресторани-ку қўяверинг) майдон шаънига ярашмаслигини таъкидлаганда уста уни бажонидил маъқуллади.

— Э-э, меҳмон, таъмир деса бўшашамиз, қисинамиз, — очиқ таъна қилди уста. — Манавинаقا савиллардан эса бор буд-шудимизни аямаймиз. Шуям сарфлаш бўлдими? Доналаб йигсанг-да, қоплаб сочсанг! Агар имонимтга ишонсангиз, бу ўртада мен фақат Шоирлар боғига харжланган пулга ачинмайман.

— Айтганча, яхши эсга солдингиз-да, — деди меҳмон тезда чехраси ўзгариб. — Бир кўрайлик шу боғни. Очилганда ишим чиқиб келолмагандим.

— Асли униям жа қойил қилишгани йўқ, — уста овозида таассуф сезилди. — Ҳазрат Навоий ёнига, мармарга зўрга тухумдан чиққан ҳаваскорлар номини... ўйиб ёзишган. Бовурни кенг қилишганини қаранг.

Оғизга тушган bog Улуғбек мадрасаси ортида уч йилча бурун яхши ният билан барпо қилинган: унча кенг эмас, кичиккина думалоқ оролчага ўхшайди, одам кирса йўқолиб кетадиган йўлаклари ва хилватлари йўқ, диққатни тортадиган жойи — бу гўшада етти иқлимга маълуму машҳур сўз сеҳргарлари мис ва тош қиёфага кириб йигилиб олишгани ва эрта-кеч кафтдек текис саҳнда унсиз назмгўйлик тинмаслиги...

Қизғимтир қум тўкилган йўлка кираверишдаги тўрт бахши ҳайкали ёнига етаклаб келди: улар худди тирик, бемалол чордона қуришган, шаҳду шижаотлари баланд, бехудуд меҳрга лойиқ дўмбиралари ана-мана куйлаб юборадигандек, қўнгиллари тубида қайнаб-тошаётган эҳтирослари кўзларидан ёлқин бўлиб сочилаётгандек эди.

Сайроқи дўмбиралардан нигоҳ узолмай қолган уста шууридан эрта-кеч уйда, чойхонада, маъракада доим мусиқа назокатидан баҳс очадиган, чолғуси нола қилганда ўзи ҳам унга қўшилиб суву селоб бўлиб ўтирадиган банда сиймоси чарх уриб ўтди.

Уста меҳмонни ўз ихтиёрига қолдириб ичкарилади.

Бог катта эмас, лекин саф катта, атроф сокиндай, лекин бу сокинлик аро абадий безовта бир руҳ учиб юрар эди. Буни у саф бошида турган маликул-калом Мир

<sup>1</sup> Буюк ҳалқ оқинлари — Эргаш Жуманбулбул ўғли, Фозил Йўлдош ўғли, Ислом шоир Назар ўғли, Муҳаммадкул Жонмурод ўғли Пўлкан.

Алишер Навоий ҳайкалчаси қошида тўхтаган чоқ теран ҳис этди. Эскирган, лекин қадамда бир баҳонада янгила-ниб турадиган кўргиликдан Ҳазрат бехабар, йўғ-а, нега бехабар бўлсин, ахир бу валийсифат зот ер юзида не воқеа содир бўлса, хоҳ камоли, хоҳ заволида, тоабад во-қиғф эмасми?! Зоро, шундай экан, ўша кўз кўриб, қулоқ эшитмаган ҳодисотдан бери арвоҳи чирқираб ётгандир. Диidi ўткир, нафаси тоза Ҳазрат шукуҳ, шавкат, назокат ва маъно берган Улуг сўзни оч ялмоғиз тамом ямлаганими?! Наҳотки?! Э, дариг, не қун эди ўша кун? Жавоб топиш мушқул бу саволга, борингки, бу дунёда дард кўпу даво кам экан-да!

Одам сийрак эди. Нега тўда-тўда келишмайди?

Хув йўлка бўйлаб шошилишмоқда. Қаёққа?

Қаёққа бўларди, овсар, тирикчилик отлиғ серғалва дунёгада?!

Қизиқ, бунинг нимасига ўқинади, ахир бу ҳол ўкинишга, жонини қийнашга арзимайди, негаки, азал-абад шу — майда-чуйда нарсалар илинжида кўйманиб юрадиган одамлар доим муҳимидан чалғишида, табиат ёки оқил бир банда яратиб қўйган мўъжиза ёнидан эрта-кеч қатнашади, лекин шу нарса мўъжиза эканлигини мутлақо пайқашмайди. Бу боғ-ку яқинда пайдо бўлган, не-не асрлар билан юзлашган анови улугсифат обидалар ёнидан ҳам одамлар эрта-кеч бепарво ўтиб-қайтишида, бир қиё боқиб қўйишдан эринишида, жа хушлари товлаганда, нима бўпти, савлат тўкиб турса турибди-да, мен ўз юмушимдан қолмай, дўконга эртароқ бориб навбат олай, дея ичиди ёзғирганча қадамларини тезлатишади. Эҳ, устай нобакор, қани айтчи, бедаво иллат — лоқайдлик ажоддларинг қонини қачон тарқ этади?! Мундай ўйлаб кўргин, хув ўшанда, қози Раҳмон мусофирихонаси олдида базми-жамшид қурганлар ва оч ялмоғиз оғзига ганжинаи муборак доналарини битта-битта тиққанлар дўконга эртароқ бориб навбат олишга шошадиганлар тоифасидан эмасми?!

Боғ ҳувиллаб ётганига ўзи гуноҳкордек эди.

Шуни ўйларкан тўрда кимдир аста-аста йиғлади.

Ажабсинган уста Ҳазрат чехрасидан нигоҳини олиб тезгина ўгирилди ва сокин чайқалаётган навдалар оралиғидан тахта ўриндиқда кафтларини юзига босиб ўтирган атлас кўйлакли қизни, қиз қаршисида турволиб нималарнидир бетўхтов уқтираётган Гайбиддинни кўрди.

Дунёдаги энг яқин кишиниси билан муюмала қилаёт-ган каби Файбиддин хайрхоҳ сўзлар, кўзлари юмшоққина порлар, изтиробини зўр-базўр ютаётгани англашилар, ҳар замонда чаккаларидан селдек қуийлаётган қайноқ терини ғижим рўмолчаси билан сидирар эди.

Шаксиз, уста боғдаги бу учрашув қандай рўй берганидан бехабар (шафқатли шоир йўлини қилган эди), у ўзича, Жамила аллақачон олис манзилга етиб боргандир, ҳар ҳолда қизгина кўп балони фаҳмлар экан, деган таскин билан юрар, энди бу ёғи осон кўчишидан умидвор эди.

Олис манзил, аллакимларга ваҳимали туюлаётган бўлса-да, Жамила учун арзимас, элак учун қўшиникига чиққандай гап: бор буд-шуди солингган жомадон билан кечқурун учоққа чиқади, хаёлга ҳам тезлик қиласиган учоқ зув ичида уни манзилига етказиб қўяди. Лекин, афтидан, ҳозир у парвоз олдида турганини атай эсламаётгандек, умуман, ўз қадру қарорини, бу дунёда мавжудлигини, тириклиқ паноҳи бўлган замину замонини унутгандек эди. Шу боис тамоман гангиган йигит жаврашларини деярли эшитмаётган эди. Сўлғин ҳолати ажаб бир интиҳога ишора: ҳар нарса тугаб битади, ҳар нарса ўз якунини ўзи қиласди. Маҳзун нигоҳлардан шу маънени уққан йигит бир лаҳза тек қотди, мен ҳеч қандай интиҳони кўрмаяпман, кўришни истамайман, деди ичида ва бошқатдан дийдиёсини бошлади. Қиёфасига беҳудуд ўкинч балқиганда қиз аста қўзгалди, енгил ҳаракат қилган бўлса-да, нозик тани чайқалиб кетди, ўзини мажбуrlагандек қилиб унга тик қарди: «Сизни анча илгари тушунган эдим, тушунмасам... нима бўларди?! Хайр!..» Сўнг у йўлка бўйлаб, ер сузганча, зипиллаб кетди, зумда боғдан чиқиб, одамлар орасида йўқолди.

Тўқмоқ теккан каби уста мажколсизланди: худди қиз ўзига қаратса таъна ёғдиргандек, ўзини бир умр унугтилмайдиган маломатга кўмиб кетгандек эди. Ажаб, ён-вери энди баттар ҳувиллаб қолди, боққа, йўқ, ёруг дунёга сифмай қоврилаётган ўғлига ҳамдард бўлолмаслигини ўйлаб янайм эзилди, унинг ёнига боришини ҳам, бормаслигини ҳам билмай жавдираб тураверди.

Регистон сарҳадида мангут ўрнашган боғда ҳокимлик қилаётган Ҳазрат, мис сиймода, ичи сидирилаётган уста

билин не хусусдадир талашмоқ ахдини күлгандек, анов йигит күнглини босиб-янчиб ўтганини бетига солиб. түрт кунлик умрини шунчаки ўзини алдаб, икир-чикирлар билан овутиб ўтказаётганини масхаралаб кулаётгандек бир алфозда эди.

Богдан қачон узилганини эслолмайды, назарида ҳамма нарса бир-бири билан қоришиб-чирмашиб кеттган эди; ҳуши-фикри күпроқ Жамилада бўлиб қолди, қизгининг боғдаги ҳолати кўз ўнгидан бир дақиқа ҳам кетмади, аёвсиз таънаси қулоги тагида янграйверди. Афтидан, Гайбиддин ҳам нуқул ўша қуни боғда кечган мuloқот ҳақида ўйларди, ўғли жимжит ҳовлида нигоҳини бир нуқтага қадаб ўтирганини кўрганда юраги эзилади, лекин яқинига боролмайди, унга аввалгидек ҳамсуҳбат бўйлмайди.

Орадан чамаси уч ҳафталар ўтгач, таниш почтачи чол Жамиладан хат келтирди. Бўсағада гарантсираб турган Гайбиддинга уста жавдираб тикилди, мактубни ўқиши ўзига бир умр насиб этмаслигини ҳис этаркан, хаёлида Арслонбек даргоҳига ҳасса суюниб кириб келган мўйса-фид дарвеш жонланар эди...

## ХОТИМА

Пўлат Раҳим Тиллакорини яна уч кун ўрганди, шувакт ичиди кўпроқ Гириҳ мазмуни ва тузилиши билан қизиқди, тўртинчи қуни учақда Тошкентга қайтди. У айтган муҳлат нари-берисида уста айрим жузъий тузатишлар киритилган тарҳни олди.

Роппа-роса етти кун иши юришмади, бойловга ташланган асов тулпордек бир жойда депсинди, депсинаверди, ётган-тургандан ўзини нуқул маза-матрасиз воқеалар ичиди кўради, кимдир панада турволиб нималарни диртаъна қилаётгандек туюлади. Хаёлини эса битта-битта босиб Регистон заминидан узилаётган, энди бу гўшага қайтмоги бир умрга гумон бўлган уста Иброҳимнинг заҳил қиёфаси тарқ этмасди.

Уста ғаш: худди бир жазога тортилган...

Шундай қилиб, у ўзича қайғуга ботиб, наҳотки Гириҳни ранжитдим, наҳотки обида паноҳида яшайдиган руҳларни беҳуда безовта қилдим, деган мулҳазага бориб сабрсизланяётгандан, саккизинчи қуни кечаси раҳматли падари тушига кирди. Падари ўша-ўша — бош-

охир оқ либосда, соқоли ҳам оппок, фақат туриш-турмисши аллатовур ҳорғин, пешонаси тиришган, чўккан кўзларида койиниш, гина; у гапирмас эмиш, йўргасига олиб олислаб борармиш, ғира-шира туман ичидаги элас-элас кўринаётган ёдгорликка қаратада учти тугилган оқ рўмолчали билан имо-ишоралар қиласмиш...

Шаксиз уста туши таъбиридан севинмади. Жами ташвиши-таҳликасини йигиштириб қўйиб якшанба куни худойи берди: қўй сўйди, ош дамлади, чор тарафдан одам чақирди. Жамоа айни жам бўлган маҳалда маҳалла мулласи орқали падари ва бобо-бобокалонлари арвоҳига хатми-қуръон бағишлиди. Маъракадан кейин тани-жонида бир енгиллик туйди, шууридаги ланжлик ҳам йўқолгандай бўлди, кўнглига азалдан қадрдан тотли истаклар қуийилиб келди. Шу кечада мириқиб ухлади, эрталаб тиниқиб уйғонди, кампири азондаёқ хозирлаган ноңуштага қарамай, Файбиддинни ёнига олиб Регистон сари ошиқди.

Энди у ўз дунёсига келган эди.

Ҳамма нарсаси шу дунёда эди.

Энди азалдан фақат шу гўша табиатига хос теран жимликини ҳар замонда кошин йўнаётган ёки ганч қораётган иноқ ва қобил шогирдлар ўзаро қилган эҳтиёткорона гурунглар бузади.

Уста палапонларини илгаритдан назокатли бўлишга ундалан, шангиллаб сўзлашмоқ, бирламчи, одобдан эмаслигини, иккиласи, хаёлни қочириб, фикрни майиб қилишини яхшилаб англатган. Айни чокда ўзи бу қоидадан жиндай четга бурилмайди. Хусусан олло назари ўзига қаратилганда — хоҳ оғир, хоҳ енгил ишга шўнғиганда, сира дағаллашмайди, аршдаги чароғбон нигоҳни туйгунча ўзини осойишта тутади, етмиш икки бўғинини бўш қўяди, шундай кезда мабодо бирор шогирди билиб-бильмай гуноҳ қилиб қўйганда ҳам авзойи бузилмайди, аксинча, тағин ҳам мулойимлашади, хотиржам муомала қиласмиш, босинки йўриги тагида ётган нозик ишорани зийрак шогирд осонгина илғайди.

Шифт олий нуқтаси қашф этилгандан кейин зарблов сокин суръат билан қўйига силжиди, зарблов тўсиқлардан кўпроқ зар кўмагида ошиб ўтди ва айланана-эгик залварли деворни ёқалаганча ажаб бўшлиқ сарҳадини эслатадиган шарафа белбог томон энаверди.

Ҳаво сийрак, бўёқ ҳиди анқиган...

Ичкари табиатига уста тамомила кўниkkан, ҳатто

бүйек-ацетон иси қоришик ҳавосиз ҳеч нарсанинг қизиги йўқдек, нафаси қайтса, кўнгли айниса ҳузур қилаётган-дек эди; чарчаши билмасди, дуч келган юмушга урнай-верарди, зар қоғозни gox Fайбиддин, gox Расул Усмон билан бирга нақшлар эди.

Кейинги вақтларда у сал бошқачароқ: юмшоқлиги бир таранглик, вазминлиги бир тажанглик билан алмашинган, нечундир эрта-кеч ичини бир шубҳа кемиради — ҳануз имони ёнида жон сақлаётган Гириҳ унсиз инграётганини, таъмирда нелардир сакталиги, нелардир қиёмига етмай қолаётганидан огоҳ этиб тўлганаётганини туйганда айниқса ҳоли ёмонлашар, таги-тути йўқ бу ташвишни ўғли ва шогирдларига топширгиси, қийноқлардан бира-тўла қутулгиси, тенг-тўши қатори тинчгина яшагиси келар эди.

Игна билан қудуқ қазимоқдан ҳам оғир бўлган зарварақ зарбовидан кейин уста ҳар кеч, одатича, ҳавоза поясида ҳорғин ўтирап, жийда баргидек митти безаклар ҳосил қилаётган бетакрор манзара ўзи ва шогирдлари жидди-жаҳди билан яралаётганига ишонқирамай кулимсираб эди.

Олий нуқтада бирлашган тугун қуий сари тилла сочтолими янглиғ шаршара ҳосил қилиб кўпириб тушган, бошқа хил бўёкли, бошқа хил қиёфали тўлқинвор чизиклар билан қўшилганча бир майдалашиб, бир йириклишиб, тарам-тарам ёйилиб кетган эди.

Юқори олам саналмиш Гириҳни қуий олам меҳвари бўлган меҳроб билан бирлаштириб, тенгсиз фазлу камол, нозик уйғунлик адо этадиган шарафа йўсенинаги белбоққа қанча зар кетажагини бир кеч чамалаб ўтирганда кимдир енгил қадамлар билан шип-шин юриб ичкари кирди. Беихтиёр у эгилиб қаради ва ивирсиқ саҳнада паришон турган, оппоқ соқоли кўқсини қоплаган, оппоқ яктаги, симоби салласи қадди-бастига ярашган мўйсафидни кўрди.

Ташқарини аллақачон қоронгилик чулғаган, осмон кулранг тусда, ўзаро туташ гир айланга ҳужралар гардишида мусичалар жой талашиб беозор кукулашар эди. Ичкари ёруғ, шундоқ бўсаға тепасида, михга омонат илинган юзлик чироқ лангиллаб нур сочади. Фақат баланд шифтга мослаб қурилган ҳавоза саҳнга олачалпак соя ташлаган, нур теккан жойлар ёғ суртилган каби ялтиарди. Ҳалиги одам gox сояда, gox ёруғда тимирскиларди, нур билан соя тўқинувидан тугилган мавжда

йўқолиб ҳам қоларди. Боқиши бегубор, хайрхоҳ, бу нияти холислигидан далолат эди.

Шарафага тилла суви юргизиш учун қунт ва дид қанчалар зарурлигини бир қур ўйларкан уста тағин эгилди. Нечундир бадани живирлади. Энди мўйсафид шундай жойда турардики, ўнг елкаси сояда, чали ёруғда, ўзи эса ҳавоза оралигидан юксакка — тарам-тарам зар толаларга нафас ютиб тикилаётган эди; чақнаётган нигоҳларида қувонч, дард, армон билан қоришиқ бир ҳайрат бор эди. Бу муҳлисми ёки адашиб кириб қолган йўловчими, деди ичиди уста ва азбаройи қизиқиши зўрлигидан тезгина пастлади. Саҳнга қадам босиб ҳафсаласи пир бўлди: мўйсафид жойида йўқ эди.

Ҳовли ним қоронги, остонада — ичкаридан пар-пар тўкилаётган ойдинда Файбиддин, Расул Усмон ва яна уч-тўрт шогирд ғуж бўлиб олган, Тиллакорини Ялангтўшбий Баҳодир қурганми ёки қизи — ундан кейин Самарқандда ҳокимлик қилган оқила ва тадбиркор малика Моҳбонуми, деган масала устида қизишиб баҳс қилишаётган эди.

Баҳайбат табақаларига ингичка ислими нақшлар чекилган эшиқдан ранг-қути учеб елвагай чиқиб келган устозни кўрган ҳамоно ёшлар одоб сақлаб шовқин солишдан тийилишди, айримлари саросималаниб секин нари жилишди.

Одатига филоф равишда анча-мунча ҳовлиқкан уста индамай теваракка аланглади, уймалашган шогирдларидан бўлак ҳеч қимни кўрмай, таажжубда тек қотди; гўё ҳозиргина жаннатмонанд бир боғдан чиққан, чиққан-у, беш-ён қадам босар-босмас қақроқ чўли-бедиёнга йўлиққандек бир аҳволда эди.

Уста бегона бир товушда гудранди. Ҳамиша босиқвазмин устозини илгари ҳеч қачон бунақа елвагай, бунақа озорли қиёфада учратмаган Расул Усмон, ҳеч нарсага тушунмадим, деган маънода елка учирди. Нечундир ранжиган Файбиддин эса хўмрайди.

— Ким экан ўша?

— Бир мўйсафид, — деди уста хижолатомуз, — истараси иссиқ, қачондир кўргандайман.

— Бир ойча бурун кўргансиз,—сал дагаллашди Гайбиддин. — Тенада Гириҳ билан мастонавор гурунглashingib, бир ночор чизиққа тилла суви едириб, ўз ҳунарингизга ўзингиз маҳлиё бўлиб ўтирганингизда у келган,

сизни олқышлаган, бўшашманг, кўпи кетиб, ози қолди, деган, кейин ғойиб бўлган.

— Ҳа, ҳа, рост!

Аёвсиз чертилган тордек овози титраб кетган уста Шамсиддин мунгайди, ўғли пичингини оғир олиб ер сузди, гўё ораларидан бир соя лип этиб ўтдики, буни фақат ёлғиз у илғади.

— Ўғлим, сен...

— Қўйинг, дада, — Гайбиддин чорпоя томон жилди.

Шу лаҳза кўнглига бир шубҳа оралади, лекин ғалати бир куч шубҳасини чил-парчин қилиб ташлади ва у ҳеч қанака дали-девона эмаслиги, ақл-ҳуши илгари қандай бўлса ҳозир ҳам шундайлигига ўзини ўзи зўр бериб ишонтиришга киришди, иззат-нафсини бемаъни хижо-латпазликдан баланд тутишга уринаркан, бехос ҳалиги куч ташқари дарвоза сари қарашга ундади. Жон томиригача симиллаб кетган уста хайрхоҳлик билан бўйсунди ва шундоқцина чиқиш бўсағасидан сал берироқда, равоқ тагида мўйсағидни кўриб қолди.

Ҳовлида қоронғилик анча қуюқлашган эди, лекин ҳалиги лаҳзада бўсаға тараф бир ёришди, мўйсағид чеҳрасида аксланган меҳр ва ҳайрат шундоқ кўзга ташланди, ҳатто либоси, симоби салласи нимдошгина товланди. Ажабки, нуроний чеҳрасида бир боқишаёқ илғаб олиш маҳол бўлган тагин кўпдан-кўп маъно зоҳир эди, у бутун зехнини ишга солиб энг муҳимини — одамзод катта савобга етишмоқ билан бу дунёдаги энг катта қарзидан қутулажаги ҳақидаги ифодани уқди ва... беҳудуд шукронга билан олга умтилди.

Масофа қисқа эди, лекин бу қисқа масофа бир-бирига интиқ, бир-бирига ташна танларни ачомлаштиришга улгурмади. Ҳалиги шукrona билан у ҳаллослаб бораркан оралиқ кенгайганини, поёнсизлик юзага келганини сезди. Афтидан бу поёнсизлик мўйсағидга ҳам хуш эмасди, мўйсағид норозилиги ялт ёнган нигоҳида аксланди, у қўлида пайдо бўлиб колган учи тугик оқ рўмол-часини оҳистагина бир-икки силкиди, сўнг борлиги зув эриди, олдинда турган беҳисоб оқшомлардан бирини осуда қаршилаётган обида жисми-жонига сингиб кетди...